





DUKE  
UNIVERSITY  
LIBRARY

*Treasure Room*







IOSEPHI  
ANCHIETÆ  
SOCIETATIS IESV  
SACERDOTIS IN  
BRASILIA DEFUNCTI  
VITA.

EX IIS, QUÆ DE EO  
PETRVS ROTERIGIVS SOCIETATIS  
IESV Praefes Prouincialis in Brasilia quatuor libris  
Lusitanico idiomate collegit, aliisque monumentis fide  
dignis.

A SEBASTIANO BERETARIO  
ex eadem Societate descripta.

PRODIT NVNC PRIMVM.

*colly. Al. Cerca de*




142642

LVGDVNI,

Sumptibus Horatij Cardon.

M. DC. XVII.

Cum Priuilegio Regis.



7/16/39  
Budget  
Ferry  
Rip

E  
TREASURER ROOM

1342A

off. of the  
Census



Admodum R. in Christo Patri,

P. MVTIO VITELLESÇO,  
PRÆPOSITO GENERALI  
SOCIETATIS IESV.

*HORATIUS CARDON S.*

**H** VNC codicem ab homi-  
ne tuæ Societatis, deque  
eiusdem corporis viri  
opinione sanctitatis ma-  
g. si rebus præclare gestis cum elabo-  
ratum esse cognoscerem, non tamen  
veritus sum tot nominibus iam tuum,  
eundem Lugduno Romam tibi mu-  
neris specie delegare. Integer, fateor,  
& membris omnibus absolutus abs te  
in meas venit manus; sed nudus, &  
viatoris in morem cute nonnihil de-  
colorata venit. Nunc posteaquam

pulverem ipsius ex ore deterfimus, ac  
nativum colorem ex arte suppleui-  
mus, eundem quidem re ipsa, & tuum  
tibi sistimus: sed alium quoque, ac  
nostrum, quàm expositionis quidpiam  
per nos ipsi adiectum est, tibi fidenter  
inscribimus. Grata quidem per se fu-  
tura erat Societatis hominibus, ac ex-  
ternis libelli huius lectio: sed tanto ac-  
cidet iucundior, cùm ex tui nominis  
inscriptione tacita incidet legentium  
oculis, animisq; prædicatio argu-  
menti, atque lectionis. Vale.

---

Mutius Vitellescus, Societatis  
Iesu Præpositus Ge-  
neralis.

**C**V M Vitam P. Josephi Anchiætæ,  
à P. Sebastiano Beretario, Societa-  
tis nostræ Socerdote scriptam, tres eius-  
dem Societatis Theologi, quibus id com-  
missum fuit, recognouerint, & in lucem  
edi posse probauerint, facultatem concedi-  
mus, ut typis mandetur, si ita iis, ad quos  
pertinet, videbitur. In cuius rei fidem has  
litteras manu nostra subscriptas, & sigillo  
nostro munitas dedimus Romæ 22. Fe-  
bruarij 1616.

M V T I V S V I T E L L E S C V S.



---

## APPROBATIO.

**I**OANNES CLAVDIUS DEVILLE in  
sacra Theologia Magister in Sancti Pauli hu-  
iusce Ciuitatis Canonicus, Librorum Censor  
in hac Lugdunensi Diœcesi designatus: fidem  
facimus nos hunc librum cui inscriptio est, *Vita*  
*P. Iosephi Anchieta Societatis IESV, autore Se-*  
*bastiano Beretario ex eadem Societate*, vidisse; ni-  
hilque Catholicæ, & Romanæ fidei contrarium  
in eo inuenisse. Lugduni apud Sanctum Pau-  
lum 5. Idus Octobr. MDCXVI.

DEVILLE.

---


*R. D. D. Thomæ de Meschatin la Faye*  
*huius libri imprimendi facultas.*

**T**HOMAS DE MESCHATIN LA FAYE,  
Comes, Canonicus, & Camerarius Eccle-  
siæ Lugdunensis, & Vicarius Generalis in Ar-  
chiepiscopatu Lugdunensi: Opus inscriptum,  
*Vita P. Iosephi Anchieta Societatis IESV, autore*  
*Sebastiano Beretario ex eadem Societate*, vt in lucem  
edatur facultatem concedo. Lugduni 5. Idus  
Octobr. 1666.

MESCHATIN LA FAYE.

---

*Summa Privilegij à Christianissi-  
mo Galliarum Rege  
concessi.*

 **V**DOVICI XIII. Galliae  
& Nauarrae Regis aucto-  
ritate sancitum est, atque  
patentibus Literis cau-  
tum, ne quis in Regno suo, aliisve  
locis ditioni suę subiectis, intra pro-  
ximos annos decem, à die impres-  
sionis primæ inchoandos, ac nu-  
merandos excudat, vendat, excudē-  
dum, vendendūque quouis mo-  
do, & ratione conetur librum, qui  
inscribitur, *Vita P. Iosephi Anchietae  
Societatis IESV, authore Sebastiano Bere-  
tario ex eadem Societate*, præter H O-  
RATIVM CARDON Bibliopo-  
lam Lugdunensem: aut illos, quibus  
ipse met concesserit. Prohibitum in-  
super

super eâdem authoritate Regiâ omnibus suis subditis, eundem librum extra Regni sui limites imprimendum curare, vel quempiam, vbi cûque fuerit, ad id agendum impellere, ac instigare sine consensu dicti HORATII CARDON. Idq; omne sub confiscatione librorum, aliisque poenis originali Diplomate contra delinquentes expressis. Datum Turonibus die 19. April. 1616.

*De mandato Regis.*

Signatum.

BERRVYER.

VITA





VITÆ  
IOSEPHI ANCHIETÆ  
E SOCIETATE IESV  
LIBER PRIMVS.

**E**ST diuina in homines Bonitas  
cùm in rebus omnibus laudan-  
da, tum in electis vndique vo-  
candis admiratione digna pro-  
uidentia : quippe non, vt olim,  
gentem vnã, & ex ea paucos, quos suo affla-  
ret Spiritu, delegit ; sed ex omnibus gentibus,  
ac nationibus, quantumuis moribus inter se,  
institutisq; diuersis, nullo discrimine, quos  
sibi æterno suæ mentis decreto destinauit, tan-  
quam ab vtero matris segregatos, ad suum  
cultum venerationemq; traducit : atque ita  
humana consilia temperat, occasionibus mo-  
deratur, euenta disponit ; vt, vel ipsis insciis,  
quos trahit, ad diuinam ipsius perficiendam  
voluntatem omnia conspirent ; nouaque suis  
iniecta mente, eos à rerum humanarum stu-  
dio abductos, ad noua consilia, noua instituta,  
nouaque consuetanda studia conuertat : tan-

támque in iis cum aliis eiusdem consilij sociis animorum facit coniunctionem, tantam voluntatum, morum, studiorúmque consensionem, vt homines longè diuersis ingeniis, diuersísque assueri consuetudinibus, iisdem videantur nati parentibus, & sub iisdem tectis, eadem in familia vnà educati; vt Prophetæ illud ad nostrum vsum in Dei laudẽ vertere possimus: *Benedictus Deus, qui congregat nos de nationibus.* Mitto alias Religiosorum virorum familias, quę multis eximia sanctitate, & doctrina viris semper floruerunt, & florent adhuc: nostrę Societatis initia si repetatur, quis vnquã futurum putasset, vt homo ex abdita Cantabria à bello, & armis derepẽtẽ abstractus, tam lectos ex diuersis gẽtibus, Gallis, Hispanis, Lusitanis, Germanis, Belgis, Italis, támq; vnanimes duces tanta consensione, tantóque animi ardore ad Christi vexilla conuocaret, ab iisq; numerosa irẽ ex omnib. gentibus generosorum militum agmina profecta, ad senescentẽ iam Religionis cultum in pristinã iuuentutem renouandum; veterẽq; abolita superstitione, in incultã Ethnicorum barbariẽ Christianæ veritatis lucem inuehendã, vniuersas orbis terrę partes tã breui tẽpore peragraret? nimirum id ille Spiritus operatur, qui *habitare facit vnus moris in domo.* Idẽ ipse diuinus Spiritus Iosephum Anchiætã nostrę susceptę narrationis argumẽtum, delegit, in quem vberem donorum suorum copiam effunderet, eumq; è terris à nostra consuetudine,

tudine, no stróq; cultu remotissimis, extra nostri orbis fines, in media Oceani vastitate constitutis, ex insulis vix antiquitati notis, per multa interualla sæculorum ne notis quidem nisi nomine; & in quas vix Euangelij lucem illatam esse existimares, quasi Abrahamũ ex Vr Chaldeorum eductum, in terras lætiores, vberioresque, atque adeò in ipsos, vt ita dicã, Religionis Elysios lætissimum germen transplātaret. Nempe *non est* (vt inquit Petrus) *personarum acceptor Deus: sed in omni gente, qui timet eũ, & operatur iustitiam, acceptus est illi.*

Fuit hic multis, magnisq; donis à Deo cumulatus; multaque, & admiratione digna diuinã in eo virtutẽ inesse declararunt. Quę, quanquã in priuatis fermè rebus, & familiaribus perspecta sunt, noli m tamen ea quisquã putet minoris esse facienda, quàm si in magnis rebus, arduisq; negotiis, in clara multarum gentium luce, & magnorum Regum ac procerum oculis gesta essent. Non enim minùs in rebus paruis, quã in magnis diuinæ sunt artes admirandę: neue minorum sunt indicia virtutum, quæ in tenuibus, quàm quæ in præclaris rebus, & illustribus miracula eueniũt: tamq; diuinum fuit formicę minutissimę bestiolę, quàm elephãti pecudũ omnium maximę animã, & vitã indidisse. Tam fuit Helias admirandus cùm farinę pugillũ, & lecythum olei mulieris viduę perennẽ fecit, quàm cũ igne de cœlo euocato quinquagenarios duces à Rege mislos momẽto cũ

suis cohortibus absumpsit. Nec quia triēnalis illa siccitas, quæ ad illius iussu Regnum afflixit Israëlis, aut clara de Baalis Prophetis victoria illum fecere ad homines clariorem, idcirco minùs in eo diuinũ fuit, cùm in fuga solus per deuia, & solitudines subcinericia placentula recreatus, quadraginta dierum nusquam consistens mensus est iter. Hæc idcirco attigi, ne quis multarum rerum narratione, quæ naturæ excedunt facultatem, solóque diuino Numine gestæ sunt; quoniam in rebus tenuibus, priuatosque inter homines eluxere, existimet diuinam virtutem rerum nostrarum magnitudine, paruitatēve metiendam esse; spiritalēque sanctimoniam, diuinique Spiritus dona, quanta quæque sint, nostra æstimatione, nostris que momentis expendenda. Diuinā in sublimibus, humilibusve rebus suam potētiā declarare, diuini solius est iudicij: multique sancti viri, & in magnis, & in paruis rebus, vt res tulit, aut prophetica prænotione, aut diuino miraculo gratiam sibi diuinitus collatā declararunt: neque tamen rerum discrimina, momentāve diuini Spiritus, gratiæve momenta in rebus illis, gradusque discreuere. Quāquam si quis in Iosephi rebus accuratē introspiciat, rerum splendore intelliget nō semper desiderari. Sed siue parua, siue magna illa sint, habeāt ipsa suam quæque admirationem, vitæ innocentiam, religiosam obseruantiam, integram obediētiam, in rebus asperis fortē patientiam, despi-

despicientiam, & abiectionem sui, perennem  
 suarum appetitionū victoriam, atque ipsam,  
 vnde tantarum virtutum harmonia existerat,  
 perpetuam cum Deo coniunctionē. Hæc nul-  
 lo discrimine, quæ omnes imitemur, propo-  
 nēda esse duximus. Nā cū multis, præclarisq;  
 dotibus, & à natura, & à doctrinæ studiis esset  
 instructus, eas ita ad hominum vtilitatem cō-  
 ferebat, vt nunquā à diuina cogitāda præsentia  
 auocaretur; semperq; quidquid ageret, loque-  
 retur, cogitaret, Deum sibi præsentem intue-  
 retur; vt verè cum Helia illud posset vsurpare.  
*Vixit Dominus, in cuius cōspectu ego sto hodie.* Inde  
 tanta illi cum Deo familiaritas, tanta in preci-  
 bus assiduitas, & tam pura animi simplicitas,  
 tantum studium, tamque indefessus labor in  
 hominum salute procuranda, vt eum nullo  
 vnquam tempore aut laboris, aut valetudinis  
 incommodum, aut periculorum magnitudo  
 ab opera indigentibus præstanda retardaret.  
 Ex eodem fonte illud etiam hauriebat, vt &  
 multa diuinitus cognosceret; & supra humanū  
 modū multis difficultatibus occurreret; qui-  
 bus rebus diuina Bonitas famuli sibi obsequē-  
 tissimi virtutem illustrabat. Atque vtinam, vt  
 multa ab ipso gesta post mortem certis aucto-  
 ribus comperta, studiosè collecta sunt; sic  
 quandiu ille vixit, artes, quibus ille ad iuuan-  
 dos homines vteretur, eos ad pietatem exci-  
 tarer, motus animi componeret, solitudi-  
 nes sedaret, mœrore oppressos erigeret; stu-

dium denique perfectæ virtutis omnium animis infereret, tum in familiaritate, conuictûq; illius responsa, colloquutiones, monita, hortationes notata essent, patientia in iniuriis, securitas animi in periculis, magnitudo in aduersis, fortitudo in arduis, in turbulētis æquanimitas, quarum rerum copiam suppeditat sanctorum virorum vita. Quàm multa alia, præter ea quæ scripta sunt, præclara virtutum exempla, quàm multa vitæ præcepta, salutaria monita, consiliâque nunc in lucem proferrentur, quæ sempiterna obruta obliuione delitescunt? Nam etsi virtutem ipsam, atque intimam cum Deo coniunctionem, qualis, quantâque sit, memoria literarum assequi non potest; tamen, vt pictores spiritum & vitam arte non exprimunt, corporum verò lineamenta, mensuram, colores; sæpe etiam ipsos animi motus oculis obii-ciunt: sic ipsam virtutum vmbra, & quasi animi lineamenta, effigiémque, quibus sanctorum virorum exemplo ad sanctimoniam amorem, & studium accendimur, quantum humano licet modulo, monumentorum traditione intuemur. Sed id fere contingit in sanctis viris: vt, quemadmodum incendia interdum per fumum tantum videmus, noctu, quanta illorum magnitudo sit, clarè perspicimus: sic, quandiu illi nobiscum communi luce fruuntur, subobscurè illorum virtutem intueamur, sublatis ex oculis

lis, quasi mortis vmbra interiecta, clara multarum virtutum memoria fulgentes admiremur: iacturam tamen eorum, quæ obliuione delata sunt, non recuperemus. Haftenus adumbratam tantùm leuiter exquisitæ sanctimonix, & tanquam in abdito sepositam effigiem à longè, quasi intento digito commonstrauimus; nunc qualis à prima ætate per omnes vitæ gradus fuerit, sigillatim exponere aggrediamur.

IN ea Athlantici maris ora, quæ se maximè à Mauritanix litoribus Oceanus expandit in Occasum, insulæ emergunt, quas à felicitate nature prisca sæcula Fortunatarum insularum nomine notarunt. Eas Ptolemæus, veteresque Cosmographi, quoniam præter nostri orbis fines sitæ sunt, extremum vniuersi limitem existimarunt; vltra quos nihil cognitum, exploratumve habuit antiquitas, non terras, non æquora, non cælum. Inde initium per gradus dimetiendæ terrarum longitudinis ad extremos vsque Eoos fecerunt. Verùm intermissa longo multorum sæculorum intervallo ob periculorum magnitudinem, & ventorum rabiem Oceani nauigatione, latuerunt; nomine tantùm, & Cosmographorum traditione nobis notæ, ignota prorsus, & intentata cælo, marique ad eas nauigatione. Non ita multo ante nostram ætatem, magna consequentium sæculorum felicitate, admirando Lusitanorum ausu,

*Iosephi An-  
chiætæ patria  
genus, edu-  
catio, & pri-  
ma ætatis  
studia.*

arte inuenta Oceani furorem superandi, eorundem Lusitanorum auspiciis repertæ, cursuque ad eas nauigandi notato, in Lusitanorum prius, postea Hispanorum venêre potestatem; nouôque nomine Canariæ appellatæ. Sed vsque eò ab antiqua illa felicitate prolapsæ (tanta in longa ætate non in moribus solum, sed in ipsa etiam natura facta mutatio) vt non desint, qui illas esse negent, quæ olim tam beato nomine afficerêtur. Vt vt est, communis Mathematicorum consensio, quæ recens inuentæ insulæ, Canariæ ab antiquo vnius earum nomine dicuntur, eas esse affirmat, quæ antiquis Fortunatæ dictæ sunt. Eæ nunc duodecim numerantur, sex ab antiquis tantum proditæ, quarum princeps nunc prærogatiua quadam nominis Canaria, & magna Canaria nominatur; reliquæ suis quæque nominibus notantur. Sitæ sunt ad tricesimum gradum supra æquatorem, in primo ipso limite antiquæ in longitudinem mensuræ. Earum vna, vt in tanta, & incolarum, & locorum asperitate, non ignobilis est Zanarifa. Hanc vnâ cum paucis etiam post illatum in reliquas à Lusitano Euangelium Barbari idololatræ aliquandiu tenuerunt: in Christiana tamen iura & ipsa tandem concessit. In ea natus Iosephus Anchieta anno à Christo nato millesimo quingentesimo tricesimo tertio, patre Cantabro, matre indigena, utroque in sua gente, & honesta familia nato, & florenti in fortuna

*Zanarifa Iosephi patria.*

*Nascitur  
anno 1533.*



fortuna constituto; & , quod magni faciendum est, Christianæ Religionis studio. Itaque diligentem prolis in pietate educandæ curam suscepere. Educatus liberali disciplina in paterna domo Iosephus Latinas literas, quantum puerilis patiebatur ætas , didicit. Cùm paulo esset adultior , quò & in studiis processus faceret maiores , & cultioris vitæ modum , formamque condisceret , Conimbricam in Lusitaniam cum fratre natu grandiore missus , in disciplinam venit Societatis IESU ; quæ paucis antè annis nata Lusitanorum Regum benignitate in ea vrbe , nobilique Gymnasio Regiis opibus excitato altas diuina iuuant Bonitate , radices iaciebat. Tantæque fuit adolescentuli indoles , tanta morum probitas , vt & omnibus , qui illum nossent , apprimè charus , & adolescentibus pudore , & modestia incitamento esset ad virtutem : breuique tempore humanitatis, Rhetoricæque studiis decursis, inter laudatissima adolescentium ingenia floreret , siue soluta oratione , siue numeris adstricta certandum foret. Sed mira præcipuè in eo ad scribendum carmen fuit ingenij felicitas. Logicæ quoque studia percurrit , & non nihil etiam de Philosophia degustauit. Interim, vt erat domestica educatione probè institutus, longè etiam à domo , diuina eum gratia ad meliora prouehente , pietatis studia toto animo complexus est. Iam in illius mente diuina

*Conimbricã  
studiorum  
causa mittitur.*

Bonitas igniculos iniecerat, & earum virtutum semina, quæ, accedente ætate in immensas, frugiferasque arbores excrescerent; quod fiebat, ut vtrunque studium, & doctrinæ, & pietatis, cum vicissim alterum altero iuuaretur, maiores in eo quotidie accessiones faceret. In primis verò candoris fuit, & pudicitiaë amantiſſimus: petulantiaë verò, & iuuenilis licentiæ osor acerrimus; eoque usque processit, ut, cum die quadam in templo ante altare Virginis Matris pronus in genua oraret intentius, ita intimis sensibus citari cœperit, ita ad earum virtutum amorem, quas Deiparæ placere sciret, inflammari, ut in ipso vestigio virginitatem, quam felici, singularique Dei dono ad eam diem illibatam seruaret, Virgini Matri voto dicarit.

*Virginitatē  
vovit.*

Ex eo tempore sincerus animus maiora cœpit secum agitare, humanam felicitatem aspernari, diuina, æternaque cogitare; eam sibi vitæ rationem exoptare, ubi tutò ab omni iniuria, periculoque integrum depositum seruaret. Itaque & religiosam amplecti vitam, & eam in Societate IESU transigere in animum induxit. Nota erat adolescentis probitas, nota vitæ innocentia, notum ingenium, indoles magna omnia pollicebatur. Ita non magno negotio factus est voti compos.

*In Societate  
Iesu asciscitur.*

ANNOS natus septemdecim in Societatem IESU Canarinus adolescens (ita non contem-

contemnenda ignotæ pene patriæ fuit indoles) magno cum suo, multorûmque postea, & rei Christianæ bono ascitus est. Admissus in Societatem, iis artibus, iisque rudimentis instituitur, quibus nouum illud vitæ genus ad omnem pietatem informatur. In primis verò veterum consuetudinum, humanarûmque rerum omnium obliuione; nouæ mentis, nouorûmq; consiliorum, ac sensuum susceptione; vitæ simplicitate, studio diuina meditando, sui abiectiōe, proprii iudicii abdicatione, suarûmque appetitionum compressiōe, assidua, continentique sibi aduersandi exercitatione, & omnium aliarum virtutum duce tutissima obedientia. His præcipuè studiis huius spiritualis militiæ Tyrones in Societate I E S V exercentur: quorum studiorum fructus ille vel maximus existit; vt animus à caducarum rerum amore abductus, cum Deo quàm arctissimè concilietur. In hac palæstra Iosephus ita se exercuit, vt, hisce virtutibus omnibus initiatus, omnes boni Tyronis numeros ex disciplina Societatis expleret.

I N T E R has exercitationes, dum rudimenta poneret Societatis, in grauem morbum incidit, ac periculosum: morbi autem videtur non vna causa fuisse. Operam dabat, vt nouitius in templi ministeriis, solemnéque illi erat quotidie octo Sacerdotibus, interdum pluribus Missa facientibus ministrare. Quo in munere totum fermè tempus applicitus, in  
genus

*Graviter agrotat.*

genua versabatur, & vt est illa ætas verecūda, & nouitiorū ardor ad pietatem imbibēdam, seseque edomandos incitator, dum spiritalis dulcedinis explorare studet sitim, & corpus ad obsequium animo præstandum adigit, non putauit eam rem, vnde tantam hauriret pietatem, vlli sibi incommodo futuram. Ergo corpore nondum per ætatem durato ad laborem, artus fatiscentes, quā femora circa sacrum os, & vertebram nectuntur, acerbos illi dolores ciere cœperunt. Sed, animo imbecillitatem sustentante, ne se priuaret eo fructu pietatis, sua præstare ministeria non destitit, modisque omnibus rem occultam habuit: corporis tantum in affectam partem inflexione dolorem lenire contendebat: tum zonam quā arctissimè ad lūbos astringebat. Quod dum sæpius facit, & maiore nisu, quā res ferret, femorum globi è coxendicum sinibus excussi, seu incuratione minùs aptè restituti; seu, quod vero similis est, neruis in viridi ætate semel laxatis minùs fideliter, vt docent Medici, nexum retinentibus, parum firmiter coiēre: inde vitium in vertebra, & humeros peruenit. Quò factum est, vt inde luxato dorso, humerisque, per omne tempus non sine aliqua deformitate vixerit. Crediderim tamen, non hanc vnā ossium luxationem tam pertinacis morbi causam fuisse: sed, vt fit, ad occulta alia naturæ vitia, id quoque incommodum momētum magnū attulisse. Nam;

adhi

adhibita ea, quæ solet in grauibus morbis curatione, est ille quidem multum alleuatus, sed morbum omnem depellere nulla medicina potuit. Quare mœrens suum incommodum dolebat: angebat iuuenilem animum illa in primis cura, quòd timeret, ne per valetudinem Societatis ministeriis par esse non posset. Hanc adolescentis sollicitudinem odoratus Simon Roterigius, vnus è nouem B. Ignatij comitibus, qui Præpositi Prouincialis munere Societatem in Lusitania regebat, cum quæsisset ex eo, quæ valeret; ex eoque sermone morbi grauitatem, & iuuenis mœrorem percepisset, afflictum animum his paucis tantum verbis alleuauit. Ne sis sollicitus, inquit, fili de tua hac inualetudine: Deus enim te in hoc statu vult. Hoc solo sermone ita confirmatus est, vt nullum ex eo tempore mœrorem senserit. Triennium lentus hic tenuit lāgor, per tenui, aut nullo fructu spei melioris; cum, re deliberata, Medicis in consilium adhibitis, in Brasiliam Patres adolescentem mittere constituunt, haud dubia spe, ea soli, cœlique mutatione reparandæ valetudinis. Erat enim iam celebri fama euulgatum, eius cœli, solique bonitatem, & alimentorum lenitatem multum ad humanam salubritatem, vel reparandam, vel retinendam, augendamque conducere. Et sanè ea cœli temperies est, qua nil clementius esse possit; vt neque æstus, neque frigora, magnis excessibus discreta, humanis

corporibus grauiā, noxiāve sentiantur: terrā item, vt ad aspectum peramcōnā; ita etiam ad fructum vberēs, eam frugum fundunt copiam, quarum nulla duritiē, cruditatēque ad conficiendum natura fatigetur.

*In Brasiliam  
reparanda  
valetudinis  
causa mitti-  
tur anno  
1553.*

ANNO igitur à Christo nato millesimo quingentesimo quinquagesimo tertio 8. Idus Mai, annos ipse iam viginti natus cum Odoardo Acosta, qui Prætor ad prouinciā pro Rege administrandā proficiscebatur, & paucis aliquot de Societate Olyssippone soluerunt. Inter nauigandum, vt erat in maritimo aëre natus, quasi in patrium cælum remeasset, meliùs habere cœpit: ita vt itinere illo toto præscripta sibi nautica ministeria (est enim illi penu, coquinā, & foci cura demandata) summa cum omnium probatione strenuè obierit. Eodem anno Bahyam Regni Brasiliici caput tenuerunt. Sed, vt planiora sint, quæ de Iosephi rebus, peregrinationibûsque toto illius vitæ decursu narrabuntur, erit operæpretium totius eius terræ tractum, situm, naturam, partēsque, & quis esset per id tempus in iis locis Societatis status; quæque in loca Societatis homines distributi essent, quibûsque in ministeriis versarentur, paulo longiore, non tamen inurili digressionē transcurrere.

*Brasilia de-  
scriptio.*

IAM dudum satis supérque notum est Brasiliam in ea noui continentis esse partē, quam vulgò Peruuium appellant. Regio toto in hemisphærio Australi sita est, maximam partem

partem in ea plaga, quam Zonam torridam dicunt: eius tamen non modica pars infra Capricorni trópicum demittitur, argenteo flumine, & Oceano illam in tenuem quasi cuspidem acuentibus. Initium capit à Septentrione duobus infra æquatorem gradibus, tenditque in Austrum ad quinque & triginta, etsi non desunt, qui eam in plures faciunt excurrere ad fretum vsque Magellanicum in quinquagesimum quintum gradum. Sed quæ proprio nomine Brasilia, Lusitanico paret Imperio, Paranáo flumine, cui ab argento est nomen, quinto & tricesimo gradu finitur: ex quo mendum in libros nostrorum apparet irrepsisse culpa, ut videtur, Typographorum, in quibus pro triginta quinque, quadraginta quinque legimus. At Cosmographorum tabulæ, & nauigantium obseruatio argentei fluminis ostium, quò extrema pertinet Brasiliæ cuspis, in 35. gradu nobis indicant. Ad Orientem, quàm Hesperiiis Africæ litoribus ostenditur, immani tractu Oceano alluitur: ora ipsa maritima multis sinibus, quàm maioribus, quàm minoribus, æquis fermè inter se spatiis distributis serratæ frondis instar, quasi arte discissa tota. Accedunt crebra, & ingentia flumina latis admodum alueis, & ingenti aquarum mole labètia; quæ cum in mare se exonerant, patentes nauigiis, & cómodos pleraque tū ad quietā stationem, tum ad flumen subeundum aperiunt sinus. Intus ad Occidentē altissimis  
mon

montibus includitur; qui cam perpetuo iugo quasi sinu complexi, videntur à reliquis Peruuji partibus auertere. Terra ferax, & benigna, & grata amœnitate delectabilis; frondosæ syluæ foliis nunquam deciduis perpetuò vernant; & quamuis ex spissâ arborum umbra; vallibus paludosis, & vastis aquarum lacunis, vnde ingentes amnes effluunt, vapores ascendant cœli salubritati infesti, qui in pluuiam, & rorem soluuntur; maximam tamen anni partem lenes ventorum. flatus sub meridiem à mari exurgunt, qui in mediam vsque noctem spirantes omnem cœli discutunt grauitatem: ita vt oriente Sole cœlum subito purum, nitidumque reddatur. Tum earum mercium abundat copia, quarum in nostras terras inuectione Europa nostra redditur beatior. Omnino si naturæ dona spectes, non facile in omnibus noui orbis terræ partibus, ac ne in nostro quidem orbe parem felicitatem reperiās; vt iamdudum constet errare Physicos, qui mediam hanc regionem Solis accessu exustam, hominum vsui à natura negatam prodiderunt.

*Brafilorum  
vitia.*

VERVM tanta hæc cœli, ac terrarum commoda haud disparibus incommodis cōpensantur. Primùm, nulla humanæ naturæ verecundia, bestiarum more nudis prorsus corporibus incedunt viri, fœminæque: deinde hominū ingenia hebetia; & inhumana; vt etiam humanarum carniū esum, in sum-

ma



ma habere lautitia non horreant; tantum in  
 vetere corroborataque bona, prauave con-  
 suetudine situm est: atque inter cultum legum,  
 barbaramque licentiam ad iustitiam, honesta-  
 temque inter homines retinendam, & bellu-  
 inam stoliditatem, feritatemque propagan-  
 dam interest; etsi non eadem naturæ impro-  
 bitas vbique: estque vbi plus, minusve crude-  
 litas grassetur. Quamquam inducta iam in gen-  
 tem Religionem, paulatim, etsi magno cum la-  
 bore, ad humanitatem condocentur. Cæteri,  
 qui nondum Christiana Religione suscepta,  
 oram accolunt maritimam, longa iam cum  
 Lusitanis consuetudine mitigati, sensim & ipsi  
 ad humanitatem inflectuntur, etsi suo pte etiã  
 ingenio minùs feri, minùs asperos habeant mo-  
 res: ac, nisi iniuriis exasperentur, amicè nostris  
 cum hominibus societatem feruent; neque à  
 iustitiæ legibus abhorreant, facileq; ad Chri-  
 stianam Religionem afficiantur; sed constantia  
 desideratur. Certas, fixasque fere sedes habet;  
 nec facile tædio loci solum vertunt. Commer-  
 cia qualiacunque habent, & amicitia iura po-  
 puli cum populis, vici cum vicis, si nulla inter  
 eos oboriatur offensio, seruant inter se. Non  
 idem omnibus ingenium, qui mediterranea  
 tenent. Videas multos eorū populos iis, quos  
 diximus, similes, quietos, faciles, amicos  
 amicis: contra alios ita asperos, & efferratos,  
 vt ipsam hominum naturam odisse videantur.  
 Immites, iracundi, truculenti, sanguinarii, fe-  
 rarum more nulla iura norunt, nisi subito co-

*Тапуа.*

ortam pro re nata libidinem. Non facilè gentem aliam reperiās, de qua illud veriùs dici possit: *Homo homini lupus*, seu, *draco magis*. Eos Tapuyas vocant: quod nomē ipforum lingua gentem syluestrem sonat. Hi non cum Lusitanis tantum, si ad ipsos penetrent, sed cum suis etiam gentilibus, qui cum Lusitanis pacē habent, bella gerunt. A cæteris Brasiliis consiliis, consuetudine, conuictūque seiuncti, inuisi omnibus, omnibus formidini, longè à mari varias in terras dispersi sedes habent, mutantque ad libidinem.

*Carigij.*

OMNIVM facillimi, mitissimique, atque ad cultum sua sponte proni sunt Carigij. Hi antiquo instituto vni ex omnibus Brasiliis viri, fœminæque vtuntur indumentis ex gossipio ipforum more contextis, forma à Mauricis tuniculis non absimili. Viuunt in tectis, domos sibi extruunt, agros colunt, mandiocam, leguminâque serunt. Forma iis, habitudoque corporis non inelegans, multumque probanda; multique inter eos corporis conformatione, speciëque cum Europæis comparandi; vt videatur animus, & ingenium ad bene conformandum corpus; aut animi organum corpus ad animi, ingeniique perpolitionem quandam vim habere. Qui ea loca lustrarunt, eos in ea Brasiliæ parte describunt, quæ infra Capricorni tropicum descendit: viginti circiter leucis distant à mari; vnde ad montes, quos incolūt, est ita asper ascensus, & erectus, vt nisi  
flit

stirpes, & enatarum arborum ex humo prominentes radices scalarum præbeant vsum, nullus ad eos ea parte pateat accessus. Sunt qui eos in interiore America Paraquarij fluminis accolæ facere videantur: eorumque circiter ducentos, vt Christo nomen darent, Hispanis nonnullis ducibus, itinere sexcentorum millium passuum in Brasiliam suscepto à Barbaris Christianæ Religionis nomine interfectos ferunt. At Iacobus Monterius Societatis Sacerdos, qui proximè anno salutis 1610 1611. Emmanueli Limæ Societatis in Brasilia Visitatori adiunctus est comes; quique præsens loca cuncta adiuit, & testis oculus peritè, & ad amissim Cosmographorum descripta ad Antonium Mascareniam pro Lusitania Claudio Aquaiuiuo Præposito vniuersæ Societati generali à consiliis hoc tempore Assistentē transmissit, eos in Brasilia non longè à Piratininganis montibus sedem habere demonstrat. Cum eo reliqua Carigiorum, & eorum, qui de Societate ad Carigos profecti sunt historia: multæque nostrorum hominum epistolæ per ea tempora in Brasilia datæ consentiunt. His vt adhæream suadet ratio. Nec mirum è proximis Paraquariis Hispanos transcenso montis iugo, ad Carigos penetrasse; si quidem legimus in Peruvianis literis nostrorum anni millesimi quingentesimi nonagesimi sexti, venisse Sanctam fidem yrbem Paraquariorum cum aliis è Societate magno cum eius ciuitatis bo-

no Leonardum Arminium Neapolitanum totius eius comitatus præsidem. Quare potuere Hispani è Paraquariis in Brasiliam transgressi, Carigiis Christianæ Religionis studio incēsis, auctores esse, & comites ad Sacerdotes Societatis perquirendos; & hi sexcenta passuum millia conficere: vtrique verò sui fusione sanguinis, illi Baptismi gratiam, hi suæ fidei, consiliorumque suorum præmia antevertere.

P o s t hanc cædem venēre alij ex eadem gente magistros Christianę Religionis accersitum: missique sunt è sede S. Vincentij duo egregia sanctimonia viri, Petrus Corrêa Sacerdos, & comes illi datus Ioannes Sosa, vterque Lusitanus, vterque in Brasilia versatus, & linguæ, Brasilicarumque rerum bene peritus: sed Corrêa florenti in fortuna, magnis relictis opibus; Sosa humili vitæ genere insignem adeptus Christianæ integritatis laudem primo vterque Societatis in Brasiliam aduentu omni humanarum rerum spe præcisa, & humanorum consiliorum vinculis abruptis, Christi famulatui in Societate se ad-dixerunt; in qua ita virtutum omnium exemplo cunctis se probarunt, vt digni primis illis temporibus, digni integerrimo illo Patrum cœtu censerentur. Hi magno cum fructu aliquandiu inter Carigios versati, ingentem eorum numerum ad Christum adduxerunt; latèque in dies Religio propagabatur. Sed zizaniorum sator Diabolus aliquot è popularibus instiga

*Petrus Cor-  
réa, & Ioan-  
nes Sosa ad  
Carigios  
missi.*

instigauit; qui vel nōdum Christianam Religionē susceperant, vel, vt semper inter bonos aliqui sunt degeneres, in ea parum firmi tātā integritatem, & vitæ innocentiam, quantam duo egregij magistri pietatis in gentem inducebant, perosi, confictis perfidi hominis criminationibus, quasi in Carigiorum perniciem validam armatorum manū paratam haberent, eō pellecti sunt, vt magno cum rei malo Religionis, & veritatis Doctores interimerent. Hæc Nouembri mense anno humanæ salutis millesimo quingentesimo quinquagesimo quinto contigēre, biennio post Anchiætæ aduentum in Brasiliam: cū illo ipso anno primū è Vincentiana sede ad nouale illud profcindendum venissent. Quid ex eo tempore cum Carigiis actum sit, nullæ nos docent literæ: sed apparet ex iis, quæ per ea tempora nostri scripsēre, operarum paucitate, & magnitudine operis difficillimi continendi Neophytos, ne ad veterem prauitatem redirent, Catechumenosque à feritate abducendi, quibus maximè rebus in Brasilia tenebantur omnes impliciti, rem non tam omissam, quā è manibus elapsam.

TENTATA iterum eadem profectio ad exitum adduci nunquam potuit, nempe Tartarea potestas eo maiore conatu huic consilio aduersari contendit, quo maior inde fructus expectādus. Proximè anno 1610. cū Emmanuel Lima Visitator cum suo comite Iacobo

Monterio ea loca circa Piratiningam pro suo munere obiret, venêre ingenti numero Carigij ad Patres Societatis euocâdos: decretâque erat ad eos expeditio; spes erat è gente ad pietatem, & humanitatem prona magnæ messis animarum. Rogandus Dominus, vt incolumes adducat operarios in messëm suam; & plantationi, irrigationique adspiret, dêtque incrementum, quod paratæ segetes expectât. Nec plura scitu digna de Carigiis ad annum 1614. Romæ nota erant.

*Brasilia terra vitia.*

Hæc de gentibus, quæ Religionis lumine orbatæ Brasiliam tenent, summatim cognitioni dare potuimus. Sed sunt etiam in ipsis terris, quæ naturæ officiant bonitati, non tam naturæ, quàm incolarum culpâ, crebræ sylvarum arborum densitate, & ramis inter se implicitis, continenti, densâque foliorum nube inumbratæ multùm de viriditatis hilaritate deperdunt; oculisque, ac sensibus, Europæis viroribus assuetis adspectum paulo reddunt tristiores. Verùm, si quemadmodum aliorum bonorum copia, ita etiam hominum cultu tellus abundet aliquando, succisa ad vitæ vsum, & ad artes arborum crebritate, tota regio reddi possit amœnior. At verò continentibus bellis, mutuisque cædibus vicinis vicinos atterentibus, ac sese inuicem vorando absumentibus, regio hominum infrequentia, terræ cultu destitutæ syluescunt. Pauci tantùm, qui bono suo casu gentilium suorum dentes euaserunt,

ferunt, ad senectutem perueniunt. Sperandum tamen, Deo bene iuuante, inducta, & corroborata penitus Religione, naturæ speciosiorē faciem, ciuitatibus ciuium frequentiam, & terris cultum suum diem aliquando allaturam. Hanc tam incultam, vastamque tot commodis, incommodisque compensatam regionem ante Lusitanorum æterna memoria dignas nauigationes nostro orbi, atque adeò hominum memoriæ, ac propè dicam generi prorsus ignotam Diuina prouidentia inopinato euento patefecit.

Post superatam Lusitanorum virtute sauiantis Oceani ferociā; & nauigationem per immensā, & nunquam antea tentata marium spatia ab vltima Hesperia ad Indos patefactam, ad rem Lusitanam in India constituentem, & Christi Euangelium in eam gentem inuehendum, Lusitaniæ Rex Emmanuel idoneam classē instruxerat. Ei Petrum Aluarū Capralem, virum & generis nobilitate, & sua virtute clarum præfecit. Ij Martio mense anno ab humanæ salutis initio quingentesimo supra millesimum se mari commisere, longēque prouecti, dum Malacias circa Guineæ oras, & furentes ætus circa Bonæ spei promontorium deuitant, longo flexu in Occasum recedentes, ad terræ conspectum venerunt, quam initio insulam putarunt. Accurata dein nauigatione oram eius adlegentes, continentem esseprehenderunt. Huc, obseruato loco ad ru-

*Brasilia inuenta anno 1500.*

endas naues opportuno, exscensionem fecerunt; loco ab ipsius natura *Portus securus* nomen inditum mansit in hanc diem. Ibi ꝑ. Non. Maias ipso die inuentioni S. Crucis dicato, religiosa, celebrique cerimonia ingens statuta Crux, & Christiano ritu ad aram pro tempore exatam sacrificatum in litore. Inde totus ille tractus, *Terra sancte Crucis*, nominatus. Vulgi deinde consuetudo euicit; vt, mutato sanctiore nomine, à rubro ligno, quod Lusitani *Brasillum*, Itali *Verzinum* nominant, quo abundat ea tellus, & ad tincturas adhibetur, regio Brasilia, gens Brasili dicerentur. Lusitani, resartis nauibus, captata tempestate, cursum inde suū tenuerunt, Brasilia relicta. Explorata deinde eiusdem Regis imperio terræ, fructuumque bonitate per Americum Vespucium Florentinum, clarum illum nauigationum, & tractandorum marium, ventorumque magistrū, à quo vniuersus noui orbis continens Americę nomen traxit, cœpère, permittente, & probante Rege, è Lusitania tum clari viri, tum omnium ordinum multi, spe commodorum pertracti, ad ea loca nauigare: & vt qui in vacua venēre, quæ quisque nacti loca sibi opportuna iudicarunt, in iis sedem poluēre, terræque fructibus sua emolumenta augere: vt magni pretij merces inde magno cum Lusitaniæ, ac totius Europæ bono in nostrum orbē inueherentur; vicissimque eò nostræ terræ fruges, sementes, arboresque, & iumenta, quorū utilitate prorsus carebant, magno prouentu



cōportarentur. Emmanuele inde vira functo, Ioannes eius nominis tertius Emmanuelis F. Regni gubernacula suscepit. Is, cognito, quāti esset eius terræ, gentisque Imperium, ac totius mercimonij rationem ordinare, haud ita multis interiectis annis Martinum Alfonsum Sosam cum classe, ac summo imperio misit, qui suo nomine Brasiliam occuparet; eamque in prouinciæ formam redactam in plures iurisdictiones, seu Præfecturas distribueret. Singulis Præfecturis, coloniisve singuli Præfecti, ducēsve constituti. Iis, præter suos, quos quisque è Lusitania colonos deduxerat, terra secundum maris oram distributa, quinæ fere quinquagenæque leuæ; cuique coloniæ definitæ: oppida in singulis coloniis, Præfecturæve extructa; ipsæ Præfecturæ ab oppidorum nominibus nuncupatæ. Omnium primam, eandemque remotissimam in ipso pene Brasiliæ extremo ad gradus viginti quatuor in Austrum sibi delegit ipse Alfonsus Sosa, qui toti rei præerat; quam à Sancto Vincentio nominauit; sequutus, credo, emolumentorum, quæ inde præcipuè sperabantur, opportunitatem, amplam enim iurisdictionem ad montes usque profert, qui Brasiliam à Paraquariis diuidunt. Oppidum ad amplum, & per commodum sinum, qui duabus occupatur insulis, situm est. Intra sinum inter litorum ambitum, insulasque duobus intrans ostiis, curuatus in arcum maris quasi euripus circumfluit, insulis

*Colonia S.  
Vincentius.*

inter se non magno freto discretis. Sed euripi ostium, cui oppidum impositum est, aggestis arenis processu temporum penè obstructum, minutis nunc tantum lintribus intratur: maioribus verò nauigiis nonnisi per ostium alterum, circūnauigatis insulis, est iam ad oppidū accessus. Ad cuius claudendas fauces, portumque turris, quam Biritiocam nominant, extructa est. In anteriore insula oppido proxima, quasi claustrum aditus, oppidum est alterum castello communitum è regione S. Vincentij, cui à Sanctis nomen est: in vtroque oppido Societas IESU cum templo sedem habet. Ager porrò latè in mediterranea se porrigit; oppidaque duo insignia continet, Conceptionem in litore Itannia, decem leucis à S. Vincentio, & Piratiningam, seu alio nomine S. Paulum, quindecim introrsum leucis ab eodem oppido S. Vincentio recedens, ad altitudinem trium & viginti graduum cum dimidio sub ipso penè Capricorni tropico sitū, in montibus asperi quidem ascensus, sed, vbi altitudinem superaueris, soli mitioris, & arborum amœnitatē nonnihil inumbrati, tum lenibus, placidisque fluminibus irrigui. De Cōceptione, & Itannia dicetur sæpius in rebus Iosephi de quo scribimus.

*Oppidum  
Sancti.*

*Piratininga  
oppidum.*

PIRATININGA cum suis finibus ora videtur esse omnium, quæ sunt in Brasilia felicissima, proinde etiam oppidum ciuium frequentia fit auctius in dies: nam vbi ex oppido in  
plana

plana descenderis, campeſtria omnia, latè que  
 patentia cœli benignitate, amœnitate campo-  
 rum, aquarum riuſ, fontibúſque campis Eu-  
 ropæis quàm ſimillima; prouentu etiam longè  
 meliora: agricolarum tâtum circa ſata curam,  
 indiſtriâmque deſideres. Ea eſt enim ſoli fœ-  
 cunditas, vt triticum nuper ex Luſitania alla-  
 tum, parca admodum, & inertſ cultura ſatum,  
 curatúmque ſuprà quàm credi poſſit, maiore,  
 quàm in Europa, copia fundatur. Nec dubitat  
 aſſerere meſuræ vnſus fructum in centenas  
 multiplicari: vt, ſi molæ non deſint, quarum  
 uſus iam parabatur, frumentum ad pinſen-  
 dam farinam toti penè prouinciæ ſeges ſup-  
 peditare poſſit. Multis etiam, ac per bonis vi-  
 neris abundant, aliſſque frugum generibus è  
 Luſitania aduectis. Armenta præterea boum,  
 equorúmque tanto numero fœtificant, vt equi  
 valde boni viliffimarum rerum, galeri vnſus,  
 aut geminorum ex panno tibialium commu-  
 tatione parentur. Fuit cum vaccæ nouem æris  
 alieni nomine minùs numorum trium au-  
 reorum ad haſtam licitatore non inuene-  
 rint: tanta eſt fructuum copia, & pecuniæ, ve-  
 ſtiariæque rei inopia in iis terris, in quibus aut  
 prorsùs, aut ſeminudi homines incedunt. Hęc  
 tamen tam largæ naturæ benignitas in campe-  
 ſtribus tantum viget Piratininganiſ; cuius ſoli  
 natura, cœlique temperies, præter reliquas Bra-  
 ſilicas oras magnam cum terris noſtris habet  
 ſimilitudinē: nam & hyberno tempore gelu,  
 prui

pruinæque terræ teguntur ; subindèque vt montanis finitimæ , vt apud nos fit , consperguntur niuibus ; neque æstiuæ tempora iustis caloribus carent , quod in Brasilia reliqua non fit. Quæ duæ contrariæ suis temporibus affectiones ad fatorum iuuandas radices , & fruges ad maturitatem adducendas in primis profunt. Et hanc copiosam rerum vbertatem superioribus temporibus ignotam recens proximorum annorum experientia notam fecit.

ACCEDIT ad cumulum commodorum illud vel maximum , quod in montibus camporum feracitati imminentibus auri probati in vicesimum tertium gradum cum dimidio ordinæ reperiiebantur ; cuius vsum ad inaurandi artem percommodum esse experimētum declarauit. Et huius tam benignæ vbertatis iam pridem à primis temporibus indicia non obscura notata in lucem tandem ipsa dies , & hominum protulit industria.

*Spiritus sanctus colonia.*

SVpra Sanctum Vincentium curuata in Septentrionem nauigatione Præfecturam alteram frequentauit Vascus Fernandus Continnius à Spiritu sancto nominatam , anno salutis quinto & vicesimo supra millesimum & quingentesimum : quo item anno , aut non ita multo antè credere est , Solum cum summa potestate in hæc loca venisse. Locus est in gradu 30. in Austrū : tellus est brasili ligni diuersarum specierum , in primis verò balsami admodum ferax ; vnde balsamum hauritur : arbo-

res

res sunt prægrandes & excelsæ, ingenti & solido trunco, & beneramosæ: non vt in Palæstina humiles arbusculæ. Forma nonnullas in Europa facilè similes esse dixeris. Harum corticem totum multis vulneribus incidunt: tum quâ hiant scissuræ, gossipium, ad imbibendum, qui distillat succum, inferunt; alternisque diebus exprimunt in vasa, massam illîc officinæ interunt, admisto balsamo, ex qua globulorum ferra conficiunt, qui eleganti opere elaborati, atque in multam duritiem concreti, ad coronas præcatorias, rosariæque odoris nobilitate in pretio habentur. Nec fere, præter brasila ligna, & balsama, vlla maioris emolumenti merces huius terræ; etsi ne saccari quidem prouentus desideratur. Pingue solum, fertileque; sed parum strenuos nactum colonos, minùs naturæ suæ respondet vbertati.

IN hac quoque colonia sedem habet Societas I E S V, habetque adiunctos vicos aliquos, in quibus eiusdem Societatis Sacerdotes resident, genti ad humanitatem, & pietatem excolendæ. Hîc diu versatus est Iosephus Anchieta nostræ scriptiois argumentum: & hæc sedes initium illi fuit administrationis, cùm primùm ad regendos alios adhiberi cœptus est; in eaque sede vitam finiuit, eiusque venerandum corpus sarcophago traditum est.

E O D E M anno ad Bahyam sinum perambulæ, vbi postea Regia ciuitas, Regni caput extructa est, Regis ipsius dono suam sedem, iuris

*Bahya colonia.*

iurisdictionemque collocavit Franciscus Pereria Continnius. Sed de hac cum ad aduentum Societatis in Brasiliam venerimus, dicendum erit accuratius.

*Portus securi  
colonia.*

ANNO item 1526. supra Spiritus sancti coloniã infra Bahyã ad gradus 16. Portus securi coloniã, primo Lusitanorũ appulsu, stationeque, & Christiana Religione consecratã tenuit Petrus à Campo. In hac quoque sedem habent Societatis Sacerdotes, qui Lusitanis, indigenisque, ac vicis aliis excolendis dant operam.

HÆC prima Brasiliæ Regni per Ioannem Regem ordinatio; atque hæ primæ in Brasilia Regiis auspiciis coloniæ à Sosa descriptæ videntur. Et fieri potuit, ut præter has, alias quoque, quæ subinde commemorantur, ab iis, qui primi venerunt, occupatas, Rex ipse ratas haberit: aliæ etiam ab aliis post primam descriptionem Sosæ Regiis item auspiciis deductæ sint. Nam in suprema Brasilia, quâ tota fronte Septentrionem spectat, proxima equatori, primum locum tenet Itamaraca item colonia. Vrbs in insula est, angusto freto à continenti diuulsa: hæc præter suos ciues habet in continenti Lusitanici nominis colonos, qui Goyanam vnâ cum indigenis incolunt. Præter hos, oppidum Paraibam cum suis finibus; qui directo in Occidentem tractu ad quadraginta leucas flumen magnum Maranonem attingunt. Hic extremus in Septentrione Lusitanici Regni limes est. Hoc loco castellum  
omni

*Itamaraca  
colonia.*

omnium, quæ sunt in Brasilia firmissimum, munitissimumque ostio fluminis, & finium tutelæ impositum, cum aliis circa locis suo Præfecto, propriâq; iurisdictione regitur. Atq; hæc oppida in Brasiliæ litore, quæ Septentrioni obiacet, censentur. In angulo altero, qui Orientem spectat, in ipso flexu ad Austrû, octo infra æquatorem gradibus est Pernambuco, omnium quæ sunt in Brasilia, coloniarum florentissima, & maximarum opum, aut certè nulli secunda. Ciuitas in summa collis planicie non multùm à mari eminet, bonis domiciliis, ædificiisq; extructa; nobilibus ciuibus, & opulentis, ac magno honestorum equitum numero illustris; vt inter opulentas etiam Europæ ciuitates honestum locum tenere possit. Portum habet ad ipsius collis radices. Emporium est in primis magni nominis, & mercimoniorum copia celebre, & opulentum: nam præter rubri ligni totius Brasiliæ præstantissimi ingentem numerum, centum viginti sacchararias officinas in sua dicitur habere dititione; vnde in Europam centum triginta, & centum quadraginta onerariæ saccharo onustæ cum ingenti negotiatorum, & rei Lusitanæ emolumento quotannis enauigant. Habet præterea Collegium Societatis Iesv à Sebastiano Rege viginti ex ea Religione capitibus alendis fundatum, cum scholis tribus: in quarum prima quæstiones de conscientia casibus explicantur; in media Latinis literis iuuentus

*Pernambucus colonia*

uentus instituitur; in infima literas legere, & formare pueri docentur. Sunt præterea in mediterraneis vici sex indigenarum, admistis Lusitanis, in quibus ex ipsa Societate Sacerdotes resident, indigenarum institutioni, & animarum curæ. Qui verò in vrbe, & Collegio degunt, præter statas, solemnesque cum ciuibus occupationes, ad alia superioris oræ loca excurrunt Societatis ministeria circumferentes; quod in Brasilia tota Societatis Sacerdotibus solemne est. Primus eam coloniam constituit, cuiusque tenuit dominatum Odoardus Coëlius.

SECUNDVM Pernambucum ad gradus tredecim Bahya, quondam Frãcis Pererix Præfectura, nunc Regia ciuitas est. Inter Bahyam, ac Portum securum ad decimum quartum in *Illai colonia.* quintum gradum sunt Illæi. Eam Præfecturam primus tenuit Georgius à Fighereto Corrêa. regio optimi soli; ac, si campos excipias Piratinganos, omnium Brasilia tota feracissimi: rubri ligni, & satiuarum rerum abundans, nec facchariis carebat officinis: sed Barbarorum infestatione ita attrita omnia, vt propè ad vastitatem regio deuenerit. Erat tamen spes his proximis annis, pacatis iam Barbaris, & parta rebus pace, terræ fugibus, & sacchari prouentibus, cum multa eius opificij instrui possint ædificia, haud longo tempore coloniam reualituram; & in hoc quoque oppido est Societati sedes.

HÆ ad annum humanæ salutis vndequin-  
quage



quagesimum supra millesimum & quingentesimum adhuc in Brasilia erant Præfecturæ constitutæ. Interim rubri ligni, & saccari ingens numerus, & metallorum nescio quid è terra S. Crucis, nunc Brasilia nominata, quotannis exportabatur; nouæque subinde venæ metallorum aperiebantur.

ATQVE hæc de locorum natura, sitûque quantum satis esse visum est, in præsens dicta sint: alia, cum se offeret occasio, inter narrationem attingentur. Nunc tandem ad ipsum Societatis primum, deinde ad Iosephi Anchiætæ, cuius vnus causâ hæc exorsi sumus, in Brasiliam ingressum accedamus.

ANNO demum 1549. Ioannes Rex non tam Imperij, quàm Christianæ Religionis propagandæ studiosus, cum in Brasiliam Thomam Sofam Prætorem destinasset, ad continendos in officio Christiani hominis Lusitanos, Ethnicosque indigenas ad Christi fidem alliciendos, non contentus ea Sacerdotum, aliorumque religiosorum virorum copia, qui cum colonis ex Europa eò traiecerant, statuit è Societate IESU, quæ per ea tempora nata, diuina fauente Bonitate felici prouentu subcrecebat, Sacerdotes aliquot in eâ expeditione mittere; permotus maximè fama fructus, quem in eo genere Francisci Xauerij, & paucorum comitum ex eadem Societate labores, & industriam in India, aliisque vlterioribus gentibus peperisse cognouerat. Igitur petete Rege

à Simone Roterigio Præposito Societatis in Lusitania Prouinciali, quatuor lecti Sacerdotes, Emmanuel Nóbrega, Leonardus Nunnius, Antonius Pireus, & Ioannes Aspliquetæ Nauarrus, magni illius Martini Aspliquetæ patrueis. His additi non Sacerdotes eiusdem Societatis fratres duo, Vincentius Roterigius, & Didacus Iacobæus; Lusitani omnes, præter Nauarrum Aspliquetam. His omnibus datus ex eorum numero Rector Nóbrega, magnæ doctrinæ, & spectatæ virtutis, prudentiæque vir. Et quidem hunc nominatim Rex ipse optauerat, hominem fama sibi notum, antequam Societati se adiungeret, cum Conimbricæ studiis operam daret, ingenij laude præstantem, & Martini Aspliquetæ, primam in professione sacrorum canonum cathedram tenentis testimonio inter præcipuos probatissimum. Hæc tantula manus ad ingentem omnino syluam expurgandam, colendamque destinata. Aberat sub ipsum profectiois tempus huius consilij ignarus Nóbrega: nam tum fortè varia loca concionabundus peragrabat. Confestim admonitus, cum omnem festinationem adhibuisset, præuertente nauigandi tempestate, classis ipse discessum anteuertere non potuit. In nauim igitur Procuratoris Regij, qui eius rei causâ substiterat, receptus, secundaque nauigatione vsus, classem in cursu assequitur; vnâque cum aliis ad Villam veterem ineunte Aprili mense exscenderunt, cum

Olysi pone Kalendis ipsiis Februariis sol-  
uissent.

F. V. I. T. Villa vetus, vt apparet, ante id tem-  
pus cum portu Præfectura non ignobilis, pro-  
pe fauces inclyti illius sinus, cui ob egregiam  
situm, naturæque speciem commune nomen  
idioma Lusitanicum proprio quodâ iure, ex-  
cellentiâque attribuit Bahyam. Est enim Ba-  
hya Lusitanis maris sinus; & cum de Brasiliæ  
locis sermo est, Bahya excellenti quadam præ-  
rogatiua hunc sinum significat. Eum Ioannes  
Rex Francisco Pereriæ Continnio, vti supra  
demonstrauimus, possidendum concesserat,  
quem Pereria hæredibus reliquerat, & siue  
duæ Præfecturæ fuerant, siue, quod vero si-  
milis est, in Præfecturam vnâ Villa vetus,  
& Bahya coierant, Ioannes Rex, obseruata  
postea loci opportunitate, Pereriæ hæredibus  
digna compensatione remuneratis, Bahyam  
ad iura Regia traduxit. Igitur mense vno in  
Villa vetere exacto, ad lectum nouæ vrbi con-  
dendæ locum intra sinum ipsum, duobus in-  
de milliariis est itum; eoque translata multi-  
tudo, paucis in veteri sede relictis, quibus lo-  
cum deserere haud fuit commodum. Locus  
vrbi lectus in summo colle intra sinus ostium,  
portui imminens, vrbi à Salvatore nomen in-  
ditum.

I. A. M. sinus ipse ea pulchritudine est, natu-  
ræque præstantia, vt nihil ad adspectum amœ-  
nius esse possit. Videtur in eum effingendum

*Bahya de-  
scriptio.*

natura ad lasciuiam vsque artis vires contēdisse : eius ambitus in triginta circiter leucas circumagitur; plus viginti in eo peramœnæ viſuntur inſulæ, frequentes penè omnes, & ad cultum, fructumque opportunæ : plus quadraginta ſaccarariæ officinæ circà numerātur. In eum cū fluij alij, euripique è mari exſcēdentes, vagōque, ac multiplici flexu in mare remeantes, terram iucundo proſpectu variè diſcindunt; tum duo ingentes amnes, Paraquasurius, & Siriginus eò ſe exonerant, qui omnes, quaſi certamine ſuſcepto, pro ſe quiſque proſpectus contendunt augere dignitatem. Litora omni conchiliorum genere, quæ grata ſunt eſui, referta; mare ipſum piſcatu abundans : &, vt nihil deſit ad oblectationem, certo anni tempore à Iulio menſe ad Octobrem balænarum greges quæ maiorum, quæ minorum eò ſe inferunt; &, velut opes ſuas oſtentantes, ſuam quæq; prolem præ ſe agunt: tum blando diſcurſu variis luſibus oberrant litora, ſæpèque ſaltu è fluctibus ſe tollunt; ruruſque quaſi palæſtra exercitatæ, multa cum elegantia in vndas ſe demergunt, emerguntque, & quaſi hominum amore captæ, familiariter inter nauigia ſe inferunt. Diceres eas his quaſi choreis hominum probationem, plauſumque captare. Ad hæc naturæ commoda illa etiam benignitas, quaſi cumulus accedit. Extra ſinum ante fauces vtroque in litore tum ad dexteram, tum ad læuam non cōtemnen-

da electri vis, seu ambræ colligitur; non quidem illi similis, quod apud nos in Septentrionis oris ex arboribus exsudat; sed quod præter vulgatum ambræ nomen, commune cum illo habeat nihil. Colori nullus est honos, ad odoramenta adhibitum magno in pretio est; ut pari æstimatione cum auro pendatur. Vnde gignatur, incertum. Est illud tantum observatum; massam liquidam in fundo maris, sensim concretam, cautibus adhærescere, colorémq; induere ferrugineum, in atrum vergentem: albi etiam coloris non rarò inuenitur; maioris etiam pretij; è cautibus postmodum æstu maris auulsam, quod piscium, marinarumq; auisum escæ superest ( incredibile est enim omne genus piscium eius cibi quàm sit avidum ) in litus eiici; ibi etiam à testudinibus, cancris, aliisque eiusmodi bestiis auidissimè vorari: exiguam omnino partem in vsum hominum relinqui. Hoc spectando theatro, & speciosa naturæ ostentatione vrbs ipsa beatior. Hæc summo in colle, porrecta planicie explicata quatuor firmis castellis munitur. Infra portum habet, quantumvis magnarum classium commodè capacem: locum ad opportunitatem omnem aptiorem, aut oculis nobiliter oblectamentum non facilè alibi reperias; ut ex usque Belgio pingendi nobiles artifices eò venerint ad locum contemplandum, tantum ut eximiam speciem ad pascendos oculos in tabula proponant. Hic locus lectus Regni sedes,

Lusitanorum conuentus princeps, & vniuersæ caput iurisdictionis tum Regiæ, tum Ecclesiasticæ. Hic etiam Collegiata, & Cathedralis Ecclesia post annos aliquot cum suo Episcopo sedem habuit: ex eoq; tempore firma Regia potestate in Brasilia, forma Reip. constituta. Sed nos ad vrbis iam fundatæ, & constitutæ ciuitatis recēsenda commoda sensim deuenimus, nunc ad ipsa eius primordia redeamus; & primo Societatis I E S V in Brasiliam accessu cognito, eius progressiones ad Iosephū Anchiætæ aduentum percurramus.

*Vrbs Saluator ad Babyloniam conditur.*

Loco vrbi condendæ designato, & sua cuique aræ parte ad ædificandum attributa, Patribus quoque Societatis I E S V, & templo excitando, & ædificandis ædibus locus assignatus. Sed illorum prima cura fuit Barbarorum animos ad nouorum hospitem amicitiam adiungere, atque ad Dei rerum omnium conditoris cognitionem, Christianamque Religionem allicere. Et sanè non tam fera, durave ingēnia incolarum his in locis, quàm qui primi ad has terras appulerunt, nacti sunt. An quòd suapte natura minùs ab humanitate abhorrent? an aliqua cum Lusitanis consuetudine nonnihil mitigati? Nam etsi certum Regem, cuius imperio regantur, nullum habent, vicatim tamen distributi habitant, singulisque vicis vnus aliquis, si minùs potestate, auctoritate certè præstat cæteris. Ita siue fixam sedem habeant, siue vagentur, vt grues, & cerui, aliquem

*Brasilerum mores.*

aliquem gregis sui sequuntur ducem. Ita quot sunt vici, ac pene familiæ, tot quasi sylvestris plebeculæ Respublicas esse dixeris. Conspirant tamen alicubi vici multi quasi eiusdem pagi, in gentem vnam, totaque natio in gentes plures diuisa, nullam tamen ciuitatis formam habet, nullas leges, contentus nullos, commune consilium nullum, nisi quod fortuita cuique libido suggestit temerè: ita & sedes mutant, & bellagerunt inter se, vt cuique libitum fuerit, aut subito subcrescens ira animos inflammavit. Rarò admodum cõtingit, vt communi consilio publicè aliquid aggrediantur. Similitudinem nonnullam agnoscas in vaga illa hominum gente, qui è facie Ægyptiorum, & arenis Libycis se prognatos blaterant, quos in Europa Zingaros vocamus: qui etiam æneo colore è Brasilia videntur cognatione profecti. Sed Zingari proni sunt ad furta, à quibus Brasili abhorrent. Zingari vitant bella, quibus se mutuò Brasili consumunt. Utuntur nostris indumentis, & tenuia quædã exercēt opificia, quibus pecuniolam cogunt. Brasili nudi, inertes, operæ inimici, nulla industria alia, nisi venatu, piscatuq; vitam sustentāt in diem. Verùm qui circa hæc loca ad Bahyam versabantur, lōgo Europæorum vsu emolliti, multum iam de insita barbarie detriuerant: proinde quieti imperio parebant; & sermones de Deo, diuinisque rebus libenter audiebant. Patres ad suos vicos adeuntes humaniter excipiebant;

*Zingarii.*

eosdem vicos alios obeuntes multo cum obsequio prosequiebantur: nostrā humanitatem, morēsque placidos amabant; admirabantur solertiam, literas maximè suspiciebant, nobisque se similes esse etiam in Dei cultu peroptabant. Ita in extruenda vrbe adiutores Lusitanis se præbebant. Sed non facilè ab insita feritate, & corroborata per omnem mundi ætatem prauitate auellebantur penitus. Pueri tantum, quibus nondum per ætatem altè impressa barbaries erat, planiusque ex eorum ingeniis naturæ lumina emicabant, mirum in modum nostra consuetudine, nostraque institutione tenebantur; & fere ipsis parentibus non inuitis, multis etiam probantibus: ita ut non Christianæ disciplinæ præcepta tantum, solemnēsque preces, quas suos postea edocerent, sed Lusitanicam etiam linguam, & nostras literas magno parentum gaudio condiscerent; ut appareat barbariem, & prauitatem non à genere, neque à locorum, cœliverum natura; sed à praua institutione, fœdæque consuetudine hominum moribus adhærere. Hæ plâta summa cura ad omnem probitatem, humanitatemque læto prouentu excolebantur; ipsoque initio eorum lecti greges, & quasi seminaria instituta. Quod cōsiliū fuit ad multas vtilitatēs opportunum: nam & ipsi primū belluino illi vitæ generi subducebantur; & ad continendos in fide parentes, & gentiles eorum, res erat adprimè expedita: nam paulo adul-

*Pueri ad humanam institutionem faciles.*

*Puerorum seminaria instituta.*



adultiores facti, nostræque Religionis mysteria edocti, propria lingua, quæ didicerāt, suos edocebant; carminēque catechistico delectabant. Et cū Patres indigenarum vicos excurrebant; illis se comites addebant, & cū interpretum, tum catechistarum munere percommodè fungebantur; vsque eò, vt dictatas interdum gentili lingua conciunculas explicarent. Quibus rebus incredibiliter ipsorum parentes lætabantur. Ita factum est, vt breui, præter pueros, non contemnendus, vt se dabant initia, adulatorum numerus ad Baptismū idoneus legeretur. Reliqui minùs in sua feritate crudeles, sensimque ad vorandos homines minùs proni: quanquam in hoc genere non nisi quos aut ex rixa, aut in bello cœperunt, occideruntve fere solemne est iis comedere. Quod nō magis edacitatem, quàm iram, odiūque explendi causā faciunt: nam quos captos hostiliter abducunt, diligenter custoditos, ac multa sagina refertos, præpingues gulæ sacrificant, genialiterque inter se festacum lætitia, ac tripudio conuiuentes absument: Et cū veniunt vel morbo, vel ætate ad extrema, intelliguntque sibi esse moriendum, queruntur iniquo animo se mori, nisi aliquid ex inimicorum carnibus mandendum sibi detur. Ita comparati animo ad diuinæ iustitiæ tribunal sui mali ignari miseri deueniūt, alioqui sanctam societatem inter se amicè, fideliterque conseruant. Matrimonia cū cer-

*Quatenus  
humanarum  
carnum e-  
su utantur  
Brasili.*

*Coniugia  
Braſtorum.*

certa nulla habcant, ſed quam quĩſq; nactus eſt mulierem, vnam, vel plures, tandiu cum illis viuat, quandiu cum vtriſque bene conuenit, orto diſſidio ad libitum faciãt diuortium: multi tamen Patrum præceptis obtemperantes, firmum cum vna matrimonium conſtituebant. Hæc primo quatuor Sacerdotum acceſſu facta ſunt.

*Pærum Sc-  
cietatis labo-  
res & ærũna*

IN TER hos labores non omiſſa cura eſt extruendi cum templo domicilij. Sed neque erat, vnde fabri, operæve accerferentur, ſingulis ſatis ſupérque in ſuo opere occupatis; neque pecunia in ſumptus ſuppeteſcat: quò ſig-  
bat, vt & opus ipſi exſequi per ſe, & materiam è ſylua ſuis manibus cædere, humeris conue-  
here, aliorumque exemplo, ea, qua poterant arte, componere cogerentur: & vt erant magna præditi induſtria, uſu cogente, paucis diebus fabrilem tum lignariam, tum cémentariam æquè atque periti magiſtri exercebant. Quibus in laboribus pauculis illis, quas ex Lulitania attulerant, veſtibus detritis, ac lace-  
ris, breui tẽpore excalceati, ac ſeminudi, vtroque in opere, & diſſeminandi verbi Dei, & extruendi ædificij verſabantur. Sed obſoletus, lacérq; veſtium habitus inter homines nudos verbũ Dei prædicantibus nitorrerat; vt dicere illi poſſent, qui euangelizabantur Euangelis-  
tis ſuis; *Veſtimentum tibi eſt: eſto Princeps naſter.* Accedebat & illud incommodum omnium durifſimum, quòd omni apparatu deſtitutis  
quo

quotidianum victum mendicatò quærere necesse erat. Sed haud multo interiecto tempore Prætoris cura illorum inopiæ subuentû est.

*Christianorum prostratum corrupti mores.*

CÆTERVM in re Christiana procuranda non minùs primis temporibus cum Christianis, quàm cum Barbaris, illis negotij fuit. Et quidem eos, qui cum classe venerant, non magnum fuit continere in officio, integros adhuc è Lusitania asportatos, & nulla externorum morum contagione inquinatos: qui verò à primis temporibus in has terras transierant, longo multorum annorum decursu Ecclesiastico Pastore, Doctoreque bono destituti, licentiæ assueti, multum à Christiana integritate degenerauerant: mira Religionis negligentia: Christiani hominis officij nulla cura; nullum nisi augendæ rei studium, & voluptates comparandi. Nullum iniuriarum genus in indigenas non iustum putabatur: eos dolis circumuentos excipere, iniusta detinere seruitute, modis omnibus vexare, nulla religio; quin etiam impedimento erant, quò minùs ad Christianam Religionem vocarentur, ne potestate eos diuexandi priuarentur. Adhæc ancillarû, pellicumque greges Barbarorum more alere decòri erat. Episcopus per id tempus nullus, nullus Antistes, Ecclesiastica potestas nulla. Illi ipsi, qui prohibere debuissêt, qui ex Europa magistri morum venerant, socij in scelere, hortatores erant ad iniuriam: licere impium genus, Christiano nomini infestum omni contumelie

tumelia afficere. Ita praua doctrina non modò scelera fouebant, sed multa etiam audacia vera docentium conatibus aduersabantur. Erant mancipiorum, tum seruorum, tum ancillarum greges, quos contra ius, fāsque quā dolo, quā rapto occuparant, dimittendi; erant ipsi Christiani ab illorum rapina, atque ab iniuria auocandi; quorum vtrumque, vt nouū, & ad eam diem ipsis inauditum, morte grauius existimabatur. Multi præterea è tenuioribus, & ex infima fæce in tāta Religionis negligentia, & effrenatæ libidinis licentia, quod illi genti prouum est, Barbarorum consuetudine, & ipsi efferati in mediterranea secesserāt; ibique inter Barbaros Barbarorum more viuebant, Christianam propè Religionem obliti. Et hi quoque ad suos fuere reuocandi.

*Malefici inter Barbaros Patribus aduersantur.*

SVPER hæc omnia erat etiā propria, & quasi domestica Barbarorum scabies, & rubigo, exterenda. Malefici inter eos, qui cæteris audacia præstabant; impostores hebetissimi se Sanctos, & deos faciebant: vana multa pollicebantur, prædicebantque euentura, & cum absurda multa stultè blaterarēt, illorumque mendacia tantum non manibus tenerentur; tanta tamen est ingente hebetudo, vt illis nihilominus fides haberetur. Hi modis omnibus populares à Patrum cōsuetudine auertebant; Patres id moliri, vt, vel deceptos in seruitutem abducant, vel iis exitium, extremamque

mámque perniciem parent. Enimuerò in tam alta barbarie non vsque eò infans impietas fuit, afflatu præsertim Tartareo adiuta, vt non interdum aliquid ad persuadendum non ineptum proferat. Et hi quoque fuère superandi. Sed magna vis est veritatis, diuina præsertim gratia fauente. Constantia tandem, & diuina ope Patrum labores promouente, cœperunt hæc quoque monstra ferocia mitescere: multi enim è nostratibus reprehensionum grauitate permoti, ipsa præsertim æquitate causæ perspecta, diuina affulgente luce, probare tandem cœpère, quod iniquo antè animo ferebant. Ita multi reuocati ab iniuria, multaque contra ius, fasque occupata seruitia manumissa; exactis que pellicibus, legitima matrimonia coniuncta multa: tum qui cum Barbaris viuere assueuerant, non sine magno labore ad Christi vexilla reuocati; & magna quoque ex parte harioli compressi. Et, quoniam malum longè per omnes oras emanarat, rebus vtcunque ad Bahyam compositis, fuère Patres in Præfecturas alias dispertiendi. Leonardus Nunnius cum Didaco Iacobæo ad S. Vincentij coloniam profecti, ibi hæserunt. Eodem fermè tempore Emmanuel Nóbrega Pernambucum venit. Vtrobique Dominicus ager iis, quas dixi sentibus expurgandus. Ita, diuina fauente ope, post multos exhaustos labores, fatæ segetes fructus lætiores protulerunt. Vtrobique locus lectus extruendis

*In S. Vincentij Præfectura, & Pernambuci sedes Patribus datur.*

*In Illis, Por-  
tus securo. &  
Spiritu san-  
cto coloniis,  
Societati se-  
des datur.*

Societati ædibus, & templo. Cæteri Patres cum in Bahya residerent, cæteras circa Præfecturas, Illæos, Portum securum, & Spiritum sanctum obeuntes, agrum Dominicum quotidie letioribus frugibus fœcundiorum reddebant. Interim in his tribus Præfecturis domicilia Societati sunt extructa, & puerorum indigenarum seminaria magno cum rei Christianæ fructu legi cœpta. Sed Aspliquetam præcipuè totum peregrinationes ad Barbarorum vicos etiam in mediterraneis longè positos abripiebant. Et, vr olim Paulus ad Gentres edocendas; sic ille præter cæteros, ad Barbaros erudiendos diuino instinctu lectus videbatur. Ipsorum idioma, quod quandam cū suo gentili similitudinem habere videretur, omnium aptissimè perceperat. Sic, quocunque se conferret, magna vbique gratia excipiebatur. Fructus etsi non par labori, aliquid boni tamen ad rem Christianam semper afferebat: nam, quamuis non omnibus, qui iam capaces essent, Baptismum ob eorum feros mores, & inconstantiam credere auderent, multi tamen in ipso mortis confinio baptizabantur, & pueri ad seminaria legebantur. Tum dilatum ipsum Christianæ rei votum sensum illòs ad suæ feritatis odium afficiebat, Subinde tamen Patres statim temporibus ad Christianorum loca concionibus, & Sacramentorum administratione fidelibus excolendis se referebāt. Hoc Christianæ rei fructu primus

primus post in Brasiliam aduentum annus circumactus.

ANNO postmodum millesimo quingentesimo quinquagesimo quatuor alij Sacerdotes auxilio missi, Saluator Rotericus, Franciscus Pircus, Emmanuel Payua, & Alfonso Blasius: subindeque alij quotannis mittebantur. Aucto operarum numero, auctus etiam laborum fructus: multisque in locis Societati sedes constituta, & domicilia, diuersoriaque variis in oppidis, vicisque tum Christianorum, tum Ethnicorum extructa. Addita praeterea seorsim à frequentia Oratoria, paruaque sacella, tum ad Societatis usum, tum ad pietatem laicorum excitandam: ad quae & quisque priuatim ad orandum commeari, & è vicis, oppidisque supplicationes pro tempore agmine ire consuefcent. Aucta praeterea etiam puerorum semina, ad S. Vincentium, ad Spiritum sanctum, ad Illaos. Sed in vire Saluatoris ad Bahyam ducenti circiter indigenarum filij alebantur, qui omnes usu linguae, & suorum consuetudine ad suae gentis homines ad Religionem alliciendos, magno erant Patrum laboribus adiumento. Res denique Dei beneficio secundiore in dies cursu procedebat, & Christiani veteres non ab iniuria modo, sed à vitae quoque prauitate se ad Christianam pietatem referebant: ita ut non pauci rerum Brasilicarum, Brasilicque idiomatis bene periti, diuino instinctu permoti, Societati

*Anno 1550.  
quatuor alij  
Sacerdotes  
veniunt.*

*Domicilia  
Societatis  
alia extru-  
cta.*

*Puerorum  
seminaria.*

tati IESV se addixerint; bonosque, ac strenuos tum ad peregrinationes, Barbarorumque institutiones, tum ad aliarum rerum, linguæ præsertim percipiendæ Patribus adiutores præbuerint.

His supplementis aucta Societas maiore contentione ad Barbarorum conuersionem incumbibat. Itaque & peregrinationes crebriores susceptæ, & in gentis interiores fines penetratum maiore semper cum Religionis propagatione; ita ut etiam inter Barbaros, & vici, & Ecclesiæ Christianorum censerentur; gregesque catechumenorum ad Baptismum instituerentur. Neque interim Christianorum veterum, apud quos omnia penè iam erant in tuto cura neglecta, sed vitæ exemplo Socij, doctrina, concionibus, aliisque Societatis ministeriis omnes ad Christiani hominis officium incitabant.

*Anno 1553.* Hoc rerum statu, cum Religio maiora-  
*Iosephus An-* caperet in dies incrementa, anno eiusdem  
*chieta cum* sæculi tertio, & quinquagesimo è Lusitania  
*aliis venit* superuenire Sacerdotes tres, Aloysius Gra-  
*in Brasiliã.* na, qui Conimbricense Collegium Rector  
 administrarat, Blasius Ludouicus, & Ambro-  
 sius Pireus, & cum his fratres quatuor, Gre-  
 gorius Serranus, Ioannes Gonzalus, Antonius  
 Blasquius, & omnium natu minimus, tãquam  
 Isai filius lectissimus, per eam, quam antè dixi  
 occasionem, Iosephus Anchieta. Aucto iam  
 in Brasilia Sociorum numero, expedire visum  
 est,



est, familiam vniuersam in Prouincię formam redigere. Ergo Prouinciale regendi munus Emmanueli Nóbregæ demandatum. Is quo tempore Anchieta cum comitibus Bahyam tenuit, S. Vincentij morabatur: ibi enim per id tempus, nullo adhuc in Brasilia Collegio constituto, Sociorum conuentus versabatur; & cum scholæ adhuc nullæ, nullique magistri haberentur, Præpositi Prouincialis, viri inter eos doctrina, & prudentia insignis, responsa, præscripta, institutæque scholarum, & Collegiorum instar erant. Hunc quoque Anchieta, postquam se ex morbo, & nauigatione recreasset, Bahya euocatus, primus omnium è Societate in Brasilia Latinas literas docere cœpit. Schola instituta est Piratinin-gæ. Auditores habuit è Societate nonnullos, & valdè bonum numerum Lusitanorum adolescentium Quo in munere magno cum discipulorum fructu, & probatione omnium per annos aliquot se exercuit: sed maior opinione fuit labor. Non erat tum ea copia librorum in Brasilia, vt singuli discipuli suos proprios codices, vnde Grammaticæ præcepta discerent, Latinæque linguæ, & rerum aliarum obseruationes haurire possent, haberent. Huic incommodo magister (agnosce miram in adolescente charitatem) suo labore subueniendum ratus, sua manu iis, qui carebant, in libris papyraceis, quæ discenda forent, descripta dabat. Huic operæ, quoniam

*Iosephus Anchieta primus Latinas literas docet in Brasilia.*

distributæ in horas singulas exercitationes diurnum tempus excludebant, nocturna somni tempora, nondum editis Societatis legibus, descriptaq; disciplina, addicebantur, ut bene sæpe noctes, quantūvis longæ essent, in matutinum, cū diurna repetenda esset opera, insomnes traherentur. Hac suscepta consuetudine, ita deinde corporis naturam obtemperantem habuit, ut, quandiu vixit, in somnia nunquam illi grauis fuerit. Inde tam familiaris illi postea, & vīitata per multas horas in preces pernoctatio. Sed haud dubiè non sine diuina ope factum est, ut adolescens, recens è morbo, & periculoso, & sæua pertinaciā diuturno, tanta cum corporis vexatione, tam laborioso, atque ærumnoso operi par fuerit. Adiecit inde animum ad Brasiliicam linguam addiscendam: quo in studio tantū protecit, ut non modò peritè, promptèque loqueretur; sed artem etiam Grammaticam eiusdem linguæ conscriberet; quæ post aliquot annos ab ipso, aliisque idiomatis bene peritis recognita, & aucta in Lusitania typis excusa, magno compendio eorum, qui ad hanc Brasiliicam excolendam vineam se conferunt, postea fuerit. Haberi enim cœptæ sunt in Collegio Bahyensi ad eos, qui eò veniunt, quotidianæ scholæ: quò fit, ut non magno labore breui omnes eā se lingua commodè exercent. Accedit & illud commodū, quòd ita ordinata est, ut paucis obseruatis dialectis,

*Brasiliica lingua Grammaticam, & alia Brasiliico idiomate scribit.*

etis, communis ea lingua sit multis aliis nationibus, quæ mare accolunt, ab ostio Maranonis fluminis per omnem maritimam oram usque ad Paraquarios, qui in continenti Hispanici Regni sunt, intra Peruuium. Neque his finibus ingeniosi se continuit industria adolescentis; sed ad vltiora se porrexit: nam & Dictionarium etiam ordinare aggressus est. Christianam doctrinam, pleniorēque Catechismum in eandem linguam transtulit: Dialogos etiam per interrogationes, & responsa, quibus Religionis mysteria scitu digna explicantur, ad catechumenorum exercitationes eodem idiomate conscripsit. Institutionem etiam ad interrogandos inrer confessionem pœnitentes. Syntagma quoque monitorum, quibus morientium animi extremo illo tempore confirmantur: & hæc omnia dum quotidianarum scholarum occupationibus teneretur. Magnum vtique, præsensque Societatis hominibus instrumentum ad sua exercenda ministeria comparauit. Et, vt erat studio ad rem diuinam promouendam indefesso, & studio par ingeniū, industriāque suppetebat, ad auertendos à lasciuiis cantionibus Christianos veteres, Neophytosque, & catechumenos iucundo oblectamento ad pietatem incitandos, contulit se ad pia conscribenda carmina. Erat ille linguarum quatuor, Latinæ, Lusitanicæ, Hispanicæ, & Brasiliicæ bene peritus. His omnibus se scribendis ver-

sibus multa cum industria exercuit. Res illi  
 successit ad votum: nam & lasciuas cantiu-  
 culas, quæ vulgò canebantur, in pia cantica  
 conuertit, & nouos ipse cantus, à se multa  
 cum venustate compositos in vsum induxit.  
 Quæ ita omnium magna gratia excipieban-  
 tur, vt iis interdiu, noctûque assiduè plateæ,  
 vicique personarent; in Ecclesia etiam inter  
 catechistica cantica decantarentur. Quæ res  
 omne genus hominum tum nostratium, tum  
 indigenarum ad piè Deum venerandum exci-  
 tabat. Dramaticum etiam genus, rem omnino  
 nouam, neque vnquam his in oris cognitam,  
 Deo maximè probante, tentauit. Optabat Nóbrega vitia quædam corrigi, quæ in Christia-  
 nos veteres irrepserántne, an inoleuerant?  
 quibus diuini cultus reuerentia, etiam apud  
 Brasílos minui posse videbatur. Postulauit à  
 Iosepho ea de re Drama vt conscriberet, po-  
 pulo exhibendum. Conscribitur; theatrum  
 legitur sub dio: excitatur scena, actores præstò  
 sunt. Et quoniam ita scripta erat fabula, vt in-  
 ter Lusitanita diuerbia Brasílico sermone epi-  
 sodia multa insererentur, eius rei fama multos  
 exciuit ex vniuersa Præfectura tam indigenas,  
 quàm Lusitanos ad spectandum. Fabula da-  
 batur in oppido S. Vincétio. Cùm maximè ad  
 audiendū cōuenissent, ecce tibi horrida tépe-  
 state cælum obnubitur; atra nubes, dēsaq; su-  
 perincūbens raras guttas, grauésque excussit.  
 Perturbauit ea res caueā totā; spectatoresq; se  
 regi

*Drama scri-  
 bit, & populo  
 dat.*

recipiebāt. Prodit Iosephus, præsentique animo, magna voce vetat loco moueri quenquā; certò futurum, vt ante absolutam fabulam imber nullus decidat. Nempe hoc est sanctis viris datum, vt, cū rebus trepidis bonæ spei pollicentur aliquid, voce, vultu, spiritu, ipsōque genere verborum, in primis verò diuino Spiritu interiore quadam sympathia hominum animos afficiente, id assequantur, vt persuadeant. Ita, seu perspecta aliis in rebus promissorum veritate, seu Deo spectatorum animos diuino suo Spiritu intus confirmante, ea vox veluti cælo missa excipitur. Nullus mouetur; peragitur fabula, quietè spectante, & plaudente populo. Tenuit actio in horas tres, nubibus pluuiam in singula momenta minuantibus. Diuina tandem bonitate factum est, vt nō nisi peracta fabula, dimissōque populo, pluuiæ, quasi tum venia data, ingenti fragore, imperūque ventorum decideret. His, aliisque id genus rebus, & vitæ in quotidiana consuetudine sanctimonia perspecta, omnium in se oculos, animosque conuerterat; vt iam docendi munere leuatus, vnà cum Sacerdotibus Apostolicum in morem Barbarorum vicos, ad fidem propagandam, nondum sacris ordinibus initiatus, obiret.

*Leuatus docendi munere, ad Barbaros Religione imbuendos peregrinatus*

A C C I D I T, vt cū comes, & interpret Sacerdoti cuidam datus esset, inter ambulādum in senem indigenam incideret, vt prodebat ad spectus centenario maiorem (sunt enim iis

*Admiranda senis Barbari ad fidem conuersio.*

in locis non pauci, longève admodùm ætatis) sermonem cum eo miscet: multa illi de rerum omnium conditore, deque diuinis rebus, vitæque futura exponit: quarum rerum nullam senex ad id tempus cognitionem habuerat; iis tamen cognoscendis tanta lætitia perfunditur, vt filios, nepotésque, qui non longè aberant, aduocarit, ad boni nuncij lætitiã communicandam, eaque percipiendã, seque iuandũ, ad eorum memoriã domi repetendam. Tantæque ea cognitione animus iucunditate complebatur, vt ne noctu quidem somnum caperet earum rerum cogitatione, colloquutioneque delectatus. Tandem paucis diebus, cùm satis videretur instructus, in Ecclesia sacro fonte abluitur, tantoque eo die gaudio completus est, vt graue illi esset à sacris parietibus discedere, nisi vt inde in cœlum euolaret. Sed vnde tanta in senẽ, & Barbaro, & hebetẽ repente ex diuinis rebus animi lætitia, tantus cœlestium rerum amor, despectusque terrenarum? Nimirum altitudo illa diuitiarum, sapientiæque diuinæ admiranda, cuius incomprehensibilia iudicia, & viæ sunt inuestigabiles, in illius animum lucis suæ radios infuderat: liberque ille, & vt videbatur, fortuitus Iosephi congressus ad eum temporis articulum diuina sapientia ita attemperatè directus est, vt prædestinatæ senis salutis forti diuinæ prouidentia dispositione inseruierit. Sed haud diu sinceri Neophyti vota distulit diuina

na Bonitas: paucis enim à sua regeneratione diebus vinculis corporis solutus, ad eã, quam præoptauerat, vitam translatus est. Hunc fructum Iosephi labores, & studium in diuina causa semper vigilans protulêre. Denique tantam de se, deq; sua virtute opinionem concitauit, vt ipse Nóbrega Præpositus Prouincialis quocunque iret, eum sibi comitem adoptaret; sibi nō interprêtem modò, sed etiam consiliarium adhiberet: nihil enim fere maiorum, minorumve rerum, illo inconsulto facere consuevit.



VITÆ  
IOSEPHI ANCHIETÆ  
E SOCIETATE IESV  
LIBER SECVNDVS.

**A**M Lusitana , Christianaque res , Dei Bonitate , felici cursu procedebant , cū ecce , vnde minimè timebatur , grauis exorta perturbatio subito tumultu , trepidationeque omnia compleuit. Est in extrema Zona torrida , sub ipso Capricorni tropico ad vicesimum tertium gradum & dimidium , inter S. Vincentium , & Spiritum sanctum colonias , peramplus , & opportunus maris sinus , haud multo minor Bahya. Locum incolæ parum apto vocabulo *Flumen Iannuariense* nominant : flumen tamen non est ; sed mare intra terras irrumpens immanem sibi aperit hiatum , in leucas fermè quatuordecim. Nomen idem & mari , & omni circà Regioni. Multi vberes amnes in sinum influunt , quorum maximum , quem *Macicum* nominant ,

Lusita

*Sinus Iannuariensis.*



Lusitanico Tago maiorem esse aiunt. Quadraginta circiter intus habet insulas: earum multæ, quæ magnitudine præstant, incoluntur; reliquæ ad ornatum à natura editæ; multæ item, vt in tanto sinus ambitu stationes, sinúsque, alij minores, instar portuum tutam nauigiis sedem præstant. Eius fauces, quæ mare intrat, tam angustum coëunt in spatium, vt quâuis parui, ænei tormenti ictum non excedant. Locus adhuc, quod nullus externo metus esset ab hoste, & indigenis fere nulli esset vsui; ne Regiæ vires tot tuendis præfidiis distraherentur, incustoditus, & neglectus habebatur; cùm satis custoditus videretur, duabus hinc inde firmis cinctus Præfecturis. Huius opportunitatem loci, vt par est credere, hominis non imperiti, & inter Lusitanos, seu fortè, vt fit, seu per causam mercimonij, aut aliam quamuis, consilio dissimulato, versati, animaduenterunt, & indigenarum à Lusitani alienatione obseruata, posse se, si eius loci potirentur, eadem, quæ Lusitanis emolumenta ex eius terræ fructibus percipere; & locum ad figendam sedem esse opportunum. Inde anno ab humanæ salutis exordio 1556. Nicolaus Villaganonius vir clarus in Gallia, & ordinis fratrum militum S. *Gallia*  
Ioannis Cômendatarius cum Gallorum in *classis.*  
structa classe improviso superuentu hunc sinum occupat. Ostium pro renata munimento claudit, indigenasque ad belli societatem trahit. Gens Tamuyæ nominantur, & multirudi-

*Tamuya, &  
Tamuyani  
belli ini-  
tium.*

neabundantes, & bellandi ferocia timendi. Ij  
antè cum Lusitanis pacem habuerant, societa-  
tèmq; seruarant: sed iniuriis exasperati, ab  
eorum se amicitia subdlexerant. Hanc Gallus  
nactus occasionem, comitate, & largitionibus  
corum animis sibi adiunctis, fœdus cum illis  
aduersùs communem hostem facit. Gallis lo-  
ci opportunitas, Zamuyis Gallorum arma ani-  
mos addebât. Ergo præter claustrum custodiam,  
vna intus ex insulis lecta, quam castello ex so-  
lido saxo ferro, & arte excuato communire  
aggrediuntur. Ad eam rem indigenæ operam  
suam libentibus animis contulerunt. Locus  
erat ad bellum ducendum aptissimus: ager cir-  
cà pabulo abundans, pecorum, & largam ali-  
mentorû copiâ, orizæ præsertim, & farine eius  
terre, quam *mandiocam* appellât, suppeditabat:  
aromatû, maximè piperis, ac zingiberis, quo-  
rum exportatio Lusitanis interdicitur, brasili  
ligni, & saccari ingens vis magnis prouenti-  
bus aduenas locupletabat. Apparebântq; in-  
dicia metalli fodinarum, quæ omnia ad alen-  
dum bellum erant opportuna; præsertim præ-  
tiosarû mercium inuitatu, supplementis subinde  
è Gallia aduenientibus. Hæsit hæc macula im-  
perio in quartû annum, neq; hostes ex eo nido  
extrudi potuerû, cùm interim Zamuyes se ad  
bellum compararent, Gallos hospites in effo-  
dienda munitione terræ fructibus, commea-  
tûque conuehendo, aliisq; opportunitatibus  
comparandis strenuè adiuuarent; donec tan-  
dem anno Domini 1557. Ioannes Lusitaniæ  
Rex

Rex, doctus à fide dignis auctoribus, multis grauibúsq; iniuriis Brasílos à Christianis nostratibus vexari; magnóque eam rem impedimento esse ad eos ad Christianorum gregem adducendos, Mendem Salam, virum integerrimum, ac magni animi hominem, multo rerum vsu, prudentiáq; clarum, & multa etiam doctrina ornatú ad Brasíliam regendam summo cum imperio misit. Cui etiá in mādatis dedit, curaret omni ope, vt Brasíla gēs ad Christi fidē adduceretur. Nullú maius officiú ipsi imminere, quàm vt eius oræ homines ad Dei cognitionem, cultúmque traducantur, impedimentáque omnia amoueat, quibus gentis possit libertas impediri. Mendes cùm primùm in prouinciam venit, nihil prius habuit, quàm vt Regis mandata de re Christiana promouenda exqueretur. Quare missis circum vicos, populósque indigenarum Bahyam accolentium, qui gentis primores ad se accerferent, egit cum illis de conditionibus pacis, in quibus prima lex fuit, ne vlllo vnquam tempore humanis carnibus, ne suorum quidem inimicorum, aut hostium vescerentur: altera, vt Christianæ legis magistros, Societatisque IESV Sacerdotes ad se adeuntes exciperent; ac sanctum inter ipsos Euangelium, diuinámq; Dei legem prædicare permitterent. Vtrique rei libentissimis illi animis assenserunt. Persuasit etiam, vt, minutis, infrequentibúsq; villis, ac vicis relictis, sed maiores, frequentiorésque vnà multi reciperent; in communésque quasi ciuitates coalescerent; in íisq; Ecclesias excitarent,

*Mendes Sala Prætor rem Christianam in Brasíla ordinat, gentis libertatem constituit.*

tarent, quo statis diebus Christiani ad diuinæ legis præcepta, Christianamque doctrinam addiscendam, in primis verò rerum sacrarum causâ contuenirent; in iisque sedem haberent, qui è Societate IESV Sacerdotes ad ipsos Christianæ vitæ præceptis imbuendos ventitarent. Neque minùs prouidus fuit in eorum libertate constituenda, vetuitque eos in posterum captiuos duci: & qui per iniuriam detinerètur, eos edixit manu mitti, grauiter in eos animaduertens, qui illorum iura violassent. Regis voluntatem esse, vt nulla in re iis fiat iniuria.

F V I T inter nostrates magnis opibus, magnæque potentiæ vir, qui miseræ gentis assuetus iniuriæ, ad Regia edicta contumacem se præbuit in iniuria perseverans; multosque per iniuriam captos dimittere detrectabat. Auersus hunc Prætor validam militum manum misit, qui iniuriosi hominis ædes disturbarent: illéque contumacæ pœnas dedisset, nisi, positis spiritibus, animum ad modestiam, & legum obedientiam composuisset. Paraquasurij fluminis accolæ Bahyensibus finitimi, infesti Christianis suis gentilibus erant, qui circa Bahyam Ecclesiam frequentabant: eosque assiduis iniuriis laceßebant, vsque eò, vt etiam nonnullos interfecerint. Postulauit Prætor, vt iniuriosi illi sibi dederentur: id illi ab insita feritate, sua freti multitudine, & Lusitanorum arma nondum experti, neglexerunt. Eos Prætor ipse in ipsorum finibus bello adortus, magna illo-

rum

rum edita strage, plus centum sexaginta villis exustis, ita attriuit, ut ad pacem petendam adigerentur, quam iisdem legibus, quibus Bahyenses impetrauerunt. In primis verò, ut Ecclesias & ipsi ad Christianorum sacros ritus, conuentusque celebrandos extruerent; Patresque è Societate Iesv inter se, ad Ecclesiarum, parœciarumque curam versari paterentur.

REBUS Imperij, Religionisque ac iustitiæ legibus ad Bahyam constitutis, ad rem bellicam, Ianuariensemque sinum vindicandum animum adiecit. Hostes interim quatuor iam annorum spatio faxea in insula munitione absoluta, nouis ex Gallia supplementis, & Tamuyarum multitudine magis, magisque in dies augebantur. Bellum adhuc nullum vitro intulerant, absoluenda munitione occupati, & emolumentis interim mercimoniorum contenti. Sed absoluta iam munitione, domibusque cum cisterna ad aquilegium in saxo excisis, periculum erat, ne, sollicitatis per Tamuyas aliis gentibus, & superuentu quotidie nouæ multitudinis ex Gallia, bellum inferrent, cum magno saltem tum priuatorum, tum etiam Regiorum vectigalium detrimento, & periculo de tota prouincia non contemnendo.

*Bellum Ianuariense suscipitur.*

DVM hæc in Brasilia geruntur, in Lusitania magno cum totius rei incommodo Ioannes Rex vita fungitur; & maiore adhuc cum

*Ioannes Lusitania Rex moritur. Sebastianus nepos illi succedit.*

incommodo biennio, trienniôve antè Ioannes Ioannis Regis filius è viuis excesserat, vxore grauida relicta, è qua maturo tempore natus Sebastianus, Regni fuit hæres. Eius auia

*Catherina  
Regina Seba-  
stiani auia  
Regnum pro  
nepote admi-  
nistrat.*

Catherina Austriaca Caroli V. Augusti soror, virilis, ac Regiæ indolis fœmina pro nepote Regni administrationē suscepit. Hæc periculo cognito, idonèam classem ex Lusitaniâ miserat; qua assumpta Prætor, magno procerum comitatu, lectâ suam cuiusq; manû ducentiû, adiunctis nauibus aliis, quæ ad oræ Brasiliæ custodiam dispositæ erant, contractisque copiis, tum ex omni Lusitanorum delectu, tum ex indigenarum auxiliis anno Domini 1560.

*Anno Do-  
mini 1560.  
Ianuariensis  
sinus è Gallis  
recipitur.*

venit ad sinum Ianuariensem; ac perruptis claustris, sinum intrat, arcemque saxeam, rem humano æstimatu inexpugnabilem machinis, præliôque fortiter oppugnare aggreditur. Et, cùm maximè intenti essent vtrique in prælium, delecta Lusitanorum manus ab castelli latere à prælio auerso, prærupto, & confragoso, ac propterea hominum iudicio inaccessio, pertinaci virtute adrepentes, in castellum eadunt; subitôque impetu sulphurei pulueris apparatu potiuntur. Consternati Galli rei iactura, & inopinato hostium ausu oppressi, desperata victoria, deditionem fecêre; castellôq; cum machinis, omniq; bellico apparatu relictis, ad naues se recipiunt. Indèque dilapsi, partim patriam repetierunt, partim cum Tamuyis, belli renouandi, & mercimo-

nij exercendi causâ hæserunt. Prætor victo-  
ria potitus , castellum disiecit ; præsidioque  
machinis , bellicóque apparatui asportan-  
do relicto , mense Iunio Bahyam se retu-  
lit , certiorémque Reginam Sebastiani Regis  
auiam de toto bello per literas fecit. Gratiæ  
illi actæ , datúmque negotium , vt Ianuarien-  
sem sinum muniret ; firmámque idoneis adie-  
ctis munitionibus coloniam deduceret ; ne ite-  
rum maiore cum periculo belli sedem hosti-  
bus præberet. Tamuyæ interim maleficio non  
abstinebant : quinetiam Vincentianæ colo-  
niæ detrimentoso magis , ac molesto , quàm  
aut graui , aut continenti bello infesti erant.  
Excursionibus , ac direptionibus litora fæde-  
bant , Neophytos in opere occupatos , nec opi-  
nantes improuiso aduentu adorti excipie-  
bant : captos viros , mulieres , pueros abduce-  
bant. Belli præmia nulla , nisi captiuos hostes ,  
occisos more patrio genialiter vorare. Bien-  
nium tenuit molesta illa infestatio ; neque vl-  
la vi Barbárorum audacia cohiberi potuit. Emmanuel  
Nóbrega regendæ prouinciæ mu-  
nere in Aloysium Granam translato , S. Vin-  
centij præses eius familiæ degebat . Is collo-  
quiis , & concione nostros accusare , monere ,  
ipsorum iniuria fieri , & iusto Dei iudicio , vt  
aduersariis iam secundæ , nostris semper ad-  
uersæ res procederent ; orare , hortari , vt à mi-  
seris diuexandis abstinere : quandiu enim  
iustam querelarum causam habeant aduersum  
nos,

*Tamuyarum  
bellum, & i  
festationes.*

*Emmanuel  
Nóbrega re-  
genda prouin-  
cia onere co-  
dit.*

nos, nostros nunquam bello potiores futuros. Ad has cœlestis iræ denunciationes & minas, domi etiam totius familiæ preces, corporisq; afflictationes, ad diuinam indignationem auerrendam, mentésque hominum ad iniuriarum pœnitudinem permouendas addebantur.

*Vincentianorum constantia infide.*

INTER tot tantásque turbas, infestationésq; Vincentiani Neophyti suæ fidei, pietatisque documenta dedêre non obscura: nam quòd nullo septi munimento in vicis habitarent, eoque faciliùs excursionibus hostium paterent, mors in dies singulos impendens eos ad maius quotidie studium pietatis excitabat; vt frequentes conuentibus adessent, culpas diligentius vitarent, sacramenta obirent, Christiano denique homine dignam vitam agerent. Multa in tanta miserorum calamitate contigêre, sinceram illorum fidem, & spem in Deum protestantia; quorum vnum, aut alterum referre ad perspicuum diuinæ gratiæ documentum non erit alienum. Captos abducebant miserum hominem cum filio. Rogauit ille ne se comederent, neve interficerent, quòd essent ex disciplina eorum Patrum, qui Deum, & res cœlestes homines docerent, ratus huic obtestationi reuerentiam habitum iri; alioqui futurum, vt diuina ira absumerentur omnes. Barbari vera monita risum, iocúmque fecêre, atque vtrumque suis genialibus ludis comederunt. Neque ita diu diuina ultio dilata; omnes initio à duce factò, lue gentem inuadente, ad vnum cõsumpti,

*Christiani duo, pater, & filius ab hostibus vorati.*



vastum vicum illum reliquerunt. Mulier vidua die Dominico pœnitentiæ, Eucharistiæque Sacramento suscepto, domum rediit; &, cum rumor increbuisse, periculum esse à Tamuyis, dixit in familiari sermone, passuram se nunquam, ut viua à Tamuyis abduceretur, nec suæ vis inferretur castitati. Quod dixit, præstitit: nam biduo, triduove Tamuyæ superuenientes domi deprehensam, cum captam in suas canoas (nauigiorum genus id est) viriliter reluctantem, nulla vi, nulloque conatu imponere potuissent, vulneribus confectam exanimem in litore reliquerunt.

*Mulier vidua fortiter mortem fert pudicitia servanda causa.*

EANDEM palmam tuendæ causâ pudicitie & altera tulit adolescentula, matrimonio iuncta, quæ præter cæteras studio dedita pietatis, frequentatione concionis, Sacramento- rum, aliarumque piarum exercitationum multum profecerat ad studium virtutum. Hec item ipso Dominico, quo Sacramenta perceperat die intercepta, abductaque cum ab hoste Barbaro, quâ minis, quâ blanditiis sollicitata adduci non posset, ut neque flagitio, neque barbaro connubio assentiretur; multisque diebus varias in partes versata, in sententia tuendæ castitatis persisteret, Barbarorum vetricam esse pollutæ vitæ præoptavit.

*Adolescentula nupta eadē causa mortem fert.*

TOT malis affectis tum indigenis; tum colonis, de colonia deferenda iam consilia ferrebantur; & erant in metu grauiora. Barbari enim successibus elati, non iam solita inscitia

*Tamuyarum apparatus ad bellum.*

*Canóæ bel-  
lica.*

latrociniiis ; & infestationibus viscerationem ex hostium corporibus captare, sed aduenarum instinctu, auxiliisq; iustum bellum cogitare, seque ad coloniam totam occupandam comparare. In eam rem magnum bellicarum canoarum numerum instruere dicebantur. Sunt canóæ actuarij lintres ex vna continenti trabe excavati: sed quibus vtuntur ad bella; aluei magnitudine præstantiis, quarum vsus ad quotidianas nauigationes adhibetur. Quæ eo facilius in hac ora parantur, quòd ob aquarum copiam arborum immani trunco magno numero syluæ luxurient; neque vlla quantumuis vetustissima ætate excindantur. Earum latitudo non ita magna à quinque in septem vlnas aperitur, prout maior, minorve trabis est latitudo. Longitudo quàm minimùm in sexaginta, quàm plurimùm in vlnas octoginta extenditur. Forma, alueique conformatione ad agendum faciles, ac leues. Remis, velisque aguntur, celeritate tanta, vt nostratibus biremibus non cedant: quadragenos, quinquagenosque, plus minúsve singulæ vehunt remiges. Iidem remiges, iidem bellatores, suo quisque arcu, & sagittarum fasce instructi, quibus præliantur; & cùm opus est, suo se quisque remo (stantes enim remigant) tanquam clypeo tegunt: eiusque rei causâ etiam circa manubrium habent palmulas. Alij præterea & à puppi, & à prora, ac nō pauci ex ipso medio alueo fistulis ferreis armati

bella

bellatores adduntur. Videas interdum duas aduersas ipsarum acies, ad militarem artem ostentandam, belli naturam imitantes, tanto impetu inter se concurrere, tanto ardore, cōtentionēque militari admisto clamore prælia ciere, vt horribiliorem pugnae speciem non desideres. Atque hoc prælij simulacro, festaque lætitia persæpe virorum principum, quos in honore habent, aduentus excipiunt. Id genus actuariis alto se committere non audent illi quidem: sed circum litora cum quantalibet naui congregi non verentur. Erat eorum consilium multis in locis eodem tempore coloniam adoriri, colonosque distractis ipsorum viribus, multiplici oppugnatione eò usque fatigare, donec multis præliis accisos, ac debilitatos delerent, totiùsque coloniae tandem potirentur. Apparebat rem consilio geri, non barbara stoliditate pro re nata raptim suscipi: eòq; magis formidini erat. Huic malo sui periculo capitis subueniendum censuit Nóbrega; Barbarorùque fidem esse pertētandam, & aut illorum animos ad pacem inflectendos, aut vitam in communi causa abiciendam. Atque hanc mentem inter preces sensit sibi sæpiùs dari diuinitùs, in eaque confirmatus, cogitationes suas cum iis, qui summæ rerum præerant, communicat. Omnes consilium diuinitùs iniectũ consentiunt. Is igitur Iosepho Anchieta, & Antonio Aloisio, homine laico, cuius fideli opera utebatur, comitibus assum-

*Emmanuel Nóbrega cū Iosepho Anchieta Legati de pace eunt ad Tamuyas.*

*Iosephus A.  
dornus.*

ptis, in Tamuyarum fines contendit. Eos sua  
 naui secum vexit vir magnarum opum, ma-  
 gnique per ea loca nominis, & multa beneuo-  
 lentia cum Patribus coniunctus Iosephus A-  
 dornus, ex illustri familia Ienuæ in Italia na-  
 tus, Francisci Adorni patruus, viri & doctrine,  
 prudentiæque, & vitæ laudibus præstantis: quæ  
 Lusitania (nam ibi adolescens literarum stu-  
 dia coluit) Societati Iesv peperit; qui multis  
 animi dotibus instructus, multisq; in ipsa So-  
 cietate magna cum laude muneribus perfun-  
 ctus, inter primos magni nominis viros in no-  
 stra Societate censebatur. Tribus nostræ So-  
 cietatis generalibus congregationibus, secun-  
 dæ, tertiæ, quartæ, triumque Præpositorum ge-  
 neralium electioni, Borgia, Mercuriani, A-  
 quaviuij, qui nunc regit, elector interfuit; Ca-  
 rolo Borromæo Cardinali, & Mediolanensi  
 Archiepiscopo viro sancto, & iam inter Cæli-  
 tes colendo sacrosanctæ Romanæ Ecclesiæ  
 iudicio fidelibus proposito in primis charus,  
 atque probatus; cuius opera, consilioque san-  
 ctus Antistes multis, magnisque in rebus mul-  
 tum est usus. Is haud ita multis annis antè,  
 quàm hæc scriberentur, diem suum obie-  
 rat. Eius patruus Iosephus per hæc tempora  
 in Brasilia negotiabatur. Barbari, horum ad-  
 ventu cognito, rati Lusitanos ad se bello lacef-  
 sendos accedere, subito furore, ad eos telis  
 obruendos, cum multis, quas paratas canoas  
 inuenerunt, se obuiam effundunt. Sed naui, na-  
 uisque

uſſque domino, & venerāda Emmanuelis Nóbregæ ſpecie conſpecta, irati hoſtiū animi deſederūt; blāda quoque Anchiētæ oratione deliniti, in primis verò eorum mentes diuina reſgente prouidentia mutuò ſeſe reſpicere; illāq; inter ſe conferre: nempe honore digni hi viri ſunt: nullæ hīc inſidiæ, nullæ ſuſpicionēs; fidei plena omnia. Itaque eos, data fide, beneuolè excipiunt. Quare obuius ad pacē primus fuit acceſſus. Exſcendunt, hoſpitiōque excipiūtur à ſene magnæ apud ſuam gentem auctoritatis. Cū de pace agi cœptum eſt, vnus è principi- bus aſterior cæteris, qui decem canōis magnū bellatorū numerū dūctabat, arrogātia barba- rica in conditionibus pacis illud ante omnia poſtulabat; vt tres gentis ſuæ Principes, qui au- xilio antè fuerāt Luſitanis, ac Neophytis, cū Piratiningam bello ipſi attentaffent, ſeque eo tempore ad Luſitanos recepiffent, ſibi dederē- tur. Huic inique poſtulationi cū magno animo abnuiffet Nóbrega, ſapientiq; oratione multa diſputaſſet, quare id nulla ratione æquū eſſet; Barbarus, qui nulla noſſet iura, nīl quæ præ- ſens ſuggerit libido; graui exarſit iracundia, ac tantū non obtruncauit Legatos: ſed nō per- miſit illū Deus. Videbatur hīc nodū inieciſſe ad diſſoluendum difficilem: nam ſi in ſua cō- tentione perſtiſſet, ingens ad conciliandam pacem obex opponeretur. Ea de re Nóbrega ad Præfectum S. Vincentij, Vincentianōſque graues literas dedit, ne vlla ratione con-

ditioni tam iniquæ assentirentur; ne si certò quidem scirent, se, suumque comitem Barbaris escæ futuros. Sed temperauit omnia diuina Bonitas. Barbarus ille iracundus missus sanctum Vincentium cum mandatis, humaniter exceptus, honorificèque habitus, rediit placatus. Ita iniqua postulatio è conditionibus deiecta, & fidelium amicorum salus facta recta conseruata. Sed hospitem hominem commodis moribus perbenignum Patres nati sunt: videturque diuina prouidentia, vt olim Helix Sareptanam viduam, sic in hoc tempore hunc senem tuendæ Patrum vitæ comparasse. Morum enim grauitate nostrorum, humanitate, animi tranquillitate mirè tenebatur; quanuis enim caliganti mentis acie, virtutum tamen lucem tantam non dispicere non poterat. In primis verò tum ipsi, tum aliis fuit admirationi continentia: nam cum interim, dum de pace ageretur, gentis proceres, vt præ se ferrent sibi Legatos de pace gratos esse, mulierum suarum propinquarum copiam illorum potestati, pro sua consuetudine gratiosè deferrent (nihil enim vitij in ea labe inesse arbitrantur) perindeque est iis ad eam hospitalitatem, atque ad computationem amicos inuitare; mirati sunt, esse in terris homines, qui integri ab ea contagione vitam agerent: cumque inter sermones de pace multa de Christiana Religione,

multa

*Hospitis humanitas in Legatos.*

*Barbari Patrum admirationem continentiam.*

multa de Patrum genere vitæ , consuetudinibusque interrogarent , cùm cætera probarent omnia ; tum nihil æquè sibi nouum, atque ad probandum difficile videri assererant, quàm vitam eius expertem consuetudinis traducere. Et, cùm quibus artibus (flagellis præsertim ostentatis, aliisque vitæ asperitatibus à Nóbrega commemoratis) aduersus prauas cogitationes, obscœnâsque species sensus commouentes arx illa custodita teneretur, cognoscerent ; vt qui diuinæ gratiæ vim nunquam sensissent, stupore defixi , quid responderent, non habebant.

HOSPES certè, in cuius pectus diuina gratia sensim influebat, minùs quàm cæteri hebes, aliquid suprâ quàm humanum de admiranda hospitum virtute animo concipiebat. Nam, cùm multi eiusdem gentis è remotioribus finibus eò conuenientes de occidendis Patribus consilia inirent (perinde est enim iis hospites, atque altilia ad gulæ sacrificium addicere) eos senex graui oratione, seuerâque interminatione à facinore deterrebat; homines esse Deo charos, in illius tutela constitutos ; si quis eos violet, iniuriam suâ ipsius nece luiturum. His monitis Barbari permoti ab iniuria se continebant. A Patribus quoque identidem hospes ipse contendeat, vt quando illorum patrocinium

suscepisset, se quoque Deo suis precibus commendarent: neque inania, neque sua mercede cassa illius officia precésque Deo oblata fuere; siquidem haud ita multo post ad Christianos se recepit, baptizatusque in Christiana Religione vitam finiit.

*Barbarorum  
querela, &  
initia dissidiorum.*

INTERIM negotium de pace vrgebatur, à qua cum Barbarorum animi non abhorrent, querebantur tamen per hospitem prætorum temporum iniurias, omnem rupti fœderis, & malorum, quæ postea euenerunt, culpam in nostros conferentes: se enim initio pacis amatores, & imperio fideles fuisse, & commercium cum Lusitanis amicè, sanctèque seruasse: sed belli, & iniuriarum ab ipsis initia profecta; ipsos quietis amicis bellum intulisse, homines innocentes in seruitutem abduxisse, vexasse, iumentorum loco habuisse: se tot malis pressos, ab eorum, quos antea dilexissent, amicitia recessisse; Deum cœli imbecilliorē partem, ac iustiorē respexisse. Hæc Nóbrega fateri vera esse; seque scire Deum suæ iratum genti ob ea scelera tantam calamitatem immisisse: sed suos iam resipuisse, longèque aliam mentem suscepisse: propterea, ut iratum Deum suæ genti faceret propitium, ad iungendam cum ipsis pacem venisse, quam nullo unquam tempore violaturi sint; & dignam etiam pro damnis satisfactionem reddituri. Quòd si ipsi communia fœdera fregeritis, scite



scite vos ob perfidiam à Deo pessundatum iri. Quæ postrema verba tanta animi præsentia, tantoque spiritu pronunciauit, vt appareret id illi diuinitus iniectum. Barbari certè id & in præsens ita acceperunt, & confirmauit postea euentus: siquidem ij, qui vicum illum incolebant, & alij cum iis coniuncti, sancta pace semper manserunt in fide, & bono pacis adhuc perfruuntur: alij postmodum, qui à fide recesserunt, multis postea attriti bellis, ad internecionem deleti sunt, paucis exceptis, qui Christianam fidem susceperunt.

RES interim nihilo minùs trahebatur; Nóbrega S. hæserantque Patres inter hostes in duos menses, cum quotidie Nóbrega Missæ offerret sacrificiũ. Sed, cum ad rem conficiendam, & ad priuatas Societatis rationes Nóbregæ præsentia in oppido desideraretur; neq; re infecta Barbari eos abire permissuri videretur, & negotium de pace deserere non oporteret, persuasit Nóbregæ Iosèphus, vt tota res diuidetur, seque ibi obsidè relicto, ipse S. Vincentium rediret. Quo tempore tria sibi nocte vna diuinitus indicata exposuit; turrem Birritiocam, quæ faucibus euripi imposita adiutum claudit ad S. Vincentium, ea ipsa nocte à paucis Barbaris, porta incensa expugnata esse, custodèmq; turris cum vxore interfectum, familiamque omnem in seruitutem abductam. Præterea certum hominem

*Nóbrega S.  
Vincentium  
redit.*

ad S. Vincentium Patri bene notum, aduerso casu, plauastro supergrediente obtritum interiisse. Tertio loco, onerariam è Lusitania ad Sanctum Vincentium breui appulsuram. Rediit Tamuyarum voluntate, Iosepho retento, Nóbrega : nauis quinto ab eo sermone die superuenit, & de Biritioca, & misero homine à plauastro oppresso rem ita se habere Nóbrega comperit ; cum leucis septem & viginti locus sancto Vincentio distaret. Quid ad ipsos hæ prænunciationes pertinerent, non satis apparet ; nisi Biritiocæ expugnatio, obex ad impediendam pacem obiectus Emmanuelis prudentia fuit amouendus ; eiusdémque prudenti charitate, opportunisque consiliis oppressi hominis fortasse de iis, qui familiæ ministrabant, calamitas alleuanda : nam quid opus esset ad uauis aduentum præsentia eius, qui toti domui præesset, coniecere difficile non est. Siue enim Socij, aliæve merces ea naui vehebantur, siue à prouinciæ Prætore literæ, quæ ad pacem prodesse, siue à Societatis Prouinciali præfide literæ ; mandatæque perferebantur ; permagni intererat ipsum, & publicè totius pacis sequestrem, & priuatim suæ familiæ præsidem, in tempore adesse. Neque aberat periculum, ne præfecti aliqui militum turbulento homines ingenio, ac præferoci, cum supplementis ea naui venirent, qui quicquid de pace sancitum esset, rescindendum contendere-

rent.

rent. Ad omnia hæc amolienda incommoda Nóbregæ præsentia momenti erat per-  
magni.

PROFECTO Nóbrega, solus in tanta barbarie Iosephus relinquitur; & annum agebat ætatis suæ tricesimum, cum hinc vitæ periculū hostium feritas, illinc animi integritati labem fœdi incolarum mores intentarent; nudis enim tum virorum, tum fœminarum corporibus, & obuia ad prauitatem illecebra, cuius continentię fuit, nullo comite, nullo custode, nullo suarum actionum teste, in tanta rerum absurditate saltem non pertentari? neq; tamē Nóbrega reprehendēdus, qui quantam virtutem quantis periculis crederet, optimè nosset. Sed, vita neglecta, eaque penitus diuinæ prouidentię cōmissa, totum se Iosephus ad animi tuendam arcem cōtulit. Erant sensus ab ad-  
spectu auertendi, erat mens, cogitatioque in Deū defigenda, ne qua turpi earum rerū specie, inter quas assiduè versandum esset, cōmoueretur. Quamobrē ad nota sibi, vītatāq; præsidia confugit: erat ei solemne, noctium parte modica somno cōcessa, reliquam diuinis precibus, diuinisq; cōmētationibus trāsfigere, reliquo toto tēpore nunquā à diuina cogitanda præsentia animum abducere. Id multo intensius sibi faciendū indixit in medio periculorū turbine. Adhæc ieiunia, aliāsque vitæ asperitates, quibus rebellantes animi motus cohibentur, & se liberiùs mens in Deum erigit, adhibendā

*Iosephus solus inter hostes pacis ob-  
ses relinquitur.*

benda esse censuit; in primis verò diuinam Matrem aduocandam; cuius tutelæ iam pridem se commiserat; cuiusque patrocínio se fore tutum, nequis è camìno Babylonis ad animum vapor afflaret, confidebat. His septus munimentis & ipse aduersus ea, quæ circumstabant, tentamenta reddebatur firmior, & insidiatoris hostis artes eludebatur, tela è manibus extorquebantur. Quare, præter negotium de pace, quidquid à precatione, piæque commentatione ei superesset temporis, id totum ad Barbarorum vtilitatem conferebat; cum iis de diuinis rebus, deque animi salute sedulò agebat, statos, quotidianosque conuentus. Catechismi causâ agebat, audiebantque eum Barbari libenter, quæ diceret, ad animum mittebant, præceptisque illius ex animo obtemperabant; multiq; idonei essent ad Baptismum, nisi pro loci, gentisque natura timenda esset inconstàtia. Infantem tantum à partu semimortuam baptizauit, quæ repente conualuit, paucis tamen post diebus in cælum euolauit; & infantem alterum, quem quòd adulterino patre natus esset, viuentem crudelis auia terræ infoderat (nam licet illegitimi concubitus apud eos odiosi non sint, inuicem sibi culpam indulgentes, alienam tamen prolem alere illis graue est: ergo culpæ foeditatè in iis puniunt, qui culpæ carent) id cum rescisset Anchieta, locum sibi curauit indicandum, humum tollit, & puerum

*Infantes duos baptizat, qui qui paulo post moriuntur.*

viuentem adhuc extrahit ; cùm semihoram ipsam terra opertus iacuiſſet; baptizat, adhibitis mulieribus, quæ ei lac præberēt: paucis tamē & ipse hebdomadis ad suæ prædestinationis brauiū hinc abiit. Et quidem iam antea S. Vincentij cùm Catechumenos ibi instrueret, cognouit semileuca ab oppido mulierē Ethnicam infantem peperisse; quem, quòd mancus esset, & membris deprauatis, illo offensa vitio, humano sensu amisso, vteri sui fructum viuentem sepelierat. Accurrit confestim Iosephus, infantem extrahit: & cùm vitæ in eo adhuc reliquias superesse sensisset, baptizauit; baptizatus paulo pòst inter eius manus expirauit. Sed noti erant quotidiani hominis labores, nota vitæ consuetudo, quæ quanto erat ab illorum consuetudine remotior, tanto maiorem Barbaris admirationem commouebat. Ergo illum tanquam aliquid humano modo maius suspiciebant, amicum Dei nominabant: secretos cum Deo sermones habere dictitabant, & quòd in corporis doloribus, morbisque remedia illis indicabat, amabant vehementer.

*Iosephū Barbari tanquā virum sanctum suspiciunt.*

ACCEDEBANT & alia, quæ Barbaros maiorem in admirationem adducebant. Erat illi vsitatum quotidie, dimisso Catechismo, ad vires animi recreandas in agro aliquantisper ambulare; atque è codice horario, etsi nondum sacris ordinibus initiato solemnem diei psalmodiam percurrere. Obseruatum est per-

sæpe admirādæ speciei auiculam, multis, pulcherrimisq; coloribus destinctā, ad ipūs solitā eo tempore aduolare, hilarique tripudio modò illius humeros, modò brachia, modò etiā ipsum librum insilire. Ea siue naturalis auis ad hominem in pristinæ statum innocentie restitutum adcurrerat, siue diuina species, ad vitæ declarandæ innocentiam, à Deo immissa, se obiiceret, non diiudico: colonus certè Piratinianus, qui fortasse vltro, citroque de pace mandata ferens, commeabat, iuratus testis id se vidisse asseuerauit. Sed id genus alia sapiūs eidem contigisse cognoscemus. Verùm, quæ erat in sanctam Dei Matrem pietate, adiecit animum ad eius laudes Latino versu celebrandas. Sed quæ pāgendi copia in tanta barbarie vastitate? non libri, non charta, ne stylus quidē, aut res alia ad exaranda grammata suppetebat: quoniam tamen sanctæ Matri id promiserat, bono memorię, quo exellebat, sibi vtēdū cēsuit, quod in magnis ingeniis, & ad scribendum accuratè exercitatis insolens non est. Exorsus igitur à purissimo eius conceptu, omnem illius vitæ seriē, ad eius in cælum vsq; ascensum, ad vsque diuinitatis concessum, diademāque ei cœlestis regni impositū, Elegiaco carmine pertexuit, omnibus vitæ partibus, mysteriisque disertè explicatis; figurisque & oraculis, quę de sacris literis, sanctiorūmq; Petrū testimonio ei tribuūtur, illustratis. Profuit id illi non modò ad suæ fructum pietatis, verū

*B. Virginis  
vitam Latino  
carmine  
pangit.*

rùm etiam, vt ipse indicat, ad vitã, & libertatẽ:  
& quod ille in primis optabat, tractatione sa-  
crarũ ipsius laudum purissima Virgo eius mẽ-  
tem ab omni, quę immineret labe, purã, inten-  
tatãmq; seruauit; quod ipse in carmine, quod  
mox subiiciemus, disertè testatur. Et multis  
annis postea, cùm iã & Sacerdos, & multa ef-  
set apud omnes auctoritate, Sacerdoti alteri  
nõ obscurè declarauit. Querebatur is cum Io-  
sepho, multas, fœdãsq; cogitationes sibi mole-  
stas esse, nec posse illas, omni adhibita cõten-  
tione, ex animo eiicere, quin vltro sibi, & inui-  
to, & oĩni conatu reluctãti obuersarẽtur: pro-  
inde ab ipso petere, Deũ rogaret illã ab se vt  
molestiam abigeret. Non est laudanda, in-  
quit, postulatio hæc, quasi in periculis Deo  
prẽscribamus, quid ab ipso velimus, & infinitã  
illius prouidentia prauertamus; non æquũ est  
à Deo petere, à nobis vt certamina remoueat:  
est enim id totũ ipsius prouidentia relinque-  
dum, & quantũ cuiq; committendum, ac quæ  
in discrimina quisq; sit coniiciendus, ipse solus  
nouit, qui quãtũ in quoq; sit viriũ iustissima  
trutina expẽdit: quin tu potiùs ab illo petas, vt  
tibi in periculis prætò sit, opẽmq; ferat, ac fa-  
ciat cum tentatione prouentũ; & cũ Augusti-  
no dicas: *Da quod inbes, & inbe quod vis*. Hac ille  
plurimũ petitione delectatur, quæ præter id,  
quod optat, nouo etiam in hanc vitam meri-  
ti præmio cumulatur. Quod scio, subiunxit,  
alteri contigisse, qui longo tempore inter

*Sacerdotem  
fœdis tenta-  
tionibus li-  
berat suis  
precibus.*

vehementes, ac perpetuas occasiones conflictatus, Filij, Matrisque diuinæ auxilio non modò lapsus non est, sed præterea etiam certum ab utroque testimonium accepit fore ut nunquam in eiusmodi periculis laberetur. Non dubium, quin & de se, & de hoc ipso sue quasi relegationis tempore loqueretur. Accipit consilium Sacerdos, & cum æqua ipsius animi cum Deo coniunctione, tum Iosephi precibus factus est voti compos: triduo enim ab eo sermone Iosephus Sacerdotem eundem ad se accitum certo promisso confirmavit, nullas & in posterum eiusmodi molestias obuersaturas; modò ipsum non pigeat omni cautela suæ ipsius curæ inuigilare. Idque Sacerdos ipse omnino sibi contigisse, ut Iosephus prædixerat, testatus est.

*Barbari Iosephum se voraturos minantur.*

Et quamuis tantæ esset per hæc tempora Barbaris admirationi, ut diuinum aliquid in eo venerarentur, ab insita tamen feritate; cum viderent negotium de pace duci longius, quasi moræ impatientes, metu, ne altile illis è cauea euolaret, mortem illi minabantur, diemque certam denuntiabant; quæ die more suo essent eum festis epulis voraturi. Parate, inqueiebant, Iosephe (vtar illorum modo loquendi) & satia te luce Solis: nam te incertam diem ad festum conuiuium destinauimus. Quibus ille placidè respondebat: Non me interficietis; nondum enim venit hora mea. Cumque ex eo postea quæsitum esset; qua



qua id fiducia tam constanter sibi polliceretur: Matris, respondit, Dei promisso, non permissuram se mihi vitam eripi antè, quàm ea, quæ de illius vita, & laudibus meditarer, perfecissem.

NE QVE sibi tantùm, sed & aliis etiam liberationem, & incolumitatem prædixit: nam dum inter Barbaros pacis sequester moraretur, pendente adhuc negotio de pace, Tamuyæ, neglecta fide, perseverantes adhuc in iniuria è Vincentianis finibus Lusitanos aliquot captivos asportarant. Accedit ad agendum de illis redimendis Iosephus, cùm iam transacta essent omnia, pretium expectabatur. Et quoniam in rebus transigendis nihil est minùs expeditum, quàm aut pecuniæ, aut pacti pretij repræsentatio,angebantur animo tum captivi, tum Barbari, quòd res duceretur longiùs. Itaque eò venerant, vt captivos iam ventri, & gulæ destinatos occidere pararent. Accurrit, re cognita, Iosephus, breuem vnius dieculæ moram interponi postulat. Postero die manè, cùm Sol ad eum locum venerit (& locum manu indicabat) omnino præstò futuros, qui illis satisfaciant. Homines ipsis notos nominabat; numerum, genúsque vestium, aliarumque mercium, quas pro captivis commutarent, commemorabat (nam pecuniæ apud eos nullus est usus) id ni fiat, suam se quoque vitam ipsorum lanienæ obiecturum. Ea obtestatione Barbari spem promissi expe-

*Captivos  
alios Lusita-  
nos periculo  
liberat.*

*Arias Fernandus.*

riri statuerūt: nec spes eos fefellit. Vt Iosephus promiserat, sigillatim cuncta euenerunt, & cōmutatione facta, captiui liberati. Verū hos, præter prædictionem, opera etiā adiuuit: alterum sola prædictione periculo liberauit. Erat hic Arias Fernandus postea colonus Ianuariensis, Iosepho admodum familiaris. Is ad Iosephum venerat, seu cum mandatis, seu quauis alia de causâ. Eum Barbari retinere in escam cogitabant: quod cū ille sensisset, Iosephum de suo periculo admonuit. Vetuit esse sollicitum Iosephus, certūque in litore locum indicauit: postero die eò nauigium appulsurum; quo conscenso, in tutum se reciperet, & ita prorsus euenit.

*Confecta pace Iosephus S. Vincentiū redit.*

Qui nodi ad expediendam pacem obiicerentur, non inuenio: sed probabile est, Gallis præsertim inter hostes commorantibus, multa cum Lusitanis de Tamuyarum securitate, multa cum Tamuyis de Lusitanorum commodis, quæ hîc Iosephus, illîc Nóbrega conciliaret, fuisse transigenda, ita nunciis vtrò, citròque mittendis, rem in longiorem, quàm putabatur, diem extractam esse. Ultra tertium mensem à Nóbregæ discessu inter sua pia studia, intérque minas Barbarorum, tanquam inter sacrum, & saxum summæ vir innocentie versatus, feliciter tandem, Dei ope confecta pace, summâ cum omnium lætitiâ, deducentibus eum Barbaris, S. Vincentium rediit incolumis. Ibi ex longo exilio, ærūnisque recreatus

contulit se ad ea perficienda, poliendoque quæ in hostium potestate cōstitutus de Beata Virgine commentus erat. Carmen totum in bis mille octoginta sex disticha extenditur; quod eidem Virgini matri, adiecta ad calcem eiusdē metri apostrophe, dedicauit: cuius cūm fragmentum allatum sit, expedire visum est, ad ingenium duntaxat degustandum, hoc loco adscribere.

*En tibi quæ voui Mater sanctissima quondam  
Carmina cūm sauo cingerer hoste latus.*

*Dum mea Tamuyas presentia mitigat hostes,  
Tractoque tranquillum pacis inermis opus.*

*Hic tua materno me gratia fouit amore;  
Te corpus intum. mēnsque regente fuit.*

*Sapius optaui, Domino inspirante, dolores,  
Duraque cum sauo funere vincla parā.*

*At sunt passa tamen meritā mea vota repulsam,  
Scilicet heroas gloria tanta decet.*

Conciliata pace cum Tamuyis, duo eorū pagi, seu terrarum tractus, vti paulo antè meminimus, qui Ianuariensis oræ partem, & qui Caput frigidum tenebant, freti Gallorum armis, à cōmuni totius gentis consilio seiuncti, bellū continuerunt. A Regina interim supplementa ex Lusitania mittebantur.

*Supplementa  
ex Lusitania  
mittuntur.*

ANNO inde 1564. Prætor Eustachium Salā, fratris filium, ac summum rei bellicæ Præfectum cum classē ex Lusitania aduecta, & nauibus ex ora Brasiliæ contractis ad res Ianuariēses cognoscēdas, bellūque ostentandū mit-

tit, eique mandat, vt hostiũ consilia, & apparatus, & quæ belli natura futura videatur, exploret: ac, si se fortuna præbeat, hostem, si possit, in altum ad prælium eliciat. Erat formidolosa rerũ facies, nil nisi hostile cernebatur, sinus canoïs bellicis refertus: litora circũquaque Tamuyarum manipulis ad bellum paratis frequentia; apparebátque Gallorum consilio administrari omnia. Lusitanus, cognito hostiũ apparatu, & consilio, & arte geri omnia; cùm sui potestatem hostis nõ faceret, nec se satis instructum ad eos intra sinum lacessendos sentiret, contentus illa ostentatione, cùm aduersus prodiret nemo, ad suppleendam classẽ, canoarũque auxilia accersenda S. Vincentium rediit.

Anno Domini 1565.  
Lusitanorũ  
classis aduersus Ianuarienses secluit

ANNO demum 1565. 13. Kalend. Februarias, qui dies S. Sebastiano Martyri sacer est, quem Regi cognominem totius belli præsidẽ inuocarunt, bene instructa classis è Biritioacæ portu soluit. Erant maioris aluei onerariæ sex, minoris magnitudinis, ad explorandũ, aliãsq; opportunitates speculatoria nauigia, lēbiq; ad varias expeditiones nonnulli, canoæ non plus nouem. Hac classe Lusitanus mense Martio ineunte in insulas ostiũ sinus appositas occupat. Ibi dum in ancoris Prætoriam nauem præstolantur, deficiente comœatu, auxilia indigenarum, quæ canoïs vehébantur, vt sunt Barbarorum ingenia, minima quaque oblata offensione, mobilia, constituerant se clàm subducere, atque in suos fines remeare. Venerant cum

cum classe à sede S. Vincentij Sacerdos è Societate Iesv Gundifaluus Oliueria, & Iosephus Anchieta nondū ad sacros ordines admotus. Fortè inuisunt officij causâ, vt fit, auxiliares: ab ipsis certiores fiunt de nuper inito consilio; frustra tempus teri, Prætoria naui expectanda, quæ nulla venit; lembos tres, qui ad petendum commeatum missi essent, non apparere: diaria malignè suppeditari; nolle se extremam famē opperiri. Hic Iosephus eos bono iubet esse animo, spem in Deum coniiciat, fidem datam seruent; non præteriturū diē posterum, quin largam Dei benignitatem experiantur. Haud multū temporis ab eo sermone præterierat, cū eodē die lēbi tres, qui erāt in expectatione, è S. Spiritus Præfectura alimētis onusti comparent, & postero die bene manē Prætoria superuenit. Ita Iosephi opera auxilia retenta, & fides illius prædictionū constituta. Aduentu Prætoriæ classis vniuersa sinū intrat, nauibūque commoda in statione collocatis, captōque loco opportuno, munitiones vrbis instar, aggeribus, vallo, & fossa cingūt. Ex hoc loco bellum in duos ipsos annos tractum est, Oliueria & Anchieta, dū armis milites dimicāt, auxilia cœlestia implorātibus. Et sanè milites nullo loco suam desiderari pietatem passi sunt. Dixisses eos non magis ad præliandum, quàm ad pietatem exercendam in armis esse. Inde factum, vt ex prælio prospero fere euentū redirent. Et verò plus armis pietatis, quàm ferro, & præliis profectū est: nam cū

*Iosephus retinet auxilia sociorum ne secedant,*

*Classis Lusitanorum sinum intrat: ibi bellum geritur.*

longè impares numero Lusitani hostium essent multitudini, & admista essent arma Gal-  
lorum, & militaris pro captu gētis disciplina; cœleste tamen auxilium ita luculenter appa-  
ruit, vt contrā quā olim Ægyptij aduersus Is-  
raëlem, nostri dicere possent; *Adoriamur hostes  
nostros: Dominus enim pugnat pro nobis contra illos.*  
Multi enim è nostris lethaliter sagittis vulne-  
rati, leuissima curatione breui tempore con-  
ualuerūt Et sanè vehemētes sunt illorū arcuū  
emissiones, grauésq; sagittarū ictus; vt multi  
magis illos, quàm scloporū nostratiū glandes  
reformident. Alij globis earūdem fistularū in-  
tegro adhuc impetu ex propinquo in pectore  
perculsi, nō secus ac si lorica periculo probata  
tecti essent, ictum illæsi euaserunt, globo illis  
ante pedes delabente.

*Petrus Lei-  
tanus pri-  
mus Episco-  
pus in Brasi-  
liam venit.  
Iosephus Ba-  
hyam mitti-  
tur ad sacros  
ordines sus-  
cipiendos.*

INTER has turbas Societatis Patres Iosephū  
Anchieta à Ianuariēsi bello Bahyā reuocarūt;  
vt sacris ordinibus initiatus Sacerdos fieret:  
tunc enim ad Brasiliā ordinandā, regendāq;  
Ecclesiā Episcopi munere primus venerat Pe-  
trus Leitanus, vir in Lusitania & genere, &  
suis laudibus clarus. Ergo ad rei diuinæ fructū  
magni interesse omnib. visū est, Iosephū pri-  
mo quoq; tēpore nulla interposita mora Sa-  
cerdotio ornari. Ex itinere eū Nóbrega, qui S.  
Vincētio, & reliquis circā sedib. præerat, sedē  
Spiritus sãcti cū vicis, alijsq; maiorib. Ecclesiis  
ei sedi attributis inspicere iussit; vt siquid opus  
esset, corrigeret, cōponerētque, tãta in nō grā-  
di ætate indoles, & in homine nondū Sacer-  
dote

dote perspectæ virtutis, & prudentiæ inerat auctoritas. Quo d munus multa cū omniū pace, & probatione administravit. Gundisaluus Oliueria interim solus in Ianuariēsis castris rem Christianam Deo precibus commendabat. Hostes iam Gallorū disciplina exercitati, freti multitudine, & aduenarum sclopiis, ausu sæpe sunt nostrorum munitiones adoriri. Castra erant exiguæ instar vr̄bis; tabernacula ex paleis raptim compacta: locus altari, temploque, & sacris rebus itē ex paleis excitatus, coniectusque. Contigit vt inter castrorum oppugnationem cū Sacerdos Oliueria ante sacrā aram in genua applicitus Dei imploraret auxilium, sagittę supernē euolantes suo lapsu super sacellum deciderent, perforsisq; tecti paleis, circa orātis corpus humo infixæ hærerēt; illius tamē corpus, quasi diuina manu submotæ non attingerent. Id milites, interquiescente per vices prælio viderunt, cū & ipsi modico spatio ad preces cōfugerent; admirati solū circa orantem sagittis horrere, Sacerdotem verò telis circumseptū, incolumem persistere in precibus, donec hostis ab oppugnatione pellere-tur. Quę res maiore animo milites cœlesti perfecto auxilio, ad repetendū præliū reuocabat.

*Hostes Lusitanorum castra adorantur.*

FESSI tandem Tamuyę belli diuturnitate, ac pertęsi toties irriti conatus, cū plerūq; a prælio malè accepti, ac magno cum damno redirent, statuerunt vno prælio de tota belli a-lea decernere; docti nimirum ab aduenis

*Prælium castrorum;*

ad vires ingenium, & artem adhibere. Et sanè prudenti consilio instituta res est: sed diuina prouidentia meliorem partem tuendam susceperat. Missa castrorū oppugnatione, induciarūq; à prælio interposita tātula quiete, quàm maximum numerū contrahunt canoarum; ad veteres, nouas lōgè à Lusitanorum statione in ipso sinu fabricare adoriuntur: cētum & octoginta toto illo tempore instruxerūt, easq; spatio leucæ vnus à Lusitanis abdito in recessu in insidiis collocāt. Inde earum non magnus numerus prodit; hostem prouocat ad prælium: nec Lusitanus certamen detrectat. Quinq; canoæ, quæ reliquæ erant (nam Vincentiani auxiliares, pertæsi militiæ, dilapsi quatuor abduxerant) aduersum à Præfecto Sala mittuntur. Prælium committitur: Tamuyæ vix conferta manu, vt inter ipsos conuenerat, simulata fuga nostros audaciùs insequutos in insidias pertrahunt. Inde maior canoarum numerus Barbaris auxilio accurrit. Circunuētus Lusitanus non animum despondet, sed diuino fretus auxilio fortiter resistit. Fortè inter pugnandam vna è nostris canois iētum bōbarde explodēs sulphureū puluerē inflāmauit, propugnatoribus aliquot semiuistis in mare eiectis; qui tamen ad suos euaserunt. Ea flāma territa Tamuyarum ducis coniux, quasi ingens incendium aduersus ipsorum classem tortum eos confestim esset absumpturū, clamoribus, euiatūq; omnes perterrit, ipsaq; cum duce fugā

con

*Tamuya mē-  
stro territi  
omnes dis-  
fugiunt.*



confestim arripuit. Ducem, & qui instatione erant, & qui praeliabantur, relicta pugna, ad unum omnes quam effusissima fuga sequuntur. Tunc apparuit ingens canoarum numerus, & magnitudo periculi perspecta. Nostri ad speciem aliquandiu fugatos insequuti, se tandem receperunt. Laudes pro magnitudine beneficii Deo redditæ, qui ipsos illo die ex tanto periculo liberavit: neque enim muliebres solum clamores hostes in fugam vertere, sed multo magis obiecti diuinitus terrores: ipsi enim hostes postea facti sunt, se admiranda specie bellatore in armis vidisse fortiter praeliantem, & de canoas in canoas admirabiliter transilientem, qui suo terrore uniuersam ipsorum aciem compleuit. Eum S. Sebastianum, in cuius patrocinium se dederant, Lusitani fuisse interpretati sunt. Et sane credendum est maiorem etiam nostrarum canoarum numerum ipsis apparuisse: quippe illa diuini propugnatoris umbra non tantam faceret ostentationem tam exiguo canoarum numero; neque solum femine illi, sed hostibus omnibus terrificum incendium obiectum esse.

ANNO demum 1567. Prætor ipse Mendes Sala ipso die festo S. Sebastiano dicato noua cum classe, & nouo etiam nobilium cum suis copiis comitatu superueniens, hostes è toto sinu exturbauit, eosque intra ipsorum fines totis viribus persequutus multa clade attriuit: duos eorum vicos, quibus se Galli munierant, excidit; totumque sinum Ianuariensem hostibus ex-

*Anno Domini 1567. Ianuariensis sinus in potestatem venit.*

*Vrbs S. Sebastianus, & in ea Collegium Societatis Iesu extruitur.*

purgatum in potestatem redegit.

PACATIS rebus omnibus, frequentiq; colonia deducta, locum muniendæ vrbi, priore opportuniorem designauit: quatuor castellis, vt Saluatorem ad Bahyam communiri, faucēsque sinus hinc inde castellis excitandis claudi iussit. Quo tempore area Collegio Societatis IESV extruendo Sebastiani Regis iussu attributa, vectigal etiam eiusdem Regis liberalitate, ad quinquaginta Socios alendos constitutum. Urbem sanctum Sebastianum nominarunt, non solum religione nominis Regi bene ominati; sed pia etiam grati animi significatione sancto Cœliti grates pro modo rependentes, ob felicia euenta, quæ vel eius die festo contigerunt, vel ab eo die eorum initia profecta sunt: nam & hæc ipsa victoria circa eum diem, vti diximus, relata est, & biennio antè Eustachius Sala eiusdem diei auspicio sinum ipsum intrarat; eiusdemque sancti Martyris inuocato patrocinio bellum exorsus erat; præsentemq; opem tum in canoarum, tum aliis in præliis senserunt. Ita satis firmum munimentum aduersus impietatem constitutum.

*Ignatius Azebedius Visitator Societatem circa Ianuariensem sinum ordinat.*

VENERAT eadem classe ad Ianuariensem sinum cum Prætorē obeūde suæ diœcesis causâ Episcopus Leitanus; & vnâ cū ipso Ignatius Azebedius, Societatis IESV Sacerdos, is, qui paucis inde annis è Lusitania cū magno Socio-

rum

rum numero Brasiliam repetens, Oceanū claro suo, & comitum martyrio consecrauit. Is per id tempus à Francisco Borgia Societatis IESU Præposito Generali missus Visitatoris munere in Brasilia Societatem regebat. Eodē quoque comitatu & Iosephus Anchieta nouus Sacerdos: sed hic in Vincentianam sedem feretulit, ibique mansit Azebedius Visitator Prætozem, & Episcopum ad Ianuariensem sinum sequutus; pro suo munere Collegiū Societatis, Collegiique foundationem admisit; & totam regēdi Collegij rationem, disciplinamque ex præscripto Societatis ordinauit. Cæteras circa sedes Societatis, S. Vincentium, Sanctos, Piratiningam, Spiritum sanctum, aliāque loca minūs nota Sebastianensi Collegio, cū perfectum esset Collegij, & vrbis opus, & sedes, formāque Collegij constituta, regenda attribuit; vt ad vnum omnes caput, tanquam corporis vnus membra referrentur, & vno omnes regimine, quasi familiavna cōtinerētur.

*Iosephus factus Sacerdos redit S. Vincentium.*

INTER hæc, vt ratio temporum suadet, iter faciebat Iosephus cū Emmanuele Nóbrega, & cum iis Arias Fernādus iā colonus Ianuariēsis eodē contubernio pernoctabat; cū Iosephus noctis cōticinio Nóbregā interpellat. Vigilāsne? inquit; cū sensisset vigilantem: Grates, inquit, agamus Deo; nostri enim victoriā ex hoste retulerūt. Hęc Arias somnū simulans notauit. Poruit illi nocte, quę cōsequuta est, ea victoria inter cōtēplationē indicari: attamē quæ victo-

ria

ria fuerit, quia notatum nō inuenio, coniectura ducor ad credendum hanc Prætoris de Tamuyis fuisse, cū hostibus ex omnib. Ianuariensibus finibus exturbatis, tota Ianuariensis regio in potestatem venit: nā diuina illa canoarum victoria quo tempore data est diuinitus, Iosephus Bahya factus Sacerdos nondum redierat. Reliqua, quæ postea consequuta sunt bella, non tam periculosa aleæ fuisse videntur, ut sollicitum quęquam habere debuerint.

At Iosephus Sacerdotio auctus, maiore cepit cum auctoritate, & fructu ministeria Societatis exercere, & in opere iuuandi homines versari, ut ea, quę proximè narraturi sumus, declarabunt. Iam antè à primo Gallorū in Ianuariensem sinū aduentu, nonnulli inter milites Caluiniano veneno imbuti immisti Catholicis venerant. In iis quidam Ioannes Boullerus homo lingua proptus, & facetus, Latinarū, & Gręcarum literarum, ut sunt Heretici, nō iners ostentator, Hebraicæ quoq; linguę nonnihil tinctus rudimentis; in locis verò sacrorū scriptorū cōtrouersis, quibus peruersum Caluini dogma se iactat, audacissimè versatus; quod cōmilites sanos in fide pestifero afflatu perentaret, vel quo alio crimine, certè hereseos; erat à suo dūce Nicolao Villaganonio viro Catholico puniendus. Quod ille per sentiens, vnā cum tribus comitibus ad Lusitanos S. Vincetium transfugit. Et fortè per id tempus in Gallia pestifera Caluini dogmata satanico flatu

*Ioānes Boullerus in Brasilia Caluini venenum spargere conatur.*

succensa tantum seditionum incendium excitant, vt potentissimos Reges multos annos fatigarint. Cuius nefarij deprauatoris potissimum consilium fuit falsa specie, quam ipse finxit Euangelij, homines ab Ecclesiæ reuerentia primùm, deinde à suorum Regum fide subtrahere; orbemque vniuersum in sui doloris, iniustæque turpissimæ ignominia notæ vltionem excitare, atque pervertere: tantum in animo pietatis vinculis exsoluto impotens potest audacia. His plenus spiritibus Boullierius diu ita inter Lusitanos versatus est, vt pestiferum virus non se proderet. Ad extremum pruritu percitus afflandæ corruptelæ, necdum suo inter suos periculo satis doctus, temerario ausu fortunam tentare non dubitauit inter alienos, ratus vbiq; eadem hominum ingenia tarda, & hebetia, qualia inter Tamuyas, se reperturum: neque in tam ab humano cultu remotis finibus canes ad custodiam aduersus lupos aduigilatu- ros. Erat Hispanorum loquela bene exercitatus, & vt erat non infacundus, & urbanus, & à natura instructus ad sermonem lepore, & facetiis condiendum, nactus homines armorum, quàm iuris peritiores, incunditate sermonis se iis insinuauit; sensimque confabulando inter risum, & iocos sensa quædam cœpit adspargere, quibus Sacramentorum vsum, sacrarum imaginum cultum, indu gentiarum vim, & Romani Pontificis potestatem eleuabat. Neque ij,

que ij, quos decipiebat, dolum sentiebant; sed zizaniorum semen conceptum inscij fouebāt. Vnde magnum ille sibi apud vulgus imperitiū eruditionis nomen compararat: non potuit tamen tanta res tam artificiosa calliditate tractari, vt homines ad Ecclesiæ excubias peruigiles falleret. Aloysius Grana Societatis IESV Sacerdos, rem odoratus, primus insurgit; duobusque in oppidis S. Vincentio, & Sanctis (est vtrumque frequens oppidum, alterum in continenti litori impositum; alterum è regione in insula Vincentiani sinus, vti suprà descriptissimus) pro concione populum dedocuit, sæpiusque iisdem de rebus; & publicè, & priuatim disputando, eos, qui venenum imbibebant, sanauit, ceteros vt callido ab impostore sibi cauerent, acerrimè admonuit. Acciditq; vt cum in oppido Sanctis concionē alia de re meditatus suggestum conscendisset, ipso conspecto, priore argumento repudiato, totū sermonem ad eius fallacias redarguendas conuerterit; tanta vi, tantæque copia, vt si octiduum totum ad eam se disputationem comparasset.

SENSIT homo astutus se peti, &, vt erat versipellis periculum audacia studuit depellere. Dat operam Aloysium vt sibi conciliet. & cum ipso tanquam homo & ipse eruditus literis amicitiam coniungit; sæpius inde cum ipso multa de doctrina communicauit: cum semper se in omnibus cum Catholicis sentire

lingua

lingua tenus profiteretur: attamen ouina pelle ad præfens assumpta, vulpinum ingenium nõ excussit; sed venenum clàm magna dissimulatione propinabat, serpebátque malum sensim, nisi excinderetur; ad quod auertendum tribunal Ecclesiasticum hominem coërcuit; vinctumque Bahyam ad Episcopum misit. Sed siue hunc, vt ibi, vbifel draconum euomuerat, puniretur, Bahya ad sinum Ianuariensem in vinculis pertractum; siue quemuis alium ex captiuis Gallicis, paris facinoris conuictum, & in hæresi peruicacem, statuit Prætor post victoriam Ianuariensem in oculis hostium extremo supplicio afficere.

A D eum adiuuandum, quoniam Latine cum illo agendum erat, neque ibi è Societate IESU quisquam erat, præter Azbedium, maioribus curis occupatum, accersitus est sancto Vincentio Iosephus, qui, cum initio difficilem hæreticum experiretur, impetrauit vt res aliquandiu proferretur: nec passa est diuina prædestinatio electam ouem sibi eripi è manibus; nam quæ precibus ad Deum, quæ rationibus de eius salute sollicitus nouus Sacerdos, diuina in primis ope ab sua duritia auulsum ad veritatis cognitionem hominem traduxit, & cum Ecclesia reconciliauit; illéq; vniuersa culparum omnium cõfessione animæ suæ statum ad optimi magistri pietatis præscriptum composuit. Et, quo

*Hæreticum hominẽ morte multandum ad fidem conuertit, & in extremo vicio adiuuat.*

quoniam quo tempore in eum lege agebatur, carnifex imperitus minùs commodè sua exequabatur ministeria, reus indignè ferebat exacerbari sibi inepti hominis imperitia carnificinam, veritus Iosephus, ne homo iracundus, & recens ad Catholicam pietatem traductus, breui illo temporis momento aternæ mortis veniret in discrimen, castigatum carnificem monet, qua ratione expedite illo munere defungeretur. Ita hominem prouum ad iram, summo in salutis discrimine versantem, in tuto animæ suæ statu, ne excideret, retinuit. Admonitus deinde, quâ non esset veritus canonicum impedimentum, notamque à sacrarum rerum functione amouentem? Quia impedimentum illud, respondit, à diuina offensione seiunctum, suis remediis non caret. Anima illa si extremo illo tempore, quod erat in proclive, à suæ salutis statu excidisset, nulla spes supererat illam in omnem æternitatem reparandi: quam ut in eo retinerem, non me pingeret illa notatum labe vitam omnem agere. Factum prima specie reprehendendum, cognita causa, & sapiens, & admiratione dignum iudicatum est. Nec defuit, ut ille dixerat, ad notam abolendam cum suis remediis potestas; tantum in eius animum diuinæ causæ tuendæ ardorem succendebat ipsa, qua perpetuò cum Deo fruebatur coniunctio: ut nō modò nunquam à recto tramite exerraret; sed multa etiā cognosceret, quæ non nisi ex ea luce hauriret.



REBUS ad sinum Ianuariensem constitu-  
tis, Prætor vrbi ædificandæ, sinuîque munien-  
do Saluatori Corrêa Sala, qui in Eustachij  
Salæ demortui locum summus rei bellicæ  
Dux successerat, præfecto ad Bahyã se retulit.  
Hostes porrò, quanuis stationibus, & Ianua-  
riensi regione deiecti, in sua tamen pertina-  
cia hærentes, circa Caput frigidum, ad quod  
illorum fines pertinebant, se muniuerunt.  
Est caput frigidum promontorium à loci na-  
tura dictum, à sinu Ianuariensi in Orientem *Caput fri-  
gidum.*  
non ita longa nauigatione dissitum: nam à S.  
Vincentio ad hoc vsque Caput ora Brasiliæ  
recto tramite tendit in Orientem, inde in Se-  
ptentrionem vertitur. In ipso flexu, inter vi-  
cesimum secundum, tertiumque gradum al-  
titudinis duo excelsi montes, Austro auersi  
curuant litora: hi portus duos includunt;  
quorum prior duo habet ostia, aterum Ori-  
ti, alterum Boreæ, quem Ernordestem nauig-  
antes nominant, obuersum. Portus alter re-  
ctà Septentrionem spectat. Regio ipsa mon-  
tosa, brasili ligni in primis ferax: cuius maxi-  
mè mercis emolumèto Galli negotiatores, dy-  
nastaque instructis ad bellum nauibus in hæc  
loca nauigant.

Ex hoc promontorio, dum Galli colli-  
gendis mercibus dant operam, Tamuyæ Vin-  
centianos, aliósque maritimos fines, maris  
oram adlegentes damnis vltro, citróque in-  
ferèdis, accipiendisque infestabant; subitoq;

*Euentus ad-  
mirabilis  
Christiana  
mulieris Io-  
sepho diuini-  
tus indica-  
tus.*

sæpe aduentu viros, ac mulieres in seruitutē, aut in escam abducebant. Et res contigit, quæ, quanta luce Iosephi animus diuinitus perfunderetur, declarauit. Christianæ mulieres duæ indigenæ sorores erant, ambæ matrimonio coniunctæ: altera in oppido S. Vincentio, altera in vico extra oppidum degēbat. Venit vicana intra oppidum ad sororem in opere iuuandam. Lychnos ceratos faciebant, qui in cylindros, aut commodiorem aliam formam conuoluti ad priuatorum nocturnum lumen adhibentur: his enim industriis operæ, & vitæ cultui assuescunt. Inter opus vicana ex liquata cera candelas duas sibi componit; rogata, cur id faceret: vt has, inquit, ad Patrem Iosephum deferam, quibus vtatur ad Missæ sacrificiū, quod mea causa offeret, cū sancta fuero. Id nimirum dicere voluisse videtur; cū pro fide Christiana ab hostibus interfecta martyrium obiero. Quo id acta spiritu loquūta sit, statuere meum non est. Crediderim certē, ad diuinam in Iosepho declarandam gratiam, ipsam insciam de se prophetico afflatu pronunciasse. Defert ad Iosephum, adiecta ea petitione, candelas suas. Haud ita multo post Tamuyæ, excursionē facta in Vincentianos fines, cū captiuos alios, tum hanc inter eos mulierem abduxerunt. Hanc adortus vnus ē principibus prædonum, vt violaret, adducere nunquam potuit, vt assen-

assentiret : quin virili animo reluctans, contestabatur magna libertate, se Christianam esse, & Christiano coniugio copulatam, nolle diuinam legem violare. Ea constantia offensus Barbarus, ratus se à muliere contemni, magna crudelitate eam interfecit. Illo ipso die Iosephus rem diuinitus edoctus, duabus illis prolatis candelis, ad Missæ sacrificiū preces, sacræsq; lectiones adhibuit, quæ ad cultū vnius Martyris sunt institutæ : & nomen etiā mactatæ foeminæ, tanquam cælo iam donatæ legitimis locis ritè pronunciauit ; cùm tamen regio, in qua illa cædes commissæ est, plus triginta leucis S. Vincentio distaret. Rogatus à Nóbrega Iosephus, quænam esset sancta illa mulier, cui Missa cultum exhibuisset illo die, nomen prodidit mulieris, inter Vincentianos notæ pietatis, quam illo ipso die causâ diuinæ legis, & pudicitie seruandæ à barbaro Tamuya occisam esse asseuerauit. Haud multo interiecto tempore, multi ex iis, qui vnâ capti erant, redempta libertate, inde rediëre, qui totius rei seriem enarrauerunt.

NON huic dissimile factum alterum, non incommodum visum est, huic narrationi adiungere. Ipso die festo S. Ioannis Euangelistæ, qui tertius est à Natali Christi Domini, Missa *Requiem*, quasi certo homini parétauit. Id verò absurdum multis visum est. Quare Nóbrega familiæ Præses, licet sciret nihil temerè in ré tanta Iosephum facturum.

*Sacerdotè è Societate Laureti in Italia obiisse illo die cognoscit.*

fuisse; tamen, ut res palam fieret, quasi factum reprehendens, quærit ex eo in conuentu, cur tantæ Religionis die tam enormiter ab Ecclesiæ ritu exerrasset? Respondit, ea nocte in Laurentano Collegio Societatis in Italia Sacerdotem Societatis obiisse, quem Cõnimbricæ in scholis condiscipulum habuisset; multæ iam inde ab eo tempore probitatis adolescentem, eum postmodum Societatem ingressum, Romam post aliquot annos missum, indeque Laurerũ, aliquandiu in eo Collegio Societatis ministeria exercuisse; se illius animæ iuuandæ Missæ sacrificium eo die obtulisse. Rogat iterũ Emmanuel, ecquid nosset de illius animæ statu? respondit, cœlum ingressam, cum post sacrificij oblationem ad eum locum venisset; *omnis honor, & gloria.*

MIRABITVR fortasse quispiam, cur tam facile sua proderet arcana: id verò nulla fieri leuitate intelligemus, si res attentius inspiciamus. Primùm, obedientia, & reuerentia erga suum prælidem ista exquirentem; cui nil celandum esse ipse apud animũ suũ statuisset: deinde ex eodẽ fonte, vnde tanta ad eum donorũ copia manabat, prodibãt cuncta Perpetua illa de Deo cogitatio, quã remittebat nunquã; perpetuãq; cũ Deo coniunctio tanto diuinæ lucis fructu occupabat animum, ut in diuinũ lumẽ absorptus nostra hæc non humana ratione, modòq; cogitaret. Inde tamto animi candore, tamq; sincera simplicitate, quæ in diuino lumine intuebatur, ad diuinã illustrandam gloriã prodebat foras.

foras. Eadē mētis in diuino lumine occupatio, & cura illa intēta subueniendi primo quoque tempore animæ opem imploranti locum illi cogitationi non reliquit, posse parivirtute, parique efficacitate cuiuslibet dici oblatum Missæ sacrificium animabus expiatione indigentibus opem ferre.

V R B S interim sanctus Sebastianus strenuè ædificabatur. Nondum confecto opere, nec muniti onibus absolutis, nouus superuenit à Gallis, & Tamuyarum reliquiis tumultus. Onerarias quatuor Galli iam mercibus eius terræ compleuerant, cū eos Tamuyæ rogarunt, vt, antequam discederent, se ad communem hostem bello opprimendum ducerent. Erat hīc homo Brasilius, vir præsentis animo, magnōque, bello strenuus, consilio bonus supra caprum gentis; fide in Lusitanos, & Christiana pietate cum quolibet optimorū comparādus. Is superioribus bellis multa pro Lusitanis, & Christiana Religione egregia facinora ediderat; magnūq; sibi apud omnes militaris virtutis nomen cōpararat, & magnū sui nominis terrorē hostibus iniecerat. Patriū illi nomen fuit Ararig Bohya. Sed Christianū nomen in Baptismo Martinū Alfonso Sosa suscepit à magno Sosa, qui primus Regiis auspiciis in Brasilia rem ordinauit, suis meritis consequutus. Eum rerū fama permotus Médes Sala in expeditionem Ianuariensem iam inde ab ipso belli initio ire iusserat, egregiāmq;

*Bellum Tamuya iterum suscipiunt, adiunctis Gallis.*

toto eo bello Lusitanorum testimonio operam nauarat; ita vt inter præcipuos duces honestum locum teneret. Confecto bello eum Prætor cum sua cohorte in vico plus minus leuca vna ab vrbe S. Sebastiano collocarat: ibi eum Tamuyæ Gallorum auxilio adoriri cogitarant; subitoque aduentu captum in suos fines pertrahere; vt more suo festa lætitia eius vorandis carnibus odium exsatiarent. Galli, ne Barbaros, quorum amicitia locupletabantur, ab se alienarent, ipsorum postulatis assensere. Ergo sublatis anchoris, octo minoris aluci nauigiis, canoïisque permultis adiunctis, magna imposita Tamuyarū turba, ad Ianuariensem sinum vela dant, & nondum munitis faucibus, sinum intrant; urbemque tutò, ac nullo impediēte prætereunt, nullis adhuc ad hostem remorandum in litore castellis excitatis. Erat omnino res periculi plenissima: aduentus hostium improuisus, apparatus timendus, nec cui paribus viribus obuiam iri posset: ac si Gallis pares virtute Barbari fuissent, magnum illo die ciuitas periculum, si tentaretur, adiisset. Missi tamen tanquam caduceatores, qui itineris causam exquirerent, à Gallis responsum acceperunt, se ad Martinum Alfonsum in potestatem Tamuyarum tradendum proficisci. Præfectus Ianuariensium Corrêa, veritus si Martinus perfunderetur, ne periculum in urbem verteret, misit ad Vincentianos petitum auxilium; arma,

milites,

milites, & quàm maximum canoarum numero-  
rum, apparatusque reliquum quamprimùm  
mitterent. Ipse militibus, quos ad subita quæ-  
libet paratos habebat, urbem munit: iubet om-  
nes in armis ad hostium aduentum paratos  
esse; præsidia, vigilésque disponit: nec minùs  
de Martino Alfonso sollicitus, eum per celeres  
nuncios de periculo certiore facit. Ille con-  
festim cum suis vicum totũ vallo cingit, reten-  
tisque; tantùm militibus, & Patribus Societatis,  
qui præliantibus animos adderent, precibus  
diuinam opem implorarent, imbellem multi-  
tudinẽ procul à periculo iussit faceßere, seq;  
magno animo ad propugnationem cõparauit.  
Hostes admota ad litus classe, exscensionẽ fa-  
ciunt, & tanquam certi de victoria reliquum  
diei otiosè traducunt, prælio in diem posterũ  
dilato. Superuenit ex vrbe, vicinisque locis per  
noctem Alfonso non magna, nec tamen con-  
temnẽda Lusitanorum manus, duce Odoardo  
Martinio Morano; muraléque; tormẽtum enẽũ,  
quem *falconem* vulgò nominant, ad fundẽdos  
in hostes lapides, ingenti canõa aduectum no-  
ctis silentio, hostibus nihil sentiẽtibus, oppor-  
tuno loco collocat. Exhilaratus Alfonsus hoc  
subsidio, letusque; ea sibi, quæ à tã beneuolis ami-  
cis sperasset, cõtigisse, multa grati animi signi-  
ficatione gratias egit Lusitanis: inuocatõque  
IESV, ac S. Sebast. nomine, suos ad præliũ hor-  
ratus, iubet vallum rescindere, & in hostes, an-  
tequam aciem instruant, eruptionem facere,

subitòque impetu , & ducis dicto, & Lusitanorum exemplo inflammati imparatos hostes , ac semisopitos adoriuntur. Onerariæ propiùs iusto ad litus appulsæ , sub ipsum pugnæ tempus , æstu refluyente, grauata mercibus , aquæ breuitate laborantes fluctuabant. In eas falco lapidum procellam euomens, multos è nautica turba , tum intra naues ipsas, tum sparsos in litore partim exanimat, partim grauiter afficit. Barbarorum acies etsi aliquandiu conferta multitudine fortiter restitit , impressionem tamen tum Lusitanorum , tum Alfonsoianorum non ferens, tandem terga dedit. Nostri insequuti magnam eorum stragem ediderunt, non magno suorum damno. Onerariæ inde , æstu statim horis redeunte , iustam aquæ noctæ altitudinem, malè acceptæ, ac multis de suis amissis, in altum se recepêre. Barbari malè multati ex fuga ægrè suis nauigiis , canoîsque conscensis, fractis animis , viribûsque accisis , vnà cum onerariis Caput frigidum repetierunt ; & qui armati è suis finibus exierant , vt Martini Alfonsoi membra deuorarent, ingentem suorum numerum per Martini campos stratorum feris , volucribûsque vorandos reliquerunt. Galli, resartis, quas prælium afflixerat nauibus, cum suis mercibus in patriam renauigarunt. Ita graui, formidolosòque bello paucis Lusitanis, Alfonsoianisque indigenis perfunctis , regio tota



metu liberata est. Vincentiani interim, cognito Ianuariensium periculo, vt in re subita, ea qua par fuit celeritate, satis firmum armatorum subsidium, cum apparatu, quem Corréa petierat auxilio sociæ ciuitati misère: quos cum paratos ad iter Iosephus Anchiéta vidisset, precatus est Deo bene iuuante proficisci: sed illorum prædixit auxilium fore superuacuum, quod illo ipso die hostes suo discessu liberum sinum reliquissent; quod ita factum esse copiarum eò profectarum compererunt. Atque id ille nulla humana via scire potuit, cum sancto Vincentio leucis quadraginta sinus distet Ianuariensis. Hac clade attriti Tamuyæ, priorèq; deturbati in portum alterum Septentrioni obuersum se receperunt, quem Petream domum nominant.

*Prædicit Iosephus hostes eo die sinum Ianuariensem liberum reliquisse.*

*Clades Tamuyarum.*

REL I Q V A multitudo mediterranea latè incolebat: ibi etiam sæpius è nostris excursionibus, minoribusque bellis eorum accisæ vires: tum vt ne reualescerent, tum vt ne maritimæ oræ, ac finibus infesti essent. Et cum ad eos bello laceffendos, superbiamque infringendam viginti à Vincentianis finibus leucis cum sua cohorte Georgius Ferreria profectus esset, Iosephus in oppido Sanctis palam denunciavit, nostros eo die vicum Barbarorum, nullo de suis desiderato, expugnasse; posteroque die sub noctem venturos eius victoriæ nuncios; idque ita contigit. Alio tempore Vincentianæ coloniarum Præfectus Hieronymus

*Victoriam de Tamuyis absens cognoscit, ac denunciat.*

Leitanus cum magna militum manu in eorum fines inuasit, trigintâq; leucas progressus bimestri fermè tempore ibi hæsît, cùm interim nuncij nulli perferrentur. Suspensis omnium animis, Iosephus eodẽ in oppido Sanctis, inter dicendum ad cõcionem, repentè obticuit; manûq; oculis obtenta, post aliquantum silẽtium, quasi ad se rediens: Pronunciemus, inquit, singuli orationem Dominicam, Angelicamq; salutationem, gratias diuinæ Bonitati agẽtes de victoria, quam hodierno die de Tamuyis hostibus, nostris militibus concessit. Atque ita eo die contigisse victores, cùm domum rediẽre, testati sunt. Sed his quasi excursionibus hostium vires retusæ, nondum fracta contumacia: nam à Ianuariensibus, Christophoro Barrio primùm duce, magnis cladibus afflicti, anno tandem 1575. duce Antonio Salema, colonix Ianuariensium Præfecto, magnis copiis in eorum fines adductis, occisione deleti sunt, paucis seruatis, qui Christiana fide suscepta, (& hi videntur, qui initio Nóbrega, & Iosepho interpretibus, pacem cum Vincentianis factam seruauerunt) in vicos S. Laurentium, & S. Barnabam, circa sinum Ianuariensem translati sunt, & Patrum Societatis I E S V institutioni, vt alij Neophyti, traditi. Atque hic tandem post viginti circiter annos belli Tamuyani finis fuit.

*Belli Tamuyani finis  
anno Domini 1575*

DEGEBAT interim S. Vincentij Iosephus, Societatisq; ministeria solito cum fructu exercebat,

cebat, cùm magnum vitæ periculum adiuit, è quo vix credi possit sine diuino miraculo seruatum esse. Milites duo magnæ in rebus bellicis auctoritatis, ingenio præferoci, ob aliqua commerita, legum pœnam timentes, cum suis familiis in mediterranea secesserant, seq; ab Barbaros hostes communi consilio contulerant; & erat metus, ne hostium instructi multitudine Vincentianam coloniam infestarent: ad id periculum auertendum, statuit Iosephus ad eos se conferre; atque, impetrata delictorum venia, eos ad suos reuocare. Iuit cum eo Vincentius Roterigius, & pauci præterea comites auxilio: iter flumine faciebant, lintre, seu, vt illi vocant, canôa vehabantur ex cortice trabis vnus confecta. Sunt hæ agiles quidem, & tutæ ad faciles nauigationes, sed quæ leui fluctuatione agitata,mersæ deprimantur; quo carent incommodo, quæ ex solida trabe excuantur: nam eæ si quo casu mergâtur, vndarum victrices enatant. Persoluebant inter nauigandum Patres sacram eius diei psalmodiam, neq; ita longè aberant à loco, quem petebant, cùm linter in abruptũ fluminis alueum aquarum impetu prouectus vnâ cum vndarum ruina è cataracta in subiectâ fossâ cadês demergitur. Omnib. nâdo ad ripâ appulsis, solus Iosephus imperitus natâdi considerabatur; & multa erat aquarũ altitudo. Venerat in eo comitatu Brasilus homo robustus, & natator egregius. Is dolore & cômiseratione  
eius,

*Vt milites  
duos trans-  
fugas ad  
suos reuocet  
vitæ pericu-  
lum adit de-  
mersus in  
flumen.*

eius, quem tantopere diligebat, se dimittit in flumen; & cum vrinando diu conquistum non reperisset, emerfit ad respirandum; dolorisque impatiens iterum se demittit; diuinoque Numine eius oculos regente, videt hominem in medio alueo sedentem, quem lacinia apprehensum extrahit incolumem cum propè semihoram hæssisset in aquis, semper suæ mentis compos, trium rerum, ut ipse postea narrauit præcipuè memor, I E S V, M A R I Æ, & ne de flumine biberet. E tanto periculo seruatus, cum ægrè respirasset, madida veste, ut è flumine extractus erat, pedibus iter cum aliis capeffit: neque habuit ne sudarium quidem, quo inter corpus, & indumenta inserto vda vestis humorem, frigusque arceret; quin cælo pluuio eos nox oppressit. Nō ignis, non cibus suppetebat, neque tectum, quod se reciperent, occurrebat: iter inuium, altis dumis, vepribusque oblitum, ut ne semita quidem gressibus locum aperiret; & manibus erant ramusculi ad ingrediendum reflectendi. His difficultatibus præpediti, diuina eorum iter regente prouidentia, in hospitia eorum, quos quærebant, inciderunt. Illi tantæ calamitatis spectaculo permoti, ingemuerunt, statimque mutata mente, ad Patrum pedes abiecti præteritorum erratorum veniam postularunt; dolentes maximè suorum delictorum pœnas homines immerentes tam graui incommodo luisse: eosque exceptos perbenignè ex tantis

arum.

ærumnis recrearunt. Non difficile fuit peccatum suum vltro profitētes ad sanitatem reuocare, præsertim fide publica commissorū impunitate impetrata. Patres igitur cum suis familiis S. Vincentium sequuti suis ciuibus se reddidēre Ita diuina ope per Iosephum & illi ab iniuria inexpiabili reuocati, & colonia à periculo grauissimo liberata. Hæc ferme circa illa tempora, quibus Sacerdotij charactere Iosephus est insignitus, cōrigēre. Dicebat præterea, vt Sacerdotes alij ingenio, & doctrina instructi, ad concionem. Eius sermo è pectore prodibat pleno magis pietatis, diuinorumque sensuum, quos ex perpetua cum Deo consuetudine hauriebat, quā doctrinæ librorum lectione comparatæ: etsi hanc in primis studiosè adhibebat, sed quam Spiritus dulcedine, quā plenus erat, condiebat; vt doctrinæ robur, & verui penetrarent ad mentem. Morata oratio spiritali iucunditate se ad animum infundens, homines ad mentis compunctionem lacrynasque sensim commoueret; & eos ad detestanda vitia, virtutésque amplectendas, in priusque ad Dei cōiunctionem per Sacramentorum vsum expetendam induceret. Sententiæ suo pondere robustæ, & efficaces non in concionibus modò, sed in priuatis etiā ipsius e Deo colloquutionibus, animos quamcunque vellet in partem, permouebant. Licet breue totius generis exemplum ex fragmentis nonnullis eius epistolarum agnoscere, quæ ad

*Quilis fuerit dicendo ad concionē.*

cem nostrae narrationis sunt adiecta. Fœmina nobilis, & grauis in concione illius oratione ita afficiebatur, vt diceret, Spiritum sanctum P. Iosepho verba in os inferere, non secus, ac columbam in pullorum suorum guttur alimētum. Gaspar Sempereſius Societatis Sacerdos iuratus testis dixit; cū Iosephus in Præfectura Spiritus sancti in templo Societatis ipso Pentecostes die concionem haberet, vidisse se passerem Canarino similem ad dicentem aduolasse: ac sinistro eius humero familiariter infedisſe, quem cū blandè inter dicendum ab se repulisset, ipsum tamen iterum rediſſe. Non est credendū, non ad testimoniū summæ innocentiae homini item innocentia dandum tantæ religionis die, inter eam actionem, quæ potiùs auem abigeret, quàm inuiteret, hæc signa Deum ostendiſſe. Ipse Episcopus Petrus Leitanus, tanta auctoritate, & sapiētia vir, ita illius sermone tenebatur, vt dicere solitus sit, faciliùs se huic vni Canarino, quàm reliquæ doctorem virorum multitudini auscultaturum. Nec tamē ille perpetuò hærebaſſe affixus concioni: sed subinde suscipiebat ad Neophytorum, Barbarorumque vicos excursionē. Quò in genere non erit inutile, vt alia multa vniuersè cognouimus, ita etia quod ad

*Passer dum dicit ad concionem illius humero infedit.*

*Episcopus illius sermone tenebatur.*

*Duo excursionum genera ad Brasilienses erudandos.*

hanc rem pertinet, accuratè nonnulla explicare. STATAS sedes & fixas Societas IESV habet in Brasilia septem in oppidis, & vicis decem. His rursus loca alia minora cum suis Eccleſiis

siis, domiciliisque, quibus pro tempore Patres diuersentur, attribuuntur. Ex his sedibus septemdecim duo ad Brasilos erudiendos peregrinationum genera suscipiuntur: nam aut Neophytorum pagos, vicosque sibi notos, quos diximus suis quemque sedibus attributos peragrant; aut in Barbarorum fines centum, plus etiam interdum leucas intra mediterranea se penetrant. Hæc omnium durissima, & crucis fructibus refertissima provincia est: non labor, non fames, non sitis, non lassitudo, non itinerum asperitas, non vitæ discrimina, non denique ærumnarum genus ullum desideratur. Nullum solatium, leuamen nullum, nisi quod ex re diuina bene administrata proficiscitur. Adhæc incolarum duritia, asperitasque, quasi laborum condimentum deuoranda. Per has asperitatum delicias veri Crucis amatores, homines aduenæ, & ignoti ignota & inhospita loca percurrentes, oues errantes ad Christi pascua compellere, & Euangelij proferre fines diuino fulti auxilio contendunt. Quæ omnia incommoda studiosi venatores animarum, tanto animi ardore subeunt, ut minùs auidè expeditiones illæ expetantur, quæ non fuerint harum asperitatum quasi acidi succi acrimonia conditæ.

*Peregrinationes ad infideles ærumnosa.*

H O R V M laborum fructus est, quamplurimos ad cognitionem, cultumque sui conditoris adducere: nec culturæ malignè prouentus respondet; siquidem plantationi,

*Brasili Neophyti quæ ratione in suis vicis instituantur.*

ni, irrigationique incrementum dat ipse Deus. Sunt porrò aliæ quasi statæ, & quotidianæ ad Neophytorum vicos, aliósq; cætus Ethnicorum in finitimis pagis excursionēs, quæ & minùs ærumnosæ sunt, & sp̃e fructus certiore suscipiuntur. Iis & Baptismo iam affecti ad maiorem pietatem excoluntur; & qui alieni sunt à fide, ad Christianam pietatem inuitantur. Est in his instituendis certa descripta ratio. Manè cùm prima luce signum datur ad salutationē Angelicam; haud ita multo post conueniunt ad Missæ sacrum, sub sacrum Christianam doctrinam ipsorum lingua, & inter Catechismum solemnes preces vnâ omnes edocentur; inde ad suum quisque opus dimittuntur.

HÆC fere omnibus in locis, vbi aut Catechumeni, aut rudiores adhuc Neophyti instituuntur. Quibus autem in locis Societatis Patres residēt, & maior est vitæ cultus inductus, post salutationem Angelicam ante Missam pueri, puellæque ad templi fores seorsim in choros distributi, assa voce alternatim rosarium decantant. Initium illo quasi prologo faciunt pueri: *Benedictum, & clarificai ū sit sanctissimum nomen I E S V.* Quibus per antistrophen puellæ respondent. *Et sanctissima Virginis Mariæ matris eius, nunc & semper. Amen.* Inde alternantes chori rosariam modulationem aggrediuntur: absoluta quaque decade, interponunt laudem: *Gloria Patri.* Decursa rota pētacontide, ad Missæ sacrosanctum sacrificium



se vnà cum aliis componunt. Hæc cùm aliis in locis , tum præcipuè in vicis , qui ad coloniam Spiritus sancti pertinent , quotidiana sunt. Missam brevis explicatio sequitur Catechismi ipsorum lingua, communis omnibus: qua breui absoluta discedunt reliqui , pueri ad scholas suas se recipiunt; & pro ætatis gradu, alij legendo , musicis alij exercentur, tum Gregoriano cantu , tum harmonico. Non pauci etiam maiores , minoresque tibias, quæ *flauta* . & *ceramia* vulgò nominant, ad symphoniam inflare assuescunt. Quo deinde artificio diebus festis Ecclesiæ sacra executio, & supplicationes , cùm traducuntur, exornantur. Vespere porrò hora quinta pomeridiana , rursus dato signo ad Christianæ doctrinæ concionem euocantur ; explicaturque iis pars altera Catechismi. Absoluto Catechismo , pueri supplicatione ab Ecclesia ad Crucem vsque non inde longè consecratam pio cum cantico procedunt, pro animabus noxarum reliquias purgantibus supplicantes. Atque hæ quotidianæ, vsitatæque exercitationes in vicis, minoribusque Neophytorum Ecclesiis , ybi Societas sedem habet. Sunt & aliæ præterea , si minùs assiduæ, non minoris tamen momenti , fructusque. Infantes recens nati baptizantur : adulti Catechumeni instruuntur ad Baptismum , Baptismo expiati ad matrimonium Christiano ritu obeundum ; illorum patrocinium susci-

*Qua ratione  
Brasili se  
comparent  
ad Eucharis-  
tiam perci-  
piendam.*

pitur, dantque operam Patres, ne quid de ip-  
sorum libertate minuatur. In morbo eorum  
curationem suscipiunt, sacro oleo, cum ad ex-  
trema veniunt, inungunt, defunctorumque  
Ecclesiasticam procurant sepulturam. Tum  
ex vniuerso cœtu deligunt, quos multis hor-  
tationibus, præceptisque ad Eucharistiæ per-  
cipiendum Sacramentum præter festum Pa-  
schæ diem, instruant, viros, fœminasque. Et  
cùm sunt ad communionem admittendi, pri-  
die eius diei circa vesperam, quies agitur inter  
eos: neque fere quidquam iis maiori curæ est,  
aut sermo dē re alia, nisi qua se ratione com-  
parent ad sacrosanctum percipiendum Christi  
corpus. Ipso die vnā omnes manē comuni  
conuentu sacram mensam ineunt, dieique  
maximā partem in tēplo precibus traducunt.

*Brasilorum  
Christiano-  
rum consue-  
tudines.*

ET, vt aliquid de illorum consuetudine  
dicamus, terram colere iam dudum qui Chri-  
stianam Religionem suscepēre, assueuerunt;  
& operam etiam varia ad ministeria locare,  
mercedem capere, rem cogere, & parta tueri  
didicerunt. Utuntur etiam viri, fœminæque  
indumento: fœminæ veste candida supernè  
circa collum adstricta, indēque ab humeris  
laxa, sinuosaque ad pedes vsque defluente  
utuntur; itaque conformata, vt & decoro ser-  
uiat, & elegantia: comam vittis colligatam  
circum caput colligunt; manibus sertum glo-  
bularum ad orandum præferunt. Viri quam  
quisque nactus est laciniam, ea fortuito cor-  
pus

pus aduelant. Diebus verò festis, & quoties ad Ecclesiã conueniunt, vestitu cultiore prodeunt, ornatu fere Lusitanico, & militari. Galeris iis tela holoserica subsutus, calcei, caligæ, manicæque eius quem quisque colorem adamauit; amictus reliquus nobili ex panno Lusitanico, Hispanicove. Et hæc ij præcipuè, qui præter cæteros sunt ad humanitatem promiores. Studiosi etiam sunt colendæ pietatis: multum Christi nece, & doloribus afficiuntur; cuius rei causâ & frequentes conueniunt ad templum, quibus diebus ea de re sermones explicantur; & multo cum feruore corpori flagella admovent, sacrisque hebdomadæ sanctæ diebus magna cum Lusitanorum admiratione supplicationes flagellantium traducunt. In quibus sæpe videre est etiam teneræ ætatis pueros pro modulo studia parentum æmulari. Hæc in oppidis, vicisque in quibus Societatis Patres resident, & ad quos peregrinantur inter Christianos instituta promouentur. Hoc quoque Apostolicæ vitæ genus, cum à concione vacua illi tempora dabantur, diu exercuit Anchieta: & cum pedibus iter faceret, maximam noctis partem precibus insomnem traducebat. Accidit persæpe inter peregrinandum, ut cum superueniente nocte, nullo per ea itinera diuersorio, tugurium Nomadum more ipse cum comitibus raptim sibi suis manibus coustruerent, obseruato tempore, quo maximè somno consopitos comites

*Studia pietatis Brasili-  
lorum.*

*Iosephi peregrinationes  
ad Brasilos  
erudiendos.*

Itannia.

arbitraretur, è tugurio exiret ad orandum; idque sæpe ab ipsis comitibus obseruaretur, & post aliquot horas ad modicam quietem se in tugurium referret; sæpeque antequam alij euigilarent (erant enim illi somni breuissima tempora) iterum prodiret ad orandi cursum repetendum. Et cum loca alia obiret frequens, tum in primis peculiarem terræ tractum sibi legit, quem ob copiosam messem animarum, & meritorum sibi paratam segetem suum Peruuium appellare solitus erat. Infra S. Vincentium litus ad octo, decemve leucas in Austrum excurrit. Solum asperum, herbis, virgultisque omnibus prorsus detonsum, aliquibus tantum fluuiis, riuisque in mare tendentibus intercisum, multis etiam balænarum cadaueribus, ossibusque respersum, quæ tumescente mari, præsertim nouilunio, aquarum multitudine lasciuentes, terras adnatant, sæpeque æstu sæuiente in litus eiectæ, refluxente salo in sicco destituuntur. Tendit tractus ille spatiosam in planiciem, lapideam totam, omni plantarum germine erasam. Hæc gentis vocabulo Itannia nomen habet, quod ipsorum lingua *pratum saxum* sonat. Vicus ibi est, qui Lusitanis Conceptio nominatur, à nobili conceptæ Virginis templo, quod multa ibi ueneratione colitur. Gentile saxei prati nomen, uti loci natura eadem, ita cum litore toto commune factum est. Ea solo durities, & cautibus asperitas est, ut ferratæ plaustrorum

rotæ, quantouis pondere onusti vestigium non imprimant. Addita etiam occulta inimica vis, vt non magno itinere confecto, incedentium plantas, quanuis soleis firmissimè munitas, lacerare, ac dissoluere videatur: eandemque & boues, & iumenta alia, pecudèsq; sentiant asperitatem. Hæc tamen itinera nudis pedibus, quod illi in itineribus solemne erat, Iosephus eius victor incommodi assidue terebat. Habet hoc asperum litus mare ad læuam, ad dexteram, cum arenosas syluas præterieris, terras introrsus recedentes ad montes vsque non longo tractu in Occasum distitos: mite ibi solum, & culturæ obtemperans; multa ibi Lusitanorum latifundia, qui cum suis familiis, & indigenarum seruitiis in ipsis prædiis habent domicilia; prouentuque agrorum lucra exercent suo. Hæc Piratiningæ cæpestria esse necesse est, quæ suprâ Europæis terris quàm simillima ab agrestibus ferme Lusitanis culta tam felici prouentu fruges fundere commemorauimus. Et licet vici, conuentusque per agros nulli sint; sed circa Conceptionem tantum non infrequens vicus, seu oppidulum; est tamen in illis prædiis ingens sparsus animarum numerus ad culturam opportunus. Hos tum Lusitanos, tum Brasilos non minore diligentia, quàm ipsi prædia, Iosephus suscepit excolendos: eandemque curam, diligentiamque in ea excolenda vinea Vincentiani Patres

continuarunt : nec culturæ fructus , quæ Dei Bonitas est,respondet malignè.Ex multis,quæ inde Iosephus animarum lucra retulit , vnum admiratione dignum , & cuius haud faciliè simile reperias exemplum , non præteribo , ex quo diuinæ Bonitati laudes reddantur , quæ admiranda planè ratione Ethnicum hominem ad suæ prædestinationis finem adduxit.

*Senem igno-  
tum in sylua  
reperit, cate-  
chizat, ba-  
ptizat, mor-  
tuum sepe-  
lit.*

Obibat Iosephus de more suam hanc prouinciam , cùm à comitibus digressus solus in syluas penitus intrauit , nullo certo consilio, nulla ei subita rei nouæ oborta cegitatione, sed quasi alterius manu duceretur in senem incidit Brasilum , humi abiectum , atque arbori applicitum. Is Patrem ad se adeuntem his vocibus compellat.Perge huc adire,iamdiu enim hîc tibi præstolor.Quærit ex eo Pater,quinam sit,quaque ex terra,vicôve eò venerit. Respondit senex , patriam suam mari imminere; aliâque adiecit , ex quibus Pater intellexit,ipsum neque ex Itanniensibus, neque è Vincentianis finibus;neque ex tota ora Brasiliæ , in qua versantur Lusitani , sed ex remotioribus terris,fortasse circa flumen argentum , aliisve Australibus partibus infra tropicum ( nam Brasilico loquebatur idiomate) vel ministerio suprâ quàm humano eò translatum , vel diuino aliquo monitote , ac duce suis gressibus venisse; ex quo labore , & ætate fractum ibi quieuisse , diuini promissi fidem expectantem. Quæsiuit rursus Pater , quid eò

eò venisset, & quid sibi quæreretur? Respondit, vt rectam vitam percipiam. Hoc loquendi modo diuinam legem, & iter ad salutem intelligunt Brasili. Cum multa de eo exquisisset; accuratèque vitæ genus per omnes ætatis partes perscrutatus, omnia illius facta, cogitatæque excussisset; cognouit ipsum nunquam plus vnâ coniugem habuisse, nunquam bellum, aut arma nisi sui defendendi causâ suscepisse; denique omnibus subtiliter, minutatimque perpensis, statuit apud animum suum Pater, hominem illum nulla vnquam lethali culpa naturæ legem violasse; vt verissimum illud esse credamus, quod de id genus hominibus, integerrima vitæ innocentia in infidelitate viuentibus sacræ nos docet interpretes doctrinæ. Cōperit præterea hominem naturæ bono magna præditum cognitione rerum pertinentium ad animum, æqui præsertim & iniqui: tum etiam ipsius naturæ auctoris. Et, cum multa de veræ Religionis mysteriis illi Pater exponeret, subiiciebat identidem, se intra animum suum ita sensisse, sed exprimere nescisse. Ergo satis instructum, labore, & ærumnis itinerum, etatèque confectum, quoniam solatio instabat, aqua pluuiæ ex carduo collecta (nulla enim alia in arenis illis suppetebat) baptizauit, Adamumq; illi nomen dedit: qui tam diuino affectus beneficio, operante intus virtute Sacramenti, diuinæ in se gratiæ sentiens charifinata, oculis,

manibúsq; in cœlum sublatis, læto vultu diuinæ Bonitati primùm, tum etiã Patri gratias agit; & quasi expetiti voti compos, cùm superesset nihil eorum, quorum illuc causâ diuino ductu venerat, omni solutus cura, animam sacro lauacro expiatam, in ipso primò suæ regenerationis vestigio Deo reddidit, Patre abeunte statis precibus de more commendante. Corpus exanime Pater sacris adiunctis precibus sabulo sepeliuit. Illud aliquando fortasse diuina prouidentia, & dies in lucem proferet: neque enim locum in inuia sylua, & arenis indigare facile fuit. Hęc peregrè cùm rediisset, ipse postea narrauit. Nec mirum certo, & prædestinato diuinæ mentis consilio sancti viri precibus de gentis illius salute solliciti, & innocentis animæ integritati datum, vt res, quæ fortuitò fieri videretur, tam certo, & nec aberranti euento eo temporis articulo transigeretur.

*Senem alterum baptizans lepra mundat.*

V I D E T V R eodem prædestinato Dei consilio & alius ad Christi gregem item per Iosephum euocatus. Incidit hæcne, an alia in ora incertum, in Ethnicum hominem indigenam, fœda admodùm lepra maculosum; quem cùm diligenter Catechismo instruxisset, baptizauit: baptizatus vtraque lepra, & animi, & corporis mundatus est. At, cùm neque quo loco, neque quo id tempore factum sit, liqueat, quoniam cum his excursionibus similitudinem habet nonnullam,

non



non incommodum visum est hoc loco recensere.

IN hac eadem Itannienſi ora alio tempore dum iter faceret, Stephanum Riberium colonum Piratininganum tunc puerum in comitatu suo habuit; cumq; ex eo quaſiſſet, ecquid in canistro haberet eſculenti? negantem in Deo ſpem habere iuſſit; ipſum famulis ſuis eſcam præbiturum. Prædixit breui piſcem ſe reperturos in litore, ſed minimè edulem, paulo poſt alterum edulem, quem in canistrum coniectum in cibum vtrique elixabit. Ita prorsus euenit: haud ita multo poſt in paruum balanæ pullum inciderunt, acceſſu maris illuc eiectum, & in ſicco deſtitutũ; quo omiſſo, paulum progreſſi mugilem naſti bene grãdem in canistrum recondunt, itinerẽq; continuato anum indigenã inueniunt magno ahenno marinam aquam, ad ſal conficiendum excoquentem; puer demiſſum piſcem cum canistro in ahenum in prandium decoxit. His monitis puerum ad ſpem in Deum deſigendam erigebat. Id iam grandi ætate poſt Iosephi mortem magno affectu pietatis ipſe Riberius narrauit.

*In itinere  
Itannienſi  
duo illi mira  
eueniunt.*

ISDEMITINERIBUS per Itanniam alio tempore aliud non minùs mirum contigit. Proficiſcebatur cum fratre vno comite, & Luſitano puero Damiano Acoſta, cognomenro Fabella; cum iam octo circiter leucas confeciſſent, petit Pater à fratre comite Breuiar-

rium ad horarias preces percurrentas : tum frater suam socordiam reprehendens faretur se illud sancti Vincentij reliquisse : hoc loco Fabella se rediturum ad illud afferendum profiteretur. Pater certus sua in Deum fiducia, eius sibi auxilium non defuturum, puerum redire non permisit, compendio suæ spei tantum redimens incommodum. Confecto itinere Ecclesiam ingressi, persolutaque de more pia Numinis, & sanctorum Cœlitum salutatione, Patrem vident ex altari Breuiarium accipere, ex eoque debitas exolvere preces. Quibus absolutis, Breuiarium comiti reddidit, adiecto monito; posthac ne sis obliuiosus. Quod acceptum frater, agnouit illud ipsum esse, quod ipse sancti Vincentij reliquisset.

*Panthera.*

SOLITVS est etiam pagos alios obire. In colonia Ianuariensi, montibusque ad Caput frigidum pertinentibus pantheræ versantur, atque ad usque litora descendunt. Dum hæc loca solito cum comitatu peragraret, nocteque oppressi mapale sibi de more extruxissent, curatisque corporibus cæteri quiescerent, noctis silentio Pater more suo ad agendum cum Deo è tugurio egreditur, longoque interuallo rediens racemos, seu corymbos pomorum eius regionis, quas *bananas* vocant, accipit; easque foras proiicit, Brasílico loquens idiomate: Capite vos, ô meæ, dicebat, portionē vestram. Rogatus à fratre, qui illi co-

mes

mes erat , cuinam bananas id noctis proieci-  
 fet. Meis,respondet,illis sociabus.Mane facto  
 duarum pantherarum vestigia humo impressa  
 apparent , quæ illi noctu oranti assederant;  
 peractoque spatio orandi ad vsque tugurium  
 redeuntem prosequutæ erant. Diuino vtique  
 instinctu hominem ab omni humana labe pu-  
 rum , & diuino charum Numini , pro capto  
 sentientes,vt animantes aliæ adamabant. Vi-  
 detur demum è Vincentiana in Spiritus san-  
 cti coloniam translatus,& in vno è vicis ei Ec-  
 clesiæ attributo sedem habuisse;nec tamen ab  
 instructione Brasilorum , eorum vicos pera-  
 grando vnquam destitisse.

IT ER cum indigenarum comitatu facie-  
 bat, vipera illis obiicitur in itinere (est autem  
 huic colubrorum generi veneni virus suprâ  
 quàm in Europa notum sit, teterimum) ea  
 conspecta comites terrore perculsi diffugere.  
 Reuocat illos Pater, iubetque viperam ad se  
 venire: paret illa, eamque apprehensam sedes  
 sibi collocat in gremio; manûque demulcens  
 occasionem cepit multa de diuina potentia  
 disputandi, naturam nullam esse demonstrâs,  
 quæ non hominis imperio obtemperet, nulla  
 re diuinam legem violanti. Longo sermone in  
 hanc sententiam absoluto, multisque moni-  
 tis indigenas ad Christianæ legis obediētiam  
 adhortatus, viperam sua benedictione affectâ  
 placidè ab se dimisit. Aliam item viperam alio  
 in itinere obuiam habuit, quæ exterritus co-  
 mes

*Vipera.*

*Vipera al-  
 tera.*

mes pedem referbat: sed reuocatus à Patre fugam continuit. Pater viperam pedè calcam, veluti subsannans, vt se feriret, & iniurias conditori suo factas vlcisceretur, horrabatur. Illa collum erigens caput huc illuc flectebat innoxia. Ita sua in Deum fiducia comiti prælucens, ad mentem in Deum dirigendam, eadem ratione, qua alteram, monito adiecto, ne cui hominum noceret, abire permisit.

VITÆ



VITÆ

IOSEPHI ANCHIETÆ

E SOCIETATE IESV

LIBER TERTIVS.



O c peregrinationum genere Iosephus Anchieta Brasilicas oras peragrando excolebat, cum ad domum Spiritus sancti literis Sacerdotis e-

ius, qui ibi præerat, ex itinere reuocatur. Ibat eadem peregrinatione cum ipso Sacerdos alter, cui dixit eò se vocari, ut illi domui præesset, cum eius rei nihil ne per umbram quidem eæ literæ continerent. Eò cum venisset, literæ Præsidis Prouincialis ei redduntur, quibus iubebatur ei familiæ cum adiunctis sedibus præsidere. Suscepto familiæ regimine, & certa illi tandem sede constituta maior copia suppetiit omnibus illius virtutes obseruandi: nam, cum antea peregrinationes huc illuc hominem traherent, vix vnus, aut alter è Societate, paucique præterea indigenæ, itinerum comites assumpti tantarum rerum spectatores

*Domui Spiritus sancti præficitur.*

*Orandi Deū  
assiduitas.*

etatores esse potuerunt. Nunc verò factus assiduius, vt ita dicam, inquilinus, familiam omnem, multosque præterea ciues eorum, quæ in ipsum Deus contulerat, bonorum oculatos testes habuit. Ac primùm quidē orandi Deū, diuinæque cogitandi assiduitas, quam semper tenuit in priuata vita, multo in eo fuit in regendi munere distento intentior. Nam, præter statuta tempora ei exercitationi attributa, maximam noctis partem, quod illi toto vitæ tempore perenne fuit, cum Deo transigebat, nunc inambulando, semperque detractis calceis, ne strepitu pedum aliorum quietem inturbaret; nunc flexis genibus, aut in templo, aut in aliquo domus recessu. Hæc noctu: interdiu, præter quotidianum Missæ sacrificium, quod offerebat ipse, aliis quoque Sacerdotibus sacrificantibus, nixus genibus intererat; idque illi, quandiu sedi huic præfuit, & antea in vico alio, vbi tribus cum Sacerdotibus versabatur, quotidianum fuit. Et quidquid ageret, siue magnum, siue paruum, in rebus omnibus, omnibusque temporibus Deum præsentem intuebatur. Ita enim cum hominibus agebat, vt cum illius æquitas, humanitas, comitas nullo loco desideraretur, sua tamen dicta omnia, cogitataque è Diuinitatis pectore haurire videretur: qui, cum à rebus gerendis, atque ab hominibus se recepisset, nūquam nisi in diuinarum rerū co-

*Perpetua eius de Deo  
cogitatio.*

gita

gitatione defixum deprehenderes. Nullus erat locus, nullum tempus, nulla occupatio, nullum otium, quod à cogitando de Deo eius animum auerteret; vt non Dei præsentia, sensuque perpetuò vbique frueretur: in mensa saepenumero cibi oblitus, aut cum Deo loquebatur, aut ex intimo pectore suspiria in Deum, tanquam hamentata iacula intorquebat. Solitus est id saepe dicere; nullam rem nos abducere à perpetua, continentique de Deo cogitatione, nisi desidiam nostram, quod parum prouidi sumus: deque se dixit saepius in sermone, nullas & alienas cogitationes impedimento sibi esse ad perpetuam earum rerum meditationem, quas sibi ad mentis spiritalem exercitationem proponeret. Sepe cum domestici, cum pro re nata ipsum adirent, in medio paupamento prouum ingenua viderunt; iunctis manibus, inflammato vultu, oculis clausis, subindeque diductis, atque in altum defixis, ex inopectore suspiria edentem; identidemque nomina cruciatuum Christi Domini pronuntiantem. Quin etiam per noctem inter quietem, cum præsertim peregrinaretur, auditus est cum quadam pedum suppositione eadem nomina pronuntiare. Genibus ex assidua orandi consuetudine callos obduxerat, eaque longo pressu exasperata, discissa cuti, rimas egerant. Et quando per occasionem regiminis aliis de-

*Mortificatio  
illius & vi-  
ta asperitas.*

& dicenda adhuc alia supersint, quæ reddentur locis suis, antequam ad eius actiones veniamus, nonnulla de vnanimi orationis forore, & indissociabili comitè mortificatione dicamus; tum ea, quæ corporis appetitiones, tū ea, quæ animi elationes, motusque prauos refrænat. Asper fuit in seipsum, sui que corporis feuerus domitor: ieiunia, & flagra erant ei familiaria, ad cubitum non lintheum, non stragulum vllum adhibebat; sed cum indumentis somnum capiebat, quò ad orandum Deum euigilaret expeditior. Si quis aliquando è domesticis ægrotaret, postquam ad necessaria ei ministeria aduigilarat, eo quieti tradito, nudo alicui asseri ad cubabat, calceis, vno in alterum inserto, capiti pro cervicali suppositis, neq; vnquam, nisi morbo coactus, lecto decubuit. Ferunt eum in Vincentiana sede cū ibi præesset, è Spiritus sancti sede eò translatum, in angulo domus spinosorum virgultorum fascem habuisse, cui caput acclinaret, corpore pauimento porrecto, cū fessus à nocturna precatione somnum repetere cogeretur. Et cū aliorum commodis prouidè, accuratè que prospiceret, sui tamen fuit neglector egregius. Nihil omnino, quò ad cultum attinet, penes se habere voluit, nisi quibus amiciebatur indumentis, iisque detritis, ac totius domesticæ vestis deterrimis. Et quandiu priuatam vitam vixit, non illi scriniū, non arcula, non cista, immò verò ne pugillaria qui-

*Charitas eius erga ægrotos.*

*Eius paupertas.*



quidem nudo in cubiculo fuerunt. Ac si quando opus essent, accepta quasi ad tempus, quandiu illi essent vsui, retinebat, postmodum vnde acceperat, referebat. Quæ scribebat, faciliè aliis largiebatur: siquid verò maioris momenti aut ad vsum, aut ad memoriam seruandum esset, id apud Præsides deponere solebat: quin etiam pia munuscula, quibus Religiosi viri sibi inter se gratificari solent, rosaria, sacras imagines, agnos ex cera consecratos, & id genus alia piacularia ita non habere studuit, vt, si quando ei ab aliquo aliquid eiusmodi offerretur, gratum dantis animum multa humanitate collaudans, gratiæ tamen remitteret, ne carum rerum cura animus ipsius teneretur. Omnino non alibi faciliè magis nudam paupertatem triumphantem videris: hæc enim vna virtus mortificationis maxime comitatum cohonestat. Huic domesticæ inopiæ consentaneus externus illius fuit in faciendis itineribus apparatus: nunquam enim neque in peregrinationibus, neque in obeundis negotiis, aut locorum mutationibus, ne tum quidem, cum ratione sui muneris prouinciam cognoscendæ causâ obiret, equo, iumentove alio vectus est; illa causa obtenta, seu vera, seu adumbrata, quod ad dorsi luxationem, de quo morbo dictum est initio, incommodum sibi esse affirmaret. Sed cum calceatus

*Eius itinera  
qualia fuerint.*

viatorio nixus hastili pedes iter iniret; frequentia loca prætergressus, detractis calceis, nudis pedibus iter reliquum conficiebat; tantæque celeritate festinabat per maris litora, per cautes, viasque asperas, per montes, per valles, per loca confragosa, ut Brasili ipsi, duri alioqui homines, & victu asperi mirarentur; eumque non festinare, sed volare dictitarent. Quo factum est, ut callis, rugisque exasperati tali, plantæque illi obduruerint. Sæpe accidit, ut, comitibus iter continuare iussis, solus in itinere subsisteret, quod expeditius cum Deo loqueretur: & cum eum ponè respectantes comites oculis perquirerent, longa iam parte viæ peracta, sibi præcucurrisse viderent; neque quisquam eorum præcedentem animaduvertere potuisset. Si quando iter mari faceret, totas noctes vigilabat, securi ut alij quiescerent. Hactenus de ea, quam diximus, mortificatione, quæ ad corpus edomandum pertinet; cui adiunximus amicam comitem paupertatem.

*Comitibus  
præeuntibus  
sæpe iter præ-  
uertit.*

*Mortificatio  
interior, &  
perpetua ani-  
mi pax.*

QVANTA porro animi pace secum ipse frueretur, compressis omnibus cupiditatibus (ut ad alteram, quæ in animo est, mortificationis partem tandem veniamus) ex ipsa eius perpetua constantia, tranquillitateque potest intelligi. Vbicunque esset, quæcunque se offerret occasio, quibuscunque cum hominibus ageret, semper ei fuit  
idem

idem vultus, eadem animi constantia, æquitasque, eadem lenitas orationis: quæ signa animi bene constituti, & in se ipsum dominatum tenentis esse solent. Cognita est multis in rebus ipsius animi tranquillitas, & nullo vnquam, ne leuissimo quidem motu agitata mansuetudo. Erga eos, qui ipsum aliquando molestia afficerent, causamque præberent indignationis, comem se præbebat, & humanum, perinde ac si nihil ad ipsum illorum pertinebat importunitas; studio, suisque illos Deo commendabat precibus. Et, cum quidam eum de homine alio, qui in re graui ipsum læserat, alloqueretur, fortasse vt cum iniurioso reconciliaret; respondit, grauius illum in Deum peccasse: & quando eum Deus tolerat, multo esse æquius, se illi Dei amore offensionem omnem condonare.

IN oppido Victoria, quod est in Spiritus sancti Præfectura, ita ædificabat oppidanus, vt nostræ domus luminibus obstrueret. Eum cum inhiberet Iosephus, illéque durius obsisteret, paulo efficacius loquutus est. Post paulo cum summæ lenitatis modum excessisse sibi visus esset, dixit vni è domesticis: ægrè mihi est, tristitia hominem illum affecisse; sed ego illi satisfaciam. Satisfactio illa fuit: qui antea nullo cum Societatis homine commercium vllum habuisset, aliisque ad confessiones Sacerdotibus

*Quidam nostra domus luminibus obstruebat.*

usus esset, post illam altercationem magno cum vtriusque animi fructu Iosepho confessione vniuersa omnem vitæ suæ rationem vltro explicauit.

*Eius in omnes officiosa  
charitas.*

SE D nescio an vlla virtus hominem cum Deo intimè coniunctum magis indicet, quàm charitas in omne genus hominum; eaque non in affectu tantùm abdita, sed in externa etiam officia prolata: cùm se talem quisque exhibet in alios, quales esse eos erga se optaret. Quàm officiosum, quàm promptum, ac beneuolum Iosephus se omnibus præstiterit, tum multa eorum, quæ narrata sunt, & plura alia, quæ narranda supersunt, luculenter ostendunt; tum nihil magis, quàm offi-

*Eius in agros  
charitas.*

ciosa eius in ægrotos assiduitas: quocunque enim in loco esset, siue cùm priuatam vitam ageret, siue alios regendi munus sustineret, vel tum cùm prouinciam totam administraret, certum erat ægrotorum leuamentum: mira cum animi alacritate, iucunditatēque illorum commodis inseruiebat; vt valetudinarij minister nullum ipso certiolem, opportuniorēque ad ægrotorum ministeria haberet adiutorem. Parandis, ministrandisque cibis, mensa apponenda, sternendis lectis, decumbentes alleuando, eosque strato componendo non vllus ipso accuratior. Tum si quis vigili custode per noctem indigeret, valetudinarij ministro iussu quiescere, ægrotos studiosè ipse aduigilabat: tamque assiduus erat vale-

tudi

rudinarij adminifter, vt qui illum fuarum rerũ causâ conquirent, hominem non ad ipsius cubiculum, sed certo ferme euentu ad valetudinarium adirent.

EADEM officia eadem sedulitate, ac studio erga externos indigenas exercebat: illos in suis morbis inuisebat, curationes, quarum solerti vir ingenio magnum vsum acquisierat, adhibebat; victus rationem præscribebat, missionem sanguinis, aliâque procurabat, quæ tempus, & morbi grauitas postularent. Nam in magna medentium paucitate tum rei necessitas, tum Pontificia indulta earum nationum priuilegio hæc charitatis in tenues præfertim homines, & inopes etiam prudentibus, peritisque Sacerdotibus, amota Ecclesiastica censuræ nota, officia permittunt. Quò fit, vt egentes multi, & ope destituti hoc leuamento recreentur, & conualescant, qui alioqui interirent. Neque opera tantum, & medendi arte, sed precibus etiam erat de illorum commodis sollicitus. In vico quodam Præfecturæ Spiritus sancti ægrotabat indigena Christianus, nomine Iosephus: eoque vsque morbi vis processerat, vt anima eum deficiente, omni sensu destitutus, pro mortuo haberetur, & iam funebri vlulatu eum fœminæ lugerent. Accurrit eò Sacerdos è Societate, qui curationis munus ibi exercebat, cum venas pertentasset, consopitâque reperisset omnia, reliquias ad extremum adhuc superantis vitæ ex cordis

palpitatione persensit. Adhibet illi extremam  
 vnctionem; misitque statim ad oppidum Spi-  
 ritum sanctum, qui hæc Iosepho nunciaret;  
 rogarétque hominem sibi cognominem, ani-  
 mam agentem Deo commendaret. Id se fecis-  
 se Iosephus respondit: neque cum eo morbo  
 moriturum. Ægrotus postmodum recepta  
 valetudine in multos annos vixit; & viuebat  
 adhuc, cum hæc in Brasilia anno 1605. nota-  
 rentur; & viuat optamus ad maiorem in dies  
 Dei gloriam, & spiritualium fructuum acces-  
 sionem. Multo etiam maiore alacritate ad eo-  
 rum iuuandas animas præstò erat, vt ex eius  
 laboriosis peregrinationibus cognouimus,  
 cognoscemusque adhuc sæpiùs. Sacras vestes  
 in S. Vincentij Ecclesia ad Missæ sacrificium  
 induebat, cum admonitus Brasilum hominẽ  
 in extremo vitæ positum postulare, vt sibi au-  
 res daret postremæ suæ confessioni excipien-  
 dæ; positis vestibus accurrit illuc: cumque ea,  
 quæ tempus postularet, ea qua par fuit chari-  
 tate homini præstitisset, ne definitũ tẽpus sa-  
 cro faciendo laberetur, redit, sacrumq; sacrifi-  
 cium illius offert causâ. Nondũ mediã exege-  
 rat sacram exequutionẽ, cum sensit in spiritu  
 ægroti animã è corpore exisse: quod pio homi-  
 ni rei totius conscio, sibi ad sacrũ altare mini-  
 stranti inter sacras actiones statim indicauit.

TANTA erat in eo tum humanitas, & com-  
 miseratio, tũ ardor animi, & studiosa, prõptã-  
 que ad omne officium celeritas; vt vel non  
 rogatus ad ea se porrigeret, ad quæ opera sua

pro-

*Moribundũ  
 Lominẽ adiu-  
 uat. Missæ sa-  
 crificium pro  
 illo offert: sen-  
 tit ipsũ obii-  
 se.*

prodesse se posse sentiret ; vt non spirituales  
modò , sed humanas alias indigentias mise-  
ricorditer subleuaret, fames quauis, frigora,  
& itinerum asperitas, & omniũ ærumnarum  
genera essent superanda : nihil enim tam ar-  
duum, tam asperum, tamq; insuperabile fuit,  
quod non excelsio illius animo esset inferius.  
Quod in frequentibus suis ad Barbaros, Neo-  
phytòsq; erudiēdos excursionibus declarauit.  
Proficiscebatur, cū adhuc priuatus geret,  
vno cum comite nudis vterque pedibus,  
aspero itinere, & stagnantibus aquis, lutòque  
corrupto, cū comitē his verbis interpellat.  
Hieronyme Soari frater, alij è nostris mortem  
sibi optant in hac, vel illa domo; in alio, atque  
alio Collegio alij, vt cuique propria est animi  
propensio, vt officiosa fratrum charitatē circū-  
septi maiore animo extremum illum agonem  
obeāt: ego verò id assero, nullum mortis genus  
esse melius, quàm per obedientiā iuuandarum  
animarum causā in aliqua harum lacunarum  
cœno, lutòq; obrutum vitam relinquere. Scē-  
tētia veri æmulatoris, atque imitatoris studio-  
rum, perfectarumq; Xauerij virtutum. Atque  
hæc non in suo recessu, in ipso cōtemplationis  
ardore, quod multis difficile non est, vota cō-  
cipiebat ; aut speciosa oratione ad alios per  
otium disputabat; sed in medio malorum cer-  
tamine, cōflictationēque, quod pauci nō hor-  
rent; fatigatione fractus hoc laborum leuamē-  
tum exoptabat: vt nō minore animo existimē,  
ipsū, si occasio tulisset, cœnum, & lacunas illas

*Quale mor-  
tis genus illi  
esset optati-  
simum.*

*Studiosè ca-  
uit, ne cui re-  
ulla mole-  
stus esset.*

subiturum, quàm Xaverius mortem in aspera  
Sinarum rupe; æstu morbi vexatus; solus, ab  
omnibus desertus in summa omnium rerum  
inopia excepit. Argumento sit placida eius  
tranquillitas cùm flumine merfus imminen-  
tem mortem non expauit. Tam beneuolo a-  
nimo, tamque molli erat, delicatòque sensu in  
alios, vt nihil ei esset grauius, quàm in re vel  
minima minùs commodum se aliis exhibere,  
vel iis ipsis, qui ad ministeria illi præstanda ad-  
lecti essent: quin eorum ipse inseruire com-  
modis quàm maximè studebat; ita vt etiam in  
morbis, quibus assiduè conflictabatur, siquã-  
do fomento aliquo, aliòve ministerio ad vr-  
gentes dolores leniendos noctu indigeret,  
quanuis sciret omnes libentissimis animis si-  
bi aduigilaturos, mallet tamen morbi graui-  
ratem, dolorésque languendo sustinere, quàm  
cuiusquam quietem interturbare. Neque in  
fratres solùm, domesticósque hac fuit indul-  
gentia, sed in ipsos etiam Brasilos, præsertim  
quos in peregrinationibus ad itinerum op-  
portunitates comites adducebat: nam; cùm  
illi sub dio suis porrecti retibus soliti sint per-  
noctare; excitatis tuguriis, eos communi con-  
tubernio excipiebat, cubantibusque ad som-  
num more suo in retibus, ipse subrus ignem  
excitabat, alebátque (hoc enim aduersus fri-  
gus remedio ea gens vtitur) noctis ferme reli-  
quum, vt aliàs docuimus; in preces insume-  
bat. Egentes, viduas, atque alios ope destitu-

*Egentes con-  
quisitis elee-  
mosynis in-  
uabat.*



tos modis omnibus subleuare nitebatur, eleemosynis præsertim, quas eius rei causâ homines opulenti, & eius pietatis studiosi è diuersis locis ad eum trans mittebant. In iis præcipuus fuit Christophorus Patius, qui Pernambuci negotiatur, vir amplissimarum opum, & qui in suo fundo tres habet officinas sacchararias: huic cum gratias per literas Iosephus egisset de deeleemosynis, quas in egen-tes distribuendas ad se misisset, adiecit, ipsum in eo negotiationis genere accepti sibi plus, quam expensi ferre oportere: siquidem ea versura inopes Deum ipsi cœlestium diuitiarum prædæ darent. Quod ille cum legeret, ita permotus est, ut in genua procumbens ipsas literas oscularetur, amplecteretur, pectori etiam adprimeret; seque in ipso vestigio Deo voto obligarit, se non modò nunquam pauperibus eleemosynas negaturum, sed duplo etiam maiores, quam ad eam diem fecisset, largiturum. Id multo etiam præstitit, quam promisit copiosius: cum antè semel quaque hebdomada petentibus singulis semidenarium dare consueffet, ex eo tempore sesquidenarium dedit: quadragesima etiam binos denarios. Cuius beneficentiæ meritum etsi totum ipsius dantis est, aliqua tamen ex parte pertinet etiam ad Iosephum.

*Christophorus Patius  
benignus in  
pauperes.*

Hæc de officiosa ipsius in alios sedulitate summatim hoc loco dicta sint. Aliorû vitia se præsentē, aut sermone pertractari, aut attingi non patiebatur: sed aut sermonem auertebat

*Aliorum vitia  
commemorari non  
patiebatur.*

aliò; aut ita intererat, vt eius aures peregrinari omnes intelligerent. Ita per tristitiam vultus error corrigebatur delinquentis. Studebat omnes sua lenitate impertire, omnes ad concordiam adducere, omnibus esse leuamento. Ipsos Brasilos, si quando mœsti, grauatiq; ipsum adirent, ite solabatur, vt lætitiæ plenos se ab ipso recedere faterentur. Harum virtutum omnium radix, & nutrimentum erat illa, quam sæpiùs in ipso laudauimus, perpetua cum Deo coniunctio, & familiaris assiduitas. Inde etiam ardens in diuina causâ laborandi, infidelésq; ad diuinum cultum adducendi studium.

*Qualis in rebus gerendis fuerit.*

ET, ne videamur hominem cœlo tantùm, & diuinis rebus factum describere, deuocimus eum de cœlo, cœlestiũque rerum cogitatione, atque ad homines, humanãque traducamus. Fuit in rebus agendis vigilans, & intentus; vt quamuis perpetuò cum Deo versaretur, nulli tamen rei, quæ ipsius esset muneris, non præstò esset, omnibûsq; ea dexteritate, ac comitate, quicquid ille ageret, ita satisfaceret, vt neque ad cœlestia, neque ad humana vllò vnquam tempore illius præsentia, diligentiaque desideraretur. Ita amicabiliter Martham cum Maria coniungebat, vt neque diuinarum rerum cura ipsum redderet in humanis otiosum, neque rerum administratio humanarum perpetuũ cum Deo familiaritatis cursum impediret. Neq; enim ad eius laudem

per-

pertinere existimem, si qua solertia, diligentia-  
que fuerit in paranda pecunia, in putandis ra-  
tionibus accepti, & expensi, in refarcienda do-  
mo, in emendis, distrahendisque rebus, aliisque;  
id genus curis, quibus occupari necesse est ani-  
mos eorum, qui familias regunt, minutatim  
prosequar. Qua enim solertia, vigilantiaque  
in rebus gerendis vteretur, ex his, quæ non mo-  
dò ad spiritalem fructum; sed etiam ad com-  
moda cuiusque pertinerent, quanta cura vigi-  
lauerit supra gregem suum, licet intelligere: ut  
non modò ad domesticos, ac familiares, sed  
etiam ad externa, & publica illius curæ, cogi-  
tationesque se porrigerent; cœlestiaque dona  
ad omnium opportunitates traduceret. Iam  
quantopere aliorum commodorum, sui negli-  
gens, studiosus fuerit, quantaque æquitate, &  
comitate iis satisfaceret, quibuscum aliquid  
transigeret, supra demonstrauius. Accedit,  
quòd ita humanam in eo prouidentiam mul-  
tis in rebus cum diuina videas coniunctam,  
ut non modò præsens occasionibus, sed mul-  
tis etiam periculis absens occurrerit in tēpore.

SACERDOTE M miserat ad ægroti ho-  
minis confessionem audiendam, quod ille  
munus dum obit, graue periculum incurrit:  
sub ipsum tempus sacris Iosephus operabatur,  
& ut erat de suis ouibus sollicitus, vnumquē-  
que Deo, & sæpius, & intēto affectu precibus  
commendans, diuino lumine Sacerdotis peri-  
culum cognouit; precibusque diuina ope im-  
pe

petrata, discussit: redeuntēque ad se Sacerdotem ē tanto discrimine seruatum præuertens illis Christi verbis excepit: *Ego rogam pro te Petre, ut non deficiat fides tua.*

*Hominem à commissa cæde profugū seruat.*

ERAT ipse in suo cubiculo rebus intentus, cum derepente profiliens, ianitorem inclamat: iubet illum confestim, patefacta ianua, hominem à commissa cæde profugum intromittere, exclusis sequutoribus, iustitiæ ministris. Paret ille; & vix aperta ianua miser ille pœnas fugiens intrò irrupit. Neque in priuata solum re, & vnius hominis, sed in publica etiam ciuitatis salute diuina illa, qua ex consortio cum Deo perfundebatur, lux frugifera fuit. Eodem modo alio tempore ianitorem ad se accitum iubet cōscensa turri æris. Campani pulsu populum ad arma excitare: mirantibus cunctis, & quid id esset sciscitantibus, in armis sint, atq; urbem custodiant, denūciat, postero die piratas fauces sinus occupaturos; fides habita est prædictioni: postridie adsūt hostes magno numero, exscensionēq; facta, cum viderēt ciues ad propugnationē paratos, urbē tentare ausi nō sunt; seq; infectare ad naues receperūt. Ita diuina prouidentia, Iosephi precibus ciuitas eo die magno periculo perfuncta est.

*Animi agri- tudinem vnus ē fratribus absens cognoscit.*

PEREGRINABATUR ille de more, suę curę vicos obiens, & vnà cum ipso Sacerdos alter ē Societate Ioannes Fernandius; cum interim vnus ē domesticis frater grauib; cœpit animi motibus agitari. Sensit id Iosephus absens,

sens, diuino spiritu edoctus, Sacerdotemque comitem alloquutus: vertamus, inquit, iter, omiffaq; peregrinatione, domum repetamus: est enim qui nostra præsentia magnopere indigeat; & fratrem certum nominauit. Cum ad oppidum venissent, ingressi domum magna omnium lætitia: magnoque ægri illius leuamento excipiuntur. Deus, inquit ille, huc te traxit hodie: nisi adueneras, quid me fieret, valde incertus eram. Pater, cognita causa ægritudinis, saluberrimis monitis, & plenâ pietatis oratione illius animum sedauit.

ERAT cum alio tempore, eodem Sacerdote comite eadem in peregrinatione versaretur, ex vno ad vicum alterum proficiscēbatur, cum comitem alloquens: properemus, inquit, vicanis enim, & ei, qui ibi residet Sacerdoti non leue imminet periculum. Haud ita multo antea ad vicum peruenerant, cum turbulenti homines superuenēre eo consilio, vt vicanorum pacem infestarent, & vico toti magnum inferrent detrimentum: sed Iosephi præsentiam reueriti, maleficio abstinuerūt. Sic perpetua cum Deo coniunctio hominem nūquam a suæ stationis custodia abducebat.

*Occurrit iniuriis quorundam adiacentium*

ERAT in vico alio eiusdem Præfecturæ homo patræ cædis reus: sed, seu, quod crimen latere posse existimaret, seu quo alio errore ductus, plus nimio fortasse sibi confidēs, securus in eo vico, suis intentus rebus cum sua familia versabatur. Erat in vico alio non longè inde

*Reum par-ricidij periculo subducit.*

inde Iosephus: is, cognito diuinitus miseri hominis periculo, de media nocte misit, qui eius vxori nuntiaret, coniugem vt moneret, in tutum se reciperet; ipsa se ad oppidum Spiritum sanctum transferret; futurum enim, vt apparitor cum lictoribus ad maritum vincendum eò veniât. Paruère monito: vir se periculo subduxit; ac, ne frustra monitos se esse intelligerent, mulier, dum ad oppidum se refert, obuiam habuit manum lictorum, qui ad rem perficiendam incassum properabant. Multa alia consultus ad aliorum vtilitatem longè positus vera prædixit.

*Prædictiones  
varias re-  
rum absen-  
sium.*

EIVSDEM Præfecturæ colonus Emmanuel Guayanus iter in Lusitaniam suscepit, annisque aliquot varia fortuna iactatus, longè à domo peregrinabatur, vt de eo certus nūcius, nullus perferretur. Mœstæ ea de re vxori sua mater, suavit, vt P. Iosephum adiret; eique peccata sua confiteretur, diligentérque illius verba obseruaret. Adit, confessionem obit; secundum confessionem quærit ex ipsa Iosephus, ecquid de viro suo cognouisset? Tristis illa certi se habere nihil respondit: rumorem tamen esse, captum à piratis Gallis interiisse. Tum Iosephus metum ponere iussit: ipsum enim viuere, sed aduersa multa pertulisse, adductum à Gallis ad Rupellam, inde elapsum grauitè apud fratrem ægrotasse; & iam reditum parare: non tamen rectà domum suam venturum: sed oras ad alias prius iactatū iri, qui quan

quam aduerso casu spoliabitur, non tamen inanis dimitteretur, vt non aliquid reliquum ipsi fiat ad reditū. Hęc omnia, vt Iosephus prædixerat, euenisse ipsa mulier suo testimonio iurata confirmauit. Adiecit præterea, alio tempore eundem virum suum iter in Angólam fecisse, atque in reditu, cū Illæorum portum peteret, vi tempestatis abreptum, vagūmque diu desideratum esse; rumorēque manasse à Barbaris in escam interfectum; Iosephum tamen sua oratione sollicitam, mœrentēmq; al-leuasse, asseruisseque ipsum adhuc viuere; diē-que Kalendarum Ianuariarum post meridiem domum suam reducem intraturum; neque ab ipso die, neque ab ipsa hora prædictionem aberrasse.

EI V S D E M Præfecturæ Antonius Georgius in expeditionem aduersus Guaitacasies, duce Michaële Azebedio profectus erat, nec multis diebus de tota profectioe perferebatur quidquam: & vt quā incertæ alex bellū cum ea gente, quantēque solitudinis, aut timoris causa fuerit, intelligatur, exponā breui, quod genus hominum, quæ regionis, belliq; natura sit. Sunt Guaitacasies inter Caput frigidum, & coloniam Spiritus sancti, homines non syluestres, sed palustres, omni tamen belluarum syluestrium genere propè dicam asperiores; crocodilis, aut lutris, quā hominibus similiore esse dixeris, in queis, præter corporis truncum, linguæ qualem qualem vsum,

*Guaitacasies quæ gens sit.*

usum, & barbaram feritatem humani nihil agnoscas: non enim, ut Tapuyæ reliqui sylvas, montesque incolunt, sed vliginosis in locis suaruguria ex paleis malè componunt. Regio palustris non plus quàm in viginti leucas sese aperit: duobus fluminibus clauduntur, pertinentque ad maris sinum, quem accolunt, vario aquarum concursu nauigantibus infestum; ut multa in eo nauigia perierint. In hoc tātulo terræ spatium duæ inter se infensissimæ gentes habitant, seseque inuicem vorant, prout alterutri plus viribus possunt. Hi cum nullo mortalium, ne è Brasiliorum quidem genere societatem habent, nullius commercio, confortiove vtuntur; non aliarum gentium pariquenquam ad se penetrare; non ipsis suis finibus, quanuis angustissimis excedere; non mediterranea pertetare: quidquid viuēs aduersa nauigatione, aut alio sinistro casu ad eos appellit, aut errore viæ intra illorum fines incurrit, siue humana, siue belluina sint corpora, tātquam altilia vorant omnia, serunt tamè circa litora legumina, & mandiocæ nonnihil. Ac si quando à Lusitanis bello petuntur, duæ inimicissimæ gentes ita iunctis viribus conspirat, ut ex infestis inimicis parum firma repētè iungatur amicitia. Et cum ad arma veniendum est, tum verò paludibus, palustribusque locis, tātquam amphibia animalia se continent, ut neque pedestribus copiis, neque equestribus ad eos sit accessus. Nauigationem prorsus ignorant:



rant: mari nonnisi nantes vtuntur, qua in exercitatione tantum valent, vt tuberonēs (ingentium piscium nomen id est) nando assequantur, & capiant, infixisque in eorum oculos acuminatis rudiculis, eorum dorso insiliant; &, iumentorum instar circumagendo per vndas, minores pisces in escam venentur. Erat Principum prouinciæ his proximis annis consilium omni conatu adhibito hanc strumam Imperij, & insanabilem humanæ speciei noxam prorsus excindere, hoc enim carcinomate exsecto, expeditum terrestre iter à Ianuariensi ora ad Bahyam vsque; & nauigationes legentes litora opportuniiores, tutioresque reddentur. Et quamuis sæpius res tentata sit, nunquam tamen serio, nec iusto bello susceptam haud mirum est confici non potuisse.

IN vnā ex iis expeditionibus, cum superioribus annis bello id genus hominum tentaretur, profecto, vti dicere institueram, Antonio Georgio, eius vxor euentorum pauida suspensio angebatur animo; eam Iosephus inuisit, iussitque sollicitudinem ponere: breui enim inde nuncios venturos; & Antonium quidem ipsius coniugem leui, nec periculoso sagittæ vulnere in sinistro latere percussum, quod tamen extima tantum affecerit, intus non penetrarit, iam à castris curationis causā recessisse, octiduōq; ad Villā veterē peruerturum; illōq; ipso die cōiux eō profecta virū suū recepit.

PARI consolatione Vincentianæ fœminæ mœrorem leuare minimè potuit: querebatur hæc cum Iosepho, quo tempore S. Vincentij morabatur, virum suum in fines hostium plus cētum leucas profectum, neque ex eo tēpore, cū iam dudum abiisset, de ipso quidquā inaudisse, magno cum suo, fœminæque mœrore Iosephus respondit, an nondum ipsum obiisse cognouisti? Id postmodum ita esse cognitū est.

*Pluuiam in  
longa siccitate  
prædicat*

Non omitam quod eodē contigit in oppido Spiritu sancto, Iosepho ibi commorante. Æstate tota ab ineunte Quadragesima ad vsque finem mensis Augusti in ea Præfectura nunquam pluerat. Suasit Iosephus, vt eius rei causâ per oppidum supplicatio institueretur: & ad rem ornandam nouum vexillum, quod colonus Vincentianus ad oppidum S. Vincētium deferebat in vsum Sodalitatis Misericordiæ, quæ est in illo oppido, commodatò acceperant. Quod ille ipse, penes quē eius curâ erat, in tam diuturna siccitate, tamque firma, vt rebâtur, serenitate, nihil suspicâs adhuc incōmodi, libens cōmodauit. Id cū vidisset expansum Iosephus, quasi subridēs prædixit: væ quàm bellè habitū referetur? Erat dies ante 5. Kal. Septembres, S. Augustino dicatus, serenitas tanta, quantam sex mensium spatium à pluuiâ inaniū facere poruerat, nulla nubium suspitione. Traducebatur supplicatio à tēplo nostræ domus per oppidi plateas ad Ecclesiâ matricē, indeq; eodē reditura erat. Quò cū venissent,

venissent, cōtrāctæ subitò nubes imbrē leniter primò, mox tanta copia effudēre, vt viæ aquarum torrentibus exundantes reditū ad nostrā ædem impedierint. Ita & diu arens tempestas emollita, & terræ optato imbre læta, hominibus ad diuinā laudandā Bonitatem hortamēto fuēre. Tū, quod in præsens populus adnotauit, ex Iosephi prædictione vexillum imbre madefactum relatum est.

ITER pedibus faciebat aliquādo cum Iosepho, aliisque comitibus Antonius Loufada colonus Ianuariensis, cū confecto diei vnus itinere sensit sibi cultellum excidisse, quē ipse ob pretium magni faciebat. Dānī iactura per-motus statuit illius perquirendi causā totum iter denuò remetiri. Id cū sensisset Iosephus, ne locum ipsum, vt fieri poterat, imprudens præteriret, & repetiti itineris spe frustraretur, quā longè, & qua parte itineris cum inueniret, illi indicauit. Rediit, locóq; à Iosepho descripto inuenit. Id ipse Loufada, cū S. Sebastianum rediisset, cum admiratione narrauit: virum esse sanctum, hæcque illi à Deo indicari: non enim qui toto itinere agmini longè antecessisset, humana vi, quid homini extremi agminis contigisset, scire potuisse.

*Alia prano-  
scit absens.*

Hoc, aliòve tēpore: matrona grauis, & honesta in oppido Sanctis nauiganti Iosepho, S. Sebastianū quatuor cottonitis pyxides, quas ad filiū deferret, in eius ciuitatis Collegio degeti dabat. Est cottonitis, seu cydonitis ex malis cottonets, saccaro decoctis bellariorum genus

secundis mensis grati admodum vsus. Excusabat Iosephus posse illam superuacuo officio supersedere; postero enim die filium ipsam apud se habituram. Rata illa sibi verba dari, contendit eo magis à Iosepho illa vt deferret; acquieuit Iosephus. Emmanuel; inquit, Oliueria (is erat eius filius) nostrū viaticū augebit. Filius postridie ad matris congressum venit, matris munusculū in Iosephi, comitūmque vsum concessit, neque hīc legi repetundarum locus fuit. Hæc etsi antequā domui S. Spiritus Iosephus præesset, videtur cōtigisse, ob similitudinē visū est cū reb. huius tēporis cōiūgere.

*Predictiones  
alie.*

ADDAM & alias quasi syntagmate quodā eius prædictiones, quas ad sua tēpora reuocādi cura supersedendū esse duxi. Eodē in oppido Sanctis Emmanuel Oliueria Gagus filiam graui morbo opprēssā vnā cū vxore deplorabant: eam Iosephus inuisit, atque vtrūque parentem lugere prohibuit, quod illa ægritudine puella moritura non esset, sed ad nuptias suo tempore peruentura: ipsi tamen se parētes pararent; vtrumque enim eorum filia funus præuenturum; & patrē quidem non diutius anno victurum: ægrota verò puella vini haustum dari, & venam ad sanguinis emissionem aperiri præcepit; seu quod ita expediret, seu quod iis remediis dicis causā adhibitis, valetudinis beneficio, quod ipse fortasse suis precibus impetrarat, velamentum quærebat; vt existimaretur pullā iis artis adiumentis, non precibus melius habere cœpisse. Quod

ipsum

ipsum alias fecisse in ægrotis aliis iam depositis cognoscemus. Ista tamen remediis puella ita respiravit, ut tandem Dei beneficio penitus conualuerit; illaq; omnia, quæ Iosephus prædixerat, postea euenire. Porro puellæ ægrotantis mater Philippa de Mota multis annis antè alteram Iosephi prædictionem veram fuisse experta erat. Degebat ipsa in parentum domo adhuc virgo, & iam de ipsa in matrimonium cum viro honorato iungenda parentes egerant, erantq; transacta omnia, cum antequam sponsalia fierent, quo casu ignoratur, conuenta omnia magno vtriusque parentis mœrore rescissa sunt. Accessit ad eos solandus Iosephus: nil esse, cur id ægrè ferrent; non enim ipsorum filiam eius futuram fuisse, cui illam tradere cogitarant: sed illius virum Olyssipponem venturum; qui indumenti, quod circa se habebit, liber dominus sit, illo ænigmate non obscurè innuens, Olyssipponensem, quem ille promitteret, in suis numis esse; alterum verò in ære alieno. Atque ea fortasse eius dissidij causa fuit, quòd cum creditoribus ille soluendo non esset, bonis suis exturbatus sit. Prolem verò tantam, tamque copiosam ex Olyssipponensi suscepturam, ut lintea indusia quod cuiusque filiorum esset ab ipsa parente non dignoscerentur.

MAGDALENAM Aluaram in Spiritus sancti colonia graui morbo afflictâ, à parëtib; apud

quos degebat adhuc, propè deploratam, prædixit ex eo morbo reualituram. Reualuit, & cum hæc in Brasilia scribebantur, viuebat adhuc; & post Iosephi mortem per id tempus vidua hæc Societatis Patribus narrauit.

ARIÆ Fernando colono Ianuariensi, Iosepho familiari, cuius suprà mentio facta est, superioribus bellis sclopeti globus in tibia inhæserat; ei Iosephus prædixit, in æstuariis circa fauces Ianuariensis sinus globum elapsurum. Cùm aliquot post annis canóia circa eum locū nihil minùs cogitās animi causā vagaretur, decumanus à mari impetu coortus canóā magna vi in æstuarium impegit, eaq; concussione cōmoto crure globū, aperta sibi via sensit excussū. Quo euctu nō magis suo cōmodo, quā, quòd amici sui prædictio vera fuerit, lætatus est.

CIRCA oppidum Spiritum sanctum propugnaculum extruebatur: fortè illac transit Iosephus, colonos, qui in opere versabantur, hortatus est, vt operis laborē forti animo ferrent; breui enim Anglos illuc appulsiuros. Superuenēre non multo interiecto tēpore Angli, cū minimè expectarētur; egressique in terrā dāni non nihil agris intulerunt; cōcursu tamē colonorum, indigenarūque ex vicinis villis; & oppidanorum eruptione inanes ad sua nauigia reiecti sunt, cū in fuga eorum multi arma reliquissent, nonnullis etiam occisis.

IOANNES Fernandus Societatis Sacerdos in vico degebat coloniae Spiritus sancti;  
cum

Angli pirata.

eū totius familiæ Præses ad oppidum accerserat, tantum ut ei mādāta daret, & rediret; quod eodē, aut summū die postero cōmodē fieri poterat. Prædixit ei Iosephus non nisi post quatuor mēses rediturū: quod ita cōtigit, cū eius moræ causam, quæ subitō interuenit, neq; ipsi Præsidi, neque eorum alterutri in mentē venire potuerit. Videtur id extremis vitæ annis, quibus, posito regēdi munere, fractus ætate, & laboribus exercitam tamē senectutem in ea colonia traduxit, contigisse.

PERSEQUAMVR reliqua, quæ ad eandē pertinent administrationem, diuinam in Iosepho virtutē declarantia. In vico, cui à Victoria est nomen, & est in Spiritus sancti colonia, Lusitana fœmina vidua Camilla Pereria tam graui dolore capitis torquebatur, ut propē de potestate mentis eiiceretur: & ei iam tanquam depositæ extrema parabantur. Iosephū in eo discrimine Spiritu sancto curant accersendū, qui cū venisset, ægrotæ capiti, manu imposita, prædicit eo morbo nequaquam morituram; promittitque se in diem posterum, diuinā hostiā de illius incolumitate oblaturum. Postero die, peracto sacrificio, redit ad ægrotam, iubet securo esse animo, morbum quidem comitalem esse, cui malo cœlum illud sit salubre: sed tamen ita eo liberandam, ut non in posterum tentetur amplius. Ut prædixit, Dei beneficio prorsus euenit. Sed ego nullam puto cœli salubritatem cœle-

*Ægroti san-*  
*nantur.*

*Morbus co-*  
*mitialis.*

sti gratia veriore Iosephi precibus impetrata. Sed ille huiusmodi tegumenta curationibus ægrotorum quærere solitus erat.

*Pedibus æger.*

FRANCISCVS Dominicus Ianuariensis colonus morbo occupatus ita pedum officio impediabatur, vt ne vno quidem gradu sine furculis, alis sustinendo corpori subiectis promouere se posset. Inuisit aliquando Iosephum iisdem fulcris sustentatus; iubet illum Iosephus illa serperastra abiicere excusanti se aliter ingredi non posse, tradit peregrinatum hastile, quo ipse fortasse in suis peregrinationibus, itineribusque vsus esset. Eo nixus, relictis sustentaculis, pedibus æger melius habere cœpit, donec Dei beneficio omni penitus impedimento liberatus est. Hastile tamen viatorium tanquam suæ prædem valetudinis sibi retinuit. Quod etiam protulit, cum publicè coram Administratore Ecclesiastico Matthæo Acosta iuratus testis accessit.

MAGENE vico Ianuariensis coloniæ bouem difficilem, & asperum nulla vis hominum trappeto saccharario admouere poterat: venerat eò Iosephus cum Sacerdote altero de Societate Vincentio Roterigio excipiendis confessionibus operarum. Is, re cognita, accedit ad bubile, pecudémq; sua signat benedictione, quâ statim ita cicurem, mitémque reddidit, vt seruulus Æthiopicus solus iuga subiecerit.

DVM ibi moratur prope eadem saccharariam officinam adit hominem Balthasar Martinus  
Floren



Florentia colonus Ianuariensis, homo asth- *Homo asth-*  
maticus, multis iam annis malè eo morbo af- *maticus.*  
fectus ; quærit opem aliquam à Iosepho. Is  
hominem iubet de fonte, qui trapeto proxi-  
mus est, bibere, pronūciatis antè in honorem  
vulnerū Christi Domini quinquies, *Pater noster,*  
& *Aue Maria.* Paruit ille, & ex eo tempore nul-  
lam passus est respirationis difficultatem.

IOANNES Soarius ciuis Piratininganus, cuius *Sanguinis*  
sepe facta mentio est, Spiritum sanctum venit, *profluuium.*  
cū adhuc in ea sede Iosephus familię præes-  
set. Ibi tanta eū dysenteria cum sanguinis pro-  
fluuiο corripuit, vt iam de illius vita cōclama-  
tum esset. Crebrę fluxiones hominē ad egeren-  
dū perpetuò penè è strato exilire ita cogebant,  
vt nullum ad quietem, ne modicum quidē spa-  
tium relinquerēt. Accedebat & stomachi lan-  
guor omne cibi genus aspernantis ; ita vena-  
rum exinanitione, & insomnia vita sensim  
omnis exhauriebatur. Inuisit laborantem Io-  
sephus, amicēq; alloquutus: Fili, inquit, ne am-  
plius alui causā è lecto te eiicias (ea enim no-  
cte propè centies exisse aiebant) confido in  
Deum, te bene habiturum; manūq; illi imposi-  
ta, ac per totū corpus adacta diuina ope & san-  
guinis sterēre fluxiones, & vigor stomachi re-  
uiruit; cœpitq; munuscula, quę ad ipsum cum  
vini rubri lagenula Iosephus miserat, grato cū  
sensu degustare: ex eóq; tempore ita cœpit cō-  
ualefcere, vt tantum à Deo beneficium per  
Iosephum se accepisse fateretur.

*Puero muto  
loquendi fa-  
cultas con-  
fertur.*

Est in eadem Præfectura vicus alius, cui à S. Ioanne nomen est. Erat in eo puer quinquennis ita mutus, vt ne ad vnum quidem verbum linguam vnquam enodauerit, cùm interim sensu aurium integer, quæ ab aliis dicerentur, optimè perciperet. Contigit vt in magna celebritate ex circumiectis locis, & ex ipso oppido Spiritu sancto nobiles ad ludos, qui dabantur, plurimi eò confluerent. Inter cætera ludicrum quoque fuit, non rarò in eiusmodi conuentibus vsitatum. Anser viuens è transuersò fune suspensus pedibus, demisso collo, medio in stadio pendebat. Certamen erat, quis ex omnibus, incitato equo, ex cursu manu caput auis apprehensum auelleret. In eo certamine orta lis est duos inter equites, vtri eorum anser esset adiudicandus, cùm sibi deberi contenderet vterque. Erat tum fortè Iosephus in eodem vico; communi consilio cōtrouerſiam omnem statuunt ad eius arbitrium deferri. Ille mutum puerum ad se vocatum iubet pronunciare, cuius anser esse debeat. Suspensi omnium animi, quò tandem id eua-deret, cùm res ambigua ex pueri, & muti iudicio penderet, expectabant; cùm mutus puer ad Iosephi iussum, ruptis linguæ vinculis, expeditè pronunciauit, Meus est: proinde mihi dandus, quem ad matrem feram. Exhilarauit omnium animos tum pueri festiuitas, & inexpectatus exitus iudicij, tum multo magis rei nouitas, & diuinum beneficium puero colla-

collatum. Ita summa omnium lætitia contro-  
uerſia ſedata, & loquendi facultate, & adiudi-  
cato anſere auctus puer domum rediit. Neque  
fere quidquam iis ludis populi maiore volu-  
ptate ſpectatum eſt. Enimvero, quod in aliis  
vim doloris linguæ impedimentum per-  
piſſe legimus, ad Iosephi vota diuinam Boni-  
tatem id puero præſtitiffe credendum eſt.

E T quoniam id in puero contigit, addam  
& alterum, quod item in puero habuit admi-  
rationem. Ioanni Baptiſtæ Mallio, qui in op- *Infans agro-*  
pido Sanctis moratur, infans erat menſes na- *tus ſanatur.*  
tus vndecim, hic graui, ignotoque morbo ita  
languēbat, vt biduum totum ne lac quidem  
ſuxerit: opem petiit à Iosephi precibus parens.  
Is vetat hominem eſſe ſolicitum; puerum  
beatæ Virgini à Conceptione, cuius tem-  
plum Itanniæ colebatur, iubet commenda-  
ri, ab ipſa haud dubiè ſalutem filium conſe-  
quuturum. Quod ille cùm feciſſet, illo ipſo  
die infans mammis os admouit, breuiq; poſt-  
ea conualuit. Quod idem à puriſſima Dei Ma-  
tre Iosephi precibus impetratum infantis pa-  
ter agnouit.

M A N A R A T de Iosepho in vulgus fama, *Aues illi*  
ipſum ſolitum, cùm iter faceret, porrecto *obediunt.*  
brachio auiculas accerſere, iuberéque ſibi di-  
gito inſiſtere, ac Deum laudare, auésque illi  
obtemperare ſolitas, & cùm diu ceciniffent,  
quaſi ipſarum penſo perſoluto, eas verbis il-  
lis dimittere. Quando ſat Deum laudaſti, abi  
cum

cum pace. Idem fecisse & arundines, cùm in domo Spiritus sancti è fenestra sui cubiculi foras prospectaret. Hæc, aliâque dum in Præfectura Spiritus sancti Societati I E S V præfuit, à Patribus, fratribusque in ipso fere obseruata sunt.

*Præst domui S. Vincē  
tij. Aues illi  
obediunt.*

P R Æ F V I T postmodum domui S. Vincentij: quo tempore non his absimilia narrât contigisse. Turtures domi alebantur; hæ men-  
sæ Iosepho semel extra tempus assidente, per triclinij pauimentum micas in escam sectabatur: quas cùm triclinij ministri abegissent, Iosephus redire iussit, & cibum sibi quæritare. Eæ, tanquam imperium percepissent, statim obtemperarunt.

R E F E R E B A T Gaspar Sampereus Societatis Sacerdos, cùm ipsum de harum rerum fama, quæ ad se permanasset, compellaret, hunc secum sermonem habuisse. Dicam, inquit, Gaspar, quod res est. Iter mari faciebam; fortè marinus passer circum nauim volitabat, brachium porrexì, passer aduolans confedit, puta, vt si extentæ hastæ, aut anténæ insiderit. Ita, dum excusatione nititur rem totam eleuare, confirmauit magis: rem enim candida simplicitate patefecit, quæ latebat. Dicunt etiam, subiecit, memiracula facere, & orantem à solo sublatum esse visum. Hæc quemadmodum excusarit, Sampereus ipse, qui hæc referebat, fatebatur è memoria sibi excidisse. Sed vel ex hoc licet intelligere, ea & frequenter fuisse

fuisse, & in oculis, & in ore omnium versari solita.

SED alia adhuc maiora contigere, admirabilem ipsius in Deum fiduciam protestantia.

Defecerant prorsus cibaria omnia domi; ad-

monetur Iosephus tempestiuè à triclinij, cel-

læque penariæ ministro, annonæ nihil esse do-

mi in cibum eo die, præter mala Medica non-

nulla, & farinam militarem; quam etiam man-

diocam vulgò nominant: ea ex certæ plantæ

radice pinsitur, ex qua panis vtcunque confi-

citur, & cruda etiam panis loco in cibum mād-

ditur. Quæ, quoniam firma, & diuturnæ est in-

tegritatis, eius multus vsus est in bello, ob

eamque rem farinam bellicam seu militarem

dicunt. Hoc nobili ferculo Vincentiana fami-

lia fuit ea die sustentanda. Iubet Iosephus, cū

horavenerit, signum dari ad se vnumquemque

de more colligendum, suæque conscientiæ ra-

tionēs expendendas, quod horæ quadrante

ante prandium in Societate IESU vbiq̃ue est

quotidianum. Ipse interim sua spe certus ad,

inexhaustum immensæ potentiæ penu pertenden-

dum totum se confert; interuallo deinde

quadrantis horæ redit idem minister, reuo-

uatæque domesticæ inopiæ memoria, consuli-

lit, quid factū opus sit. Iubet iterum Iosephus

signum dari, ac mensam iniri. Datur signum,

conueniunt; statas preces præmittunt, mensæ

assident; vix dum religiosa lectio de more in-

stituitur, cū fores pulsantur; eò se confert

*Deficiente  
domi anno-  
na cibaria  
submitturn-  
tur in tem-  
pore.*

ianitor: cista epularum plena adhuc ex coquina recentium illi offertur, à Iosepho Adorno nobili Ienuensi, cuius suprà mentio facta est, eleemosyna missa, quibus in singula capita distributis, abundè suppeditauit omnibus in prandium. Quæ res maiore affectu ad agēdas Deo grates omnium animos excirauit.

Non ignotum est, & superioribus temporibus aliis sanctorū virorum familiis in summa eorum omnium inopia, aut Angelorum ministerio; aut piorum virorum commiseratione abundè diuinam prouidentiam escas ex insperato suppeditasse: & proximè primis Societatis temporibus in Hispania, haud multis annis antequam hæc Iosepho contigerunt, subitis eiusmodi necessitatibus eadem diuina benignitate subuentum esse. Anno ab ortu Dei hominis quinquagesimo secundo supra millesimum & quingentesimū Societatis 13. oriens tum primū Salmanticense Collegium in tantam rerum omnium difficultatem deuenit, vt nihil omnino ad victum domi esset, & crumena penitus exhausta. Maturina communi familiæ supplicatione iussu Præsidis omnibus indicitur, vt præsentē diuinæ Bonitati necessitatem commendarent. Expleto precationis tempore subitò ad ianuam pecuniæ tantum est allatum, quantum ad egestatē subleuandam satis fuit. Anno inde eius sæculi quinquagesimo quarto, Societatis decimo quinto, Francisco Borgia in Hispania Com-

missa

missarij munere Societatem regente , Hispali neque alimenta in penu , neque in arca pecunia vlla erat ; & fortè illo ipso die Sacerdotes è Societate ex itinere ad eos diuerterant : aduentante hora cibi capiendi, adit Collegij Rector Borgiam difficultatis non ignarum. Quid sit agendum, incertus , Borgia coniecta subito in Deum mente, hærere tantisper visus est, móxq; conuersus ad Rectorem: Vestram, inquit, cùm tempus est, campanulam pulsate; & in Deo spem reponite. Datur signum, Socij conueniunt ad mensam, cùm subito ad ianuam præstò est puer ab Isabella Galindia inclytæ nobilitatis , & eximix pietatis, fœmina cum fiscina epularum plena, quæ toti familiæ abundè, & in escam etiam pauperum superfuère. Neque Hispali tantùm, sed & Septimanæ, & Vallisoleti, cùm domi nihil esset, unde fames leuaretur , & Socij mensæ iam accumberent, in ipso temporis articulo, incertũ à quibus copiosa prandia submissa ; iis, qui ea tulerant, beneficorum amicorum prodere nomina recusantibus.

VERVM hæc in ipsa prima Societatis ætate, ac planè pueritia, familiis nondum certo vectigali constitutis, domibus omni apparatu inanibus, incensis omnium animis amore incommoda præsertim paupertatis patiendi, & quibus rerum inopia esset in deliciis, non mirum est euenisse. At in familia iam haud paucis annis fundata, & idoneo dotata vectigali,

Præsi

Præsidem in tanta egestate sedere otiosum pos-  
sit aliquis mirari, & hominis prouidentiam de-  
siderare. Sed qui superiore lumine, quàm hu-  
mana prudentia regitur, est iure optimo hac  
hominum censura eximendus: non ille teme-  
re certam de diuina prouidentia fiduciam cõ-  
ceperat, qua duce certiore via, quàm humanæ  
industriæ ratione ad exitus consiliorum perue-  
nitur. Quæ causa tam subitæ fuerit penuriæ  
assequi coniectura quis contendat? non tamẽ  
illum, quod sui muneris esset, neglexisse cre-  
dendum est, neque vias illi ad omnem expedi-  
endam difficultatem defuisse: sed noluisse  
humano consilio impedire, quod in diuino  
lumine diuina prouidentia cernebat expedi-  
tum iri. Et fortasse huius inopiæ exemplo di-  
gnum iudicauit senescentem sensim nostram  
in Deũ fiduciam renouare. Voluit certè Deus  
torporem nostrum, si minùs ad hæc miracula,  
ad viam saltem, qua ille ad tam excelsum vir-  
tutum gradum ascendisset, capeffendam ex-  
citare: nempe ad amorem in Deum, perpe-  
tuamque de Deo cogitationem.

*Oleum in  
magna cha-  
ritate domi  
nunquam  
deficit.*

LABORATUR tota S. Vincentij Præfe-  
ctura olei inopia. Patres Vincentiani cadum  
vnum olei domi habebant, è quo ad domesti-  
cos vsus, & ad perpetuum alendum lumẽ an-  
te sanctam Eucharistiam duabus in Ecclesijs  
Vincentiana, & Piratiningana, quæ eidem tum  
Præsidi parebant, & ad elemosynam indigen-  
tium hauriebatur: cùmque oleum in dies mi-  
nuc-



nueretur,exiguóque,ac tenui fonticulo distil-  
laret, quod in huiusmodi inopia fieri solet,  
subfulta sapiùs posteriore vasis parte, liqui-  
dóque in anteriorem acclinatam coacto,oleũ  
tamen cœpit guttatim defluere. Denique eò  
ventum est,vt ne vna quidẽ gutta extillaret.  
Antonius Riberius è Societate frater, cellæ  
custodię præpositus Iosephum admonet,cadũ  
non modò exhaustum;sed iam planè exsicca-  
tum pòsse inde ad vsum aliũ transferri. Ve-  
tuit Iosephus,iussitque ad domesticas omnes  
opportunitates,& ad inopum egestatem eodẽ  
vtri confugio;Deum patrem esse miserationũ,  
facturum,vt intra ipsum vas oleum non defi-  
ciat.Paruit ille monito,& vt arens fonticulus  
in summa æstatis siccitate, quanuis tenuiter  
labens noctu deficiat,redeũte tamen die rur-  
sus extillat;sic expleta præsentí necessitate,vas  
fluxum retinebat quasi omni liquore exha-  
ustum,noua oblata necessitate,rursus tenuiter  
fluere,donec præsēs leuaretur inopia,incipie-  
bat.Biênio propè toto,quo regio inopia labo-  
rauit olei,cadus,quátũ ab eo postulatũ est,  
etsi tenui riuulo,tantũ fideliter reddidit;ita  
vt miraculifama percrebuerit,oleum in Pa-  
trum domo Iosephi precibus nunquam defi-  
cere.

IN summa igitur inopia Erasmodum nauis  
(negotiatores Belgæ hi sunt, ampla in iis lo-  
cis negotiã habentes)in portum inuecta,olei  
dolum eleemosyna missum Patribus detulit;

quo in penariam cellam illato, vt illius viduæ ab Elisæo edoctæ, deficientibus vasis, modica viduæ mensura, ita olei fonticulus statim exaruit. Et id quoque magna cum omnium admiratione, & Dei laude in vulgus emanauit. Iam quanta cura diuinitus admonitus ad eas subleuandas necessitates in sede Spiritus sancti accurrerit in tempore non ita multo antè exposuimus.

*Duorū fratrum incommodis occurrit in tēpore.*

GRAVIOR adhuc causa è domo S. Vincentij ad domum alteram suæ ditionis attraxit. Fratrem quendam eius loci Præses iusserat se cubiculo continere; neque inde iniussu suo efferre pedem. Huius rei Iosephus diuina inspiratione factus conscius, accurrit ad misericordiam subleuandum. Ita homo imbecillus, & malè affectus, solus, nudis pedibus iter leucarum quindecim ante meridiem confecit. Domum intrat, adit mœsti hominis cubiculum, apertoque ostio, iubet miserum exire, & sibi prandium parare in triclinio. Sumptō cibo, cum Præsidi colloquutus; vtrumque opportunis monitis instructum inter se reconciliauit. Domesticiis salutatis, suæque benedictione cōfirmatis; amicis etiā externis, qui ipsū adierant, officiosè dimissis, eodem die, vnde venerat, rediit; cū ne ibi quidem illo die ipsum desiderari quisquam animaduertisset. Commisæ sibi charitas ouiculæ hominē tātum incommodum adire iussit: quòd fortasse non tam commodè ei malo alterius manu medicina admo

ad moueri posset; multum enim interest, dum in tumore est animus, cuius auctoritate, beneuolentiâque subleuemur.

FRATER alius è Societate prædia Societatis curabat. Erat ea loci natura, ut nonnisi maritimo itinere illuc adire; indeque redire liceret. Huc siue loci solitudo, siue quid aliud illius animum incesserat, ægritudines variae, tristesque curæ sollicitum habebant; neque erat, qui mœstum animum leuaret; nec quicum ille suæ ægritudinis causas conferret. Tertium iam diem miser illo angore tenebatur; cum a domo egressus ambulans in agro videt non longè Iosephum cum viatoria virga solum ad se aduentem. Occurrit lætus, hominem venerabundus salutat, aduentum gratulatur. Tua vnus causa, inquit Iosephus, hic adsum. Ille expositis omnibus, quæ se sollicitum haberent, in prudenti, charitatisque plena Patris oratione acquiescens, piis eiusdem monitis confirmatus se recepit. Neque qua ratione, eò se Iosephus contulerit, aut inde in suam sedem redierit, ne cogitatione quidem assequi potuit. Nec mirum eundem Spiritum, qui hæc illi nota faciebat, ut ex itinere Æthiopici Eunuchi Philippum Diaconum restituit in Azotum, ita hunc, vnde eum asportarat, in eundem locum retulisse. Licet in his rebus diuina in homine dona cum veneratione admirari: charitatem verò erga suos, curam, vigilantiamque in eorum præuertendis lapsibus,

afflictis erigendis , mœstis consolandis benevolentiam, & erga omnes comitatem possunt omnes , ij præsertim , qui aliorum curæ præ sunt , imitari.

*Eodem die  
duobus di-  
stantibus in  
locis agit cū  
hominibus  
utriusque  
loci.*

*Quidam ne  
arborū ruina  
opprimatur,  
cavet.*

SED pergamus ea, quæ de ipso referuntur, dum Vincentianæ domui præfuit , enarrare. Testatur Stephanus Riberius ciuis Piratiniganus , eodem die diuerfos homines & S. Vincentij, & Piratiningæ cum Iosepho collocutos, de suis rebus transegisse, cū inter oppidum vtrumque tanta interiaceat distantia, quantam sæpius commemorauimus. Alia huius generis aliis temporibus contigisse suis locis ostendemus: at texam tantū quod huius loci propriū est. Proficiscebatur cum Sacerdote altero Vincentio Roterigio, quem per sæpe comitē in suis peregrinationib. habere cōsueuit, Piratiningā. In medio itinere, imminente nocte , hospitio sibi tugurium de more extruunt. Eadem via aduerso itinere Piratininga S. Vincentium Lusitani aliqui petebant: nondum ad eum locum , quem Patres sibi delegerant , venerunt , cū citra semileucæ spatium, & ipsi sibi tugurium ad pernoctandum excitauunt. Misit ad eos Iosephus vnum ex indigenis comitibus, qui iis denunciaret, ne illo in hospitio pernoctarent; sed ad Patrū hospitium se conferrēt; ne arborum, quæ procerissimæ tugurio imminerent, ruina opprimerentur. Mirati illi vnde se eò venisse rescisset Pater , fidem tamē habuerunt monitis,

non

non dubij quin, qui illorum iter, & commorationem nosset, futuræ quoque calamitatis euentum præuideret. Itaque, eodem puero duce, ad Patrum hospitium processere: quos ea conditione Iosephus intra contubernium admisit, ut ante apud Roterigium confessione peccata expiarent: quin etiam vnum ex iis, qui id neglexerat, & vnà cum cæteris se insinuabat, redire iussit, ut confiteretur, adiecitque quasi admisto ioco: nemo inconfessus infortunium, quod vobiscum trahebatis, huc inferat, ne vnà vobiscum eadem calamitate inuoluamur. Ea nocte ingens ventorum rabies magnam excitauit tempestatem; manè utrique suum iter tenuerunt. Patres, ubi ad locum, quem Piratiningani pridie delegerant, venerunt, prostratas magnas arbores, & turgurium oppressum, obtritumque, gratias agentes diuinæ Bonitati perspexerunt.

ALIO tempore iter idem cum eodem Roterigio, aliisque Societatis Sacerdotibus Piratiningam habebat: cum septem leucas emensi essent, montesque Piratininganos iam conscenderent, ad locum venere sacro Missæ faciendæ destinatum; & cum reliquis adesset apparatus, sentiunt Missalem codicem deesse; & festus erat dies. Suscipit negotium Iosephus illum S. Vincentio accersendi: post semihoram adest cum Missali sub axilla inde desumptum; cum tamen neque ipse S. Vincentij visus esset, neque liber ipse, quem tulerat, illuc

*Ad Missæ sacram Missæ le septē leucarum itinere semihora affert.*

desideratus. Ergo aut Spiritu Domini oblectus illuc Iosephus delatus est, & breui illo intervallo in suum comitatum restitutus; aut Angeli ei manu liber allatus, quemadmodum supra in Breuiario factum esse cognouimus comitibus nihil sentientibus. Sed ut hæc noua non erant in Iosepho, ita sermo de re postea nullus habitus. Iter deinde persequuti, Piratinam tandem, consensu monte, tenuerunt. Hæc utrum illo familiam regente facta sint, an antè, cum priuatus illuc degeret, mihi in obscuro est: sunt enim quæ suspicionem moueant in utramque partem. Prælagit tamen animus, tum hæc, tum illa quæ sequuntur, hoc potius tempore euenisse, quo non minus iucundè, quàm admirabiliter puerile furtum detexit. Quod ut planè intelligatur, ac ne in parum noto nomine impingamus, est aliquantùm non longa, & nec multùm aliena egressione de cursu narrationis excedendum.

*Poma, quæ  
ab acore nominantur.*

I N T E R peregrina poma, quæ ex alienis terris superiora sæcula in Italiam primùm, indeque in occiduas oras asportarunt, omnium nobilissima, ac præstantissima sunt, quibus ab acore in Italia est nomen. Eorum tria genera præcipuè familiam ducunt: mala Medica, limonia, & citrea. Medica, quorum est maxima copia, & vsus frequentissimus, aurci coloris sunt, magnitudine, & forma malis cotoneis similia: aurancia in Hetruria nominantur;

*Mala Medica, limonia, & citrea.*

*Aurancia.*

tur; & hoc nomen omnium maximè nobilitatum: vt festiuo etiam colori nomen accesserit; cortex ab interiore pomo facilè auellitur, qui ex melle decoctus grati admodùm saporis est, aliàs inutilis, carne admodùm tenui, & gratissimi, succi aliàs acidi, alias dulcis vix instar grauida. Citreis, ac limoniis color idem, flauus vergens ad albedinem. Sed limonia ouali forma: cortice, carnèque non multum ab auranciis dissimilia, sed cortex non auellitur; longè etiam nobiliore sapore, odoreque citrea forma multo maiore, rotundiorque cortex, extimus iis, non vt limoniis æquus, & læuis, sed aliquanto callosior, & tuberculis, quasi verrucis non nihil inæqualis: verum vt limoniis corpus vnà cum cortice grato admodùm sapore totum edule. Auranciorum, limoniorumque magna copia: citrea rariora, neque vbique æquè proueniunt. His odor non modò ab auranciis, & limoniis dissimilis, sed etiam ita gratus, ac nobilis, vt ea tantum causa integra seruentur, vt cubicula grato odore redoleant. Intus à cognatorum natura dissimilia, peponibus similia; caro etiam peponum carne solidior: ab extimo cortice ad intimum sibi similis, nullo putamine. Et vt pepones angustum continendo semini in media aluo sinum aperiant, ita citrea succum omnium pretiosissimum cum semine concipiunt, aluntque; qui conditus ex saccharo antidotum est aduersus pestilètes morbos

*Citrea.*

*Poncilia, seu  
limonia Hi-  
spanica.*

*Adami po-  
ma.*

*Lima Hispa-  
nica.*

efficacissimum. Ad hæc tria genera, siue illa regionum natura discreuit, siue agricolarum solertia naturā mutauit, miscuitque alia tria genera referuntur. Limonia Hispanica vnum genus nominat Italia, poncilia Hispania: à citreis non nisi mensura dissimilia; sunt enim fere duplo maiore, sed breuiore longitudine, humani penè instar capitis, colore etiam paulo tristiore. Cæterum vix à citreis distare noueris; estque eorum copia angustior, usque eò difficiles educatu arbores sunt, & pomorū moles minuit fœcunditatē. Sunt & alia mala media inter aurancia, & limonia; Adami poma vulgò nominant: edulia tota, vt limonia; magnitudine, & figura auranciis similia, cæteris rebus esse dixeris limonia, sed succo sine acido suauiore; etsi non in omni cœlo suauia proueniunt: nam in plerisque Italiæ locis quæ nascuntur, gustatui aduersantur. Omniū suauissimi, & scitissimi saporis, quas limas vocāt Hispanicas, Adameis pomis non parum minora: &, nisi succi præstent bonitate, cætera similia; & horū quoque rara copia. Hæ omnes arbores è Lusitania in Brasiliam trāslatæ felici prouentu propagantur. Hæc eo explicanda duxi curiosius, quòd, quib. in locis frigorū asperitas has plātas adolescere nō sinit (neque. n. ne in Italiæ quidē regionib. omnibus hæ notæ arbores) peregrinū, & ignotū nomē iis, quæ subiiciuntur, obscuritatē offunderet: quis. n. cui hæc nota nō sint, limas dari puero xeniorū loco cū audierit, nō struthiocameli cōcipiat naturā?

Dum



Dum Piratiningæ Iosephus moraretur, affidebat aliquando vnà cum Vincentio Roterigio in schola puerorum: iubet vnum de pueris è Patrum viridario sex limas ex arbore decerpas ad se afferre, quas fortasse pueris è proposito certamine victoribus præmio daret. Paret puer lubens; & astutus sex alias sibi legit, quas certum in locum abdidit, vnde commodè, dimissa schola, eas repeteret: sex priores, vt iussus erat, Patri detulit. Non fefellit Iosephum puerile furtum; accersitòque puero altero, vbi furtiue limæ abditæ essent, indicauit, easque ad se afferri iussit: quas cum attulisset, iubet eum, qui furtum fecerat ad se acciri; ei que sex priores limas dat. Cape, inquit, hæc, neque posthac furtim surripere quidquam adsuæscas. Miser ille, pudore affectus, fletu & lacrymis suam ingenuitatem tutatus est. Peccauerat, sed puerile peccatum puerili satisfactione compensatum est. Multa alia, vt in toto eius vitæ decursu licet animaduvertere, diuino Spiritu cognouit.

*Puerile furtum detegit.*

PER idem tempus, quo Vincentianæ præfuit familiæ, sensit Domino inspirante graui periculo occurrendum esse Piratiningæ; maturatòque opus esse. Itaque puero vno comite ex indigenis alumnis, dedit se in viam, & cum per forum oppidi transiret, viderunt festinantem Georgius Ferreria, quatuor que, quinqueve alij ciues, qui in circulo colloquebantur. Quærun, quò tanta cum festinatione

*Piratiningæ accurrit ad duos dissidentes reconciliandos.*

contendat? Piratiningam, respondet, ad compescendum diabolum, qui vinclis emissus, furens duos inter viros primarios bacchatur, eos acerbis inter se odiis succendens. Quærit iterum Georgius, ecquem rei nuncium, seu cuiuspiam sermone, seu literis acceperit? cum abnuisset, iterque suum persequeretur, intellexerunt, id illi, Deo manifestante, indicatū. Cognitum est postea duabus circiter ante Solis occasum horis, eò peruenisse, & eos, quos inter dissidium illud exarsisset, diuina ope, per Iosephum potestate Tartarea compressa, ad concordiam rediisse. Nec minùs mirum fuit, hominem imbecillo corpore, nec satis firma valetudine, cum tenera ætate adolescentulo tantum iter tam breui tempore conficere potuisse, quàm periculi grauitatem tam longè positum cognouisse. Sed cuius virtute prius, potuit etiam & alterum noua nulla admiratione. Maius adhuc periculum, &, vt videtur item Piratiningæ depulit, cum duorum constitutam cædem prohibuit. Sed id opportuniore loco mox videbimus.

EODEM in oppido S. Vincentio in re leui prædictionem tamen veram euentus declarauit. Vnus è procuratoribus Erasmore, quos sæpe cōmemorauimus, qui saccharario opificio præerat, vini dolium penè iam exhaustum domi habebat, neque anno toto eius mercis nauis vlla venerat. Querebatur homo Belga cū Iosepho hanc inopiam, vitam sibi defuturam, deficienti

*Remini vi-  
no indigenti  
innuit die  
postere ei al-  
latum vi.*

deficiente vino, nouum fortasse ab ipso in vino miraculum expectans; quod antè in oleo contigisse euulgatum erat. Blandè hanc querimoniam Iosephus accepit, hominèmq; securo esse iussit animo: nondum, inquit, præterit sacra S. Francisci dies, & erat pridie eius diei. Ecce tibi festo S. Francisci die nauis onusta vino, ad ipsum missa procuratorem magna cum omnium admiratione, qui ei sermoni interfuerunt, portum intrat. Quis hîc audeat diuinam suo iudicio prouidentiam metiri? tãtine fuit operarium hominem in metu rei leuissimæ spe diuini promissi confirmari, vt diuino Spiritu mens hominis cum Deo perpetuò coniuncta propterea fuerit illustranda? an, quòd illius commiseratione commotus, vt illo exemplo ad spem in Deum defigendam erigeret, Iosephus eam prænotationem à Deo impetrauit? an, quòd ex illa admiratione boni aliquid ad eos permanauit, qui rem totã obseruarunt? sæpe enim accidit, vt, cognita insignis alicuius viri sanctimonia, homines ad meliora vitæ consilia conuertat. Magni refert, quo affectu, quãue reuerentia sanctorum virorum verba, monitaque accipiantur.

MIRVM est, quanto diuinitus occulta cognoscendi dono præditus fuerit: vt non quæ fierent modò, sed etiam quæ intra animum suum agitent, tanquam in tabula depicta perspiceret. Graui mentis æstu angebatur quidam, neque adhuc animi sui perturbationem

*Occulta, etiam quæ latent in animis cognoscit.*

cui

cuiquam detexerat; commodum fit illi obuiam Iosephus, & his tantum verbis usus; Apage, apage ista, quæ ad rem non pertinent: suaque benedictione impertitum hominem ita tranquillauit, serenatque reddidit animo, ut si nulla vnquam tristis cogitatio illius animum subiisset. Ita fere nihil eum fallebat, ne eorum quidem, quæ vel remotis arbitris à quopiam gerebantur, eratque id ita omnium cognitione euulgatum, ut multi vererentur in ea esse familia, cui ille præesset. Testimonium post eius mortem de ipso dixit vnus è domesticis: sibi quædam à Iosepho esse patefacta, quæ inter ipsum, domesticosque intercesserant, quæ non nisi diuino lumine scire potuisset. Quæ res efficiebat, ut ponerent omnes corda sua super vias suas, multoque attentius vitaret offensiones, cum scirent nihil domi geri, quod Præsidis effugeret cognitionem. Qua tamen ille cognitione non nisi ad eorum, quorum intererat, utilitatem utebatur; vel ut eorum commodis prospiceret, vel ut eos errati admoneret, aut conscientiam ipsorum tranquillaret.

*Fesso cui-  
dam fratri  
dari iubet  
ientaculum,  
cum opsonio.*

FRATER è familia multa affectus lassitudine ad vires recreandas à ministro cellæ penariæ ientaculum, & ad panem opsonij aliquid petierat; negauit id se posse iniussu Præsidis cellarius, cum moueri domi nihil posset præter ordinem, quin id Præses, vel nullo referente, rescisceret. Acquieuit æger æquo animo: vixdum ille discesserat, cum adit ipse cellarium

rium Iosephus , monétque fratri illi daret quod petierat; valde enim eo leuamento indigere.

DE se in suo testimonio testatur alius extra familiam, se, cum puer esset, Patrique Iosepho confiteretur , ab ipso certi peccati admonitum, quod puerili metu sciens præterierat, statuisseque ex ea, quæ de ipso passim habebatur opinione , id Patrem diuina reuelatione cognouisse; propterea à Deo venia petita, integrè confessum esse.

DIXI de iis, quæ terrori essent: addam non nihil de iis, quæ ad leuandum animum pertinent. Sacerdos è Societate Iosepho confiteri solitus, sacrificaturus, eum confessionis causâ adibat; iubet illum Iosephus securo esse animo, & sacrificium offerre. Cùm instaret Sacerdos, esse, quæ confessione indigerent; iubet iterum Pater bono esse animo, & peccati genus prodens , nullam penes ipsum esse culpam, quin potius multum ipsi ad meritum accessisse, declarauit; cùm tamen res esset eiusmodi, vt nisi diuinitus edoctus, & genus ipsum nosse, & iudiciû de merito ferre non potuisset. Sacerdotem alterum, antequam verbum proferret, ab se dimisit, nullam eius rei, quæ conscientiam vrgeret, apud ipsum affirmans culpam residere.

AT TEXAM huic loco graue, publicumque quod Iosepho vita functo testimonium dedit rogatus Ioannes Soarius ciuis Piratininganus;

*Puero confitenti peccatum aperit, quod celarat.*

*Conscientiâ se aduentu confessionis causa videt.*

nus ; se ante annos circiter triginta quinque P. Iosephum Anchiétam in ora Brasiliæ nosse cœpisse, & que populos circa positos obeunti sæpiùs comitè fuisse ; seque illius propè lacte, halitūque educatum, ipsum semper, tanquam virum sanctum veneratum esse : & cū factus iam grandior sæpiùs certo consilio patrandi aliquid contra ius, fasque, vt iniurias, rixas, aliāque id genus, quibus diuina lex violaretur, iter suscepisset; neque eius rei vllus esset conscius, in Iosephum incidisse, qui, tāquam ipsius animi arcana introspiceret, paterno amore se ab ea mente amoueret. Caue, fili, inquit, eò tēdas, quò cœpisti : caue istud animo retineas, quod concepisti, muta mentem, alioqui puniet te Deus; ita eius monitionum vi sententiam mutasse. Adiecit præterea hominē multa familiaritate sibi coniunctissimum, propriam coniugem, quòd ab ipso recessisset (subita, vt videtur, muliebrique indignatione, magis, quàm grauioris culpæ suspitione) interficere decreuisse, & alterum præterea, à quo iniuriam profectam esse suspicaretur : ad hoc patrandum facinus, se amici precibus, & contentione victum vnà cum ipso conspirasse : & cū remotis arbitris, nullo conscio, hæc maximè agerent inter se, superuenisse Iosephum, grauique oratione vtrumque ab eo consilio deterruisse; se tam inexpectata re perculsos, atq; admiratione defixos, qua ratione tam occultum consilium ad eum permanasset, victos

*Duos à decreta cade  
duorum reuocat.*

momentis rationum, quid responderent, non habuisse non tamen à praua illa mente destitisse. Iosephum iterum maiore contentione rem adortum, & quâ rationibus, quâ minis diuinæ ultionis vsque eò disputando processisse, vt victus alter manus dederit, promiseritque se vxorem in gratiam recepturum, remque totam Iosephi arbitrio permissurum. Ita Deo bene iuuante, & duæ immeritæ cædes prohibet, & duo coniuges reconciliati summa concordia, & cum diuino cultu vitam deinde duxerunt. Ita cœlestem suam, perpetuamque cum Deo consuetudinem, ad suorum vtilitatem traducebat.

PORRO inter multas, variâsque regendę familiæ occupationes, non omisit curam infideles ad Christi gregem conuocandi, tum per eos, quos regebat, tum ipse quoque, cùm vacabat, præsens adiens. Sunt intra Brasiliæ mediterranea, vti suprà demonstraui, alię, atque aliæ nationesne dicam, an syluestrium hominum greges? In iis Tapuyarum naturam, seu potius naturæ noxas suprà ostendimus. Tapuyis, si vagam vitam, inconstantésque mores spectes, non admodum absimiles sunt Ma-

*Maramosij.*

mi

*Maramo-  
sios studet ad  
Christum  
adducere.*

mi fines ad colonias quâ S. Vincentij, quâ Spiritus sancti. Hi tamen quàm cæteri Tapuyæ minùs feri; interlucéntque in iis inter alram barbariem nonnulla naturæ lumina: nam & Lusitanorum amant consuetudinem, amicitiam colunt, & vno fere coniugio contenti viuunt; humanèq; carnis esu abstinent: quin hac vna præcipuè virtute Brasiliis cæteris se præferunt, quòd ne suorū quidem hostiū, quos occidunt, carne vescuntur. Hos ad Christum adducere Iosephus iam tum ex eo tempore contendit, cùm adhuc in Vincentiana sede priuatus degeret: nunc autem, ipso familiam regente, eorum non magna manus, relictis montibus, & solitudine, se ad frequentia receperunt, & circa aream Biritiocam in Vincentianis finibus confedère. Ad eos amicè, humanitèrque excipiendos, & sedes, agròsque iis assignandos colonix Præfectus se contulit; vnâque cum illo venit etiam Iosephus, adiuncto sibi comite Emmanuele Viega, Societatis item Sacerdotè: mansit inter eos Iosephus cum Viega dies quindecim; quo tempore, dum res inter eos componit, Ecclesiam ordinat, vitæ ciuilis pro captu gentis rationem præscribit, aliâque ad communem societatem seruandam constituit, vt erat eiusmodi industriæ multum vsum adeptus; ipsorum linguæ Dictionarium, & artem Grâmaticam ordinare aggressus est, vsus ad id opera seruæ mulieris ex ea gente, quæ communem linguam in seruitute didicerat:

nam



nam sermone illi vtuntur, à communi Brasili-  
 orum dialecto, qui maris oram accolunt, nō  
 parū diuerso; & qui nō sine labore ab aliis in-  
 telligatur. Sed reuocatus Iosephus ad regimē  
 suorum, inchoatum opus, & recentem Neo-  
 phytorum curam Viegæ persequendam tra-  
 dere necesse habuit. Viegas porro rem totam  
 ita strenuē suscepit, tantāque cura, solitudi-  
 nēque nouas Ecclesiæ plantas excolere insti-  
 tuit; vt nulla re alia quiescere videretur. Ne-  
 que his contentus, qui primi venerunt, alios  
 per syluas, campos, montes, eorum adiens la-  
 tibula, non minore studio, quā ipsi feras ve-  
 nabatur: contendebat eos in cætum cogere,  
 ac tantisper saltem continere, dum vnā mul-  
 tos Christianæ fidei rudimentis imbueret: il-  
 lorum paruos filios parentum voluntate se-  
 cum adducebat; vt cum pueris aliis Neophy-  
 tis educatis, & communem Brasilicam lin-  
 guam edoctis, pōstea ad ipsorum parentes,  
 gentilesque interpretibus vteretur. Quo in  
 opere multos labores exsudauit, multasque  
 difficultates exorpsit, multorum reprehēsi-  
 ones, irrisionesque deuorauit, ipsum frustra la-  
 borare dictitantium, operāque certā, at-  
 que vtilem ab iis, qui in manibus essent ad  
 eos, quos nullis vinculis tenere possis, auerte-  
 re; præsentiaque, & certa lucra animarū omit-  
 tere, incerta, & fugacia consuetari; gentem esse  
 leuem, vagam, inconstantem, societatis inimi-  
 cam, non vna vnquam certa in sede, non vno

*Viega studiū  
 in Maramo-  
 sis ad Chri-  
 stum addu-  
 cendis.*

in consilio persistere: sed repentina quaque ob-  
 orta cupidine, cum consilio sedes etiam, & fidem  
 commutare, & omnem susceptam vitam rationem su-  
 bito impetu pervertere. Sed amor Christi, &  
 saluandarum studium animarum superabat  
 omnia. Interim, dum minus se praebeant ad au-  
 dita contumaces, si fructum nullum alium, illum  
 certe non leue percepit, quod infantes aliquos,  
 adultosque sub ipsum mortis articulum ba-  
 ptizatos praemisit ad caelum. Credere est ipso-  
 rum preces ad diuinam misericordiam suam genti  
 propitiandam non parum valuisse; ut dura sen-  
 sim ingenia, quae nondum prorsus se dabant,  
 mitescerent, & ad diuinos concipiendos in-  
 stinctus se compararent: & cum subinde noui  
 greges ad priores se adiungerent, vicissimque  
 amore veteris consuetudinis ad visitatas soli-  
 tudines se referrent, rursusque ad nouum vi-  
 tae genus Viegae inuitatu, contentioneque re-  
 dirent, post multos tandem exhaustos labo-  
 res, multamque gentis toleratam inconstan-  
 tiam, pertinaci tandem charitate expressit, ut  
 eorum multi greges in Vincentianis finibus  
 considerent. Locum sibi legere in campestri-  
 bus Piratiningae, vicosque sibi, & tuguria ex-  
 truxerunt: obstinata deinde perseverantia,  
 nunquam in illis quaeritandis, ad fidemque,  
 & societatem cohortandis fatigatus, aliquot  
 annorum interuallo greges alios in Ianuari-  
 enses fines non longe a vico S. Barnaba de-  
 duxit: & nunc eo vitae genere contenti, terram  
 colunt,

*Maramosio-  
 rum greges  
 se conferunt  
 ad Christianos,  
 & ad  
 Christiano-  
 rum institutio-  
 nem.*

colunt, sementes faciunt, & laborum suorum fructu victitant; eadēque cura, diligentiaque qua indigenæ reliqui Christiana pietate excoluntur. Ergo Viegas tot annis cū illis versatus, eorum linguæ facultatē nactus, Catechismum, reliquāsque institutiones è cōmuni lingua in eam transtulit. Dictionarium valde copiosum, vnāque cū Iosepho eius linguæ Grammaticā absoluit. Petrus Goucanus frater è Societate, natione Germanus, vir ad peregrina percipienda idiomata magno ingenio præditus, multa cum ipsorum vtilitate illis instituendis, regendisque præest. Hæc etsi Viegæ labores omnia peperere, initium tamē, & progressionum bona pars ad Iosephum referenda sunt: siquidē studio, institutionēque eius omnia suscepta, promotāque sunt; ad eosque subinde inuisendos, promouendosque ipse se referebat.

DVM in sede S. Vincētij degeret (seu familiæ Præses, seu in priuata vita, non explico) res cōtiguit summæ admirationis, & rari admodum exēpli. In oppido Sanctis homo Brasilus nomine Didacus, iam pridē Christiana Religione suscepta, & inter Christianos, tanquā Christianus diu versatus in domo Lusitani ciuis diē suū obierat; diūq; cadauer exanime iacuerat: & cū maturū visum est, illud regionis more funebri adsuta veste obuoluerant, foueāque ad sepulturam aperta iam erat, cū his rebus omnibus paratis, duarum circiter horarum

*Hominem,  
qui sine Ba-  
ptismo obie-  
rat, rediuiuū  
baptizat.*

interuallo materfamilias Gratia Roterigia videt illud commoueri. Accedit prompta magno animo, vt quid id sit, cognoscat: eam is qui antea cadauer fuerat, rogat, se illo funebri amictu dissuat; iubet illa dissui, eique assidet, vt, quò res progressura sit, obseruet. Is rursus Dominam rogat, P. Iosephū Anchiêtā accersi iubeat. Negat illa Patrē in oppido esse, sed duabus inde leucis in oppido S. Vincētio. Subiicit Didacus, ipsum iam in oppidum Sanctos venisse; seque cum ipso ad riuulū vsque, qui proximus est oppido, iter fecisse, inde ab ipso iussu esse ipsi præcedere: à quo digressū, domum rediisse, & quod exuerat, iterum corpus induisse. Misère statim ad Societatis domum, qui hæc Didaci nomine, in vitam restituti Iosepho nunciarent, quem, cū venisset, statim rediuius interrogauit, an secum ferret sacrarum Reliquiarum thecam, quā sibi ostēdisset in itinere? eā cū protulisset moribūdus lætatus est, tū de suæ animæ salute sermonem ingressus, narrauit illi, se seiunctū à corpore in vitam alteram egressum, monitum esse, non recto itinere in ea loca venisse, quod per Baptismi ostium Ecclesiam non intrasset. Idque ille fatebatur esse verum, neque vnquam antea errorem suum agnouisse, memorem tantum homines albos (sic enim appellant Europæos) cū in patriam suā venissent, Christianamque doctrinā populares suos docuissent, Didacū sibi nomē indidisse: ex eo tēpore ratū se

se perfectè Christianū factū esse, nullam aliā curā nisi præceptorum seruandorū suscepisse: ab ea inscitia, & imprudentia, nunquā sibi in mentem venisse Baptismum esse suscipiendū; proinde Iosephū rogauit, se quāprimū sacro Baptismate in Ecclesiā induceret; se enim illuc, vnde regressus esset, properare. Tum Iosephus hominē, etsi Christianæ legis non rudē, accuratè tamen summa fidei capita illi in memoriam redigens, quantū extremi tēporis patiebantur angustia, instructū magno cum animi sui fructu, multis cū lacrymis baptizauit, testatus se, si nullo alio fructu, hoc certè, quòd vnā hanc animā in cœlū præmiserit, suū in Brasiliā aduentū, laborésque omnes antè susceptos præclarè impensos esse existimare. Baptizatus Didacus, abeundi venia à matrefamilias petita, eā rogauit, vt vilia, quibus vsus esset, indumenta, egentia alicui daret, curarētque duo Missæ sacrificia offerenda, vt saltē ille Deo cultus suo nomine adhiberetur, sibi que in præsens sanctificatā in Ecclesia ardentē candelā in manū traderet. Inde cōuersus ad Iosephū, rogauit sibi vt adesset, donec animam in Domini manus, cuius ipsa esset, emitteret. Quarum omnium petitionum cōpos factus, Iosepho, aliisque præsentibus, ac piis precibus abeūte adiuuātibus, spiritū Deo reddidit. Hęc ipsa Gratia Roterigia corā Ecclesiastico oppidivicario iurata testis deposuit. Laudanda diuina Bonitas, cuius miserationes

sunt super omnia opera eius. Et sanè diuinæ miserationis excessus fuit, & qui omnè superet admirationem, hominè sine Baptismo è vita egressū æternis suppliciis subduci, eiusq; spiritū certū adire Sacerdotē, venire ad oppidū cū ipso, sanctas, quas ille secū ferret sanctorū virorū reliquias venerari, eiusdémq; Sacerdotis præcepto obtèperare, relictū corpus repetere, recepto Baptismi cōpotem fieri; ac deniq; militanti Ecclesiæ membrū annexū, momento in triūphantē transferri. Admirādū, euidénfque diuinæ prædestinationis argumentum, vt in duobus exactæ iam ætatis senibus, à Iosepho edoctis, baptizatisq; vidimus, & in multis in ipso mortis articulo lustrali Baptismi aqua purificatis animaduertimus.

*Leuatur re-  
gendi munc-  
re.*

PERFVNCTVS regēdi munere Iosephus hæsit aliquādiu in Vincentiana sede: sed variæ occasiones, seu Præsidum iussū modò huc, modò illuc hominè trahebāt. Venit aliquando ad dilectum sibi Maramosiorum gregem, qui circa Biritiocam cōfederant; de quibus videtur præcipua cura sollicitus fuisse, biduóque apud eos commoratus est: quo tempore petiit ab hospite, qui arcem tenebat, vt se noctu ex arce mitteret, cupere se noctem illam in Oratorio B. Virginis iuxta arcem sito transigere. Libenter arcis præfectus ei permisit, ipseque vnà cum Alfonso Gonzalo genero suo hominem cò deduxerunt, inde se in arcem receperunt, facem, qua ad  
noctur

nocturnum lumen vñ essent, referentes, Iosepho ibi nocturnis in tenebris relicto. Intempesta nocte, cunctis quiescentibus, vna Gonzali coniux vigilabat. Hæc admirabili viso permota, maritum ad eandem rem spectandam magno studio à somno excitat. Prospectant ambo per fenestram; sacellum vident admirabili splendore circumfusum: splendor è regulis, valuis, culmine, fastigio, totaq; porticu emicabat: concentū præterea admirabili sono vocum non admodum longè audiebāt. Quæ res magnam eos in admirationem, ac propè extasim abripuit. Voluit Gōzalus ex arce exscendere, vt, quid id esset, cognosceret; ratus, quoniam harmoniam sibi à lōgè exaudire videbatur, nauem aliquam id noctis in portum inuehi. Verùm cū descendere cœpisset, capillus ei præ horrore obriguit; sensitque se quasi inuisibili manu retineri. Itaque eo spectaculo vnà cum coniuge diu potiti, mira ambo dulcedine perfusi sunt; cuius etiā memoriæ iucundo sensu in multos postea dies recreabantur. Postero die, cū diluisset, domesticos, reliquosque arcis vicinos, seruitiāque percunctati, an aliquid luminis eorum aliquis in Oratorium per noctem intulisset, comperiunt nihil quidquam horum factum esse. Ipsum denique Iosephum interrogant, vnde tantum lumen ea nocte è sacello effulisset. Is initio contemptim tergiuersari, rem totam dis-

*Noctu' in  
sacello ipso  
orante, splē-  
dor effulget,  
cantus au-  
diuntur.*

simulando obscurare : sed cùm perspecta, & probata veritate teneretur, graui contestatione, pro ea, quam spiritali Patri obedientiam deberent, illis præcepit, ne quandiu viuerent, cum vlllo mortalium ea de re verbum vllum facerent. Aliud nihil ex eius sermone exprefferunt: quod illi pro ea reuerentia, qua Patrem prosequiebantur, sanctè seruarunt, donec illo vita functo anno salutis millesimo sexcentesimo tertio, 5. Non. Octobres Gonzalus in vrbe S. Sebastiano ad sinum Ianuariensem à Vicario generali eius ciuitatis proferre iussus est, siquid memoria dignum de Iosepho scitet, iuratus totam eius rei feriem narrauit, adiecitque se Musicam illam, harmoniam, splendorémque cœlestem fuisse pro certo habere; tum ex eo, quo peresus est horrore, iucunditatéque, tum ex vi, qua se impediri sensit, quominus ad rem explorandam proficisceretur. Nec dubium, quin ad Iosephi contemplationem totum se illud miraculum effuderit : nempe ad has spirituales epulas se vocari, atque hæc cœlestia sibi conuiuia parari sentiebat, cùm ab hominum societate seiunctus noctem illam traducere peroptauit. Et quidem splendorem inter eius preces effulxisse nouum non fuit: nam cùm S. Vincentij familiam regeret, adirétque eum, vt sit, cum literis, aut nunciis ianitor, deprehenderétque orantem, sæpe accidit, vt ingēti è cubiculo splendore emicāte,

percel

*Splendor inter eius preces fulget.*



percelleretur. Sed per idem tempus, dum à regendi munere vacaret, anno 1576. Sancto Vincentio Piratiningam venit. Eam sedem tum senex regebat Societatis Sacerdos Adamus Gonzalus. Hic quodam die circa auroram, cùm intentis in cælum oculis è specula domus oraret, agmen per cælum ambulantium prospexit: quoniam essent, corpora, vmbrae non dignouit; tantùm ad eius aures vox allabatur dicentis. Pater, pater, ego sum, ora Deum pro me. Erat huic filius in Societate adolescens Bartolomæus nomine, quem ipse matrimonio antè coniunctus susceperat, & grandiam ætate coniugio solutus secum duxerat ad Societatem. Is per id tempus in Bahyensi Collegio doctrinæ studiis occupabatur. Visus est sibi senex filij vocem agnoscere: perturbatus eo viso, cùm diluxit penitus Iosephum conuenit; qui, diuina prouidentia ad senis in ea consternatione animi solatium videtur eò venisse. Eum vti hominem rerum absentium in diuino Spiritu conscium rogat, ecquid bene sit Bartolomæo? Bene, respondet Iosephus: neque esse, cur de eo sit sollicitus: sermonéque commutato, hominem ab ea cogitatione ad aliam traducit. Præterierat ab eo sermone annus, cùm vterque in Ianuariensi Collegio esset, naus è Bahya eò venit, quæ certum de Bartolomæi morte nuncium attulit. Petiit à Iosepho Adamus, vt ad legitimum sacrificiorum numerum, quæ pro defunctorum Sociorum

*Piratiningæ  
Bartolomæi  
Gonzali  
mortem præ-  
scit.*

animabus à Sacerdotibus singulis in Societate offeruntur, aliquid adderet: respondit, se cum vita excessisset adolescens, quinquies pro illo hostiam salutarem immolasse, neque pluribus sanctam illius animam indigere, idque se fecisse, quo tempore Adamo ipsi visum illud Piratiningæ obiectum est: quod Iosephus non potuit nisi diuinitus cognoscere, cum ob distantiam locorum (distat enim Bahya S. Vincentius plus ducentis leucis) & infrequetiam itinerum non antea die eius rei nuncij peruenerint. Ita & animæ illi consuluit in tempore, & nuncij acerbiter præuere deuitauit.

*Fratrē è Societate graui vlcere sanant.*

IN eodem Ianuariensi Collegio Gonzalus Aloysius Societatis frater affectus decumbebat, cui acerbum vlcus infra sinistrum brachium intumuerat, neque, remediis multis adhibitis ad suppurationem veniebat; quin etiam exasperabatur magis, sæuo cum cruciatu ægrotantis. Accedit Iosephus, manum admouet tumori, signum crucis imprimit, confestim rupta cuti, una cum cruciatu coacta sanies effluxit.

*Venit Bahyã, vnus è fratribus cogitationē nouit.*

VENIT postmodum Bahyam, quo tempore abditam alterius cogitationem se penetrasse declarauit. Frater quidam, qui hominem nunquam viderat, ratus, quod corporis habitudo parum firma, & humilis eius indicabat apparatus, inutilem hospitem, & contemptibilem aduenisse, hanc de illo cogitationem concepit. Quid huc venit iste? neque verbum vllum protulit: non fefellit

Iose

Iosephum illa cogitatio:&cùm ad eius amplexum venisset, maiore, quàm cæteros lætitiæ, ac beneuolentiæ significatione illum excepit. Ita est, inquit, charissime frater, vt cogitasti: vnus tu omnium de me optimè iudicasti; quid ego nullius pretij homuncio huc veni? Percussus ille mirari desiit, cùm qualem virum contempsisset, intellexit.

IN Bahyensi Collegio is, qui coquinariam exercebat, patella pisces in cœnam Collegij elixabat, cùmque decoctis piscibus, patellam adhuc bullientem ab igne remoueret, sinistro casu ius exæstuans, effluensq; in retrahentem, sinistram ei manum ambussit. In illa doloris acerbitate fortè Iosephus per coquinam transit; fratris videt manum concrematam, quam sinistra manu apprehensam, dextera signo crucis signauit, illis subiectis verbis: Sat est; ne doleat amplius: admouitq; ad ignem, quæ tēperato cōcepto calore, statim persanata est.

*Fratris vnus è Societate ambulans manum sanat.*

IBI DEM maioris aliud contigit admiratio- nis. Cùm longè ab vrbe ad ægroti excipien- dam confessionē excurrisset, in reditu nox illū oppressit inter Tapagipā (locus est oblōga cus- pide in mare procurrēs) & Bahyā: ea cùm iter facerēt secus stagnū, ingentē ranarū coaxatio- nē, & inter eum strepitū eiulatus ingentes au- dierūt, quasi hominū acerbos cruciatus tole- rantū; vsq; eò, vt Patris comiti capillus inhor- ruerit. Metū ponere Pater iubet, substititq; ali- quantisper, ac sublati in cælū oculis; Æterne Deus,

*Animas purgatorias pœnas dolentes audit, adiuvitque.*

Deus, inquit, quàm magna tua potentia est: propiùsque ad stagnum accedens, comitem vnà secum genua ponere, & quinquies orationem Dominicam, Angelicamque salutationem pro animabus purgatorias pœnas sustentibus pronunciare iubet. Qua per soluta prece, cessauit eiulatus, neque inde amplius, cùm sæpiùs illac frater idem pertrāsisset, eiusmodi clamores exauditi. Videtur diuina misericordia profundo suæ diuinitatis iudicio animas illas selegisse, quæ ad id tempus sancti viri precibus pœnis illis eximerentur.

*Ægrotos in ipso mortis limine prædicit eo morbo non morituros.*

IDEM ad ægrotæ mulieris, ac propè iam depositæ confessionem audiendam extra urbem accersitus, eius maritum, qui ad se excipiendum prodierat, obuium habuit lacrymabundum; cuius permotus dolore, antequam ad ægrotam perueniret, blandè eum consolatus, prædixit periculum præsens euasuram, vixitq; postea in annos multos.

PER idem tempus, aut fortè ipso prouinciam regente (non enim nisi hoc tempore, aut prouinciæ Præses Bahyæ degere solitus est) Didaci Morini coloni Bahyensis coniux Andresia Diazia septimum iam mensem vterum gestabat, cùm sinistro casu lapsa abortu infantem fœminam emisit. Eo casu malè affecta vtraque, mater quidem diu malè habuit; infans verò vitæ discrimen adiit. Ipsam, totamque familiam inuisit Iosephus; parentes tenellulæ infantis periculo permoti, cùm iam iam exha-

exhalatura animam videretur, eum rogarunt, ut antequam expiraret, eam Baptismi beneficio afficeret; honestius fore respondit, ipsam in Ecclesia matrice, solemni apparatu, sacrisq; adhibitis cerimoniis baptizari: non enim eo tempore morituram; neque graue illis esset Mariæ illi nomen imponere, siquidem ipso Assumptionis Virginis die sacro nata erat; proinde probè illam, pièque educarent, futuram enim familiæ toti non iniucundæ hilaritati: vndecimum tamen tantum annum exacturam, eodémq; quo in lucem edita est Virginis die sacro ex hac vita exituram, etsi non in qua vrbe nata est. Parentes postmodum S. Sebastianum se transtulerunt, ibique puella vndecimo ætatis anno eodem, quo nata est die decessit. Totum id matris testimonio postea cognitum est.

VITÆ



VITÆ  
IOSEPHI ANCHIETÆ  
E SOCIETATE IESV  
LIBER QVARTVS.

A.D. 1578.



LESTRABAT suis excursionibus Iosephus, pro re nata, loca circa Bahyam, cum anno à partu sacro millesimo quingentesimo septuagesimo octauo insulam Taparicam, omnium quæ in sinu Bahyensi sunt, & maximam, & frequentissimam obiens ad confessionem ægrotantis anus indigenæ accersitur. Hæc gentis more extento in reti decumbebat propter focum. Pater illi aures dans parum commodè in ligno ad ignem appposito sedebat. Voluit paterfamilias, pro ea quæ suppetebat copia, ei sedile paulo commodius præbere; recusauit Pater: sessio, inquit, mihi paratur, ad quam, antequam operam hanc persoluero, vocabor, multo mihi iniucundior. Nondum planè suam confessionem mulier peregerat, cum ad eum Præpositi

*Præsit se  
Præpositum  
Prouincia-  
lem futurū.*

siti Prouincialis perferuntur literæ, quibus iubebatur ad urbem repedare. Ille statim se itineri commisit: etsi optimè sciebat quos ad labores vocaretur: nempe ad eam, quam sibi parari prædixerat sessionem; nam statim ut venit ad Collegium, Præpositus Prouincialis, conuocata familia, domesticam, ut in Societate mos est, concionem habuit; recitatioque Præpositi generalis diplomate Roma missa, Iosephum Anchiétam Præsidentem Societatis in Brasiliæ prouincia renunciavit. Mox ad singulorum pedes accidens, multis suis, aliorumque dulci sensu pietatis, cum lacrymis oscultatus est. Ægro animo Iosephus onus subiit; posteròque die & ipse domestica item concione singulorum sibi preces auxilio poposcit; parique humilitatis significatione ad singulorum pedes osculabundus se abiecit. Et quidem eam rem Deo illi indicante, quasi rebus, quæ in consilio Romæ agerentur, interesset, multo antè prænouerat. Nam cum adhuc Vincentianæ domui præesset, inspiciundæ familiæ causâ Piratinin-gam vincerat, dixeratque in familiari sermone quasi per iocum, cum tres alij Sacerdotes, fratresque duo interessent. Videte aniculæ quid garriant, me fore Præpositum Prouincialem, & quàm forte dorsum ad id onus habeo. Et sanè erat, uti suprâ vidimus, ex morbo, quo nouitius laborauerat, luxato dorso. Dixerat etiam multo ante se Bahyensis

Col

*Fit Præses  
Prouincialis  
anno Domini  
1578.*

Collegij Rectorem lectum esse, sed electionem irritam futuram. Quæ cuncta euenerunt: nam Roma literæ postea venerunt, quibus ipse Bahyensis Collegij Rector dicebatur: sed nodus obiectus rem totam impediuit. Superuenêre deinde eæ, de quibus facta mentio est. Ita qui impeditum aditum ad Rectoris munus inuenit, expeditum ad Prouinciale nactus est.

Anno, vti dicebam, eius sæculi septuagesimo octauo prouinciæ regimen suscepit; eamque septem circiter annis administravit ea prudentia, integritatēque, quæ à tanto viro expectabatur. Ac primum, quod ad ipsum attinet, eadem vitæ integritas, idem erga se rigor, eadem cum Deo coniunctio, familiaritasque quæ fuit semper: neque eum honor à sui despectione, neq; rerum occupatio à continenti cum Deo familiaritate vnquam retardauit. Ita multarum, magnarūque exemplo virtutum, vel tacens Pauli illud referre videbatur. *Quæ & didicistis, & accepistis, & audistis, & vidistis in me, hæc agite*, Ad integritatem tamen, & rectam legum normam, ad quam cæteros exigebat, inlitam sibi à natura lenitatem, comitatēque adhibebat: quò fiebat, vt disciplinæ rigor moliretur. Sic charus omnibus, nulli grauis, omnium animos ita sibi deuinxerat; vt, quod mirum videri possit, domestici omnes ei suas confessione conscientias optatiùs, quàm quò utebantur ad confessiones Sacerdoti, aperirent.

*Qualis in munere regenda prouincia fuerit.*



rent. Omnino peculiari Dei dono præditus erat, ad quemcunque animi morbum dulci medicamine sanandum, mœrore afflictos al-  
leuandos, nubésque ex animo eorum depel-  
lendas, qui vel suspitione, vel indignatione  
aliqua, perturbatione agitentur. Sed in  
ipso maximè perpetua animi tranquillitas, &  
singularis mansuetudo elucebat: & sanè,  
quod in Præsidi Religiosorum virorum ma-  
ximè laudatur, & in quo summa charitas,  
summumque illius officium versatur, vt vigi-  
li cura in id semper incumbat, suos vt ad per-  
fectam instruat virtutem, modisque omnibus  
viam ad eum finem illis expediat, impedi-  
menta amoliendo, & lapsus, si qui imminent,  
præuertendo, quanta in eo laude Iosephus ex-  
celluerit, quàmque paterno amore suis in di-  
scrimine constitutis præstò fuerit, eosque ne  
laberentur, sustentauerit, multa eorum, quæ  
narrauimus, declararunt; cuius rei subinde  
documenta dabat: nihil æquè cordi Præsidi-  
bus esse debere, atque amorem erga suos, stu-  
diùmque processus eorum ad virtutem.

*Qua cura  
erga suos esse  
oporteat,  
qui aliis præ-  
sunt.*

AVDIT aliquando Sacerdotem in fami-  
liari sermone disputantem, non debere eum,  
qui aliis præst, culpâ cuiusquam suæ familiæ  
præterire, quam non animaduersione aliqua,  
aut reprehensione, aut saltem monitione cor-  
rigere nitatur. Adiecit Iosephus; quin etiam  
nulla in priuato homine Religioso culpa in-  
esse debet, quàm non eius Præses, antequam

*Ministrum  
cuiusdā Col-  
legij dulci  
monito corri-  
git.*

de ea reū alloquatur, bis; tēve corā Deo multis cum lacrymis deploret. Nēpe hoc est oues tibi à Christo cōmissas saluas velle. In vno ex eius prouinciæ Collegiis Sacerdos, qui ministrū agebat (est autē in Societate Ies y minister à summo totius familiæ Præsīde secūdus) asperiores aliquādo erga eius familiæ hominē se præbuit. Id cū vidisset Iosephus, quippe totius familiæ Præsēs, cur id ita faceret, quæsiuit. Ille, qua id totū animi sinceritate fecerat, eadē suo Præsīdi respondit. Qui mihi, inquit, ministri munus demādaui, idē hoc præcepto me instruxit, nullā occasionē vt prætermittē priuatorū quēque ad omnē patientiā exercēdi. Atqui ego in nomine Domini, inquit Iosephus, istā personā te iubeo exuere, & nouam induere mansuetudinis, ac lenitatis; &, quantum in te est, nulli anīsam prębeas offensionis, aut tristitiæ: sed te beneuolū, comēmque omnibus exhibeas. Crediderim tamen monitū non modò nō reprehendendū, sed ad præsentem occasionē accommodatū etiā religiosæ prudētię plenū fuisse. Sed nihil prauius in artibus vitæ præsertim, quàm bona multa præcepta tenere, & illa, cū ad vsū venias, incōmodē interpretari: at verò sanctū senē magnō lumine præditū, cognita animi trepidatione, intellexisse homini dilatandū esse cor. Tū ille, quasi discussa caligine, corde dilatato, ita cōsiliū probauit, vt, nouo percepto lumine, totum se studuerit ad eam normā conformare. Ita non

prima

priuatos tātūm homines, sed eos etiā, qui aliis  
 pręerat, sui officij admonebat: sed & priuatorū  
 etiā quę partes essent, edocebat; nā cum paulo  
 pōst in Collegio Sebastianensi vnā cum aliis  
 patribus, fratribusque Societatis in eū sermo-  
 nē venissent, vt diceret vnus è Patribus, debe-  
 re priuatū hominē in religione, ad perfectam  
 animi sui quietē minimē de se, déq; statu suo  
 esse sollicitū; sed totū in Præsidiū suorū potesta-  
 te, eo munere, gradūque acquiescere, in quo  
 cum sui Præsides collocarunt (sententiā illis  
 temporibus firmam, ac robustam, vtinā cursu  
 tēporum lapsi mores, nostri amor, & nostra  
 de nobis opinio non aliquando cōuellāt, aut  
 in obliquum inflectant) id adeò verū esse Iose-  
 phus affirmavit, vt, nisi id fiat, non possit mul-  
 tis, ac magnis perturbationibus animus vaca-  
 re. De se ita dicebat, nūquam in futurū pro-  
 spexisse, antequam fieret Sacerdos, nunquam  
 sibi in mentē venisse, posse se fieri Sacerdotē;  
 Sacerdotio auctum nunquam neque de pro-  
 fessione, neque de regendi munere cogitasse;  
 neque se ad tantam rem vllis instructum do-  
 ribus sensisse. Quo tempore ad professionem  
 admissus fuerit, non reperio, sed ex proximo  
 sermone Ianuarensi licet odorari, antequam  
 ad regimen adhiberetur, id factum esse; ad  
 quam cum solus ab aliorum conuictu semo-  
 tus se diebus aliquot more Societatis com-  
 pararet, fideli amico narrauit, se in medita-  
 tione Christi dolorum defixum magnam eo-  
 rum partem in suo corpore per eos dies cum

*Priuatos ho-  
 mines in Re-  
 ligione omni  
 de se cura so-  
 lutos esse de-  
 bere.*

*In meditatio  
 ne dolorum  
 Christi partē  
 sensit.*

aterbissimo cruciatu expertum esse.

*Sape hominū  
adipetui se  
subducit.*

V I D I M V S eum sæpius in peregrinationibus, cœtu comitantium præmissis, in itinere substituisse : inde magna confecta viæ parte, nullo sentiente, ipsorum tamen iter anteverisse. Hæc autem non cum indigenis tantum, hominibus tenuibus, nec magna solertia præditis, qui cū ista viderent, qua ratione fieret, non magnopere solliciti erant; sed maiore adhuc cum admiratione, in cœtibus etiam, comitatūque clarorum virorum sæpe contigerunt. Antonius Barrius Episcopus, qui Leitano successit, vicos circa Bahyam lustrabat, ut sacro chrismate vicanos confirmaret: ibant eodem in itinere, præter Episcopi comitatum Georgius Serranus Bahyensis Collegij Rector, aliique Sacerdotes è Societate, & ipse Prouincialis Præses Iosephus; & cū è vico S. Antonio, peractis rebus omnibus, ad vicum S. Ioannem in equis omnes proficiscerentur, solus Prouincialis Præsul more suo pedes, & nudipes illis præeuntibus, se subsequuturum prædixit. Sex leucas confecerant, cū ipsum inter eundum neque subsequente, neque prætercuntem vidisset quisquā: ad vicū cū venerūt, Petrus Acosta Societatis Sacerdos, qui in eo vico curionem agebat, instructa de more supplicatione, prælata cruce fit obuiā Episcopo; & quem venturum ad vesperam existimabant, cum Acosta eodem in agmine, maxime admirante Episcopo, apparuit etiā Iosephus. Sed cū hæc in ipso essent iā quotidiana,

na, vt admiratio nulla fuit apud domesticos, ita nullus ea dere sermo emanauit latiùs.

CONTIGIT aliis tēporibus, vt cœtu, colloquiisque nullo sentiēte se subduceret, nimirū, vt ad Dei colloquiū, quò se vocari sentiret, se reciperet; sed postmodum ita se redderet eorundē numero; vt, cum absentia, prēsentiāque nosceret, discessus, reditusque non notaretur. Michaël Azeredius coloniae Spiritus sancti Præfectus testis est, Iosephū vnā cū aliis è Societate, & indigenis multis ad aperiendū alueū aquæ deducēdæ ad molā saccharariam rogatu hominis amici, ac de Societate bene meriti venisse; & cū ibi vnā cū aliis versaretur, improviso è cœtu ad agendū cū Deo secessisse; eius discessum nemine aduertēte; cūmq; cum desiderari animaduertērent, statim inter ipsos itē ex improviso apparuisse, quasi in eius esset potestate, & se ad spectui subducere, & se visendū exhibere. Nauigabat vnā cū aliis in trimi Melchioris Azeredij: saepe accidit, vt, cū ad cœnā quæreretur, accuratissimè trimi tota perlustrata, nullo loco appareret, paulo post ipsū viderēt in iis ipsis locis, vbi paulo antè sūma cura eū perquisierant, rogatus, vbi latuisset, respōderet, se circa prorā preces horarias percurrisse. Credēdū est, aut diuino Spiritu asportatū aliquò, aut etiā diuino nutu inuisibili nube tantisper obductum, ne illius inter orandum ardores, excessusque spectarentur; nec potuisse ipsum diuini amoris impetus, quin erumperent, cohibere.

A.D. 1578.

*Lusitanorum  
cladem in  
Africa a-  
misso Rege  
diuinitus co-  
gnoscit.*

ANN O eodem à Domini ortu millesimo quingentesimo septuagesimo octauo, quo ipse prouinciæ regendæ munus iniuit, ordinatis rebus ad Bahyam, apparet ipsum ob-eundæ prouinciæ causâ, ad inferiora Brasiliæ cognoscenda in Ianuariensem sinum descendisse. Inde ad dilectum sibi Maramosiorum gregem, qui circa Biritiocamiam antè sedes posuerant, reuiscendum se contulit; arcæque Biritioca exceptus, nequaquam illa animi tranquillitate, quâ prius inter eos versatus est, quin alta mœstitia oppressus, lugenti similis magna curarum grauitate fatigatus, alto silentio insidentem penitus in animo ægritudinem abdere cùm conaretur, prodebat magis; vsque eò, vt biduum totum nihil omnino degustauit. Attonitus rei nouitate, qui ipsum exceperat, arcis custos; & de homine, quem tanta reuerentia coleret, sollicitus, sæpius quæsiuit, quænam tanta tam subitæ mœroris esset causa, cùm ille grauati id ferre videretur, destitit ei molestiam augere. Illa tantùm pauca ab ipso verba expressa sunt; *hodie in mundo calamitates ingentes apparantur.* Rem totam hospes, Iosephi responsum, & diem ipsum literis adnotauit; is fuit prid. Nonas August. anni 1578. postea cognitum est, illo ipso die in Africa funesta ad omnem memoriam clade, cæso exercitu, Sebastianum Regem desideratum esse. Damnum, vt omnium maximum, & irreparabile, ita etiam trist-

stissimam apocalypsim non mirum est virum alioqui ingentis animi, magnæque fortitudinis, ac semper cum Deo coniunctissimum tanta tristitia affecisse. Sed diuinæ tandem prouidentiae decreto acquiescendum est; & quis est, qui audeat dicere, quare sic fecerit? Recepit deinde se ad munus suum obeundæ, administrandæq; prouinciæ, cum circa annum millesimum quingentesimum octogesimum primum iterum urbem S. Sebastianum, inferiorésq; Brasiliæ oras reuisit, cumque è Bahya egressus ad Villam veterem ex itinere diuertisset, templum S. Mariæ Virginis à Victoriâ ut inuideret, adiuit hominem Irene Barbosa fœmina illius oppidi primaria; postulat illius precibus vteri fructum aliquem sibi à Deo impetrari. Respondet illi Pater, iter sibi esse ad inferiora Brasiliæ, sedes illas inspecturo: inde cum redierit, Deo bene iuuante, auditurum se ipsius partum (marem, an fœminam? sed fœminam fore videri sibi euidentius) ferri ad Baptismum; & nomen illi Anna imponendum: sed eius latitiæ fructum haud fore diuturnum, diuinam tamen Bonitatem secundum hunc primum alios ei deinde fructus largituram. Hac in spe relicta fœmina nauigauit; anno vertente cum rediret, nauisque ad portum Villæ veteris appelleret, in nauiculam incidit è portu exeuntem, qui, cum se mutuò consalutassent, quæsierunt illi, vnde aduenæ soluisent,

*Irene Barbosa prolem prædicat.*

vicissimque Iosephus , quisnam esset ille comitatus, rogavit, quem in acta è mari collem ascendere viderent? responderunt, Isabellam esse ab Auila, Garliæ ab Auila, viri primarij filiam, quæ eum comitatum secum traheret, infantem filiam Irenes Barbosæ, ad Baptismum de sacro fonte suscepturam. Reuocate, inquit Iosephus, Irenæ in memoriam, me id ei totum prædixisse. Puella ad annum duodecimum tantum vixit, cum interim fecunditatem, quæ Iosephus prædixerat, mater à Deo consequuta esset. Qua in re admiratione digna est, & suspicienda diuina prouidentia, cum occulto suo iudicio iis , quos suo diuino Spiritu illustrat, quædam nota facit, quædam celat, vt olim Elisæus Sunamitidem fœminam in magna esse amaritudine cognouit, se tamen rem totam à Deo celatum professus est. Et Paulus per omnes ciuitates Spiritum sanctum ait sibi protestari, vincula, & tribulationes Ierosolymis se manere : quæ autem euentura sibi sint, ignorare ; sic hoc loco Iosepho multa sigillatim nota facta sunt , quæ cuncta euenerunt: sexum primi fœtus , qualis futurus esset, nequiuit expedire ; sed ex nomine tantum facta coniectura potuit aliquid innuere , disertè asserere non potuit. Et in hoc quoque magnis Prophetis fuit non dissimilis. Id an hoc, aut superiore, aliòve itinere factum sit, non distinguo : ad Ianuariensem certè sinum,



fedes illas vt viferet , nauiganti illi contigit. Addam & aliud, quod quo tempore contigerit , quia diuinare non potui , incertam coniecturam incertæ adiungere coniecturæ visum est, quippe consentaneum est , id aliquo eorum itinerum accidisse , cùm Præpositus Prouincialis Australia Brasiliæ inspicuendi causâ obiret. Venerat ad Spiritus sancti Præfecturam, & cùm portum iam essent in-  
ituri , repentè aduersa vis venti coorta nauim ab ipsis faucibus portus longè asportauit: tum Iosephus magna voce edixit. Aliquis ab Ecclesiæ communione seclusus hac naui vehitur. Is ad me adeat : potestatem habeo ipsum à censura absoluendi , & sanctæ Ecclesiæ Sacramentis restituendi. Tunc è vectoribus vnus ad ipsum accessit ; missalem librum protulit è suppellectili Francisci Sosæ Prætoris acceptum ; interdictaque piorum communione iis , qui aliquid inde acceptum intra certam diem non repræsentassent. Is, seu aliquo impedimento , seu mora voluntaria eam diem non obiuit, nunc rem totam apud Iosephum confessus , exhibito libro , censuræ impedimento liberatus est; statimque sedata tempestate, secundo vento portum ingressi sunt. Inde cursum suum persequutus, in Ianuariensem sinum inuectus urbem S. Sebastianum tenuit.

*Quendam è  
vectoribus  
eadem nauì  
excommuni-  
catum ab-  
soluit.*

Cùm ibi versaretur anno ipso 1581. Dida-

*Classē, quā  
timebant, a-  
micam esse,  
& alia præ-  
dicit.*

cus Floreſius cum firma aliquot nauium claſſe ad fauces Magellaniſi freti muniendas miſſus Braſiliæ oram cū adlegeret, ſpatio leucæ vnius contra ſinus oſtium ſtetit in anchoris, ſpeciēmque præbuit inimicæ claſſis, & fortè per id tempus erat ex rumore, & nunciis aduentus hoſtium in metu. Perturbauit ea res vehementer ciuitatem, ciuēſque ad arma exciuit; & iam Societatis Patres de toto rerum ſtatu ſoliciti, cū rebus aliis, tum ſacro in primis apparatui latebras quærebant: eos admonuit Iosephus inanem ſuſcipere ſolicitudinem, claſſem amicam eſſe: oculiſque tanquam aliquid certum inſpecturus, in eam coniectis, fabrum lignarium, ſui opificij bene peritum illa vehi edixit, quem Deus trahit ad Societatem, ſua opera Societati profuturum, atque bonos in ipſa proceſſus habiturum. Quod ille nullo modo, niſi Dei Spiritu indicante ſcire potuit. Is fuit Franciſcus Eſcalantiuſ, cuiuſ infrà mentio ſæpiuſ erit. Is cū nauis exiſſet, rectè ad Collegiū Societatis venit, petiitque ad colloquium admitti Præſidis Prouincialiſ. Accerſituſ Iosephuſ, ſe, & quiſ eſſet, à quo accerſeretur, & cuiuſ rei cauſâ, antequā ianitor planè loqueretur, ſcire ſignificauit, cū eum nunquā antea vidiffet: quē de more legitimis interrogationibus examinatū, & probatū admiffit demū in

*Vocatuſ ad  
ianuam, à  
quo, & cuiuſ  
rei cauſa vo-  
caretur præ-  
dicit.*

Socie-

Societatem; eique prædixit futurum, vt in sua vocatione constans ad vsque vitæ finem perseveraret. Qua ille prædictione latus, quasi suæ salutis accepto pignore, magno cum animi sui fructu, & omnium probatione in obsequio Societatis vitæ agit. Classẽ sequebãtur onerariæ quatuor, quibus Didacus Arias præerat, cõmeatum supportantes; hæc Caput frigidum præteruectæ, antequã fauces sinus Ianuariensis tenerent, in stationem malè tutam, æstunc maris, an loci ignoratione, se receperunt, eratque periculum ab omnium naufragio: trepidus ea de re nuncius Sebastianenses perturbavit. Iosephus sociæ classis periculo permotus, ad vsitata confugia recurrit, Deum orans, vt imminens periculum auerteret: nondum suam precationem intermiserat, cùm ecce tibi paulo post priorem nuncius alter superuenit, naues iã extra periculum se recipere. Latus hoc nũcio Stephanus Grana Sacerdos è Societate accurrit ad Iosephum, vt eum primus ea lætitia imperiat; apertoque ostio, hominem videt in aëre suspensum, iunctis manibus, incensâ facie orantem. Eum statim Iosephus, ad se rediens, præuertit; nihil mali esse: nihil mali ingemilians, nullum nisi lembi vnus, qui se onerariis adiunxerat, iacturâ esse factam, & ex eo nullum prorsus hominem interiisse. Quarum rerum tam distinctam præsertim cognitionem, cùm

*Onerariis  
quatuor in  
magna periculo  
precibus  
auxilio est.*

*Sæpius inter  
orandum in  
aërem subla-  
tus apparet.*

cùm ad ipsum nuncius nullus penetrasset, nemo non videt, ex quo lumine hauserit. Atque ita prorsus contigisse, receptis nauibus postea cognitum est; & credere est illam ipsam Dei Bonitatem, quæ hæc absenti, & oranti nota fecit, eandem Iosephi precibus salutem, incolumitatemque nauibus præstissse.

NEQUE solùm hoc tempore, sed aliàs præterea inter orandum à solo sublatus apparuit, eiúsque rei fama in vulgus emanat: sed testes oculati nonnulli proferuntur. Gaspar Lopesius colonus Vincentianus iurat se eum vidisse in sacello S. Georgio dicato extra oppidum ad Erasmodum sacchararia inter sacrificandum sublatum ab altaris scabello instar palmi vnus. In templo S. Matris in Portu securo octo, decemve homines magna cum ipsorum admiratione per non modicum temporis spatium, item inter Missæ sacrificia aulsum à terra viderunt. Isabella Nogheria narrat, se cum fœmina altera, in templo alio B. Virginis à Schala prope Bahyam fuisse, vidisseque Iosephum, cùm à sacro Missæ agendis de more gratiis intentus esset, suspensum solo aëre inniti, seque strepitum dedita opera fecisse, si fortè ea re permotus in statum suum se reponeret; cùmque ipsum nihil moueri viderent, se ipsas reprehendentes, muliebrem leuitatem in admirationem, & reuerentiam vertisse.

CLASSE igitur sinum ingressa (vt eò vn- *Quanta asti-*  
 de digressi sumus, reuertamur) occasio classis *matione*  
 Præfecto dum ibi in statione commoratur, est *apud Regia*  
 oblata familiariter cū Iosepho agēdi. Is illius *classis Præfe-*  
 fermone, & virtutum odore, qui ex eius ad- *ctum fuerit.*  
 spectu, colloquutioneq; emanabat, ita captus  
 est, vt magno cum animi sui fructu vltro sæ-  
 pius hominem adiret. Attinebatur in eius na-  
 uibus homo Anglus, quem circa ea loca, quò-  
 cum sua traxerat fortuna, oberrantem, aut  
 quid aliud agentem Hispani milites tanquam  
 perduellem exceperant. Adiuit Præfectum  
 Sacerdos è Collegio alia de causa; cui Iose-  
 phus in mandatis dederat, vt miseri aduenæ  
 missionem peteret. Grauatè id ferre visus est.  
 Præfectus, multisque verbis, quare id facere  
 non deberet, ostendit; tum Sacerdos, vt à se  
 crimen amoueret insolentiæ, id se à suo Præsi-  
 de Iosepho iussum esse significauit. Ad Iose-  
 phi nomen Præfectus repentè mutatus. Mit-  
 tatur, inquit, & Iosepho concedatur: absit  
 enim, vt illius vnquam audeam præceptis re-  
 fragari; nam cū primùm vidi hominem, ni-  
 hil primo adspectu abiectius, nihil contem-  
 ptius mihi videre visus sum: ac postquam be-  
 ne, penitúsque introspexi, nunquam tanta  
 maiestate virum meadiisse memini, ad cuius  
 conspectum tantopere ego me parui esse  
 senserim.

ERAT, dum in Sebastianēsi Collegio Io-  
 sephus moraretur, vnus è familia Pernambu-  
 cum

*Proficiscenti  
Pernambucū  
iubet cōmea-  
tū duplica-  
ri, quòd iter  
illi duplo lō-  
gius immina-  
ret.* cum petiturus; huic cū in discessu, quod nautici commeatus ad illud iter fatis esset, daretur, iussit Iosephus annonā duplicari, quòd iter illi immineret duplo lōgius: nam vi tempestatis à Pernambuco abreptus, ac lātus Septentrionalē flectere coactus, ad insulas orae Peruuianæ insulis adiacentes, quas anteinsulas vocant, delatus est. Ita hominī à suis sedibus longè asportato profuit diuina sui Præsidis futuri incommodi prænotio.

*Impedit ne  
matrimonii  
cōtrahat, qui  
se cōiugio vir-  
duatū simu-  
labat.*

VENERAT ad urbem S. Sebastianum, dū ibi Iosephus moraretur, hoc, aliōve tempore, hospes è Lusitania, qui se cōiugio orbatum simulabat, nouūque coniugium cum muliere Sebastianensis coloni filia ambiebat; eratque in proximo, vt vtrunque sponsiones fierent. Cognouit id Iosephus, egitque cum magistratibus, vt per causam alienam ille simulator in Angólā ablegaretur. Questus est mulieris pater cum Iosepho, quòd filia suæ matrimonium impediisset; tum ei Iosephus hominis fallaciam detexit: ipsum vxorem habere in patria adhuc viuentem, & antequam ipse Angólā perueniat, eodem ipsius quoque vxorem peruenturam. Idque ita euenit; misera enim mulier iam diu deserta à marito, nauim cum honesto fœminarum comitatu in Brasiliam euntium conscenderat, coniugem suum vt quæreret, sed ventorum

ventorum in aduersam oram delata Angolam tenuit triduo antè vt postea cognitum est, quàm eò maritus appulit. Opportunè igitur Iosephus Angolanum illud iter suasit, congressumque duorum coniugum in iis locis futurum præuidit. Ita scelus ingens prohibitum, graua duo incommoda sublata, & qui antea Iosephi iniuriam accusabat, Deo grates egit, se, filiàmque magna fraude, ac simul ignominia liberatos.

VIDETUR adhuc in prouinciæ administratione Iosephus fuisse, cùm Sebastianensis Collegij Rector fratrem rerum gerendarum peritum ad res domesticas obeundas ex vrbe dimiserat, eique alterum è fratribus comitem addiderat. Hi venerunt ad vicum, in quo Iosephus morabatur; iubet Iosephus fratrem procuratorem ad Collegium redire, comitem alterum vt inde peteret, priore comite in Collegio relicto, quòd satis, superque laborum, incommodorumque in Collegio illi immineret. Is, fratre procuratore cum comite altero profecto, biduo, triduo ve post tam graui prostratus est morbo, vt propè venerit ad extrema; ex quo intellectum est, quanta incommoda vtrique sua prædictione Iosephus redemerit; & morbido in alieno hospitio longè à suis ægotandi, & valido ex cura ægroto inferuendi, moraque ob id impedimentum rebus gerendis iniecta.

*Fratrè è Societate grauem in morbum lapsurum præuidet.*

*Infelix mor-  
tis genus cui-  
dã prædicat.*

ERAT adhuc in Sebastianensi Collegio Iosephus, & rebus illius oræ ordinatis reditū ad superiora parabat, cū, vxore defuncta, vir primarius in vrbe S. Sebastiano ab ipso petierat, vt se in Societatem admitteret. Id se facturum Iosephus promisit, cū negotia quædã, quibus vir ille tenebatur implicitus transgisset, quorum causã erat Bahyam profecturus, eoque se quoque venturum. Venit ille Bahyam, transegitque negotia sanè ex sententia; interim amor humanæ prosperitatis omnem de religiosa vita illi diuinitus iniectam cogitationem penitus adussit. Venit haud ita multo post Iosephus, fit illi obuiam mutata mente inconstans Societatis candidatus. Rogat Iosephus, ecquid se ex humanis tricis expedierit: ille solito honorificentius, & honestioribus titulis, quàm familiarem hominem, & Societatis conuictum iam præsentem deceret, Patrem compellans, se quidem impedimentis ait esse liberum; sed statuisse in Lusitaniam redire: ibi petiturū denuò Societatem in patria, & in Societate moriturum. Intellexit Iosephus mentis inconstantiam, vultūque ad seueritatem composito, manu ei leuiter humerū pulsans: Sodes, inquit, quod de profectioe ais, venies quidem in Lusitaniam, tamen neque in patria, neque in Societate, sed hīc in Brasilia morieris, & eo mortis genere, quo dignus est, qui Dei inuitamenta aspernatur. Si habuisset fidem monitis, nã ille sibi  
optimè



optimè consuluisset; sed debebatur, opinor, aliis documentum levis inconstantiæ. Rediit ille in Lusitaniam, ac post aliquot annos Brasiliam repetiit publica cum potestate nouam coloniam circa Caput frigidum condendi. Cui rei dum dat operam, ac per montes iter facit, à comitibus seu destitutus, seu quo casu abiunctus, nusquam amplius comparuit: euoluto demum anno, eius cadauer arefactum ad ingentis rupis radicem repertum, & agnitum est.

DVM post reditum à Ianuariensi lustratione in Bahyensi Collegio ageret, Franciscus Fernandus è Societate nondum sacris initiatu longo tempore quartana laborauerat, & cum die festo præsentationis Virginis, quem diem S. Matris à Schala vulgò nominant, 11. Kal. Decembres multi è Bahyensi Collegio, ad eiusdè Collegij templū eius inuocationis causâ, duabus leucis Bahya diffitum, proficiscerentur, hærebat quartanarius in Collegio; erat enim dies parocysmi. Rogat Prouincialis, cur non vnâ cum aliis communem diei religionem obeat? eo die responder ille se febre m expectare. Vade nihilominus, inquit Pater, atque ita eam illîc relinque, vt non amplius te adoriatur. Iuit, sæuâque ibi cum inuasit febris: confert ille se ad templum; atque ante Altare Virginis abiectus, supplex ab eius clementia opem petit, eò se Iosephi iussu venisse; ab ipso sibi mandatum esse

*Quartanarius impetrat sanitatem.*

contestans, ne febrim inde referret ad Collegium. Fauit Iosephi præcepto, & iuuenis obedientiæ S. Mater, ratamque habuit Patris auctoritatem, ægrotusque molestissimo in posterum morbo leuatus reuertit ad Collegium.

*Ioanni Fernando fabro in Societate moriturnum, & alia prædicit.*

PER idem tēpus Ioannes quidam Fernandus Lusitanus cemētarius faber, vir integritate vitæ, & pietatis studio in primis probandus Bahyenss Collegij fabricæ operas locauerat. Hic cū in sacra templi turri æra Campana suspenderet, venit eò Iosephus, & magna voce inclamans; Ioannes Fernande, inquit, accuratè apta æra ista: tu enim primus è nostra Societate futurus es, in cuius funere ipsa pulsabuntur; & huic erat coniux in Lusitania. Præteriēre ab eo monito pauci menses, & tempus appetebat, quo Pernambucense Collegium sui muneris obeundi causâ Iosephus inuiseret. Suadebant ei Patres, vt, antequam idonea tempestas efflueret, nauigationi se committeret. Ille interim per dissimulationem procrastinabat: vni tamen Patrum dixit. Vrgent hanc meam Pernambucensem profectionem, neque sciunt diuinæ esse voluntatis, vt festo die conceptionis Virginis hîc siem: certa enim in illum diem hîc me manet occupatio; & hoc quoque loco futuram necessitatem in diuina voluntate perspexit; quæ se in eum diem maneret occupatio, cū rediit, tum demum intellexit.

Victus

Victus tandem Sociorum monitis profectio-  
nem parat; & cùm in discessu Patres, fratres-  
que paterna de more charitate amplectere-  
tur, cùm ad Aloysium Fonsecam Sacerdotem  
venisset. Bene vale, inquit, chare comes, me-  
que interim hîc expecta: es enim mecum  
iturus Pernambucum; & ego de nauigatione  
huc te accersitum redibo. Conscendit tandê;  
ac, cùm plus triginta dies nauigasset, aduersa  
tempestate in eundem, vnde discesserat, por-  
tum reiectus est. Collegium ingressum Patres  
ad eius cubiculum deducebant, cùm ille se  
vocari aliò significans, ad hospitium se con-  
fert, in quo fabri, qui Collegium extruebant,  
hospitabantur. Ibi Ioannes Fernandus iam  
diu graui morbo pressus decumbebat, & non  
multo antè certum de vxoris morte nuncium  
acceperat; idque totum Iosephus diuinitus  
rescierat. Accedit ad eius cubiculum, amicâ-  
que oratione, ac piis monitis hominem salu-  
rat, mœrentem duplici malo consolatur; mox  
subiicit. Beata Virgo mater nostra me mittit  
ad te, vt te in Societatem nostram admittam,  
vnâque nobiscum communi in fraternitate  
perseueres, tibi que id oneris impono ob gra-  
tiam tanti beneficij, quo te hodiè illius amore  
afficio, vt mei memor sis, cùm ad conspectum  
sanctissimæ Matris perueneris septimo ab hoc  
die; indeque eum tanquam vnū e fratribus in  
Collegiū transportari, curariq; iussit. Tertio in-  
de die hominem inuisit, ei que magna lætitiâ

*Ioannē Fer-  
nandū fabriū  
in Societate  
moribundū  
excipit.*

significatione, Ioannes frater, inquit, lætum, optatumque nuncium ad te perfero : Bona tua coniux ante conspectum Dei tibi præstolatur; indèque digressus dixit multis audientibus : tam boni viri vxor, fieri non potuit, vt periret. Septimo demum die, vt ipse prædixerat, à suo in Societatem ingressu ægotus, præsentè Iosepho, Sacerdotibus reliquis, aliisque multis è Collegij fratribus, qui suis precibus abeuntem animam iuuarent, excessit è viuis. Tunc Iosephus exurgens, magno cum animi sensu, cunctis audientibus, in has voces erupit. Viri fratres, huic homini, quem nunc ipsi ex hoc loco spiritum ante oculos nostros in Dei manus reddidisse spectauimus, cum tota vita fabrilem artem exercuerit, maximamque eius partem matrimonio coniunctus, Deus septem dierum spatio religionis, religiosæque vitæ præmium repræsentauit, quoniam penitus se toto cordis affectu Deo permisit, vt postremo vniuersi iudicij die existat in iudicium, & damnationem multorum in suæ studio religionis torpentium, quorum nonnulli adsunt in hoc cœru; qui, cum annis multis in religione versati sint, nunquam tamen Deo se totos crediderunt; hi meritò, iurèque optimo religionis præmio frustrabuntur. His dictis è cubiculo excessit, attonitis cunctis, pallentique vultu relictis.

NON putem quemquam absurdè Iosephum fecisse iudicaturum, qui grandævum hominem, mortì proximum ad Societatem admiserit, tantùm vt in ea non sine familiæ incommodo paucis diebus agrotus decumberet, ac moreretur, cùm id ita factò opus esse in diuina voluntate perspexisset. Neque absolum à ratione fuit hominis multa, & fideli opera de eo Collegio benemeriti præmia hoc religionis auctoramento quasi quodam auctario cumulari. Et certè videtur diuina providentia hunc delegisse, vt homo rudis, & operarius multis parum de sua religione sollicitis, multorum annorum laboribus perfunctis, aliisque multa doctrina instructis, multisque annis in sui æstimatione consumptis, ad brauium suæ vocationis, vt ipse Iosephus testatur, paucorum dierum, seu potiùs horarum cursu anteiret. Consilium enim Dei ad nostri iudicij trutinam expendere fas non est: possumus tamen miserationes eius super omnia opera eius collaudare, & nostræ desiderii culpam imperus, ardorésque ad virtutem sensim quo longiùs à primis temporibus progredimur, minuentis in nos conferre; palmamque meritorum in stadio bene sæpe post multa tempora tyronibus concedere vel inuiti. Fateamur igitur diuinæ misericordiæ fuisse, animam illam, non vndecima, sed extrema duodecima hora ad vineam vocasse; vt pro mensura votorum

multa Dei causâ patiendi , cœlestium bonorum copia sub ipsum duntaxat vitæ exitum compleret ; multisque votorum meritis ornatam, in cœlestium numerum adscitam beatis in sedibus collocaret. Tritum est enim , non quantum ipsi facimus , sed quantum ipsius causâ volumus , Deum spectare. Latronem quoque ob maleficia in crucem actum , cum breuissimo illo tempore se Christo penitus dedisset , cœlestis cum ipso beatitudinis illo ipso die confortem factum esse ; vt mirari desinamus , & diuina reuereri consilia discamus , si quando videmus egregia spe , & clara virtute adolescentes , paucis multa cum laude annis in religione actis , præmaturo exitu vitam finire ; & , cum ex ipso ætatis flore primi fructus erumperent , repente subscissos , palmam , quam alij post multos annos , multosque labores consequuntur , statim in primo stadio , ac vix è carceribus emissos præripere. Hos nimirum ad ipsorum augendam virtutem , & cumulanda merita , reliquosque claro exemplo excitandos diuina prouidentia vocationis beneficio dignatur. Ita alij ad operam religioni præstândam , alij ad virtutem augendam ; omnes demum ad merita cumulanda , beatissimosque ex ea fructus percipiendos ad religionem vocamur. Beati de

demum Christi ipsius testimonio, qui ad finem vsque contendunt ad brauium.

**S E D** redeamus ad Iosephum. Est in hac narratione propheticum in ipso Spiritum multis in rebus deprehendere. Primum enim nouus ille Christi miles in Societatem à sæculari statu, vti multo antè ipse prædixerat, adscitus est: deinde septimo die, quem illi terminum Iosephus definierat, vitæ cursum confecit; tum primum funebre signum, quod è sacro illo ære auditum est, iuxta ipsius prædictionem, fabri ipsius in Societatem iam adsciti funus indicauit. Bahyæ præterea festo die Virginis conceptæ, sicuti monuerat, præsens fuit, negotiumque feliciter confecit: & cum vi tempestatis Bahyam repetere coactus esset, literas Præpositi generalis Roma ad se missas accepit, quibus ei Fonsæ comes, vt ipsi antea significarat, dabatur; ex eodémque vaticinio cum ipso, idonea redeunte tempestate, Pernambucum nauigauit. Nec nisi prophetico Spiritu nosse potuit, mulierem fabri vxorem ante Deum de mariti salute diuinam misericordiam implorare. Sed, cum quinque in re vna prædictionum veritatem perspexerimus, possumus & hanc veram fuisse pro certo habere; multoque magis quæ de viri cum ipsa æternæ gloriæ consortione pronunciauit; præsertim cognita postremæ prædictionis veritate, quã ta

met si non statim, haud tamen ita multis post annis non inanem fuisse constitit, cum vnus, aut alter eorum, quos suo sermone perstrinxerat, quique rei tum interfuerunt, à sua postmodum vocatione defecerint. Atque ita probò illi viro & verus, & felix, aliis verus quidem, sed infelix vates fuit.

*Pernambucū profecturus Frācisco Pinto multos vitæ annos, & mortē in diuinā causā obiturum prædicat.*

ADORNATA iterum post Ioannis Fernandi obitum Pernambucensi profectiōe, antequam discederet, Franciscum Pintū Societatis Sacerdotem salutandi causā inuisit. Grauius hic in eo Collegio agrotabat, vt exigua admodum spes de eius salute superesset. Hominem igitur de suo exitu cogitabundum iubet se ad multos in diuinā causā labores perferendos comparare, interim de cœlesti mansionē curam ponere: non enim leui (inquit) manuum ablutione cœlestem mensam inibis; neque te tranquillum manet mortis genus, longa tibi adhuc restat via; & ego Pernambucum ad parentem tuam, fratresq; lætus nuncius de tua reparata valetudine veniam. Surge proinde, sumptisque indumentis, templum adi, atque ante sacrosanctam Eucharistiam Deo dignas gratias de reddita tibi ab ipso valetudine persolue; iussitque illi indumenta exhiberi. Paruit ille dicto; illicoque sedata vi morbi, tanta exhausto corpori virium accessio facta est, tantoque vigore cœpit reualescere, vt ex eo tempore ad valetudinarium non redierit.



INDE digressus Iosephus, assumpto Aloysio Fonseca, ut iuebatur, comite, Pernambucum nauigauit. Pintus interim versatus inter religiosa Societatis studia, labores, exercitationesque magno cum Ethnicorum, ac Neophytorum bono, multarum virtutum exemplo non modò ipsi Iosepho superuixit, sed vitam etiam multis laudibus ornatam post id tempus traxit in sextum & vicesimum annum. Tot enim ab anno 1582. quò eo morbo liberatus est, ad annum 1608. intercedunt, quo in Christiana causa sanguinem, & vitam profudit. Et quando in tanti viri mentionem incidimus, non fuerit inutile ad nostram pietatem strenui Christianæ militiæ ducis, memoriâ non longa digressione à silentio duntaxat præsentis temporis vindicare; siquidem narratio à Iosephi rebus non abhorret.

IN eo, quem suprà demonstrauius terræ tractu inter Pernambucum, & flumen magnum ad Lusitanici Regni iura pertinere, interiora tenent amplis terrarum spatiis aliæ, atque aliæ gentes, partim Christiano lumine illustratæ, partim intractatæ, ac fama subobscura tantùm notæ, ad quas nondum Euangelij vox vnquam adflarat. Optarunt diu Societatis Patres hoc quoque ad Brasiliam pertinens proscindere nouale, multis interfusis gentibus, ter-  
tisque notis, ignotisque à nostris finibus se-

*Narratio de  
P. Francisci  
Pinti peregrinatione  
& martyrio.*

motum. Consilium diu , multumque agitatatum , ac de more per multas preces Deo commendatum , aliquot tandem post Iosephi mortem annis ad maturitatem venit: statutumque est , gentium animos esse percontandos , ac ferramentorum , aliarumque supellectilium donariis, quæ apud ipsos in pretio habentur , dandam esse operam, ut ad amicitiam allicerentur : nam pecunia, aurum, atque argentum apud Barbaros nullius est usus. Duo , præter ceteros eorum, qui eam sibi prouinciam depoposcerant, Pernambucensis Collegij lecti sunt. Sacerdotes, Franciscus Pintus , cuius modò meminimus, & Aloysius Figheria.

PINTVS annos natus quatuor , & quinquaginta, magnæ vir religionis , & prudentiæ assiduus in precibus , & diuina cum Deo agendi consuetudine bene, multumque exercitatus, Brasiliicarum rerum , & idiomatum abundè peritus ; atque ad Barbarorum sibi conciliandos animos adprimè factus : tanto præterea studio propagandæ fidei, hominèsq; ad sui conditoris cognitionem adducendi , tantoque ardore pectus periculis quibusque obiiciendi , ut Brasilia vniuersa angustis illius animi magnitudini finibus esset. Figheria ætate quidem iunior , multis tamen & ipse à natura , & diuina gratia donatus , multa etiam doctrina ornatus ; & qui pari animi ardore , ut in eam  
expe

expeditionē Pinto comes adderetur, contenderat, scilicet vt tali duce Apostolicæ militiæ rudimenta poneret. Siquidem Pintus quater, quinquiesve in mediterranea eiusmodi difficiles, durasque expeditiones susceperat, multis adductis ad Ecclesiam gregibus Barbarorum.

S E D erit illud quoque operæpretium, *Ratio itinerũ ad ignotas gentes.* qualis harum peregrinationum ratio sit, per noscere. Adhibito Christianorum indigenarum, ad id à Societate educatorum comitatu, quā maiore, quā minore, prout fert occasio, qui laborum adiutores sint, iter in mediterranea per ignotas plerumque sylvas, asperasque solitudines capeſſunt impigri venatores animarum. Commeatus siquid portant, non aliud, quā farinam militarem, quam diximus, ex mandioca; qua deficiente, gentis more venatu, piscatuve, quā occurrunt flumina, stagnaque, victitant. Sylvæ enim, campique in magna hominum infrequentia, vario ferarum genere abundant ad esum vtilium, & comites indigenæ sagittarij sunt bene periti, & configendis feris exercitati: piscationi verò ita assueti, vt nullam artem melius tenere videantur. Hic victus Barbarorum more in diem partus, & ea culinæ opportunitate, quam sylvæ, rupesque subministrant, apparatus, panis instar, & opsonij itinerum compensat lassitudinem; ac sæpe accidit, vt quadrage

dragenarium, aliâque ieiunia piscibus, ac non rarò minutis, pauculísque pro natura locorû, fluminûmque eadem ratione traducantur.

Ex arboribus etiam, si quando copia est, oppiparum, ac delicatû opsoniû lecta suppetant mella, quæ apibus liberè vagantibus, atque in scissuris petrarû, arborûmq; aluearia sibi parantibus, neminéque ea colligente, è fauis arboribûsq; copiosè defluunt. Cùm ad cœtus veniunt, mapaliâque infidelium, indigenæ comites in suorum gentilium colloquiû se insinuant, faciléque inter eiusdem naturæ homines conuenit, muneribus ipsorum animos demerentur: deinde Patres sese inferunt, sermonémque de Deo rerum omnium conditore, deque æterna vita, æternísque præmiis, suppliciísque adoriuntur; consuetudinéque inducta, ad explicanda Christianæ vitæ rudimenta descendunt, sensimque rudes animos ad amorem æternorum, & conditoris sui venerationem inuitant. Cui vt cultum adhibeant, animæ suæ saluti, & præsentis vitæ commodis consulant, eos à syluestri vita, & vaga abducere, & ad vitæ societatem, victumque leniorem sibi tutis in sedibus parandum pertrahere conantur. Quam ad rem Patrum comites multum profunt, Patrum dicta excipientes, & ipsi, pro ea, quam rudibus ingeniis natura, assidua cum Patribus consuetudo, & frequens Catechismi vsus dicendi copiâ suggerit, de rebus iisdem multa persequuntur; tum de

de socialis vitæ commodis; de copia rerum in cultis, maritimisque locis, pro captu gentis a lia subiiciunt; quò fit, vt multorum mentes diuina Bonitas permoueat, qui se ad audita præbent obsequentes.

AT QV E hac ratione Franciscus Pintus multa animarum millia suis excursionibus ad Christianorum cœtus, & ad frequentia, cultaque loca pertraxerat. Eodem studio vnà cum Figheria ad hunc, quem sibi lætissimum, opimæque frugis campum proposuerat, quémq; sui Apostolatus extremum habuit actum, se compararat. Missu igitur Præsidis Prouincialis Ferdinandi Cardinij, & potestate facta, opèque Brasili Prætoris Didaci Botellij duo aduersùs Tartareas potestates coniurati fratres Pernambuco anno post partum Virginis 1607. Ianuario mense discedunt; mari iter faciunt Septentrionalem oram ad legentes: leucas centum viginti emensi ad locum, què *Zagaribam* nominant, exscensionem faciunt; pedibus inde iter in mediterraneâ capiunt viatorio hastili nixi, modicum indigenarum comitatum secum trahentes, & erant eorum aliqui ex ea gente, ad quam iuquirendam mittebantur. Non vsquam difficiliora itinera humanis vestigiis calcata: loca omnia circum aquis, ac luto latè stagnantia; vt nudis pedibus, frigida hyeme, per saltus, & nemora incederent. Syluæ inuiæ, montes asperi, horridique dumis, nulli aditus, semitæ nullæ;

omnia

omnia densis arboribus obsepta: neque progredi, ne pedem quidē vnū licebat, nisi quatenus ferro, & lacertis, adiunāte comitatu, via aperiretur in diē. Tanta cibi penuria; vt herbis persæpe spōte natis famē tolerarint. Cum his difficultatibus annū integrum obluētati, tandem plus centum leucas aperti sibi, ac propēdicam perfoſsi itineris emensi, perrupēre demum ad montes Ibiapanæ. Eltis locus leucis plus minùs centum cis Maranonem non longè à finibus Ethnicorum, quos quærebāt; ad quos vt penetrarent, tres tātūm aditus, per quorum vnum intrandū erat, sese offerebant; sed ij à Barbaris, ferisq̃ue hominibus tenebantur, non modò Christiano, ac Lusitano, sed planè etiam non secus ac si feræ syluestres essent, humano nomini infestis; qui non modò externis hominibus, cò aduenis, sed ipsi etiam inter se vicini vicinis inimici sint; nec fidem, sanctāmque societatem vllam norint: non alios his Tapuyas immaniores esse dixeris. Misere Patres ad eos, qui proximi erāt, semel & iterum, qui eos muneribus ad amicitiam pellicerent, transitūque ad vltiores populos impetrarent; nihil pacatum ab iis expressum est. Venēre ad eos, qui claustrum alterum tenerent, parique tatione illorū animos tentarunt; nihilo plus profectum est: irritū igitur ab vtrisque nunciij rediēre. Conſulere se ad tertios, si fortè minùs asperitatis inuenirent, ij omnium teterrimi, nunciis

ad se

ad se munera ferentibus , responſi loco cædem reddiderunt , vno ſeruato adoleſcente octodecim annorum , quo vterentur indice ad Patres ad necem perquirendos ; atque ij felices hanc beatam ſortem ſuis ducibus , ac magiſtris præripuerunt. Haud multo interiecto tempore , dum quid agendum , aut quâ iter intendendum , incerti Patres inter ſe deliberabundi hærent , ecce tibi ad 3. Idus Ianuarias anni 1608. magna è montibus Barbarorum manus exſcendit , propiorésque facti Patrum comitatum ſagittis laceſſunt , eodémque impetu mapale ; quo interim dum horarias preces perſolueret ; Pintus ſe continebat ; adoriuntur. *Frãciſci Pintus martyriũ.* Prodit Sacerdos , & quàm maxima poſteſt amica oratione furentes illorum animos ſedare contendit. Chriſtiani comites pro ſe quiſque Barbarorum furori ſe oppoñere , magnis vocibus clamare , hunc Patrem illum ſanctum eſſe , qui ad ipſos res cœleſtes docendos , itérque ad animæ ſalutem aperiendum veniſſet , vt eiꝝ vitæ parcerent , rogare : illi furore inflammati reſpondere , nihil ſibi cum illo ; eſſe omnino ipſorum manibus neci dandum. Vnum è comitibus , qui validiùs cæteris obluſtando Patrem multo conatu defendebat , interimunt , atque hunc quoque Patrem ad æterna præmia præmiſit : pauci denique incrimines , ac mites homines inflammata multi

multitudini, & armatæ diu obsistere haud  
potuere. Patrem tãdem barbara feritate a dorsi  
vecte ligneo in caput adactò prosterñit, mul-  
tisque repetitis ictibus exanimant; maxillæ  
cōfractæ, excussi oculi, cranium totum com-  
minutum. Non longè inde aberat Sacerdos  
alter, cū puerulus è comitatu inter eas tur-  
bas ad eum Lusitanicis vocibus inclamat; Pa-  
ter, Pater consule vitæ, consule vitæ, ille con-  
festim in intimas sylvas se recipiens, quamvis  
illum quoque ad necem Barbari diu quæsis-  
sent, illorum tamen oculos diuina seruatus  
ope effugit. Barbari Sacerdote omisso, quod  
reliquum iis furoris supererat, in mapale ef-  
fundunt, tenuemque illam supellectilem, quā  
ad sacrum apparatus, & munera in Barbaros  
distribuendā comportarant, hostiliter diripi-  
unt. Hac tetra victoria, exiguaq; præda con-  
tenti, ad suos se retulerunt. Inde locus datus  
Figheriæ cogendi dissipatos comites, & cædis  
locū adeundi. Iacebat exanime cadauer quas-  
sato, ac deformato capite, facie cruore, tabo,  
lutóque fœdata; absterfæ inde sordes, abluta  
facies, corpúsque in retigentis morē compo-  
situm ad sepulturam ad radicem montis, pro  
ea, quæ in rerum omnium difficultate copia  
suppetiit, delatum est. Vnus è fustibus, quibus  
illi sacrum caput contusum est, à Barbaris re-  
lictus, cruore ad indicatiū crudelitatis infectus,  
ad nonnullum nostrorum solatium Bahyam  
visque perlatus, magna veneratione in eius  
vrbis



urbis Collegio seruatur. Ita vir fortis, & athleta inuictus, cuius palmam cœlestes acies diuinis laudibus honorant, in ignota barbarie nulli fidelium notum, sine honore, sine nomine, Deo, & Cœlitibus testem suæ fidei nudum tumultum spectandum triumphator reliquit. Sperandum, tamen ex hac solitudine, & locorum asperitate magnam aliquando ad homines quoque diuinæ lucis copiam peruerturam; fortissimique ducis, paucorumque comitum sanguinem in diuina causa fustum, diuinis imbribus irrigatum in copiosam animarum segetem surrecturum. Atque hic fuit Iosephi de præstantis athletæ triumpho prædictionis exitus.

SED nos ad reliquam de Iosephi rebus narrationem redeamus. Is post Pernambucensem profectiōem anno millesimo quingentesimo octogesimo quarto rediit ad sinum Ianuariensem, urbemque S. Sebastianum, ut statum Societatis in oris illis de more cognosceret. Cogit ut in aduersum urbi litus traiceret, vicos, parœciasque illius oræ inspecturus. In reditu cum canoam ascendisset, ut urbem repeteret, Petrus Leitanus è Societate ipsum comitabatur: erat malacia summa, æstus grauis, ac molestus, trajectio aliquot leucarū, neque vlla aura afflabat; agrè eam cœli grauitatē ferebat Leitanus: videt in arbore Iosephus tres, quatuorve quaraicies insidentes (eæ sunt aues gallinarum magnitudine purpureo colore in flauum

*Auibus imperat, ut sibi nauiganti umbram faciant.*

vergente specie pulcherrima) eas Iosephus Brasilico sermone alloquens; *Ite, inquit, cognatas, consanguineasque vestras accersite, nostrumque iter volatu vestro inumbrate. Illae extento collo vocem, quasi accepti imperij signum misere; indeque auolantes paulo post magno grege redierunt, densataeque in nubem tandiu canoam superuolantes umbram fecere, donec spatio leucae vnus decursu; lenis afflare coepit aura Fauonij: tunc Pater auium dimisit comitatum. Illae quasi imperio perfunctae, officiosa crocitate, & multis laetitiae signis auolarunt. Hoc idem Leitanus Sacerdos factus post Iosephi mortem multis grauib. viris praesentibus iureiurando interposito publice affirmavit; nec mirum ad hominis voluntatem cum Dei voluntate coniunctissimi naturas omnes se adtemperare.*

*Longa multorum dierum piscatio, & multa, quae in ea contigerant.*

*Deum in Sebastianensi Collegio moraretur, vnus est Collegij fratribus, vt de piscatu in annonam Collegij prouideret, in piscationem cum piscatorum familia exierat. Piscatio longè fiebat ab vrbe in sinu quodam, ac propè aestuario, ad insulam, quam Maricanam nominant. Iuit cum illis etiam Iosephus, tum vt ne per eos dies, quibus duratura piscatio erat, Missae sacrificio carerent; tum vt tempus illud ab interpellatoribus vacuum, cum Deo in ea solitudine traduceret. Incredibilibus piscium copia omnes rapuit in admirationem,*

nem, quos cùm ad falem legissent, ingens  
 marinorum coruorum, aliarumque aqua-  
 tilium auium numerus ad expositam escam  
 aduolantium magno erat operi impedi-  
 mento, vt operam crebrò interrumpere ad  
 eas abigendas necesse esset. Iosephus eas  
 iussit inde facessere, Brasílico sermone allo-  
 quutus. Vos, inquit, hinc secedite tantisper  
 dum hi sunt in opere, neque iis molestæ sitis,  
 cùm hinc discesserimus, tunc redibitis ad dia-  
 riũ vestrum capessendũ. Quasi verba illa vim  
 habuerint humanos sensus in auibz imprimendi,  
 seorsim quietæ finem operis expecta-  
 runt; profectis inde cum Iosepho, fratreque  
 piscatoribus, gregatim ad vorandas reliquias  
 accurrerunt. Verùm inter saliendi operam,  
 eodemne, an alio die, cùm maximè operi  
 essent intenti, in aduerso litore Pantheræ duę  
 intentis oculis in piscatores apparuere. Signi-  
 ficauit frater Iosephi comes, optare se eas è  
 propinquo spectare; respondit Pater, absolu-  
 to opere fore eius rei potestatem. Interim  
 Pantheræ se recipiunt; admonitus ea de re Pa-  
 ter, magna voce iis inclamat, paulo post vt  
 redeant; esse qui ipsas velint cominũ adspi-  
 cere. Confecto opere, duabus conscensis  
 canoïs, Pater cũ toto comitatu sinũ traiciũt,  
 ad litusque accedunt; illæ tũ in litore placidè  
 se spectandas præbent, vt eas per otium  
 adspicere omnes ad satietatem potuerint.

*Panthera illi  
 obediunt.*

*Maris æstus  
in litore orā  
tem non at-  
tingit.*

Satiatis iam omnium oculis, Pater acceptam solitorum piscium partem iis proiecit: illæ, quasi suo demenso contentæ, abierunt. Eodem in litore die alio piscandi, saliendique operi intentis aliis, cum se a cœtu, diuina liberius contemplandi causâ subduxisset, spatio trium, quatuorve horarum plus minus desideratus est: eum, vestigia sequutus tandem in litore sedentem frater illi comes inuenit; & illo ipso tempore maris æstus accedebat, qui, quasi diuino imperio accepto, cum præter eum finem, vbi Iosephus sedebat, longè fluctus eiecisset, ab eius tamen corpore ita vndas cohibuit; vt aquæ illi & à fronte, & vtroque ab latere, quasi in sinum diductæ, ac veluti in parietes erectæ, nulla contactum alluuiione, ac ne aspergine quidem circunsepirent. Diceres rubri maris miraculum in transitu Hebræorum renouatum esse: non audebat frater intra vndarum hiatu se insinuare, sed extra vltimos fluctus quanta maxima poterat vocis contetione Patrem copellabat; ad vocis clamores, strepitum etiam, fragoremque asserum addebat. Cumq; ne sic quidē fremitu maris superaret, neque alto contemplationis somno consopitu Iosephi animu excitaret, fretus & ipse diuino patrocinio, diductu intrat aquarum sepu, Patremque admonet, tepus esse hospitii reperendi, abeuntes vndæ sequebantur; præcunteque Patre, talos subsequenter fratris allue

alluebant; ille territus periculo Patrem antecessit. Eum Pater leniter verbis increpans: nescis, inquit, quia venti, & mare obediunt ei? timere prohibuit. Prætergressis tãdem extremã alluuiõnem, tũ mare litore toto coæquatum.

VERSABATUR adhuc ibidem piscationis eiusdem causã, cum sub noctem inter cœnam piscis frustum iussit asseruari. Ignarus eius cõsiliij comes, cuius rei causã id faceret, quæsiuit; hominis, respondet, eo leuamento indigentis. Mox conuersus ad orandum: commendemus, inquit, Deo miserum hominem, qui magno in discrimine versatur. Vir etenim nobilis Sebastianensis colonus Iosepho perfamiliaris ad ipsum literas scripserat; quibus eum rogabat, vt ad Ariam Fernandum ipsius perbeneuolum graui morbo prostratum inuisendum veniret; eas seruulo Mauricio perferendas dederat. Erat huic iter per loca Pantheris infesta; cui nisi Iosephi precibus, hæc omnia diuinitus noscentis, diuinum præstò fuisset auxilium, iuuat credere incolumem peruenturum non fuisse. Duabus horis ab eo sermone transactis, noctis tenebris, cœlo pluuio, frigida hyeme, puer cum literis madidus, & lassitudine semianimis aduenit; quem humaniter exceptum curauit Iosephus recreandum, eiq; partem piscis, quam seponi iusserat, in cœnam dedit: & antequam aut literas resignaret, aut de puero quidquam ei renunciaretur, & a quo missus, & quid esset in literis, prædixit. Ergo ad

*Seruulum  
per infesta  
Pantheris  
loca iter habentem precibus adiuvat.*

Collegiū redeundū est, subiecit illi comes. Magis se posse ægroto ex eo loco opem ferre respondit, quā si eò veniat. Postero die pro illius salute Missæ sacrificium obtulit: post sacrificium à fratre comite rogatus; victurusne esset ægrotus: malè, inquit, eum morbus est habiturus, sed tamen periculum euadet, vixitque postea in multos annos.

*Reditus illius à piscatione.*

ABSOLVTA piscatione, iussit Pater apparari reditum in crastinum. Erat tempestas turbida, dēsus imber, grauisque ortus sub vesperā nunquā cessauerat, & duraturus noctē totā videbatur. Obiecit ei comes: opportunā sanè Pater tempestatem ad iter elegisti. Cui Iosephus: vtinā tam simus ipsi viri boni, quā de nobis Deo curæ est; non enim tantum die crastino imber molestus nobis nullus erit; sed ne nunc quidem, tempestate tanta, vllus est, quā sumus cras iter facturi. Postero die iter manē ingressi, ad vicum S. Barnabam, qui tribus inde distat leucis, quacunque iuerunt via tota ad latitudinem triginta passuum solum siccū, ac nullo tentatum imbri ad vicum vsque inuenerunt, cū circa loca omnia nocturna pluuia maderent.

*Pluuia illi parit in itinere.*

NEQVE verò hoc solū; sed alio etiam tempore eandem in eum benignitatem Deus declarauit: nam cū eadē in ora Ianuariensi vnā cum Alfonso Gonzalo Sebastianensi colono, & altero eius propinquo per montes iter faceret, in magna pluuia, & alij madidis vestibus

ad

ad finem itineris venirent, mirabantur ipsum vnum siccis vestibus apparere. Quibus ille respondere; suis vestibus, quoniam perbonæ essent, aquam non adhærere, cùm re vera valde essent detrita.

SED in reditu à piscatione cùm iter facerent ad S. Barnabam, simium prægrandem barbatum (quod iis in locis novum non est) in arbore insidentem sagitta vnus è piscatoribus confixit, ad cuius casum, stridorémque ingens simiorum grex quasi ad funus patrisfamilias accurrit magna consternatione: tum piscatores eos quoque interficere in cibum adoriuntur; tam grato enim gustu Brasili illis vescuntur, quàm aliæ gentes hœdiculis, suillis, ac leporibus: nec mirum homines, qui in summa lautitia humanas carnes habeant, à pecude corpore humanam speciem referente non abhorre-  
re. Ab ipsorum tamen cæde Pater piscatores prohibuit; monitos tantùm vt è ridiculo pecore ludum captarent, & quò maiorem piscatoribus oblectationem adderet, simiis lingua Brasilica præcepit, funus suorum ciuium vt prosequerentur: tum pro se quisque multo stridore, & belluino planctu obtemperare cõtendunt; cùm alij per plana quadrupedarent, alij per arbores ex ramo in ramum, & ex arbore in arborem tràsiliētes, exequias & ipsi sublimes prosequerentur: horridisque vocibus, ridiculisq; sannis vtrique, vt poterant, in suum gregē grassatoribus iniustas cædes exprobatēs.

*Simiorum  
ludus.*

Hac funebri pompa miseræ bestiolæ cùm ad duarum ferme leucarum spatium sui gregis hostibus ludibrio, & oblectationi fuissent, ad vicum iam accesserant, ac ne rursus à vicanis violarentur, iussit eas Pater in suas sedes redire: illæ, commeatu accepto, in sylvas se receperunt. Hæc non commiseratione solùm illarum pecudum, aut quòd illarum lusibus delectaretur, Pater faciebat; sed vt diuinam legem in honorem adduceret, tardasq; indigenarum mentes ad sui conditoris cultum, venerationemq; excitaret: quippe docebat eos omnia conditori vniuersi parere; &, qui diuinis præceptis integrè obtemperant, omnia illis inferuire. Quod in vipera etiam, vti suprâ retulimus, alio tempore aliis ostenderat.

*Alia, qua in piscationibus admirationem habere.*

ET, quando cum piscatoribus, piscationibusq; versamur, subiiciamus alia eiusdem generis, quæ diuersis locis, temporibusq; euenire. Homo Lusitanus, cùm ad piscationem se conferret, obuium Iosephum habuit in itinere, à quo cùm venerabundus benedictionem petiisset, iacto reti ingentem piscium numerum ad admirationem vsque excepit; quod totum Iosephi tribuit præcationi. Et quidem piscatoribus indicare, quàm copiosam piscationem facerent, erat vsu quotidianum: nam, cùm in Bahyensi Collegio esset magna piscium penuria, piscatores, qui in vsum Collegij piscabantur, die quodam bene manè inanes rediêre, quòd piscibus mare vacuum videretur, ita nulli usquam



quam apparebant. Eorum ad se magistrum Iosephus accersit, eiq; è Collegij specula locum indicat spatio leucæ vnus distitum, Piraiæ sinum appellant; ibi prædam copiosam reperaturum. Paret ille dicto; & cum sociis eò profectus, ingentem magnorum mugilū numerum domum retulerūt. Solitus est ipse persepe è piscatoribus sciscitari, quod genus maximè piscium optarent; & vt quisq; proprium piscium genus nominaret; ita cuiq; alias, atq; alias regiones, quibus piscarentur, assignare. Et quauis nunquā ea loca piscator vllus pertentasset, imò verò persepe ne nota quidē essent, tamen & quod volebāt, & quantum volebant, capiebāt, ita vt interdum retia remittere cogerētur, ne multitudine piscium damni aliquid pareretur. Diuersabatur interdū in vico, cui à Spiritu S. est nomen Bahyē suburbano: erat iā solēnis eius loci piscatoribus cōsuetudo, quo die piscatū exirēt, Iosephū anrē cōsulere, quo in loco piscatio iis esset fructuosa; neq; vnquam votis frustabātur, quāuis & sterilibus in locis, & inrēpestiue, modò à Iosepho indicatis piscarētur.

TANTAM apud illos auctoritatem per illā, quam referam occasionē, aut primū est adeptus, aut certē partā multū auxit: nam cū ibidē, vt solebat, versaretur, animaduertit die quadam magnum silentiū in vico, vicanosq; magno mœrore, solito quietiores sedere otiosos. Percunctanti causam responderūt, cibaria sibi deesse; iubet ille omnes ad mare secū ire, cibos haud dubiè reperturos. Negāt idoneam

ad piscandum esse tempestatē; quòd tum cœlum, tū mare ipsum aduerfetur. Instat nihilominus Pater, omnes vt eant, neminem voto frustratū rediturum. Iuēre omnes: mare seuum altiùs semper intumescebat. Dicunt vicani: vides præsens tuis oculis mare esse intractabile: quærit nihilominus ex iis Pater; quos pisces optatis? Respondent contemptim: xareos minutos. Est id genus pisciculorum palmi vnus fere magnitudine, quorum illo anni tempore nulli solent apparere, sed post aliquot menses affluere. Tum Pater locum iis circa litus minimus mille inde passibus indicat; ibi fore eorū piscium quantam velint copiam. Eò se conferrunt, & paruis reticulis iniectis, atque adeò nudis manibus, quantum quisque voluit ad satietatem exceperunt. Itaque admiratione læti, Deo gratias agentes multa cum gratulatione domum rediēre.

*Quanta estimatione fuerit apud Brafilos.*

His, aliisque eiusmodi beneficiis per Iosephum affecti indigenæ hominem magna veneratione prosequiebantur: de eo, tanquam de homine supra naturam potestatem habente & sentiebant, & loquebantur. Cū eum post mortem significare vellent, Patrem illum dicebant, qui nobis pisces, quos vellemus, præbebat; qui, cū ab ipso opem peteremus, nos ab omni periculorum genere, atque adeò à morte ipsa eruebat. Tantam enim de ipso estimationem conceperant; vt cū apud eos versaretur, quocunque ituri essent, aut ad venationem, aut ad res suas transigendas,

non

non antè itineri se committerent; quàm ipsum adirent. Pater; inquiebant, iter est mihi in hanc, illamve oram, dic (sic enim illi loquuntur) ne illi moriar; & vt id cōsequar, quod opto: nec malus coluber me feriat: &, saluis rebus, incolumis domum redeam? Ita Patris promissō, quasi cēto salutis accepto pigmore, læti proficiscebantur, læta omnia sibi pollicentes. Neque in hoc vico tantum, sed in omnib. etiā circā locis hæc de illo apud omniū ordinū homines fama percrebuerat; ipsū, quidquid vellet, à Deo impetrare, Deūque ipsum illius petitionibus semper annuere.

IN vico alio indigenæ aliqui canōam in mare deducere nitebantur, sed propter hominū paucitatem ægrè illam submouebant; fortè præterit illac Iosephus: illi à concepta de homine opinione petunt, vt ipsorum conatibus sua benedictione aspires. Non modò se iis benedicturum respondet, sed opem etiam manu allaturum; ita iis bene precatus, cū manum operi & ipse admouisset, statim multa facilitate lignum in vndas impulerunt.

SED nos ad filiū tēporis, persequēdum redeamus. Erat adhuc Iosephus in Sebastianēsi ciuitate cū anno 1515. Christophorus Goueanus Societatis Sacerdos iussus est Visitatoris munere eam prouinciā inspicere: &, siue superiore anno vnā cū Iosepho eō venerat, siue, quod verosimilius est, in Ianuariensi oratū versabatur, & obita fortasse ea prouincię parte, ad reliquā sui muneris iurisdictionē cōficien-

*Anno Domini 1585.*

*Christophorus Goueanus sic prouincia Visitator.*

*Sauam ma-  
vis tempesta-  
tem precibus  
sedas.*

ficiendam cum Iosepho, aliisque de Societate Bahyam nauigabat; cum sæua coorta tempestas eò vsque increbuit, vt navis, domito iam gubernaculo in sinus, & æstuaria, quibus subinde litora scinduntur, cum certo naufragij periculo impelleretur, itavt vi nulla posset retineri. Naturæ arti diffusi, omisso navis regimine, se totos vi tempestatis permisere, vna spe salutis in votis tantum relicta. Patres infra navis tabulata se receperat, atque ad naufragium, mortemque excipiendam per confessionem, mutuamq; hortationem, & preces se comparabant. Solus Iosephus supra tabulata apprehensis rudentibus, oculis in cælum fixis, aduersus maris, tempestatisque sæuitiam precibus pugnabat. Interim vnus è fratribus, vt suam excipiat confessionem, orantem interpellat. Negat Iosephus id necesse esse: quid, inquit ille, nonne perimus omnes? negat iterum Iosephus. In spem alter erectus instat nihilominus aliquanto importunius, vt certius aliquod exprimat responsum. An non sumus hic omnes mari absorbendi? castigauit importunam contentionem Iosephus non sine aliquo reprehensionis acculeo, idemque iam tertio negauit. Ergo, subiicit molestus interpellator, descendam, idque Patribus metu consternatis nunciabo. Vetuit id Iosephus: quid enim obesse potest illos esse in precibus? Ille Iosephi promisso fretus acquieuit, rei exitum securus expectans. Post paulo, vi tempestatis remitten

remittente, sedato tandem mari periculum  
discussum.

EODEM in itinere Ignatius Tolosa So- Ignatiū To-  
cietatis Sacerdos in morbum incidit; cūque losam gravi  
Caput frigidum tenuissent, cūque è naui in morbo preci-  
hospitium exposuissent, in intestinorum tor- bus sanat.

mina versa morbi vis est, & eò vsque se inten-  
dens sauiit, vt spes vitæ nulla superesset; &  
iam deliberarent Patres, illicne eum sepultu-  
ræ traderent, an ad Sebastianense Collegium  
corpus exanime reportarent? Interim Iose-  
phus consilium dissimulans, fratrem curatio-  
num peritū, qui illius curæ præerat, quanvis  
desperantem monet, ægroto remedium ali-  
quod, saltem ad speciem adhibeat; futurum  
omnino, vt non moriatur eo morbo, non ta-  
men remedia abiiciat; neque quemquam de  
re ipsa alloquatur. Paruit consilio frater, &  
hora circiter elapsa æger alleuatus est, pristi-  
nāque tandem Dei beneficio recepit vale-  
tudinē, atque vtinam eius ætas frugifera ad  
multorum fructum quamdiutissimè proro-  
getur. Id totum Iosephi precibus impetra-  
tum, magis quàm medicinæ virtute partum  
senferunt omnes.

ET multo iam antea Franciscum Diazium Zosterem mor-  
comitē suum graui, periculosoque morbo li- bo periculoso  
berarat. Ignis sacri genus est supercutaneæ laborantem  
inflammationis acerbæ, ac periculosæ, quem ope B. Virgē-  
scriptores nobiles Zosterem nominant. Is in nis sanat.  
extima cute circa lumbos, dextro è latere na-  
scens

scens cum acerbissimo cruciatu, quasi perpetuo cinctu in orbem serpit: cuius ea natura est, vt, si extrema coëant capitâ; exigua admodû spes vitæ supersit. Hic morbus Diazium inuasit, cum Portus securi sedem Iosephus cognoscendi rerû causâ inuiferet. Quare intendētibus se doloribus in dies, cum qui medicâ manum admoueret nullus esset, ad diuinâ æger

*Templum B.  
Virginis ab  
Adiutorio.*

implorandam opē se conuertit. Est in eo portu templum Virgini matri dicatû, cui ab Adiutorio est nomen. Hunc locû Societatis Patres, qui primi in Brasiliam traiecerunt, sibi delêgere, cœli salubritatem, & situs amœnitatem sequuti; sed aliquâtum longè à frequentia; quò fiebat sæpe, vt, orto repētè bello inter indigenas, gentē barbarâ, & ad subitâ iracundiam furentō, Patres locû deserere, & ad frequentia confugere cogerentur. Re igitur deliberata, inde se intra oppidû transtulerūt: māsit tamen loco religio, & reuerētia, iam inde à primis tēporibus nata, côm primû Patres in ea loca venerūt; nā cum templû vnâ cum sede ædificarent, & aliæ opportunitates ad victum suppeterent, vna aquæ potabilis copia desiderabatur: eâ suppedirauit casus admiratione dignus. Arborē ingentem secus fabricam vnus ex pperariis ligandi causâ conscenderat; cūque maximè ligna cæderet, repētè cōuulsa arbor ad terrâ cadens hominē innoxia molliter humi deposuit, suâq; ruinâ montis partē, cui adhærebat, secū traxit. Ex illo hiatu limpidissimæ

simæ aquæ fons erupit ad potandum adprimè  
gratæ; è qua cū variis morbis ægrotibibissent,  
sanati sunt: cuius rei fama diffusa multos ad eā  
regionem vndiq; exciuit, quorū aliqui religio-  
sam ad eam sacram ad e peregrinationē obire:  
re: alij inde accersitā aquā ad varia morborum  
genera certo reparatę valetudinis fructu adhi-  
buere; ita vt tum Christianorū, tū Ethnicorū  
sermone celebrata aqua sanctæ Dei Matris  
vocaretur. Hanc sedē vnā cū templo, & aquæ  
custodiam nunquā post suum inde discessum  
Patres deseruere: sed ad religionē, piūque  
Christianorum cultū conseruandū, ac confo-  
uendū, Oratorij, seu Heremitorij nomine lo-  
cum retinuerunt. Ad hoc B. Virginis templū,  
quasi se voto obligans, petiit ægrotus à Iose-  
pho, vt pro se Missæ die postero offerret sacri-  
ficium: id se facturum promisit Pater; interim  
tamen inquit, vnge morbi locū oleo ex lam-  
pade, quæ ardet ante sacrosanctā Eucharistiā;  
non ægrè erit Matri, nos prius ad opem à filio  
petendā confugisse. Ea inunctio dolorē miti-  
gavit, & quasi quidā præs futuræ valetudinis  
fuit. Postero die Pater ad templum Virginis se  
cōtulit; promissique fidē liberauit. Eodē die,  
post Missam, cū se aqua ex eo fonte ægrotus,  
qui vnā venerat, abuisset, & dolore, & morbo  
prorsus liberatus est; vnāq; Bahyā Dei, diuinę  
que Mattis laudes deprædicātes peruenere.  
ALIO tēpore (& videtur cū adhuc regeret pro-  
uinciā) è Ianuariēsi sinu superiora repetebat, cū  
præter

prætergressis insulas, quæ sinu s ostio obiacēt ē suo cubiculo prodiēs Iosephus gubernatorē admonet, altū vt teneat; futurū alioquī, vt illo die Caput frigidum sine naufragij periculo flectere nō possint. Gubernator, etsi satis prosperam nauigationem esse sentiebat, Patris tamen monito in præsens obtemperauit, in flectendo tamen ad ipsum Caput accesserunt, & cum leucas ferme sex præteruissent, quod aspera esset nauigatio, anchoram ad insulam, quō venerant, iecerunt. Tum Iosephus iterum prodiens, monet quamprimū anchoram tollant: non sanè faciles aures præbere gubernator, nautæque quod quieta statione se vti existimarēt: Iosephus tamen acrius contendere, quamprimū id faciant, qui si tantū tam moram interposuerint, non fore inde potestatem munia illa commodè exercēdi: tum repentē tanta ventorum vis ab Austro coortur, vt contrahendis subito velis omni nautica turba occupata; anchoram vix cautibus auulsam aliquandiu arantem trahere necesse fuerit: Quod incommodum Iosephus nō arte nautica, aut cœli obseruatione, quarū rerum erant illi doctiores, præsertim suo gurgustio cōclusus prouidere potuit, sed diuino monitū illi cognitum fuisse omnes vno consensu professi sunt. Id Lupus Fernandus colonus Ianuariensis, qui vnā nauigabat, iuratus testis asseuerauit.

I A M ē Ianuariensi ora Bahyam redierat,  
cū



cùm Emmanuelem Contium nondum Sacerdotem ad Sebastianense Collegium è Bahyensi mittebat. Quæsiuit ille ex Iosepho, quandiu ibi futurus esset; tum Iosephus coniectis oculis in alterum, qui inde tum redierat, rogauit quandiu ibi fuisset, respondit ille, triennium totum cum semestri: tantundem Contium ibi futurum Iosephus respondit; atque ita factum est: quod totum Iosephus humanitùs scire non potuit; cùm suæ potestatis rem futuram non esse optimè sciret: siquidem haud multo post adolescentis profectiorem munus regendæ prouinciæ alteri cōcessit. Verùm antequam planè prouinciam deposuit, in Bahyensi Collegio graui prostratus morbo iacebat Petrus Andreas Societatis Sacerdos.

Ingressus ad eū manè valetudinarij minister sensit ægrotum solito grauiùs laborare, & esse periculum in mora. Accurrit ad Præsidiẽ Prouincialem admonendum, vt ad vltimã ægroti confessionem excipiendam se conferret: distinebatur tunc temporis Iosephus negotio, quo maturè se expedire minimè poterat; & antequã ad ipsum valetudinarius planè peruenit, Pater illius nuncium præuertit, magna voce Ignatium Tolosam suo loco acciri iubet; qui ea, cui dabat operam, tantisper confessione supersedeat, dum ad ægroti, & morti proximi confessionem accurrit. Quo facto, confessionéque absoluta, ægrotus à mēte abalienatus est; neque inde amplius rediit ad se.

*Ægroti graue periculum absens nouit.*

Hoc etsi neque ad prædictiones, neque ad miracula referri posse videtur, cognitio tamen rei absentis, tanquam præsentis, præterquam quod habet & ipsa admirationem, ex eodem hausta fonte est, è quo & futurorum prædictiones, & curationum miracula manabant.

*Ægrotū lan-  
gore stomachi  
sanat.*

Et, quoniam in ægrotō homine id contigit, non incommodè videtur hoc loco aliud posse referri. Decumbebat frater alius eodem in Collegio, qui ex langore stomachi cibi genus omne aspernabatur. Hunc inuisit Iosephus, rogatque ecquem cibum sentiret sibi fore gratum? Respondet æger: salitè suillæ, aut pernæ frustum stomacho arridere. Iube t Pater id à penariæ cellæ custode postulari. Negat penarius tale genus edulij domi esse: confert se Pater ad cellam, & ex pendula cista, in qua assati pisces asseruabantur, piscis frustum excecat; quod cū ad ægrotum attulisset, in pernam optimam conuersum erat. Id ægrotus magno cum voluptatis sensu mansum cū deglutisset, stomachus auidè retinuit. Ægrotus postea cum cellario eius duritiā questus, quæsiuit, cur id initio negarit, quod postea Iosephus sua manu attulit? Ille se purgans, ut videas, inquit, quā verè responderim, & quam pernam ad te Pater attulerit, afferam & ipse ex eodem loco. Vadit, frustum alterum ex eodem abscissum pisce ad ægrotum affert; quod statim, ut prius, ipso mirante cellario, perna, qualem ipse optabat ægrotus, facta est,

diuina

diuina clementia Iosephi voris vel absentis obsequente. Laceret in tenebris miraculum prius, nisi hoc alterum nouo euentu in lucem illud protulisset.

ADDAM & aliud huic non absimile. Decumbibat ipse, vt sæpe extrema ætate solebat, ex morbo; eodemque tempore vnus è fratribus inualetudinario eodem, quo prior stomachi fastidio, nausæaque ægrotabat. Parauerant Iosepho in prandium pullum gallinaceum, quem acceptum, vt erat opertum in lance tradidit ad ægrotum fratrem afferendū suo nomine; eique iussit nunciari, vt comederet; & neque in posterum nauseam vllam, aut fastidium haberet. Æger pio affectu obediendi, sancti senis virtute fretus comedere ausus, confestim meliùs habere cœpit; paucisque diebus diuina adiutus ope conualuit omnino. Hæc porrò hócne, an alio tempore acciderint, incertum.

*Ægrotum  
aliterum eodē  
morbo sanat.*



VITÆ  
IOSEPHI ANCHIETÆ  
E SOCIETATE IESV  
LIBER QVINTVS.

*Eius inuale-  
rudo, & fre-  
quentes mor-  
bi.*



INTER has curas tum regendæ  
prouinciæ, fratrûmque oppor-  
tunitatibus inferuiendi, tum Lu-  
sitanos, Brasilôsque iuuandi per-  
petua inualetudo, morbique  
assidui hominem toto penè tempore, quo  
fuit in Brasilia, exercitum habuerunt. Initium  
autem habuêre morbi ab ea dorsi luxatione,  
quæ à primo ipsius tyrocinio per totum vitæ  
cursum illi molesta fuit. Accessêre deinde va-  
ria incommoda frigorum, famis, itinerum, fa-  
tigationum, ærurnarûmque aliarum, penè  
quotidianarum, quas incurrat necesse est, qui  
in eiusmodi vinea Domini versatur, quæ est  
crucis fructuum feracissima. Ac si nihil aliud  
accederet, quantam morborum, ac dolorum  
sementem in neruis, artubus, compagibus,  
totoque corpore fecerat aduersus ille casus,  
cùm

cùm homo tãta imbecillitate propè semihoram altis aquis coopertus hæsit in fundo fluminis, indèque extractus, madida veste, cælo pluuiò iter persequi multas horas in noctem multam necesse habuit? Tum perpetua, cui ætatem penè omnem afflueuerat insomnia, etsi illi quodam modo naturalis, corpus tamen, & spiritus eo leuamento fraudauerat, quod ex somni beneficio perciperet. Accedebat multa corporis imbecillitas morborum, & nouarum tentationum illecebra, & perenne nutrimentum: quæ etsi valida ætas, fortiter sustinens, minùs molesta sentiebat, iis tamen homini iam senì, & inualido haud facile erat reluctari. Itaque, quantum de ætate viribusque in dies deterebatur, tantum ad morbos, dolorésque accedebat. Inde & frequens decubere, & pharimaca, curationésque adhibere cogebatur.

In his languoribus adiuit aliquando valetudinarij ministrum; querit ex eo, quid in cubiculo operam insumat frustra? respondet se literas ad sororem scribere Olyssiponem. Ad cælum, subridens Iosephus ait, ei literas dato; præstat in præsentem mihi prandiū parari: languebat .n. ex morbo. Cognouit postea certis nunciis frater, ipsam illo ipso tempore, quo ea loquutus Iosephus erat, diem suum obiisse. Petiit à Iosepho, ad illius animam iuuandam, ut Missæ semel sacrificiū offerret. Id tamen se fecisse respondit, cum à Deo ex hac vitaeducta esset. Sed ex his, & superioribus Iosephi verbis licet coniicere, utramque rem illi diuinitus

*Absens, quæ  
longè evenē-  
re, cognoscat.*

indicatam esse, & mulieris mortem, & fratrem in cubiculo frustra scribēdis litetis occupatū.

ATTEXAM aliud nō absimile, quod circa extrema illius tempora videtur contigisse. Litteræ ad ipsum ex patria venerant à sorore, quibus nondum resignatis, & vnde essent, & quid iis scriptum esset, præmonuit; multaque cum lætitiæ significatione sororem suam dixit graui, perpetuoque corporis dolore affectam, cum diuina omni voluntate coniunctam, incommodum illud magna cum animi tranquillitate tolerare.

IN morbis porro, quibus assidue afflictabatur, curationibúsque talem se præbebat, qualem ipsius animi inuicta magnitudo, perpetuaque cum Deo communicatio, & toto illius vitæ decursu perspecta virtus non imperito cuilibet suadeat; vt pigeat de eo valetudinarij ministri testimonium referre, tanquam rem leuem, & minimè parem tantæ virtutis magnitudini: nullum vnquam ægrotum hominem se expertum esse minùs languentem in corporis doloribus, æquè fortem in patiēdo, atque ad curationes, diatásque obedientem, vel per ea ipsa tempora, quibus prouinciā regebat.

*Amaram  
prandium a-  
grotus com-  
edit silentio.*

PHARMACHVM sumpserat, cum eo ipso die carnes illi ferunt in prandium cum amara cucurbita elixatas, quod per imprudentiam non animaduenterat is, qui illas coxerat. Sensit igitur, cum gustasset, amaritiem; itaq; egrè comedebat.

debat. Ratus valetudinarius ex pharmaco, & nausea lassatas vires esse stomachi, ad eum excitandum, Patrem hortatur strenuè vt com-  
 edat; stomacho enim vires redituras. Tum ille  
 sibi vim faciens, quasi multa cum iucunditate  
 manderet, valetudinario obediuit; hausit etiã  
 ex amara illa decoctione iustum iusculi demẽ-  
 sum: quæsiuit deinde, an aliquid ex eo superes-  
 set aliis dandum; negante valetudinario, ob-  
 ticuit. Paulo post sensit valetudinarius erra-  
 rum, redit ad Patrem consternatus: me cæ-  
 cum, ignosce, inquit, Pater, mea impruden-  
 tia te perdidisti. Cui subridens Iosephus: non  
 me, ait, perdidisti frater, sed recreasti po-  
 tius; cum me voluerit Dominus tantu-  
 lum suarum acerbitationum degustare; cum  
 è cruce pendenti fel, & acetum in potum  
 sunt oblata.

SED crescentibus in dies exerciti senis mor-  
 bis, doloribusque, fuit onere leuandus alios  
 regendi, cum se ipsa natura iam regere non  
 posset. Id fuit haud ita multo post eius è Ia-  
 nuariensi ora cum Visitatore Goueano reditũ,  
 anno eius sæculi octogesimo quinto, aut sex-  
 to ineunte, septimo eius Prouincialis admini-  
 strationis: tot enim annis prouinciã tenuit,  
 cum septuagesimo octauo suscepisset. Succes-  
 sor est illi datus Martialis Belliartes.

*Leuatur re-  
 gendi mune-  
 re.*

POSITO regendi munere, & leuatus vtcunq;  
 ex morbo, ad inferiora Brasiliæ, vbi maximam  
 vitæ partem egerat, tedire iussus est: hæsit que

*Eius vita  
 priuata.*

aliquandiu in Sebastianensi Collegio: in multa tamen imbecillitate valetudinis, & variorum morborum conflictatione nunquam curam posuit totum se in aliorum vtilitatem impendendi, studio, atque ardore animi naturæ imbecillitatem superante. Discant hinc labores non timere, qui nimia indulgentia sui, ætati, & meritis plus nimio concedendum putant. Scribit ipse de se hoc tempore, cum in opere Brasilos iuuandi versaretur ad Ignatium Tolosam. Corporis valetudo est quidē imbecilla, sed ea tamen quæ gratiæ viribus adiuta se sustentet: neque enim Deus ipse deest, nisi ego ipse mihi desim. Itaque & peregrinationes suscipere, & Brasilorum vicos obire, debileque corpus ad indigenas Catechismo erudiendos vtcunque trahere ei solemne erat: ac si quando, quod necesse fuit sæpius contingere, inter ambulandum ipsum lassitudo progredi prohiberet, subsistebat tantisper; ac regionis more in reti interquiescebat, quod itineris comites indigenæ duobus affixum hastilibus suspendebant. Inde, recreatis modica quiete viribus, iter persequebatur, & vt fortis Christi miles, nullam amabiliorem quietē ardentius optabat, quàm in animarum salute procuranda nunquam defatigari.

PRÆERAT per id tempus Sebastiani Collegio Ferdinandus Cardinius: cuius obedientiam Iosephus ipse summa cum animi sui iucunditate, tum cæteræ circà sedes S. Vincentij,  
Spiri



Spiritus sancti, Sanctorum, & Piratiningæ regebantur. Et vt intelligatur quantopere non modò diuini Spiritus illius sermones pleni erant, sed ingenij etiam lumine, & sententiarum pondere efficaces, non me pigebit, etiam hæc, quæ cuipiam videri possint leuia, consecrari. Optabat vnus è fratribus Antonius Riberius cum ipso viuere, eique familiariter ministrare; ad eum rescripsit è sinu Ianuariensi in hæc verba.

---

EPISTOLA AD ANTONIVM  
RIBERIVM SOCIETATIS FR.

**F**RATER in Christo mihi charissime pax Christi. Satis scio te intelligere, quàm mihi gratum esset, pro meo in te amore, studioque tuæ progressionis ad virtutem, te mecum habere: sed, quando Deo D.N. aliter visum est, demus operam, vt cum illo coniuncti viuamus, eum nobis socium adhibeamus, qui in locis omnibus, omnibûsque temporibus nobiscum est: quem si quando à nobis nostris malis moribus repellimus, semper tamen ad cordis nostri fores adstans pulsât; vt, aperto ostiò, intret ad nos, ac diuersetur nobiscum, vnâque cum ipso Pater, ac Spiritus sanctus adueniunt. Curandum igitur, ne quis in nobis locus illius vacet præsentia; neque

res vlla alia vllam ne minimam quidem animi partem occupet. Est præclara illius Patris, & Patriarchæ S. Francisci sententia: nolle de nobis diabolus plus quàm vel tenuissimum capillum; ex illo enim cogitat chamum ingentem, validumque ad nostras constringendas animas, sibi que vendicandas conficere. Si modò semel nos in re aliqua, vel minima, ad nostram sequendam voluntatem impellit, inde ad alias, atque alias adigit eò vsque, quoad obedientiam posthabeamus, quæ non in nostra, sed in Dei facienda voluntate sita est, Præsidum voce nobis explicata. Si semel vel leuissimam turpem cogitationem excutere cunctemur, id ipsum arripit; eòque contentus ei longum agmen fœdiorum specierum consequentium adnectit. Si semel modicum in studio orandi in te pesimus, & contentionem humiliter cum Deo communicandi tātulum modò remittimus, sensim tantum nobis algorem iniicit in animum, vt non modò internarum cogitationum gustum nullum sentiamus, sed pias etiam omnes exercitationes, & ipsam quoque religiosam vitam penitus fastidiamus; nosque ipsos ad libertatem, & humanas voluptates conuertamus. Atque ita prorsus fit, frater charissime. Contende igitur frater ad brauium; magnum iter diuina adiutus ope adhuc fecisti: quantùm iam superfit, Deus scit. Id breuissimum fortasse erit; ipse tibi opem feret, ipse te comitabitur.

Cauc

Caue ab eo te abiūgas: nam, quantuis peregrinus tibi videatur in itinere, vt olim Discipulis Emmauntem proficiscentibus, tamen ad illius sermones cor tuum inardescet, spiritalique solatio in via redundabit. Scio enim te persæpe, quæ illius bonitas est, spiritalibus hisce deliciis abundare, præsertim porrigente illo tibi inter preces panem cœlestium charismatum, & diuinam carnem suam in Angelorum conuiuio. Quòd si quando mentem diuino solatio destitutam, tædioque affectam languere senseris, illud tibi remèdium sit, eius laciniam apprehendere, atque eum ad te verbis illis inuitare: *Mane nobiscum Domine, quoniam ad uesperas cit, inclinata est iam dies,* nòxque irruit tentationum; & solito crebrius, impetrata facultate, ad sacram mensam accedere. Còfido enim diuini eius pabuli virrute, te ab ea mensa cùm recesseris, lætitiæ plenum iter magna alacritate persequunturum, donec cœlestē teneas Ierusalē. Has literas velim cum fratre altero N. cōmunicēs: illius enim quoque causâ hæc scripsi; cùm vtrūq; vestrū, omnesque fratres nostros, quotquot in Societate viuimus, eius sancti Spiritus plenos esse velim, qui tanto cū rei miraculo hodierno die cœlitus illapsus Apostolorū animos compleuit: vt illius diuinis donis cōfirmati, nihil vnquā, quo illius impediatur in nobis gratia, cōmittamus; sed potiùs tātò aucti amico, tamq; digno hospite intra nostræ animæ domicilium

lium excepto , ad finem vsque vitæ eius dulci amore , consuetudinèque perfruamur. Iesus Christus vnà cum B. Virgine nobiscum semper hæreant. Amen. E flumine Ianuario, prid. Non. Iunias , ipso Dominico die Pentecostes 1587.

*Tuus in Christo Frater*

IOSEPHVS ANCHIETA.

LI CET, cùm alia , tum illud maximè ex hac epistola , tanquam ex paruo , contractóq; exemplo, quanta in eius verbis vis inesset, intelligere ad hominum animos amore in Deum, studióq; pietatis inflammandos. Hæsit in vrbe S. Sebastiano ad annum eius sæculi octogesimum septimum , vt ex eius vidimus epistola; eodémq; anno transtulit se ad sedem Spiritus sancti. Et, quoniam semel cœpimus eius spirituales doctrinam delibare , ne id quidem præterire æquum visum est , quod ex ipsa Spiritus sancti sede hoc ipso anno ad Franciscum Escalantium scripsit ; quem in ipso Ianuariensi sinu ex Hispanica classe ab ipso admissum in Societatem scripsimus.

EPISTO-

EPISTOLA AD FRANCISCVM

ESCALANTIVM.

I E S V S.

**C**HARRISIME in Christo frater pax Christi. Quoniam nostra nauis, qua ad te literas dare constitueram, non ita breui iter factura erat, statui nihilominus has ad te literas fortunę committere: bonā illis, nobisque, & verē bonam à Deo fortunam comprecatus; quæ est in Dei gratia, & amore semper vivere, & in eo ad finem vsque vitæ perseuerare. Huius rei causā Deus te ab humanis rebus auellit; religioniq; inseuit; tēque in ea tot annos aluit, conseruauitque. Caue diligenter, ne vel modicum quidem diffidentię cor tuum subeat: nam etsi in te, tuisque rebus nihil nisi misérias, culpas, & magnā aduersus hostium impugnationes imbecillitatem inuenias; à Deo tamen firmum tibi est auxilium, & omnia diuinæ gratiæ bona; quibus fultus præsidiiis, certamina superare, ac de hostibus triumphare tibi dabitur. Scio quidem te isto genere vitæ esse cōtentum, deque eo persæpe Deo grates agere: tamen intelligo, fiduciam tibi, vti dixi, opus esse, tum in Deo, tum in Præsidum tuorum charitate defixam, quos Dei loco habeas necesse est: iis enim studio illud est in primis, vt esse debet, perfectam vt virtutem assequaris,

quaris, atque ad eam rem omnia tibi adiumenta comparare. Caue, ne ad hūc ex animo tibi sensum euellēdum, vlla ne tenuis quidem suspicio subrepat. Quicquid alij seu sentiant, seu suggerāt, illud tibi persuade, te in isto esse Collegio tantum vti tuam salutē à Deo consequare. Da operam, vt ipse saluus fias, & hoc contentus esto, ita tamen vt, cū intra annum tuum fratres omnes interno amore; ac reuerentia prosequaris, eosque virorum sanctorum numero habendos esse sentias, tua tamen consuetudo, & colloquia cum iis præcipuē sint, quorum tibi vitam, morēsque ad fructum pietatis prodesse senties. Beatam in primis Virginem, Reginam nostram, perpetuam tota vita adiutricem fac habeas, eique de me interdum preces offer. E sede Spiritus sancti, in qua frequens tui memor sum. 14. Kal. Ianuarias 1587.

*Tuus in Christo Frater*

IOSEPHVS ANCHIETA.

PAREM planē pietatem, diuinique Episcopus virtutem duæ aliæ ad eundem epistolæ continent; quæ, quia prodesse possunt, statui eas non omittere: tum ob eum, qui percipere ex iis fructus potest, tum vt iis satisfaciam, qui aduersus hunc virum aliquam reuerentiam conceperunt; vt his legendis, ipsum sibi præsentem, & loquentem audire videantur.

I D E M

## IDEM AD EVNDEM.

I E S V S.

**F**RATER in Christo charissime pax Christi. Magnum fructum cupio, cum mecum ipse cogito, quibus bonis Deus adhuc te auxerit, augeatque in dies, & qui largè in te suam manum effudit, effunder adhuc largiùs dehinc: etenim illi insitum est benignè facere, cum sit ipse summum bonum, infinitaque bonitas; quæ quanto latiùs emanat, tanto ampliore ipse gloria dignus est. Decet igitur te cordis spatia proferre, quò possis id totum; quod Diuina Maestas paratum tibi habet, quod certè multum est, excipere: sed necesse est, omnem inde amorem, qui aut Dei non sit, aut in Deum non tendat, eiicias. Cõfide multum illius diuinæ gratiæ; nam qui prima tibi mediâque tam secunda, secundiora etiam vltima in Societate largietur; quæ non ita longè iam abesse cogita: nam, vt quamdiutissimè viuas, plurimùmque in diuina causa labores, id totum breue, & modicum est, prout tam bonus & Pater, & Dominus dignus est. Propitiam valde, & strenuam habes adiutricem sanctissimam Virginem Reginam nostram Dei Matrem: ne te ab illa abiungas; ipsamque perpetuò roga, ne nos deferat: ipsius enim ope omnia poteris. Peto vt huius miseri fratris  
tui

tui Iosephi in tuis ad ipsam precibus memineris.

ERAT hic, ad quem scribit, vti suprà demonstrauimus, faber lignarius, natione Cantaber, artis suæ operarius valde bonus; magnamque sua opera vtilitatem præstiterat Societati; ad ipsum iam tertio ex eadem Præfectura Spiritus sancti literas dedit.

## EIVSDEM AD EVNDEM.

### I E S V S.

*Prescriptum  
enim Lusitanicè  
Charissime in  
Christo Irmão pro  
Hispanico  
Hermano.*

**F**RATER in Christo charissime pax Christi. Iam penè me fugerat ad te Castellano idiomate scribere, sed haud multum in loquela est. Is verò totius rei cardo est, nō loqui, sed operari, & boni esse studiosos; neque aliā loquutionem nosse, quā quæ sapit obedientiam. Hæc enim omnium maximè à Deo intelligitur; hæc propria ipsius loquutio est, & vnde abest obedientia, frustra ibi cum Deo prolixa colloquia miscentur: non enim exaudit sermonē, qui aut sine, aut præter obedientiam ab ore funditur. Hinc satis intelliges, si quando te obedientia ita in opere habeat occupatum, vt ad orandum tempora nō suppetant, ipsam pro te obedientiam orare; eamque ille audit, qui factus est obediens vsque ad mortem. Spero, quæ Dei in te bonitas est, te

hanc



hanc rationem optimè tenere, & obediendi operam in orandi vsum conuertere; cùm inter aggrèdiendum opus, & continuandũ, mēte in Deum coniecta, operã subinde illi offeras in sacrificium; absolutóque opere, illi gratias agas, qui te dignum fecerit, vt in eius obsequio occupareris, atque in re, quã certò scires ipsius esse voluntatis. Tũ, ad elapsa tēpora recuperanda, scis, cùm subinde datur, Dominicos, festósque dies reliquos tibi assumere, Missæ sacrificio sæpiùs assistere, orandi spatia proferre: quo tempore Deus transactos obedientiæ labores diuinis solatiis cōpensat. Verũ illud hoc loco temonitũ volo: te per hæc tempora magnũ æs alienũ contrahere. Quæres, quodnã? nēpe vt Deũ pro me depreceris, atque hoc æs alienũ debetur charitati: cui cū maximè debitũ redditur, nunquã tamen reddendi, nec debendi finis inuenitur, nam, quod debitum soluimus, id ipsum ei debemus: itaq; quãto plura soluũtur, tanto plura supersunt, quę debētur. Neque ea res mediocri mihi voptati est, te mihi talẽ debitorẽ obuēnisse, quẽ scio multo meliorẽ, pleniorẽmq; mercedẽ rependere, quàm quantũ mihi debeatur. Atque hac ratione tibi multo plus, quã impendis ad tua lucra accedit; euadísque in dies hac ratione insumendo, ditior. Deus, pro sua liberalitate te semper suis immēsis augeat diuitiis; quibus & tibi, & tuis fratribus egentibus fructui

esse possis. Fratribus Aloyſio, Hernando, Tinocio, & quibuscunque volueris, poterisque peto à me multam in Domino salutem dicas. E Præfectura Spiritus sancti Non. Iul. 1591.

*Tuus in Christo Frater*

IOSEPHVS ANCHIETA.

*Eius occupationes, & studia extrema ætate.*

INTERIM in eadē Præfectura Spiritus sancti cōsuetis exercitationibus, laboribúsque in opere iuuandi proximos summus laborū cōtempтор versabatur. Quod verò vacui tēporis ab opere, & quietis à valetudine dabatur, id totū ad scribendū, & memoriā rerū consignādam conferebat: scribebat autem iussū Præsidentum rerū historiam à Societate IESV in Brasilia gestarum. Cuius partem anno ante, quàm mortuus est, se iā confecisse, & paratū habere exemplū, quod Romam mittere iubebatur, scripsit ad Emmanuelem Viegam, quem Marcomisii Apostolum, vti suprà demonstrauimus, reliquerat. Circa hæc ipsa tēpora, cū adhuc inter varias tentationes reliquiæ nonnullæ pristini vigoris superessent, accisæ illæ quidem, & imminutæ, sed tamē per interualla repullulantes videtur id contigisse, quod Antonij Sequeriæ testimonio cognitū est. Is enim publicus ad ciuitatis tribunal scribā, & Cancellarius camera in oppido Sanctis post Iosephi mortē testimonium sua manu scriptū, & sui

*Aqua in vinum sapius conuersa.*

sui officij sigillo signatum dedit in hæc verba. Testis sum, me cum Patre Iosepho Anchieta superioribus annis Piratingam iter habuisse, vnaque nobiscum tres, quatuorve comites iuisse: eo itinere nullum aliud vinum habuisse, nisi vinum factitium ex melle, quod Iosepho dederat vir pius illi familiaris Nicolaus Grilius. Id Iosephus intra cucurbitam in lagenulæ modum conformatam gerebat; ea quandantal minusculum (mensura eius regionis est) capere poterat. Eo in itinere tres, quatuorve dies insumpsimus; & cum ter diebus singulis, ut viatores solent, cibum caperemus, ad potum ex eadē cucurbita hauriebamus omnes: & cum suā quisque sitim extinguere contēderet, nūquam tamen colocynthinū œnophorum desiit cuiquam abundē suppeditare: quin etiam quantum vini in singulis comestationibus detraheretur, tantundē aquæ superinfundi Pater præciperet; & tamē quoties cibum repeteremus, semper fidele vasculum eandē copiam lecti, & probati vini, & omniū iudicio melioris quàm primi benignè reddidit: neque quisquā è toto comitatu dubitavit, quin id miraculo adscribendum fuerit, eratq; omnium fama euulgatum alia multa cū diuino miraculo coniuncta ab eodem Patre facta esse; omniūque iudicio Præfectura tota vir sanctus habebatur.

Hoc testimonium et si in oppido Sanctis

multis pōst annis à Sequeria datum est , non tamē iter inde, neque ex oppido S.Vincētio, vbi aliquādiu Iosephus versatus est, susceptū videtur:nam neque S.Vincentio,neque Sanctis tam longē distat Piratininga, vt triduum, quatrīduūmve iter illud exegerit, quod sepiūs vno die Iosephus, aliūque confecerint. Quōd si ex oppido Spiritu sancto mari discesserunt, fuit Caput frigidum flectendū, & aut Ianuariensis sinus nauigandus, aut S.Vincentium appellendum, indēque terrestre iter capeffendū: sin terrestri itinere, obitis finibus Tamuyarū, perrexerunt; potuit alterutrum iter triduum, quatrīduūmque absumere.

*Anno Demi-  
ni 1590. po-  
restas illi sit  
quācunque  
sibi sedē eli-  
gendi.*

ANNO porrō nonagesimo Præses Prouincialis ei liberū fecit, quæcūque sedes eius maximē animo colliberet, eā sibi extremē quietē senectutis adoptare. Sed homo nullius rei æquē atque obediendi, & in diuina causa laborandi studiosus, ea vti facultate sibi religioni duxit. Et libet hoc loco ipsa eius verba ex epistola ad Ignatium Tolosam adscribere. P. Prouincialis optionem mihi dedit, quamcunque vellem mihi sedem eligendi: non me libertas tanta delectat: est enim sæpe cum cæcitate coniuncta, & periculo à recto itinere aberrandi; cūm, quid sibi maximē cōueniat, dispiciat nemo: valdēque esset absurdum, cūm duobus & quadraginta abhinc annis omnem de me, dēque vitæ meæ rationibus potestare libero

libero Præsidum arbitrio permiserim, nunc extrema hac ætate velle de me quidquam arbitratu meo statuere. Me totum Patris Ferdinandi Cardinij, cùm ad sinum Ianuariensem Rector Sebastianensis Collegij proficisceretur, potestati dedi: nunc diuinæ voluntatis fuit, vt comes P. Didaco Ferdinando ad hunc vicum Reritibam in Spiritus sancti Præfecturam, Brasilos iuuandi, doctrinæque confirmandi causâ venirem. Cum his libentiùs operam pono, quàm cū Lusitanis: illos enim quæsitū in Brasiliam missus sum: & fortasse diuina prouidentia constituit, vt comes eidem adiungar Sacerdoti, ad interiora gentis penetranda, aliasque errantes oues ad Ecclesiæ caulas cogendas; vt, quando non alia ratione coronæ Martyrū compos esse possum, contingat mihi saltem inter itinerū asperitates, summamque rerū omniū inopiā ab omnibus deserto, atque omni humano solamine destituto, in aliqua horū montiū rupe pro fratribus meis vitā relinquere. Hæc erant admirādi senis, & athlete fortissimi vltimæ quietis vota optatissima.

CIRCA annum 1592. venit ad Prouinciale Patrum conuentum Bahyam. In eo conuentu lectus est Aloysius Fonseca, qui de Prouinciæ rebus Romam procurator mitteretur, homo exiguis viribus, & imbecilla valetudine. Attulit vni è Patribus Pernambucensis Collegij, qui conuentui non interfuerat, pro eo, quo

*Anno Domini 1592. ad Prouinciale Patrum conuentum Bahyam venit.*

erat in Fonsecam amore, ea electio sollicitudinem; eaque de re ad Iosephum admirationis plenas literas dedit; quâ fieri potuerit, ut in eam electionem consenserit, tanto cum periculo hominis iuualidi, & infirma corporis constitutione? Et, quando ita constitutum erat, petiit ab ipso, ad se saltem ut scriberet, an esset rediturus. Ad eum ita rescripsit Iosephus; ut, cum de se nihil diceret, electionis tamen dignitatem integra fide his verbis tueretur. P. Aloysius Fonseca eò tendit, quò eum Deus mittit, & iubet proficisci: & quanuis infirma valetudine nauim conscenderit, tamen cum oram istam ad Pernambuci conspectum adnauigaret, meliùs habebat; magnaque ei ad valetudinem accessio facta erat; qui, etsi magno suo cum incommodo, tamen incolumis perueniet, quò mittitur, negotiâque ex sententia, multa cum omnium probatione transiget; indeque eò redibit, ubi ipsi à Deo itinerum finis constitutus est. Nunc, quando ita Deo visum est, nos ad illius sanctissimam voluntatem adtemperemus, necesse est. Hæc omnia, uti Iosephus præmonuerat, contigerunt. Fonseca enim satis bene confirmatus in Lusitaniam, indeque Romam venit; transactisque feliciter rebus omnibus, in reditu, cum in Hispaniam peruenisset, Matridij & itineris, & vitæ finem inuenit

inuenit anno eiusdem sæculi nonagesimo quarto.

REDIERAT Bahya ad suas excolendas segetes Iosephus in Præfecturam Spiritus sancti, versabaturq; in vicis Brasilorû occupatus in opere indigenas iuuandi. Anno autem nonagesimo sexto, aut non ita multo antè ob illius inualetudinem, & frequentes morborum accessiones Præsidis literis reuocatus est ad oppidum Spiritum sanctum; ibi maiorem fore copiam curationum, & opportunitatum aliarum ad imbecillitatem sustentandam. Ipse rem cum Patribus, qui in eodem vico versabantur, deliberat, videaturne esse ea morbi conditio, vt possit se itinere periculo committere (est enim leucærum quatuordecim) an verò satius sit Præsidi periculo proposito, per literas satisfacere. Negantibus cunctis profectionem esse tentandam, visus est acquiescere: paulò post, re meliùs considerata, statuit omnino discedere; quòd si se mori contigerit, leuem fore iacturam; multòque id præstare, quàm tanta iam ætate minùs obedientis exemplum iuuenibus relinquere. Et videtur Deus illius obedientiam ratam habuisse: nam profectus presenti incommodo leuatus vitam traxit adhuc anno diutius.

*Redit in Præfecturam Spiritus sancti.*

*Reuocatur ad oppidum Spiritum sanctum.*

REPARATA utcumque inter assiduos languores valitudine, cum satis virium esse

*Reritibus redit.*

visum est, rediit ad suos labores repetēdos Reritibam. Ibi, cū iterum tentatiuncula redeūte, decumberet, nocte quadā, qua erat in omnes charitate, & studio rebus in omnibus iuandis, surrexit è cubili ad pharmacū ægroto alteri temperandum; nam hanc quoq; peritiā tenebat: &, vt erat languidus ex morbo, & ætate, diuturnisque incommodis confectus, inter operam, rigore superueniente, humi concidit. Eo casu morbus auctus in sextum vsque mensem hominem lecto affixum tenuit, variantibus morbi vicissitudinibus, modò lenioribus, modò grauioribus, & semper cum aliquo virium decremento, momentoque ad morbi vim accedente; natura tandem morbi diuturnitate, & ætatis grauitate afflictæ artis ope cū releuari amplius non posset, & reualescendi spes quotidie decresceret, iussit Præses hominem ad oppidum Spiritum sanctum deportari. Verū, cū ibi quoque morbus ingrauesceret, vnam in prioris cœli repetitione spem superesse arbitrati, rursus Reritibam curarunt reportandum: sed nimirum stamina ad relam longiùs texendam non sufficiebant; nec morbi, dolorésque vitæ finem, sed vita deficiens morbos, dolorésque accersebat, & hora illi iam aduenerat præmiorum. Videtur vtique à Deo impetrasse vt saltem inter Christianos Brasílos vitam finiret, quos tantopere dilexerat,

*Rursus Spiritum sanctum, indeque Reritibam reportatur.*



xerat, quibúsque instruendis, & Christiana virtute informandis, tanto cum ardore animi, & sincera charitate desudauerat.

Ut rediit Reritibam, nouis doloribus superuenientibus, veteribúsque acriùs recrudescentibus, grauiùs cœpit habere, donec euoluta tertia hebdomade, sacrosanctum ad æternum iter Viaticum, & extremam postulauit inunctionem. Vtriusque compos factus Sacramenti, non longo interuallo interiecto, eodem die postremum deuenit in agonem. Is fuit 5. Idus Iunias anno 1597. præsentibúsque è Societate quinque, qui in eo vico residebant Sacerdotibus, semihoræ spatio, quam cœpit agere, purgatam animam suo conditori reddidit; cum inter agendam tanta animi, corporisque tranquillitate fruetur; ut non morte dissolui, sed intentis precibus, ut solebat, cum Deo coniungi spiritu viuens videretur, qui moriens animam, spiritúmque in ipsum penitus transfundebat; oculis subinde significans, grata sibi esse monita, quæ ad memoriam æternorum à præsentibus suggererantur. Annum agebat ætis quartum & sexagesimum, in Societate septimum & quadragesimum, è quibus tres in Lusitania, quatuor & quadraginta in Brasilia transfegerat.

*Illius mors  
anno D. 1597.  
die 9. Iunij.*

*Illius ætas.*

AUDITA eius morte, magna animorum in omnium ordinum hominibus commotio

facta est, tum è Societate, tum è reliquis, omnibus communis Patris amissionem lugentibus. Sed indigenæ maximè iacturam senserunt: intelligebant videlicet, quantum de ipsorum commodis in illius desiderio deperisset. Eius corpus sacerdotali indurum ornatu, arca lignea inclusum, post biduum funebri pompa, indigenarum subcollatione ad oppidum Spiritum sanctum deportatū, prosequente de Societate Ioannes Ferdinando cum sacerdotali stola linteato, & Reritibanorum magna multitudine cum funebri lamentatione, & precatione. Et cū quatuordecim leucarū iter confecissent, subcollatores tantū ab eo abfuerunt, vt fatigatione vexati flacerent, vt vegetiores potiùs, validiorésq; iter cōfecerint, quā cœperant: quod idem de se Sacerdos Ferdinā-  
 dus testabatur, cū tātū iter pedes cōfecisset.

*Eius corpus  
 Spiritū san-  
 ctum ad se-  
 pulchrum de-  
 fertur.*

*Funus, &  
 exequia.*

CUM venissent ad portum, qui est sub ipsum oppidum, confestim occurrere Michaël Azeredius coloniae Præfectus, Bartolomæus Simonius Pereria Episcopi Vicarius, qui Administratoris titulo ornatur, cum clero, Religiosi Franciscani, qui ibi sedem habent, Sodales à Misericordia cum feretro splendide ornato, & reliquæ confraternitates cum lænis, & funalibus, oppidanique reliqui. Interfuit sub ipsum tempus antiquus Iosephi familiaris Ioannes Soarius colonus Piratinganus: is pro ea, qua semper Iosephum  
 beneuo

beneuolentia , reuerentiâque prosequutus est , ab Administratore petiit, vt sibi potestas fieret defuncti corpus videndi , à quo uiuente tam salutaria monita , vitæque præcepta tam diu hausisset. Et quidem is non ita multo antè , cùm postremis hisce , qui ipsum confecerunt , languoribus afflitteretur , Spiritum sanctum venerat , ægrotantemque inuiserat ; cui digredienti : vale, inquit, fili ; non enim posthac, nisi in vita altera congrediemur; tu quidem hîc me videbis iterum, ita tamen, vt ipse te alloqui non possim. Impetrauit Soarius id quod petierat; ac dum pompæ processio ordinatur , ac præmittitur, antequam in feretrum Misericordiæ inferretur, aperta est arca, spectante Soario, cum magno virorum aliorum numero ; qui omnes testes fuerunt, nihil inde graueolentiæ efflari , cùm triduo antè animam emisisset ; & nullo aduersùs putredinem condimèto cadauer curatum esset ; & nec sine multa succussatione itinere tanto translatum. Tum vera Iosephum Soario prædixisse cognitum est, futurum vt se ibi videret iterum, nec tamen loqui possent inter se. Inde è portu in oppidum instituta supplicatio , defunctique corpus à Sodalibus Misericordiæ ad fores vsque templi Societatis delatum, inde à Patribus in templum illatum. Ab Administratore , clero , & Franciscanis exequiæ trium nocturnorum officio,

*Arca, qua  
eius cadauer  
ferebatur,  
aperitur.*

ficio, adhibita etiam symphonicorū harmonia, celebratæ. Postero die solemni Missæ sacro illi parentatū: inter sacra audita est Administratoris cōcio; multaque quæ per suū famulū Deus admiranda ediderat, enarrata: neque veritus est vir tāta auctoritate illū inter dicendum Brasiliæ Apostolū nominare, multaque alia adiicere Dei D.N. gloriā, & defuncti laudes augmentia. Ingens tū pridie inter supplicationem traducendā, tum eo die inter concionem audiendam lacrymarum vis effusa: omnes enim ingenti amore, reuerentiāque viuentem, nūc vita functum mœrore, lacrymisque prosequiebantur, tantaque de illius sanctimonia opinio manarat, vt multi de eius salute preces ad Deum facere obliti, illius sanctæ animæ, tanquam cœlesti iam beatitudine donatæ, de se preces offerrent. Sepultum est in ipso Societatis templo, in capella S. Iacobo dicata. Eius tumulus iuxta tumulum Gregorij Serrani, de quo sæpe facta mentio, situs est; & in hoc quoque altera Iosephi prædictio vera declarata est. Huic Serrano aliquot annis antè mandarat Iosephus, cū adhuc prouinciam administraret; vt è Bahyensi ad Sebastianensem Collegiū se transferret. Obiecit illi Serranus: ergone me Pater eiicis à te: istud verò, inquit Iosephus, nullo modo; quin etiā verba S. Basilisci ad S. Chrysostomū Latinè subiecit. Vade frater, non longa enim dies nos loco coniun-

iunget. Iuit S. Sebastianum Serranus, indè que postea ad Spiritum sanctum missus, ibi diem suum nò multo antè obierat, & cum eius tumulo Iosephi tumulus coniunctus est.

HACTENVS existimo, quibus, quantisque laudibus excelluerit; quantoque diuinæ gratiæ gradu communem hominum mensuram hic admirandus vir excesserit, ex iis, quæ narrata sunt, satis esse explicatū. Sed illud maiore admiratione, imitationeque dignum, quòd tam excellentes virtutes arte admiranda humilitatis velo ita obtegebat, vt ipsam etiam virtutem humilitatem deprimeret: non enim ille sua facta eleuando humilitatem præferebat, sed splendorem, qui ex ipsis erumpebat, ne emanaret, per multam dissimulationē obscurabat. Quiricius Caxa Societatis Sacerdos, multæ doctrinæ vir, cùm post eius mortem in Bahyēsī Collegio in communi Sociorum conuentu de Iosephi virtutibus quæreretur, hoc illi testimonium dedit: nihil se in Iosepho tam admirari, atque suspicere, neque vilius rei magis exēplo cōmoueri, quàm quanta efficacitate dona, quibus, & à natura, & à Deo ad omnia summa esset instructus, obtereret, ac pro nihilo duceret. Qua ex re factum est, vt, quamuis omnibus, quandiu vixit, esset admirandus, multo tamē post mortem illius magis aucta sit existimatio: multi enim illo vita functo, ita de eo, dè que eius virtutibus loquebantur; vt non modò eius per-

tra

tractandis laudibus satiari non possent, sed etiam à colloquiis eo ardore animi discederent; vt, nouis conceptis votis, maiore festudio excitari sentirēt ad virtutem. Quod de se ipse quoque Petrus Roterigius, qui Prouincialis Præses in Brasilia quatuor de rebus eius quasi testis oculatus scripsit libros, testatur: id tamen, quandiu vixit, non ita passim fiebat: quin etiam quæ admirationi essent, silentio potius obtegebantur, nec mirum: Deus enim illo ex oculis sublato, hominum mentibus velamen amouerat, quod viuentis humilitas obducebat. Sed non postremum obtinet locum in eius laudibus ingens ardor animi in opera præstanda indigentibus: quamuis enim aduersante valetudine, languorēque corpus retardante, nunquam tamen sibi parsit, aut labori se subduxit, quæcunque res difficilis, aut ardua se offerret, quin, quod de sanctis Gregorio, Hieronymo, aliisque scriptum legimus, contra vim dolorum, morborūque contenderet; magnōque animo ad id, quod se offerret, quasi sua incommoda non sentiens aggrederetur, omnique cura, contentioneque perficeret.

NE QVÆ est in minimis ponenda ea laus, index animi de se humillimè sentientis, sanctamque religionem adprimè venerātis; nam, cū more, institutōque Societatis singuli iubeantur quotānis sæpius postulare à Præsīde,

vt pœna aliqua sibi irrogerur , ob ea, quæ in- Cùm pœna ob quotidiana-  
nos lapsus  
exposceret ad  
Præsidis pe-  
des genua po-  
nebat.  
terdum, vt sunt humani lapsus , aut à Sociē-  
tatis legibus , aut à recto religiosi studij tra-  
mite exerrarunt; id ille, positus humi genibus  
magna cum animi submissione supplicabun-  
dus exposceret. Quo fuerit ad humana om-  
nia ingenio, quātaque facultate ad amœniora  
studia præsertim excolenda, etsi id ille in mi-  
nimis habuit, & non nisi ad communem vti-  
litatem est vsus, non tamen est æquum nos si-  
lentio præterire. Nam , præter Quiricij Caxæ  
testimonium, potuimus ex iis, quæ suprâ nar-  
rauimus, leonem ex vngulis agnoscere. Mul-  
ta præterea Latino carmine, Lusitanico, Hi-  
spanico, Brasiliçoque conscripsit; quæ verus  
contemptor sui, vti suprâ docuimus, ita aliis  
distribuit, vt ne vnâ quidē literā sibi retinue-  
rit. Illa tamē vt multæ frugis, ad consequentiū  
temporū vsum Patres cōseruanda esse iudica-  
runt; Drama, quod ille nōdū Sacerdos S. Vin-  
centij dedit, poëma de B. Virginis vita versu  
Elegiaco; Brasiliçā Societatis historiā, & vitas  
clariorū Patrum, qui in Brasilia vixerunt. Sed  
primæ eius lucubrationes maximè frugifera  
fuerunt, ars Grammatica, aliæque ad linguæ  
Brasiliçæ vsum obseruationes: aditum enim  
aliis aperuit, & viam tum ad eam linguam fa-  
cili negotio percipiendā, tum ad varias eiusdem  
notandas dialectos expediuit. Ad hæc Cate-  
chismum, aliāsque institutiones, ad gentem  
Christia

Christianam religionem imbuendam, puerosque rudimentis variis exercendos, Brasílico idiomate conscripsit : cuius fructus operæ quantus sit, Brasílica natio & iam inde ad hanc usque diem sentit, & sensura videtur in annos consequentes. Clarum item præstantis illius virtutis testimonium citari potest opinio, quæ de illius passim habebatur sanctimonia. Multi frustra ex illius veste adhuc viventis resecta, loco sacrarum reliquiarum sibi adoptarunt; eaque in morbis, doloribusque capitis præsertim certo cum salutis fructu adhibuerunt; eiusque rei multi testes sunt, & qui rei miraculum in aliis præsentibus perspexerunt, & qui ipsi de se testati sunt. Graui lateris doloreangebatur quidam : inuisit Iosephus ægotantem, petit æger ut sibi liceat manicam ex eius veste dependentem dolori admove- re; eaque admota, omni prorsus morbo leuatus est.

Tota denique illius vita magna fuit apud omnes veneratione; ut non modò eius consilia, sed dicta etiam plurimi fierent. Nam, ut omittam Ignatium Azebedium, Emmanuelemque Nóbregam solitos ipsum, vel eo ipso tempore, antequam Sacerdos factus est, magnis in rebus & consiliarium, & socium, ac quasi collegam adhibere, viri primarij multi ita illum suspiciebant, ut non auderent in rebus præsertim magnis illius dicto aduersari.

Hiero



Hieronymus Leitanus, qui Vincentianā Præfecturā annos circiter viginti rexit, magna sæper in æstimatione illius in rebus omnib. habuit sententiam. Petrum Leitanum primum Brasiliæ Episcopum dicere solitum suprà retulimus; se vni huic Canarino plus, quàm reliquis omnibus tribuere, eum magnum Dei famulum vt in minimis nominabat: magnum esse dicebat Societatis luminare. Societatem in Brasilia aureum esse annulum, eius gemmam esse Iosephum Anchiétam. Proximè etiā dictum est ab Administratore Ecclesiastico in funebri, quem de eius laudibus habuit, sermone, Brasiliæ Apostolū fuisse nominatū. Mitto hoc loco Didaci Floresij Regiæ classis Præfecti, aliorūque, quos antè commemorauimus, de ipso iudicium. Ab eadem, qua fuit apud omnes auctoritate multis in eorum periculis saluti fuit. Certi cuiusdam oppidi colonus grauitè aduersùs coloniæ Præfectū deliquerat, eratque crimen capitale: statuerat Præfectus, in eoque magna iracundia animū seuerè obfirmarat, reum extremo supplicio afficere: Iosephi tamen victus precibus iniuriam delinquenti condonauit, eūque in pristinam gratiam recepit, cū alioquī negotium insuperabile videretur. Pari acerbitate animi regij cuiusdam præsidij Præfectus irritatus præsidarios duos ob ipsorum commerita capitali sententia punire con-

stituerat: cūque multorum preces de miserrorum salute repudiasset, accedente ad illorum causam Iosepho, tantus Præfectum pa-  
uor, vt ipse postea fassus est, occupauit, vt ei liberum permiserit, quidquid vellet de vinc-tis constituere. Ioannes Fernandius Brunus, vir honoratus, & locuples, Lusitanos duos sibi in-festos grauium iniuriarum reos fecerat; eratq;  
illorum caput in discrimine. Ad hominis pla-candum animum, veniāque iniuriis impe-trandam, multi honesti viri, in iisq; etiā Pa-tres aliqui de Societate accedentes nihil pro-fecerunt: adit hominem ægrotantē multa prece, & fiducia in Deum confirmatus Iose-phus; eiūsq; aduentu egroto diuinitus mens iniicitur, Iosepho concedendum quidquid peteret. Ita nullo negotio duorum calamito-  
rum aduersus immobilem animi duritiam diuina ope salus impetrata.

Hæc de viro omnium iudicio virtutis ad-mirandæ habui dicere; digno illo quidem me-liore præconio: sed clara celebri fama virtus non tam scriptorum lumen desiderat, quā ipsius splendore scripta ipsa illustratur. Meum certē consilium in hac qualicunque scriptio-ne non fuit lucem, aut fumum dare; neq; vi-rum summis dignum laudibus exornare, sed eorum imperio parere, qui pro suo iure mihi id oneris imposuerunt; &, quantum pro mea tenuitate possem, effigiem perfectæ virtutis,



& excellens religiosæ vitæ exemplum in eo viro proponere, qui hæc in se, suâque vita tam ad viuum expressit. In quo cùm admiratione, tum in primis imitatione digna multa perspexerimus, torporem nostrum ad perfectam religionis mensuram possemus, qui in hoc studio languemus, excitare: quod si assequutus sum, est quod diuinæ Bonitati gratias agam: sin minùs, in sanctis hisce cogitationibus curas meas occupasse non me pœnitebit.

*Laus Deo, Beataque Virgini Matri,  
& Sanctis eius.*

BIBLIOTECARIO  
**RICARDO PALMA.**

